

豫略

軍

紀

光緒丁丑仲冬

司康題



申報館仿
聚珍板印

豫軍紀略序

盜賊之患歷代恒有其萌芽也至微而其爲禍也最酷國家全盛之時師武臣力廟堂之上有確然不拔之計主持於拾遺攘之間疆吏一心權不中制猶必經久而其亂始定勢使然也咸豐初元粵寇倡亂江介騷然曾未踰歲長驅中原北犯畿輔皖豫亂民乘間蠡起中州當七省之衝無日不戰靡役不從自始亂至戡定首尾十餘年

宵旰憂勤將吏勞苦賊勢之出入去來盛衰分合諸臣辦賊之成敗得失載於章奏文檄牘如山積致亂之易如彼戡亂之難如此鶴年幸得假手以告成功深懼日久事忘傳聞失實匪惟豫軍之勞不著而

廟謨堅確保大定功之烈亦不可無以昭示來茲爰屬尹杏農觀察排北歲月輯成一書佐以康麥生方宗屏吳子珊三大令釐爲四目曰粵匪曰皖匪曰土匪曰會匪題曰豫軍紀略亂不始豫功不專豫曰豫軍者書成於豫紀豫軍之勞也旣艸創復晚李子衡觀察參訂付梓余究

觀終始而喟然曰嗚乎理大物博蘖芽始伏禍亂之興殆非朝夕使然而撥亂反正雖曰天運豈不以人謀哉自來平寇之策無過勦撫兩端我

朝鑒賊反覆不輕議撫天戈所指元惡巨憝罔弗授首乃皖粵餘孽竟成流寇浸不可制迨合圍之策立恢天綱頓地紘箕張翼舒蹙之海隅一鼓遂滅論者謂巨寇之平由統帥好謀不輕戰以徼利疆臣并力無畫畛以禍鄰然當飛走道窮鹿駭豕突任兵事者幾無以自堅非

聖明主持樞輔翊贊不撓浮議不責近功其收效必不能如是之速此則計成功立有事諸臣所惕然思懼者矣刊成因揭其大要於簡端扶危定傾恃有成算建威銷萌貴審未然閱是編者其念之哉

同治十有一年春季春中澣三韓李鶴年序

總纂

布政使銜河南記名簡用道尹耕雲


河南候補道李汝鈞

分纂

運同銜直隸州河南候補知縣康曾定

同知銜河南候補知縣方昌翰

運同銜河南候補知縣吳保清



豫軍紀略目錄

卷一

粵匪一

粵匪二

粵匪三

卷二

會匪一

會匪二

會匪三

會匪四

卷三

土匪一

土匪二

豫軍紀略

目錄

土匪三

土匪四

土匪五

卷四

土匪六

土匪七

土匪八

土匪九

卷五

土匪十

土匪十一

土匪十二

土匪十三

土匪十四

土匪十五

卷六

院匪一

院匪二

院匪三

卷七

院匪四

院匪五

院匪六

卷八

院匪七

院匪八

卷九

皖匪九

皖匪十

皖匪十一

皖匪十二

皖匪十三

卷十

皖匪十四

皖匪十五

皖匪十六

卷十一

皖匪十七

皖匪十八


皖匪十九

皖匪二十

皖匪二十一

皖匪二十二

皖匪二十三



豫軍紀畧卷一

粵匪一

道光三十年六月廣西逆民洪秀全倡亂於桂平縣之金田村挾左道造偽書誑稱天父天兄蓄髮山箐間分途誘脅附從日多歛資財謀不軌以咸豐元年正月僭偽號於大黃江稱天王擾桂平武定等縣入象州境閏八月陷永安州建偽國號爲太平天國封其黨楊秀清爲東王蕭朝貴爲西王韋昌輝爲北王石達開爲翼王洪大全爲天德王秦日綱羅亞旺范連德胡以晄等各授丞相軍師諸偽職十一月大學士賽尙阿以欽差大臣督師合攻永安州戰屢捷城僞得會叅將李廷楷等陣亡諸將少卻賊復熾二年二月潰圍東竄官兵復永安擒僞天德王洪大全檻送京師磔於市賊遂以三月犯廣西省城四月陷全州五月陷湖南道州七月陷郴州八月犯長沙十月陷岳州十一月下竄湖北陷漢陽府十二月陷武昌全楚大震三年正月陷九江安慶二月

陷金陵據之使僞丞相林鳳祥羅大剛李開芳曾立昌等率賊東下二

十一日陷鎮江府二十三日陷揚州府時廣西提督向榮爲

大臣率師追賊至金陵戰獨力

上命前大學士琦善爲

欽差

大臣由河南信陽州偵賊進剿直隸提督陳金綬內閣學士勝保先之

以三月二十二日與賊戰於揚州廿四橋法海寺破其土壘四月林鳳

祥等留僞指揮曾立昌踞揚州率二十一軍北竄軍數千人擾滁州踞

臨淮關旋陷鳳陽府勝保自揚州分兵躡剿是時江南北大兵雲集湖

南在籍禮部侍郎曾國藩倡練鄉兵起湘潭楊秀清使劇賊僞丞相吉

文元等由浦口擾亳州與林鳳祥合股是月乘間入河南境陷永城河

南兵事於是始時陸應穀巡撫河南親督師禦賊失利整軍淮甯賊遂

犯歸德府知府陳介眉率兵勇出援永城商邱縣知縣宋錫慶與在籍

御史陳壇爲城守計時承平久兵民聞賊至皆股慄宋錫慶等出請救

五月初七日賊闌入府城官紳士庶格鬪罵賊不屈死者甚衆事聞

五月

上震怒褫宋錫慶陳壇職命所在執獲就地正法陳介眉以先出禡
職查問宋錫慶畏罪逸或言死亂軍中陳壇以紳士無守土責後得論
減死陸應穀自淮甯親督各將弁分道截剿賊已由睢州直竄開封藩
司沈兆澐臬司林揚祖署開歸陳許道張昀等督率在城文武紳民分
壕守禦十二日賊至城下數來攻城上槍礮轟擊不得近賊攻城長枝
特地雷自牟工祥工黃水兩溢汴城外浮沙丈餘近郊無大村落不能
成隧道賊大隊踞朱仙鎮距城四十里十三日攻城會大雨雷電交作
野曠無蔽賊藥火不能然城上礮發斃賊甚多開封府知府賈臻祥符
縣知縣何懷珍復募回勇壯丁縋城下殺賊梟其悍目數人會將軍托
明阿提督善祿都統西凌阿督三鎮兵由睢州偕道進以十八日抵汴
賊知不可逞乃由朱仙鎮竄中牟鄭州汜水沿河而西先是 廷議
河防緊要命詹事府少詹事王履謙赴汴巡察河岸禁商民懣遷船隻
罷私渡查官渡河道總督長臻復率師駐廟工以故賊不能渡遂由汜

水竄登縣東十餘里爲河洛交滙洛河舊有民舟運煤糧上下賊掠以渡至中流水暴長舟覆溺死無算其先渡者屯溫縣之柳林灘稍稍掠近村陳家溝民陳仲生有拳勇率村農數十與賊鬥於溫縣城西斃賊目大頭楊河內縣在籍侍讀學士李棠階方講學河朔書院聞寇至率生徒號召鄉里得精壯數千前禦賊戰始勝鄉兵非夙練無紀律賊出精銳以火器突陣多潰散諸生有死者鎮標游擊穆奇賢兵單不能禦賊乃徑逼府城焚四關時六月初二日也懷慶知府余炳燾河南知縣裘寶鏞督文武紳民登陴禦守賊恃衆驟攻輒敗退翌日復攻又擊郤之賊因分掠四郊踞村舍於沁河北岸築木壘爲久困計日數攻復累木石爲臺高與城埒守兵伺其將成以巨礮擊壞之賊銳始減明日復來攻昇雲梯數百具騎者游弋時隱禾黍間守兵誘之僞爲下城食賊揮衆突進城上炮火遽發賊不及避死者枕藉因駭退越數日勝保軍至壁城南而托明阿善祿西明阿軍亦至捕殺坐龍錦褥服黃袍賊目

二 欽差大臣直隸總督訥爾經額理藩院尙書恩華率蒙古盟長
察哈爾勁旅由東北路進屯清化鎮山東巡撫李德越境剿賊以所部
與賊角偪賊而壘城內人心益固惟以阻木壘糧不得通賊持之愈急
穴地十餘所余炳燾奏寶鏞用獄囚業煤者言覘賊其處以計穿破之
最後一隧未穿藥發裂西南城牆十數丈掀寶鏞墮下面體皆傷兵役
掖之起賊方銳進寶鏞挺身堵缺口守者競從之口立塞牆上槍炮旁
擊或傾藥簍就燬之煙焰漲天賊不得上兵民至益衆取檣寶磚土夾
門扇案几縱橫填積城以復完賊死甚多守兵無傷者賊由是氣奪不
敢復攻城李德以東省有警引師還勝保等軍轉攻賊壘先後血戰十
餘復縱間離其黨拔身投誠者數百人七月二十八日訥爾經額親督
諸將會城下分五路並進燬其木柵賊棄壘我兵追斬三千餘級餘衆
竄山西懷慶圍解時東北正南皆我軍壁壘北阻太行西濱大河惟西
北一徑達濟源界連山西陽城垣曲其地有封陵口邵原關諸隘重山

杏嶺馬不連騎步不駢踵山西巡撫哈芬奉

旨嚴兵嚴備而賊竟

由此遁矣賊既竄垣曲遂擾曲沃陷平陽河東道張錫蕃知縣晏宗望
戰歿勝保率軍追賊先諸軍至收平陽訥爾經額旋師正定與哈芬均
逮問授勝保爲

欽差大臣

賜神雀刀八月賊由洪洞屯留潞

城黎城復闌入豫境陷涉縣知縣李毓珍死之尋復竄直隸踞臨洺關
擾深州河南巡撫陸應穀由汝甯移營彰德爲畿輔聲援

上命惠

親王爲奉命大將軍科爾沁郡王僧格林沁爲參贊大臣總統四將軍
督旗營察哈爾精兵會勝保所部進剿賊之入山西也衆二萬餘楊秀
清由金陵復使僞官朱錫琨許宗揚率衆應援並所裹脅不下二萬至
直隸與林鳳祥等合勢益張其後由深州連陷直隸山東諸州縣僧格
林沁勝保分路追剿所至皆捷賊得城不能守斃僞丞相曾立昌許宗
揚於曹縣僞副丞相陳世保於冠縣五年正月大股麇聚連鎮僧格林
沁肅殲之生擒逆首林鳳祥四月分股由高唐竄馮官屯僧格林沁引

河水困之破其壘生擒逆首李開芳及僞職黃懿瑞謝金生等檻送京師凌遲處死髮逆無一得免者北軍凱撤旋京師渡河之粵逆至是全滅其未渡河之賊回旋鞏汜間周以三年六月初五日竄擾新鄭長葛至許州陸應穀簡駐省河北鎮標兵以懷慶左右兩營馬步二百五十名配善祿率之渡河援懷慶以七百五十名及寧夏馬步五百名收集陝甘潰兵五百名配河北鎮總兵王家琳爲前隊游擊瑚圖凌額帶陝甘兵五百爲中隊自督練勇四百爲後隊策應援許州令巴里坤總兵經文岱以所部由黑石關進勦鞏汜餘匪飭南陽鎮總兵柏山由汝州赴許會合初六日賊攻州城知州金梁禦之初七日柏山敗之於八里橋賊由臨潁南竄初九日夜又及之王店斃黃巾賊目二紅衣賊三童賊髮辮紅緯者三游擊伊里綳阿繞擊賊後又殺長髮賊百餘短髮賊二百餘辮紅緯童賊十餘燒死者不可勝計奪獲槍械牲畜無算時經文岱亦由鞏縣追剿殘賊至密縣陸應穀因令柏山會合王家琳等由

西平一路進初十日柏山及賊於西平之小龍橋復戰生擒長髮二十
五殺斃三百餘都司百順分隊鈔擊復斃賊數十生擒三十餘賊乃入
遂平境時陸應穀移營赴汝寧兼辦南路土匪賊驟至遂平知縣劉鴻
勳城守汎蔣鳳岐會汝寧帶勇委員前南召縣知縣趙曉擊賊於張堂
頗有斬獲賊乘間闌入縣城爲負隅計會柏山追至城南五里大雨如
注因止不前派兵由西北繞城南八里橋沙河以北左右伏大隊夜馳
繞城北爲疑兵以驚之賊聞礮委城南走至沙河北岸水暴漲不得過
我兵伏起呼譟震地柏山大隊繼進賊前阻水殊死鬪我兵奮力合擊
斃長髮賊二百餘短髮賊三百餘投水溺死者無數奪其大黃旗金帽
生執僞丞相李姓斬之餘衆竄匿亦有從上流淺灘鳧涉者游擊全善
都司蘇林邀之先後獲斬二十餘級賊勢乃蹙王家琳隊至西平淤泥
河梁黍中突出數十賊矛傷家琳左髀千總魁齡外委陳衛林奮身格
鬪殲焉十二日柏山由西路田渡口乘船渡河令游擊伊里綳阿由東

踏張堂東筏渡沿途斬首百餘級十三日經文岱馬隊由密縣追賊至會合進剿於確山縣之南京店鏖悍賊數十餘衆潰遁十四日黎明追及於五戰河北岸賊方半濟我軍薄之賊鳧水渡溺死甚衆殺斃百餘是日全喜蘇林於三官廟遇賊斬首二十餘級十五日賊竄明港驛欲東南遁爲淮河所阻我兵追及斬首三十餘級乃循河奔逸十六日戰於省店復斬數十級賊遂竄羅山正陽間殘敗晷盡矣有竄回煙樓者爲遂平縣知縣劉鴻勳捕獲二十二日竄宣化鎮羅山縣知縣雷元昭伺使截殺賊乃由大勝關南遁入楚時豫省南汝歸陳土匪蠭起陸應穀別檄經文岱柏山他勦而令王家琳追粵賊入楚七月初二日王家琳追賊至宋埠獲賊諜訊稱楚帥阻截欲回光山周家口南竄家琳伏兵山溝驅鄉勇前誘之伏兵踰溝鈔擊復鏖長短髮賊百餘生擒者三奪僞將軍僞先鋒大黃旗二餘賊復竄楚爲楚省帶兵布政使唐樹義兵勇邀殺無遺明日家琳至界上樹義以書來止之且告捷此股粵匪

亦滅而各路土匪因緣竊發遂致大煩兵力矣其後四年二月粵逆爲土匪勾結一竄永城夏邑旋遁去而犯鄂犯皖犯豫章中州所在設防三關之戍亦頻年不解云八年正月與皖捻合圍固始擾商城皆爲官軍擊退事在皖匪部茲不具載

同治元年官軍困賊於廬州偽英王陳玉成廣西人眼有黑痣二號四眼狗凶桀嗜殺魁諸賊洪逆倚之蹂躪數省至是爲楚師所蹙僞扶王陳得才隸玉成股中亦凶狡玉成使陳得才僞端王藍成春僞遵王賴汝沆僞啓王梁成富僞大將馬融和等率黨三萬餘人勾結皖豫諸捻竄河南擾南陽邊界分楚師兵力正月豫省土捻楊方衡袁安愚等煽合圍攻新蔡縣城時豫軍勦汝捻正亟帶兵藩司張曜輕騎至項城賊阻不得過復還汝甯巡撫鄭元善檄副將楊飛熊率所部往援適穗子鋪官軍失利欽差大臣勝保羽檄調飛熊去新蔡圍愈急知縣韓承宣素得民因激勵紳庶督率文武登陴固守賊始至晝夜攻皆擊退乃穴地道十五日寅刻北面地雷轟發裂城垣十餘丈逆衆萬餘冒火競登韓承宣督城守營外委陳繼先等挺身堵禦兵勇繼之拋擲火罐火彈槍礮矢石如雨賊相顧駭愕民夫乘勢搶護缺口歷四時之久斃

賊四百餘賊始敗退有先引去者二月初二日至濠頭爲張曜擊敗西竄至乾莊縱橫數十里初四日至確山初五日擾及泌陽之沙河店知縣溫逢春集團禦之初六日分兩股攻泌陽東西兩門爲溫逢春擊退西北竄唐縣澗嶺店青苔等鎮初十日犯南陽府城知府金梁護南陽鎮總兵游擊徐榮柱督兵勇抵禦十一日賊繞城圍攻復擊卻之派隊追擊斃賊百餘賊遂敗竄鎮平有駛及唐鄧者其留攻新蔡之賊復穴隧施地雷二十六日寅刻藥發塌城八九丈承宣等禦之如初倅憊間北面地雷復發復堵禦之先後四十餘日守益不懈賊知不可爲乃皆遁去奏入

上嘉之賞承宣佐勇巴圖魯陳繼先千總用馬正心守備用馬河龍把總用承宣由是心力交瘁未幾病歿照例議卹蔭其子入官先後西竄之賊並聚於南陽冒充官兵卷旗疾趨至鎮平內鄉入西峽口始縱殺擄折由西坪襲富水關入陝由商雒進擾尹家衛四月將軍多隆阿與皖軍總兵張得勝克廬州陳玉成遁壽州乞援於苗練

勝傷密飭川北道苗沛霖誘執之昇官軍檻送京師奉

旨卽所在

正法抵延津磔於市陳得才等聞急將赴援先分股由商雒取道盧氏
出宜陽東向赴皖旋折回擾確山遂平往來游弋五月復分股竄鄭西
陳得才自率全股由華陰越潼關突豫境初四日陷閿鄉閿鄉城久傾
圯不可守知縣王其昌巷戰死之賊遂進圍靈寶會陝西駐防委營總
圖克唐阿率馬隊二百抵境知縣杜頌納之與爲城守賊攻三晝夜皆
擊卻昇雲梯數十至先是修城掘地得明季舊礮一尊置城上守兵
發之適斃賊目乃駭紛退初九日圍陝州河陝汝道廣隆率知州王詒
固守礮變攻城賊三百餘賊將由城北緣道蟻附爲山西平陸守兵槍
礮轟擊不得上都司王永旺乘勝擊賊生擒僞豐天安李萬受僞檢典
劉洪登夥逆宦明性等皆斬之城圍遂解十一日賊由硤石驛觀音堂
竄澠池之英濠鎮澠池縣知縣張應煒率勇禦之十二三日新安宜陽
永寧境皆有賊十四日副將楊飛熊自洛陽拔隊進駐新安城東鐵塔

山獲賊諜訊稱西來大股皆四川江南湖北老賊志在踞城爲負隅計云十七日楊飛熊進軍鐵門十八日與賊接戰賊先踞高坡我軍戰失利飛熊躍馬挺矛陷陣賊圍之數重臂輟皆傷戰益厲乘騎中礮蹶飛熊幾折踝守備趙鴻舉掖之起易馬突圍出退營鐵塔賊衆迫壓數四趙鴻舉盧得勝堅壁拒之賊乃自浣池折竄宜陽我軍退保洛陽且扼其東竄汴梁路也六月賊由宜陽紛擾嵩縣寶豐南召葉裕桐泌諸境盤踞舊縣獨樹吳城等鎮前陷鄆西之賊亦擾及浙川之戴家河距荆子關數十里三路環逼南陽府城戒嚴鄭元善策以駐洛之師歸叅將盧得勝暫統由汝郊兼程進勦並令前派援洛之剛銳三營改道襄葉探蹤勦擊勝保復派副將王佐臣馬隊千名由商水西平鄆城會知縣王珠煒所部勇隊取道舞陽與盧得勝各軍聯絡聲勢團練大臣毛昶熙派米營馬步千餘亦由省馳赴裕州一路以厚兵力均歸南陽鎮總兵圖塔納統轄

上以宛事方亟命助勦信陽之楚師移勦宛南復

食海廣總督官文湖北巡撫嚴樹森增兵協助員西賊犯唐縣爲知縣
高天寵截擊奔竄井樓安篷十八日游擊徐榮柱統標兵與副將尹里
綑阿會合擊賊後隊於白林莊斃賊五百餘十九日午刻馳抵井樓我
軍直前鈔擊賊竄向畢店追殺十餘里適高天寵率團至合力扼擊斃
賊三百餘生擒髮逆齊有英等斬之餘竄桐柏之平氏鎮其舊縣吳城
踞賊亦合股於平氏往來唐泌奔突靡定徐榮柱率兵急追七月初一
日賊直趨南陽郡城徐榮柱間道出賊前會民團截勦礮斃馬賊數十
圖塔納親督兵勇策應賊勢稍卻退竄雙橋鋪栗河店時援兵未至賊
三股合併衆約十萬初四日乘夜梟渡白河圍攻府城並分擾近縣南
陽文報不通近城十里賊壘周布築礮臺洩濠水掘地道運柴草糧食
牛馬確磨屯集四關援師不能進會楚師襄陽道金國琛候補道梁作
楫率馬步十餘營越境剿援與圖塔納約內外夾擊鏖戰數日殺賊二
千有奇生擒正法者千餘賊勢不支分兩股一竄鎮平一竄距城五十

里之安臬十六日圍乃解其至鎮平者攻城極悍知縣李樹楨竭力守禦十七日夜乘賊不備選精壯絕城薄賊壘縱火伏兵繼之斃長髮百餘獲僞丞相僞檢點及執照木戳官冊賊竄西北叅將盧得勝軍抵縣人心稍定楚師以邊圉當要衝將引歸鄭元善乃令署臬司洪貞謙率師赴宛自率師赴洛陽援澠陝八月十六日洪貞謙抵葉縣適有張鳳林夥匪二千餘竄縣境瓦岡店焚掠因督知縣張延齡叅將盧得勝殺賊百餘生擒丁更等斬之粵逆時攻浙川廳署同知馬筮乾力守九日擊退之餘衆由李官橋沿河遁入楚荆子關間無城僅署副將德培領弁兵五十駐守賊圍浙川分股由馬蹬攻陷之二十二日多隆阿派隊至賊悉走商雜爲多隆阿所敗折由浙川馬蹬竄入鄧州之厚坡圍鄧州新野縣城侵唐縣臬司洪貞謙先飭游擊任治國馬天祥都司劉鴻增張興邦秦安慶等督兵勇探蹤進閩八月初六日馳抵新野迤北之趙莊遇賊斬殺甚多初九日追至郭灘迤南三十里唐河北岸賊正槍

渡猝遇我軍殊死鬥我軍奮力合擊附近鄉團協助賊且戰且渡俘馘二千有餘溺死者亦千計賊向楚北棗陽隨州紛竄金國琛軍至棗陽賊已過應州洪貞謙因撤還內鄉剿擒方賊之入楚也豫擒陳大喜竄西平確山官軍邀之復東竄其夥股由桐柏之平氏鎮入粵匪夥竄棗隨或言中有王廷幹股廷幹時投誠隨官軍破汝光逆寨實不從粵逆三年巡撫張之萬疏雪其事賊由是紛擾楚境至二年二月復入陝陷漢中城固等府縣與川逆藍大順藍二順相犄角亦屢爲官軍所敗



同治三年正月陳德才欲救金陵竄河南糾合皖豫各捻分股一由石泉漢陰出興安而竄鄖陽一由西鄉出紫陽磚坪平利而至竹山一由寧陝出鎮安而趨商州統於河南之南陽湖北之襄陽會齊東下時張總愚陳大喜俱會於宛南總愚竄盧氏因喉賊入豫巡撫張之萬檄總兵張曜宋慶副都統善慶色爾固善道員葛承霖等軍西剿捻以扼粵賊二月二十一日張曜追捻至黑峪留副將保英李世玉軍防回竄而自率張士元尹嘉賓步隊合宋慶軍馳繞盧氏斷捻粵句合之路簡選精壯分布要隘知縣單體晉領豫勝親兵會靖淮輔衛兩營壁南召縣境之鍾店分雷才貴所部屯黃墟堽爲疑兵二十六日賊大股麕聚鎮平縣境之馬山口七里坪豹子灘單體晉等率長槍馬步勁勇突至陣斬紅巾馬賊多名賊遂西南竄二十八九日至內鄉攻縣城知縣朱錕禦之三月初一日復分南北兩股攻內鄉叅將周兆常軍至與朱錕合

守城上開大礮擊殺賊數十雨雪忽作賊夜避山凹擁火燎濕周兆常率兵勇潛縋城以噴筒火箭燒賊死無算賊駭盡棄所掠西南竄由下瓦亭入陝西商南境之龍駒寨竹林關穆家垭龍駒寨距盧氏境之朱陽關僅百里張之萬預派守備賈文田勇隊扼守復檄保英率王成豫勝等營往助保英未及至賊闌入關賈文田以勇丁五百當賊數萬殺其先鋒悍賊數十卒以衆寡不敵退屯湯河賊亦旋退其時賊分數股蔓延山谷往來倏忽官兵隨所在擊之於是西平一股僞端王統之犯內鄉城上兵勇擊退之竄鄧州境之厚坡張十一林邊馬擾及鎮內又有鍾得勝終股犯荆子關爲總兵李殿元叅將裴政黃貴誠等設伏擊敗由屈元岡至內鄉旋復有分股由淇河莊猴兒山突入荆子關縣丞張鴻緒率勇抵禦李殿元裴政回兵擊之賊乃遁三月二十三日張曜善慶色爾固善等軍由馬山口追張總愚猝與粵逆遇粵賊大股由內鄉之西坪峽口赤眉城南駛布滿山野衆且悍二十四日我軍游擊蔣希

夷首陷陣斫殺悍賊十數副將尹嘉賓知縣單體晉從山下抄賊後破賊壘二叅將程之偉奮勇直入賊殊死鬥善慶色爾固善馬隊分兩翼包進鏖戰四時斷賊爲二賊不能支狂奔四散援賊翻山西南竄我兵追殺二十餘里是役也斃悍賊七八百生擒二百餘陣斬僞將軍唐姓僞指揮劉得保僞檢點何子整等二十五日科爾沁親王僧格林沁由嵩縣伊陽魯山南召追賊亦至軍威益振先是僧營統帶蘇克金派營總春壽等帶隊赴鄧州時三月十五日也與賊遇於城東北之茶庵斃賊百餘十六日戰於雙橋里勝之越日賊拔營走復追殺三十餘賊十八日另股擾鄧北亦爲春壽擊敗二十日復擊殺數十奪旗械無數蘇克金自率馬隊援新野偵知粵逆全股會陳大喜股由新野東竄楚界後股尙在鄧州桑莊腰店因扼白河潛伏以待二十一日賊分四路乘夜渡河我軍突起擊斃賊五六百追殺十餘里適新野縣知縣方承宣率勇接應賊馬步橫亘十餘里折回抗拒我軍奮勇合擊衝賊數處又

斃賊六七百陣斬身衣團龍黃褂賊目四二十三日黎明賊分三股渡河蘇克金及營總烏爾圖那遜復擊斃數十而大股已由新野南新店鋪合總愚大喜諸股梟渡東奔棗陽矣僧格林沁親督馬步截殺於夾道溝大勝之遂追入楚其留豫境者爲偽啓王梁成富由鄧州元店南竄二十四日春壽擊之於軒西里殺賊百餘二十七日張曜色爾固善等追及於浙川泉山斬悍賊二百餘擒偽朝將林喜桂偽澍天安徐隆明梁正坤等并長髮百餘奔北山者一股我軍追戮悉盡越日五鼓梁成富自率醜類沿山衝突我軍分勦逾一時善慶蔣希夷率衆奮擊賊始由板橋南蠻子營翻山遁我軍逐北間偵知偽朝將邱陳李三賊糾領馬步七八千由西北至張曜會同色爾固善善慶等部勒各隊於板橋川老鸛河東岸狙伏伺之賊至我軍突起騎兵鈔擊斃賊無算生擒邱陳二賊目二十九日追及浙州境之娘娘洞我軍乘夜渡河與宋慶軍合復鏖戰賊中槍及溺水死者甚衆四月初一日張曜等浮渡丹江

由淮河直起楚境，及賊於陽鳳之羊皮灘賊衆四拒伏兩山以誘我宋慶突進先敗其伏豫勝親兵繼之賊狂奔陣斃悍黨二百餘生擒長髮老賊五十餘僞朝將一會大雨山水驟發河流暴漲賊搶渡渚斃尤多張曜飭玉成豫勝等營先期冒雨渡河因截之於南化集斬馘益衆賊西越大山直竄趙家川張曜等追過鄖西百四十里會楚陝兵至乃引師還時僧格林沁追賊入楚賊方圍隨州楚軍血戰四時解其圍賊始東敗遁殺二十餘里馘賊千餘賊乃竄入河南信陽州張之萬時在南陽急檄都司連美守備賈文田馮聖傳李承先道員葛承霖等軍扼三關未及至賊前股已闌入平靖黃土關窺伺州城馮聖傳連美賈文田李承先等軍先後至聖傳壁西關營甫立三里店賊大至勢將渡河急出隊邀擊賊乃回遁諜言賊將以十八九兩日攻州城連美馮聖傳各率隊覘賊行二十餘里有馬步賊千餘往來游掠見我兵至不戰遽走我兵追殺十餘里所過要隘賊多柴道列鎗礮我軍未敢深入

翌日葛承霖軍亦馳至譙隨州大股爲僧格林沁擊敗由吳家大店竄信陽卽堅築壁壘自率七成隊往覘賊十七日至馮家莊賊方渡河東岸列陣以待副將張養吾游擊白定燮首陷陣斃長髮老賊數十乘勝渡河追至夏家冲賊已由雙河店白雲寺合大股東竄僧格林沁軍至諸將稟節度十八日連夫擊賊於楊柳河斃賊五百餘賊由譚家河南向武勝關僧格林沁檄諸將從提督傅振邦追勦十九日敗賊於譚河二十日敗賊於東旺我軍營廣水驛賊由應山大新店雙橋鎮馳竄我軍追及擒斬賊數十奪獲僞印一二十一日馬賊馳至廣水驛前之長正河李承先迎擊退之又大股由大山口駛至五色旗幟空踴沓進連美賈文田帶隊突出張養吾鈔左白定燮鈔右李承先率騎兵襲賊後葛承霖自扼其前鋒賊不能敵四散潰敗我軍擒殺十五里至大山口突見黃巾賊首領千餘騎揮前敗賊回門白定燮引衆直前突之賊復譙潰越山遁我軍追至距廣水二十里之石塘復遇悍賊二千餘死拒

十數交鋒葛承霖揮隊兜擊賊始敗向小河司盤踞其各股併由大新店竄羅山之姚家畝宣化鎮及光州之白雀園先是張之萬派副將徐連陞駐防羅山復以叅將邵春仁李大成等繼之賊至宣化鎮踞大勝關卡窺羅山縣城薄生生寨徐連陞以生生寨地扼要因進屯周黨店會練總知縣趙祖蔭舉人丁振鐸文生樊紹心集團往援兵至永定店游擊徐光志都司巴振德守備周興國分三路進連陞自督馬隊策應賊瞭見我軍卽拔退我軍追至順河大勝關踞衆突出連陞揮隊奮擊戰數合賊始敗入關殊死拒徐光志選精壯三百越山繞關後縱火賊隊亂遂奪復關卡乘勝疾追擣宣化賊巢賊乃盡東南奔我軍追殺至清水塘墨斗關陣斃賊七百餘生擒之賊斬以徇其由墨斗關竄向家店何家畝新店者復爲光山縣知縣鄭家濂截殺退竄陡山河復竄踞光山新集擾潑陂河田家新凹西高廟環數十里焚掠裏脅破曾家寨及孟家寨邊馬四出張僞示勒索各寨財物復圍攻連康寨圖久踞

徐連陞既克宣化鎮留徐光志扼守自率李大成等隊往援陽山等寨
五月十五日連陞馳抵潑陂河與紅旂馬賊遇擊敗之追殺二十五里
至傳灣地方鄭店四面山賊踞各寨同時收復二十一二日張曜宋慶
色爾固善各軍馳至解連康寨圍進屯潑陂河與徐連陞隊合豫兵既
大集新集之賊聞風夜遁黃安與宣化敗賊合小河司踞賊亦竄紫檀
河柳子港新洲團風是時賊股紛紜散漫而指喉統聽四僞王僞啓王
梁成富爲張曜等擊敗遁入漫川關竄商州與另股蔡逆合擾山陽小
河口米糧川孝義廳旋入楚僞端王藍成春與陳大喜合竄黃州下巴
河僞遵王賴汶沆與張總愚合由黃陂亦竄黃川僞扶王陳德才與捻
匪張佃江合由安陸之旱市竄應山羅宗店於是諸逆先後並羣集於
楚六月大武告成協辦大學士節制四省軍務兩江總督曾國藩督水
陸諸軍克復金陵陳德才愈窮無所歸乃由新洲龍山竄麻城踞白果
僧格林沁親詣巴河與官文會議滅賊之策因合擊前後斃賊數千擒

首賊目死者甚多大股復竄皖境安徽巡撫喬松年臬司英翰率總兵郭寶昌張得勝何紹彩等初敗之於楊柳灣再敗之於上門河紅花界賊有竄商城黃蘗山者有由白杲竄豫境閩家河者均爲張曜蘇克金等擊退張之萬由南陽移營汝甯督防七月二十二三日各逆分竄或東或西楚之羅田黃安蘄州以及皖豫交界之羅山光山均有賊騎僧格林沁派成保色爾固善宋慶善慶巴揚阿楊長春等躡賊西馳令張曜徐連陞扼商城之長嶺關松子關二十六日徐連陞行過羅田猝遇賊於滕家鋪急整隊迎敵賊至益衆我軍力竭連陞身被十七創戰死哨官把總陳華元白雲青隊長賈萬林李東昇藍得勝同時戰歿是日張曜督隊至草子店進屯長嶺二十八日敗賊於班竹園殺賊百餘擒老逆徐會慶等成保等與賊遇於羅山之蘇家河陳家河戰小挫八月初二日藍逆併馬融和股將竄皖境張曜率營官羅輔臣郝永剛楊春祥等以四更襲踏賊營殺傷甚多得糧八十餘石初四日辰刻賊糾衆

回門有大黃旗書陳字知爲陳得才卽揮隊迎擊敗之追至東嶽廟賊
遂竄六安州之毛坪流瀑踵復至漫水河趨向無定初九日張曜復擊
之截殺另股幾盡賴汶洸及張總愚任柱牛老紅等股以初五日困羅
山之永安寨初七日竄潘新店豹子山入倒座灣盤踞初十日僧營提
督陳國瑞擊敗之走竹竿鋪十二日賊之前股又入光山之文殊寺十
九日至人和寨陳國瑞成保色爾固善朱慶巴楊阿楊長春等合兵追
之巴楊阿戰歿賊遂遁麻城之界嶺是時各路統兵大臣奉 上諭
以國家命將出師剪除凶逆原期與吾民共樂昇平其甘心從賊者固
爲法所難容然猶殲厥渠魁脅從罔治至於被賊逼陷悔罪自新者皆
在可矜可赦之列嗣後各路統兵大臣於收撫難民誠心歸順者勿論
從賊久暫准一律薙髮寬其既往咸與維新令下榜於通衢賊心益渙
散頭目汪世第張啓才李宏揚陳錦鳳等率衆二萬餘投張得勝何紹
彩軍乞撫安徽巡撫喬松年派總兵徐鵬馳往受降僞天將馬融和投

英彰郭寶昌軍僞端王藍成春夜僧營翼長成保軍僞朝將魏康福范
立川陳漢泰周天順等投道員蔣凝學軍皆以其衆先後不下十餘萬
人僞扶王陳得才仲藥死蔣凝學因僞將高啓成掘得其屍於岳嶺送
僧營剝戮殘賊僅數千僞遵王賴汝沆挈之入皖掄任柱陳二老淵股
與張總愚合竄襄脅復衆易步爲騎四年忠親王僧格林沁戰歿於曹
州賊勢復熾馳騁數省寢爲流寇益剽忽不可制五年春巡撫李鶴年
蒞河南以爲賊無宿糧其不卽殄滅者賊騎我步以步當騎走不相及
滅賊之計非合圍必不能勦賊蹤延蔓凡三百州邑因險合圍固非一
省兵力所可辦第爲勦則必勝計豫軍多潁亳人與賊相習其長技亦
略同宜若可用乃添練兩大軍曰毅曰嵩武軍各萬餘人察豫省宿將
無如南陽鎮總兵宋慶前布政使改用總兵張曜者奏起張曜於家與
宋慶各領一軍而以副都統善慶將騎爲游軍與兩軍爲犄角授以方
畧視賊所向相追逐部署甫定兩江總督曾國藩署兩江總督李鴻章

奉 命督勦相繼入豫與李鶴年會籌制賊不流之策時賊聚潁西

築壘潁東以偪之圍未合賊潰出大掠齊魯間南入楚楚將多戰死六年復犯豫豫軍敗賊於潁西賊乃分張賊西入秦任賴二賊突出運河東走青萊運河故有堤頗堅整於是今協辦大學士直隸總督李鴻章復議偪賊於海隅徵各省兵緣運河膠河築重圍畫地以守李鶴年以爲圍勦二事如循環圍合賊必滅乃以提督馬德昭候補道段廣瀛守潼關備張賊餘悉遣赴齊圍始合六月賊騎犯膠防豫軍擊卻之賊不得逞七月乘隙旁出涉濰逸而南淮軍提督劉銘傳豫軍副都統善慶等追擊沂海間賊屢挫十月二十四日戰於贛榆賊目任柱素耐戰豫軍善慶槍斃之賊由是不能振往來海沭邳宿間諸軍縱擊一敗之於壽光再敗之於濟陽伏屍數萬賴汶沆與其死黨數百人跳入江南境爲所在防兵截殺畧盡賴賊薙髮易裝從數人竄揚州甘泉縣之萬福橋爲邏卒所獲送曾國藩讞問確繫獄以聞奉 旨就地凌遲處死

粵逆之局遂結其張賊入秦一股戰事具詳皖匪部巴揚阿徐連陞陳
華元白雲青賈萬林李東昇藍得勝皆議卹如制

會匪一

咸豐四年秋九月禹州莠民劉化振作亂化振禹州東鄉人自三年夏粵逆犯豫各州縣奉文辦理團練於是紳民紛紛舉行聯莊會化振倡議自爲東鄉總會首邀張大鼃袁西成宋成等入會九月初九日張大鼃袁西成宋成王和尚赴鄭州會場置買刀槍歸途遇滎澤縣捕役吳青山爲宋成等所殺棄屍賈魯河灘歸至禹州隱其事時值開征錢漕化振因聯莊會絀於費欲聚衆挾制求減錢漕遂糾集岳三教宋成張大鼃胡春有張麻子等一百六十五人入城見官而賀先彭木霍有成姚常聚等三十一人不從化振脅之以威賀先等懼而從之九月十九日化振率其黨岳三教等一百九十餘人入城賀先等三十餘人中途遁蓋尉氏縣抗糧殺差首犯王添佑爲化振之戚寄禁禹州獄化振陰議以見官減漕爲名入城劫獄賀先等故不從署禹州知州朱光宇聞

變會營汎帶兵勇往捕遇於城外化振卽率衆求減錢漕光宇不允衆遂譁鬧光宇飭兵勇查拏趙在持刀徑前爲光宇格斃化振見事不濟退至距城五里之張良洞屯聚光宇遂請兵勦辦巡撫英桂檄開封府知府王建泰前任獲嘉縣知縣王萬齡等督兵往勦化振脅游民三百餘人圖劫王添佑直攻州城光宇閉關嚴守匪衆圍攻益急王建泰兵至化振聞風逸官軍追斬二三十人焚其巢散其脅從英桂慮王添佑久禁禹州獄易啓戎心命襄城營都司瑞林提至省斬之光宇等督兵勇訪躡各匪蹤跡知化振匿密縣境超化鎮遂會同署密縣知縣胡燕清等圍拏化振自經死其黨丁幅等潛匿禹州之七姬廟光宇會同瑞林往緝格斃武宣汶王化蕤張金旺趙欠常羣成王得章林痴子劉全王懋朱廣五董玉同擒王自修李四保劉玉成等丁幅與吳大富董金榜賈沅慶逸去官兵四出搜拏先後獲王永青賀先彭木霍有成張振東朱金池劉西力焦成郭秀石王贏子等賀先王永青彭木霍有成以

不從化振入城劫獄後得減死冬十二月匪黨楊藍楊穴楊合宋雪妮李芳春王瞎子禹州趙澱沅張富妮宋撞妮逃匿長葛縣之陳公祠無量寺長葛縣知縣劉世勛派外委王永彪帶勇往拏楊藍等殺傷勇役衆復逃散禹州及附近各縣查拏嚴急乃於禹密交界方山爲匪張大鼃糾李賢等爲一起胡春有糾王大林等爲一起張麻子糾劉玉等爲一起袁西成糾蔣雄等爲一起岳三教糾周三妮等爲一起王和尚糾金戈狗等爲一起閆魁糾馮順等爲一起張鐵鎗糾劉汰等爲一起楊由奇糾張紅林等爲一起張虎糾楊穴等爲一起馬登雲糾許源頭等爲一起馬金勝糾焦同等爲一起李奎糾徐淙兒等爲一起吳大富糾長葛縣趙澱沅等爲一起其老官山則有宋成糾合陳小瓣子夏三夏有河宋旦妮等爲一起凡十三起麇聚山中時出劫掠行旅於是石固驛錢店王家溝客車先後皆被劫各州縣拏捕愈急遂成反噬明年正月乃有密縣之亂蓋相距未一月也

1

會匪二

咸豐四年冬十月輝縣刁民戴鑒楊景幅史杭經瞿全義魏鳳池郭彬等主使遊民曹得意糾衆作亂二十日在縣西二十五里趙固鎮設局脅衆花戶抗納錢漕燒毀糧差房屋二十六日衛輝府知府蔣斯崇同衛輝營叅將松志馳往查辦三十日戴鑒等率衆圍城至十一月初二日始漸退出關廂先是豫省自三年夏粵匪闖入歸德攻開封圍懷慶另股折回圍許州南竄羅山出九里關入楚土匪乘隙四起於是各屬議行聯莊會爲守望相助計刁民恃衆煽惑鄉愚則有懷慶府屬之河內開封府屬之尉氏禹州抗官殺差滋事至是蔣斯崇馳書請兵巡撫英桂甫由信陽撤防回省朝廷方令英桂出省防勦於是英桂奏言各縣抗漕滋事深虞相率效尤須分派官兵搜捕兵勇之在本省已有不數分布之勢臣已飛咨河北鎮臣崇安酌撥北路防兵馳往輝縣並飭河北道蔣啓敷相機解散嚴捕渠魁撤輝縣知縣周劭任查辦起

崂根由十一月十七日蔣啓敷稟輝縣刁民戴盛等仍在趙固集及縣東之琉璃閣縣南之山西會館屯聚放百泉閘水阻官兵句結四五千
人傷勇役百餘十九日河北鎮崇安率彰德防兵六百餘人到郡會同
河北道蔣啓敷示諭以百姓本爲身家而求減錢漕何至捨身家而同
于顯戮况求減之錢漕不及刁徒之苛斂等語痛切詳明懸示遠近移
知輝西接壤之山西陵川縣嚴加堵緝而附近之獲嘉新鄉封邱陳留
諸處完納錢糧率多觀望有

旨歸德擒匪未除或應駐陳州或應

駐歸德英桂當體察車機親往督辦但攘外必先安內賊氛不靖固當
示以兵威至地方偶有刁民聚衆滋事則專賴管轄之府州縣善於
彈壓平時撫馭有方必不致抗官滋事之案層見疊出若因抗納錢糧
卽須移兵動衆徒事煩擾且恐激而生變當嚴飭蔣啓敷等究其啓崂
之由剛柔相濟總期分良莠擇尤懲治不致釀成事端動勞兵力方爲
上策英桂奏言地方刁民藉聯莊會輒欲免納錢漕臣已再三誨誠本

輝縣刁民
入教

管道府務當解散脅從嚴捕渠魁正不敢遽爾興兵致涉鹵莽惟刁民
糾衆數千任情抗拒恃其洶洶之勢挾制要求當時竟有不可以理義
曉諭者若徒事拊循必致養癰貽患鄰近各縣率慮附從不得不示以
兵威爲之鎮懾現鎮臣崇安已抵衛輝經臣密函知照會同蔣啓鳳查
明起衅根由分別懲治儻有負隅抗拒再行相機辦理惟臣一經前赴
歸陳則相距輝縣路途寫遠深恐鞭長莫及且開封各屬亦無以資控
馭現當漕糧開兌催科緊要之時必期施措得宜方能補救擬暫駐省
城就近調度歸陳距省各三百餘里輝縣距省二百餘里何路緊急卽
往何路督辦斷不敢顧此失彼自干咎戾奏入英桂遂調撥官兵先駐
衛輝府城聲言不日往勦派員馳赴輝縣愷切開導曉以利害爾時被
脅之衆羣知悔悟相率解散趙固集滋事之匪畏罪潛逃合邑紳士呈
懇願設法捕獲首惡戴鑒楊景幅曹得意等緬送求免官兵臨境著知
縣路璜親赴各鄉分別良莠擇尤懲辦四鄉紳耆翕服漕糧照舊完納

二十八日英桂將輝縣安戰情形入

告仍飭崇安蔣啓厥督率地

方文武嚴拏首惡自督大軍馳駐陳州布置邊防時濟源溫縣原武各
邑聚衆抗漕尚未散五年正月學政張之萬奏言豫省去歲抗糧殺差
糾衆之案層見疊出其尉氏許州禹州輝縣各案均經撫臣先後入奏
此外之旋聚旋散未經入奏者尙復不少推原其故皆因連年豫省兵
差絡繹不能不借資民力而被賊竄擾之區疲敝尤甚雖年穀順成而
商賈不行銀價日貴穀價日賤自湖北肅清以後大河以南銀價稍減
而民間石粟尙不得易一金且自錢法之行以制錢二串作銀一兩河
南各州縣糧銀完納大抵收錢其價亦非以銀爲低昂多者制錢三四
串少者兩串數百不等若盡以兩串作銀一兩計之皆多贏餘而小民
無知遂以爲國之正課皆係以兩串宗納於是奸民得所藉口良
民亦隨同附和假聯莊以聚衆託減糧以要官地方官催科不急則正
課無著催科一急則動至激事此處一動鄰境因之生心此處甫平彼

處效尤又起實在情形大抵如此現當

國用浩繁之時以屢歲豐

收而錢糧不能踴躍深爲可慮伏思奸民之糾衆皆謂減價完納非敢謂抗不完納也皆謂求減差徭非敢謂不應差徭也尉氏許州之案其始皆不易辦而近日皆能拏獲爲首之奸民聯莊解散安靜者實由州縣盡去其多取於民有累於民之積弊但留實在辦公之項且與各紳民商權利弊酌定章程明白曉示而官民已相安於無事然此卽辦理此等案件之定法卽當時愛民裕

國之要務矣然亦非盡咎州縣

也一切支應攤賠無名之費不能無所取於州縣州縣何能不取於民間若積弊之有病於州縣者不除但去州縣之積弊則州縣不能多取於民必致多虧於國從前積弊未除州縣尙不能無虧况俱裁之則其虧必甚此又一定之勢矣請

飭下撫藩各臣揀派公正曉事素

洽輿論之員逐縣清釐積弊並會同司道府廳各官通盤核實查確爲辦公之項酌量減留其一切無名之費盡行裁汰事寬其既往以去其

諱飾之情法嚴於將來以杜其復加之漸則弊源先清民氣自靖然後嚴懲奸民確効虧短斯民困可蘇而國用亦不憂其不足奏入有

旨命英桂按照學政所陳逐款詳查分別裁革妥議具奏原奏尙有未備之處一併詳查列入章程議未及行而有密縣鄭州濟源新鄉各邑焚署圍城之事初禹州之亂匪首劉化振伏誅餘黨匿山中久之誘集無賴出沒禹密交界之方山大紅寨半坡山諸處各州縣此擎彼竄至是署密縣知縣胡燕清捕獲李如意王景唐代理鄭州知州黃見三捕得蔣二蔣三蔣四均繫獄匪黨遂謀劫奪正月十九日掠密境東南大隗鎮胡燕清會同外委王青山帶兵勦捕馳追遇伏王青山被戕胡燕清受傷走脫匪黨已潛伏城中是夜放火焚署劫獄胡燕清之妻常氏及一子一女幕友潘芷香刑書二人同時遇害典史受傷監犯肅逸迨胡燕清回城匪衆已遁二十二日竄至鄭州脅煤窑游民圍攻州城黃見三閉城堵禦礮斃六七十人縋城擊斃四五十人匪衆退踞廣福屯

於是胡燕清黃見三同馳書請兵時巡撫英桂督師駐陳州檄臬司余炳燾出省督辦令襄城營都司瑞林佐領巴哈布帶兵三百名隸之令開封府知府趙書升帶兵二百名益以練勇先往查辦並奏言密鄭距省不遠開封所屬州縣近因錢漕觀望人心浮動內患堪虞臣若自往恐南路有警未能策應故命臬司帶兵勦辦如果情形日重當親往督勦

上以地方官辦理不善剗密縣知縣胡燕清職命英桂體察邊境情形如皖防稍緩牛鑑張維翰等皆可派往崇安於輝縣案辦結亦可帶兵會勦時趙書升等勦賊於廣福屯鏖賊數百餘匪退至孟家寨又經兵練擒匪目袁西成及李賢等實諸法分路搜勦先後擒獲王大林等百餘格殺數十鄰縣捕獲各數十胡燕清擒獲焚署要逆胡春有等皆斬之趙書升等親赴方山大紅寨半坡山分兵窮搜焚其巢餘匪竄禹州掠黃岡署知州朱光宇遣勇往捕傷歿十餘匪衆乘勢攻城朱光宇率紳民袁鳳三登陴捍禦適趙書升派兵追至礮斃紅巾賊二朱

光宇率文武

紳

勇開城出擊武生馬永清力戰陣亡火彈傷光宇頸猶

督勇奮擊斃

賊百餘賊向西南竄逸州城圍解擒楊老虎等梟示趙書

升留兵五百鎮禹州余炳燾馳抵禹州賊已殲除過半遂飭緝餘匪示

諭聯莊

各保其鄉未幾胡燕清等於寶豐縣境香山寺擒獲首犯張

成及其子張安妮又於舞陽縣境獲首犯岳三教傳首犯事地方於是

劉化

三似之黨始盡五月十一日

上諭英桂曰地方團練原以保衛

鄉閭

近來河南彰衛懷及開封等屬抗糧滋事之案層見疊出皆因聯

莊

曾借團練爲名糾衆抗官府縣平日既辦理不善臨時又補救無方

以致相率效尤後患何堪設想著英桂督飭地方官剴切曉諭不遵者

嚴行懲辦現北路軍務已平所辦聯莊是否可以裁撤並著酌量辦理

是時河內濟源汜水各縣刁民皆踵縣之弊聯莊抗糧旋起旋止而

輝縣首惡戴鑒楊景幅曹得意等逃匿各鄉煽惑新鄉獲嘉濬縣原武

陽武濟源溫縣河內安陽林縣內黃各縣聯莊聚衆抗官河北三郡人心

騷動亂萌已見故有是

詔張炳者新鄉縣之刁民也爲戴鑾等所

惑於縣境龍泉寺聚衆抗糧殺傷差役十八日聚衆千餘抵城下知縣祝璽率勇登陴礮斃賊四匪衆退歸龍泉寺六月初四日匪復率衆攻城祝璽出擊斃匪四五十匪黨愈集愈多官軍斂兵入城賊遂盤踞東西北三門衛輝府知府蔣斯崇募勇六百餘人命軍功霍振國帶領於新汲接壤遙爲聲援時翰林院庶吉士傅壽彤方奉英桂檄往來懷衛間解散聯莊旣而知各屬匪黨相結已成尾大不掉之勢非言語所能爲力亦令前武安縣知縣高天寵招募壯勇駐亢村驛聽調河北鎮崇安聞新鄉亂命都司穆特布守備魁齡各帶兵馳往懷慶府知府高應元河內縣知縣師長怡亦各以壯勇往援英桂督師信陽得報檄山東都司唐佐清帶兵五百尅日馳往又於南陽信陽防堵官兵內抽撥五百名令叅將全福千總張永芳分帶繼進檄山東游擊王鳳祥帶五百名由陽武渡河令開封府知府趙書升於汜水抗糧案辦竣卽帶所募

壯勇就近由榮澤渡河北趨各路官兵統歸崇安調遣仍令傅壽彤會同在籍四品頂戴李棠階徧諭鄉民各安生業飛咨直隸山東山西各督撫撥兵防邊堵其竄逸因奏言賊匪近在德安防禦外寇固難稍寬而河北變生肘腋勦除內患刻不容緩兼之黃河漫口徧地災黎萬一奸民誘令附從則其勢益張辦理更形棘手體察情形河北腹心之患實較南路尤爲緊要擬將防堵事宜責成南陽鎮邱聯恩南汝光道邊浴禮臣卽酌帶兵勇前往河北督辦得 旨允行並 詔直隸總

督於防河官兵一千五百名內抽兵千名赴新鄉援勦英桂正擬北行值楚省官兵失利西凌阿退守隨州信陽三關戒嚴飛檄署臬司周士鏜募勇先赴河北會同崇安督勦是時附近各縣聯莊知官兵大集傅壽彤等又往來勸諭尙不致蠢動而新鄉匪黨脅聚幾萬人崇安等復請濟師英桂令增募鄉勇並檄催直隸官兵七月十八日崇安傅壽彤趙書升蔣斯崇等率兵入新鄉境沿路搜殺伏匪獲潘鐵妮等崇安由

關焚賊踞房屋祝塏見援兵至遣壯勇出城接應斃賊甚多賊向西南
正北各村屯踞圍始解十九日崇安率將弁分隊搜勦於曾家營殲賊
數十擒賊十餘搜獲火藥雲梯槍礮各器械賊踞龍泉寺掘濠築壘爲
久踞計二十一日署臬司周士鏜帶兵至衛輝大名鎮總兵史榮椿大
順廣道聯捷同時以兵來會二十二日賊竄西南小集二十三日崇安
周士鏜分路進勦傳壽彤蔣斯崇趙書升各率練勇接應斃賊七十餘
擒裴六妮等匪首張炳逸去餘衆負隅

上益命英桂往衛輝督勦

八月十九日英桂至師崇安等戰益力獲匪徒曹成玉趙心和等究出
新鄉圍城獲嘉滋事皆戴鑒楊景幅等同惡相濟趙固集收藏軍器糾
衆不散思抗大兵崇安周士鏜遂遣兵往捕抵趙固賊衆千餘分股迎
拒官兵馬隊衝進立斬百餘賊始潰散擒孟得幅等焚其軍器局署輝
縣知縣路璜滑縣知縣張廷璽直隸游擊德魁分路追勦獲楊景幅戴

鑒千總馬騰蛟獲曹汝梅於山西陵川縣之衛衙審皆斬以徇而張炳
及獲嘉首匪郭象明尙未獲餘黨尙多其林縣安陽湯陰原武溫縣濟
源聯莊仍未盡散英桂飭崇安史榮椿聯捷分駐新獲輝三縣嚴搜匪
犯蔣斯崇安撫居民方新鄉之圍也濟源抗糧之案雖已解散而首惡
未擒聞山西陽城縣侯井村趙連城滋事復思萌動而獲嘉聯莊會於
是起焉恃衆要挾陽請赴新鄉曉以利害陰與匪黨勾結阻塞大路四
門樹黃旗困委員候補知縣朱光宇於城至是聞官兵將至盡運器械
出城周士鑑知其助賊卽與崇安分路迎擊至安村匪衆千餘在村外
挑濠溝欲引衛水灌濠官兵越濠進斃賊數十擒二十餘餘衆潰散越
日匪黨復裹脅數千竄踞登岡寺叅將全福等擊退之官兵會合追勦
大勝都司唐佐清等復敗賊於贊城郭莊脅從日漸解散英桂命周士
鑑赴懷慶傳壽彤赴彰德各就地方情形相機辦理於是安陽湯陰臨
漳林縣各聯莊皆紛紛呈繳軍械遣散會衆而修武陽武溫縣孟縣諸

處擒獻彭馬妮彭月觀王全喜劉大林劉大合張大魁苗河馮青元范
六合苗志高義馬六雲郭寶郭廷魁張士林等並呈繳馬匹器械崇安
史榮椿聯捷各遣所部搜拏郭香曹在訓岳在兆彭羸妮王世俊孫世
全曹保全曹文龍天岐等交蔣斯崇訊明正法而江南礪山之賊時又
竄入歸德攻破馬牧集英桂恐移師南渡河北餘孽復萌於是酌抽行
營官兵三百名令游擊巴哈布援剿以祝壇得歸德各屬團練之心令
解新鄉縣印馳往歸德援剿擒匪九月初六日原武聯莊會匪聚於縣
境東岳廟飭兵往捕獲首匪張秀生閻春榮婁中平郭保妮靳三保婁
鐵匠張長幅張瀾等焚其巢賊黨張熙謨王萬和姚添正遁山西爲鳳
臺陵川兩縣所獲張炳之弟張倫遁遂平爲知縣金益謙所獲解營斬
之陽武聯莊會首彭鳳池濟源縣要犯段懷法商振邦等亦次第就擒
林縣匪閻傳壽彤帶兵往拏悉竄散獲岳超凡賓諸法安陽湯陰內黃
各邑匪犯屢經嚴緝未獲湯陰之下扣南陽各村陽奉陰違居心尤爲

叵測英桂慮地方州縣因循粉飾貽患將來檄飭崇安蔣啓敷會同史榮椿聯捷帶兵馳往十月十二日先至湯陰之南陽下扣拏獲首犯索希孟申岳生及其子申九功王斗南王道南路喜等十四日獲王知心馬士沅楊春榮王乾元等又獲王幅青司法喜於濬縣官兵正擬移師內黃適內黃聯莊會首生員王隆章民人宗浩然宋飛等赴營自首悔懼認罪並約闔邑紳耆出具永不滋事保結官兵遂至安陽二十四日獲王老樂雷天雷施雨於伏思邵里等村獲李美王牧宋明德於辛村獲胡純德等於大保村皆要犯也毀其局仆其碑傳集紳耆剴切勸導皆俯首聽命林縣各犯自岳超凡就擒餘悉潛蹤縣境少安乃以搜緝逸犯責成邑令旋擒獲河內侯會鄭孟縣李興禮原武李象賢濟源段起謨其獲嘉縣首惡郭象明爲候補縣丞張鈞軍功杜來崇追至鹿邑縣汾塔集會同縣令擒獲新鄉縣首惡張炳爲軍功閻如蘭及王祿營兵丁獲於武陟境先後解營盡寘諸法於是河北大定英桂復令崇安

周士鏜傳壽彤帶兵千名前往開封屬之鄭州陳留杞縣尉氏洧川滎陽許州屬之襄城長葛河南府屬之洛陽偃師鞏縣登封解縣莊並擒中牟滋事首犯賈世清陳林鄭青雲王光三尙古魁朱燕青汜水縣毆差杭官設立私渡之杜邦彥王七任二紅安身王雪來周元良禹州匪黨王建功新鄉縣首惡陳錫田陳得玉李在田解省訊辦十一月初三日英桂以河北肅清入告督兵旋省 上以辦理認真授翰林院庶吉士傳壽彤爲檢討免其散館復開封府知府趙書升革職留工處分在事出力文武論功陞賞有差

會匪三

咸豐八年正月阜陽教匪王庭楨等聚衆焚掠盤踞西爐村其地與項城沈邱新蔡各邑毗連居民驚恐項城縣知縣彭旭調團勇搜拏匪衆列陣迎拒另股賊從旁出撲傷團勇十餘會沈邱縣知縣秦篤新帶團驟至賊始退歸先是匪首王庭楨李潮仕李長四等習教傳徒煽惑鄉民始僅二百餘人糾捻首劉石滾張三等入夥集數百人陰結粵逆期以二月至阜陽相助沈邱項城二縣捕之急遂於七年十二月起事裹脅附近鄉民焚掠村鎮於西爐集挑濠築壘爲負隅計至是焚阜陽屬之銅陽城等十餘莊攻圍項城之新興集沈項縣丞鄧祥鈴督勇嚴守賊於集外縱火擄人聲言攻項城彭旭布置城守馳書告急時巡撫英桂駐師葉縣以固始縣城久未解圍羣捻蜂起隨營無兵可撥乃檄陳州府知府安奎汝甯府知府祁之銓候補知府蒯賀蓀等督勇分勦奏請截留過境之陝甘官兵一百八十餘名赴沈項援剿正月初八日匪

攻沈邱縣境之劉莊秦篤新帶勇馳往擊退十一日夜匪衆三千竄至距沈邱城三里徐營十七日秦篤新會同營汎由韓橋李增橋兩路進擊賊亦分路迎拒互有殺傷二十二日陳州府知府安奎陳州營都司雙麟會師進剿殺賊三十餘擒裴成等二十三等日賊竄阜陽境鹽店莊諸處擄糧焚殺一空逼近汝陽所轄之陽埠廟灣汝郡震動賊以妖言布散汝蔡沈項各邑鄉團聞賊有邪術飛刀殺人見其服色詭異互相疑懼望影先逃二十七日汝甯府知府祁之銓會同安奎分路兜擊安奎由西進兵至吳橋遇賊列隊迎拒官軍奮擊賊辟易斬紅衣馬賊及匪黨四十餘擒劉小等追殺至賊巢遇伏匪衝動後隊前隊不能陣賊衆四面圍逼署新興汎把總麻金銘力戰歿並陣亡兵勇數十安奎雙麟等退守沈邱之新興集祁之銓由南進兵亦遇伏兩面受敵傷勇數名退守新蔡之龍口集賊衆誘脅沈項兩縣鄉民在李增橋屈橋吳橋諸處大肆焚掠沈項兩城危如累卵英桂奏言沈項鄉團素稱得

力茲以妖言惶惑盡皆四散教匪兇鋒所至已逼沈邱項城新蔡汝陽四邑切近陳汝兩府城距周家口要地亦祇百餘里設有疎失省城必爲震動且皖境之阜陽豫境之汝蔡俱爲勝保袁甲三兩軍後路饒道若被阻隔關繫匪輕而臣所帶馬步官兵祇有三千名除頭起馬步官兵一千二百名已赴光固外二起官兵一千名亦已起程赴援當此教匪蔓延鄉團星散變生肘腋不得不先救腹心不得已將所派二起官兵截回計已行抵息縣飭卽由息改道徑赴新蔡並德楞額等馬步卽日啓行赴新蔡沈項相機進勦臣一旅偏師兼顧爲難請 敕直隸督臣山東撫臣選撥精兵各一千名遴派曾經出師得力將弁管帶迅速來營以資調遣 上以直隸山東兵丁均難再行出調 詔恒福選山西省勁旅一千名赴英桂軍營調遣時勝保奏調陝甘官兵二千名業由甘肅起程 中旨如固始卽解圍此項官兵英桂尙可與勝保分帶並趣英桂馳赴沈邱一帶督勦是時沈項汝蔡各邑二百餘

村莊咸苦匪擾東西百餘里南北四五十里俱成赤地王庭楨李潮仕等徧貼僞示僞號順天軍師大司馬所踞西爐東爐劉莊新莊李家廬等處挑濠築壘連立五圩結黨四五千分踞成犄角之勢其西北河湖汗漫寬十餘里賊巢前後有洋河坡河兩道其地田埂逼窄溝渠分繞惟南北兩路可以進兵賊於要路設伏屢敗各縣團勇二月二日總管德楞額等進兵賊知官軍從北路來悉衆南向圍攻汝陽之廟灣楊埠新蔡之龍口集郡城左右烽煙相望英桂令祁之銓蒯賀蓀等援楊埠廟灣自帶親軍駐汝寧督勦密令德楞額等馬步自北路折回由龍口集進兵攻其南開封營游擊承惠等帶甘肅寧夏官兵自新興集進兵攻其北訂期夾擊初七日德楞額等南路官兵先由洋河渡至爐莊觀賊勢賊分兩路鈔截各千餘人官軍馬隊張兩翼應擊轉戰二時斃賊百餘乘勝追殺復斃二百餘至濠邊巢內賊齊出矢石雨下時已薄暮斂兵歸營獲牲畜器械無算初八日黎明德楞額等大隊由李新莊分

東西南三路進攻令軍士人挾束薪至劉莊遇匪千餘出門中路步隊迎頭截擊斃賊數十東西兩路兵勇同時馳擊賊稍卻德楞額先遣馬隊扼劉莊新莊李家廬三巢要路斷賊援應於是三路並進賊衆敗奔退入西爐老巢官軍至濠邊擲草填濠天津勇隊發噴筒火箭奪開頭道濠門賊衆抵死以拒槍礮如雨官軍五入木柵傷亡百餘不得進叅領綏圖根敦札樸驍騎校托克屯五品藍翎馬甲恩祥德星布賡音布勝福千總王同聲外委張超均受傷劉莊等三巢匪衆齊出救應馬隊截殺甚多賊殊死戰官軍暫撤過濠分頭迎擊北路承惠帶甯夏官兵馳攻其背南面匪衆紛紛移向北抵拒承惠身先士卒槍過濠溝甯夏官兵齊登北柵德楞額等見北路兵到鼓勇疾進火器並發賊巢草柵先然會東風大作火勢猛烈呼號鼎沸賊衆大亂官軍兩路攻入斃匪二千餘立毀西爐老巢其東爐及劉莊等四圩並附近小莊見西爐破同時潰竄官軍乘勝勦殺各巢俱焚毀追至湖邊復斃賊四百餘賊向

東北狂奔匪首王庭楨殪於巢中是役也攻毀賊巢五掃平小莊零匪
鏖戰六時先後斬首三千餘級擒任小妮等獲牛馬大炮軍仗無算英
桂以捷聞於

朝賞德楞額黃馬褂營總蘇克金伊勒固木圖巴圖
魯名號加承惠副將銜擢都司何建鰲京營游擊賞叅將綏圖花翎其
餘出力將士獎叙有差時敗匪數百人亡命竄至阜境之迎仙店謝家
園德楞額等躡勦斬馘四十餘賊復東竄王家壩盤踞會德楞額積勞
疾發以蘇克金代統其軍十三日官軍進至艾亭賊復折向西南竄息
縣所屬固成倉十四日蘇克金等追及轉戰累時斃匪五六十忽大雨
如注賊逸去竄距光州所屬靠山埠十五六七八等日官軍冒雨進兵
泥水沒踝沿途搜殺三十餘賊勢蹙甚議投粵逆光州知州鄭元善息
縣知縣周仁壽羅山縣知縣廖慶謀各派兵勇堵勦蘇克金等會之斬
賊百餘賊竄光山縣所屬寨河集焚掠裹脅復增四五百人十九日雨
止蘇克金等由集北進攻集南忽出悍賊一股官軍猝不及防有傷亡

者游擊巴揚阿防禦滿堂均被創蘇克金分兵勇爲三隊自東西北三面夾攻光山縣知縣楊維宗委員任浩及廖慶謀等督勇由南面進擊官軍發火箭然其草房自辰至戌轉戰六時斃匪三百餘四更時賊黨三百餘冒煙出兵勇緊躡追擊沿河斬首五六十級二十日黎明官軍渡河賊竄陳家畝圩蘇克金馬隊先到即時進攻光羅各縣勇團陸續會集賊以槍炮死守防禦永奎及兵勇均受傷將士憤怒攻益急賊黨紛紛越垣竄皆爲官軍所獲二十一日辰刻各軍攻入悍賊悉就誅賊首李潮仕張三等皆斃焉其亡命他竄者開歸陳許道徐繼鏞督派員弁在新集擒獲賊目李聶子朱純修等委員黃以清等督勇在三文坡擊殺多賊生擒十餘掘毀李潮仕祖墓搜獲王庭楨族孫王五誅之廖慶謀督勇擊匪搜出偽印二偽封官號及與粵逆勾通違悖書字秦篤新拏獲匪目王心名擒首劉石滾劉樞匪張豹等彭旭獲賊目張全等新蔡縣知縣馬益乾拏獲劉金秀石興云等於是教匪悉平



會匪四

咸豐十一年四月河北聯莊會匪餘黨李占標姚天英劉金山等作亂踞獲嘉之中和鎮張時中者新鄉進士貴州卽用知縣以辦團故留團練大臣毛昶熙營遣赴河北招勇時中所部勇目李占標等藉招勇聚衆三四千踞中和鎮勾結小冀鎮刁民牛有金爲犄角營器械繕牆濠李占標爲紅旗隊姚天英爲藍旗隊劉金山爲白旗隊煽新獲輝三縣聯莊餘黨四山搶掠值山東直隸土寇蜂起徧擾濮范大名各屬豫邊臨內滑潞處處戒嚴李占標等陰議結東匪以仇昔日之誅聯莊會者獲嘉縣知縣趙寶仁偵知之語張時中速往鎮撫會時中已奉文停止募勇遂馳往解散占標率隊道迎時中不能制巡撫嚴樹森督師陳州聞變檄河北道王榮第率領叅將裴政帶衛輝營官兵並汲新輝三縣練勇通判馬步瀛帶剛銳左營勇會同總兵牛浩然乘其初起併力撲滅並絕東匪救應四月二十四日賊由中和小冀分三股出竄掠陽武

之黑洋山新鄉原武父界之高莊賈莊管張莊獲嘉之亢村驛二十日
遂攻原武縣城知縣孔慶鉞登陴守禦發砲擊斃執旗賊目三步賊七
馬賊二復縋城出擊追殺三十餘賊向東南敗走楊橋趙莊渡口船泊
南岸不得渡遂攻官廠二十七日復攻原武縣城柘四關城上發礮擊
退殪馬賊三步賊十餘賊奔西北孔慶鉞督勇追剿復斃十餘擒李麻
妮等賊踞黑洋山二十八日馬步瀛兵到擊斬頗多賊竄延津之七里
村遂犯延津知縣林大木督勇擊退賊踞陽武之齊亦集五月初一日
守備陳占魁把總張清雲周占魁外委楊得山等率二十餘騎首先衝
入賊見官兵少率衆圍逼張清雲戰歿五品軍功陳錫福身受二十一
創官兵四突不得出適馬步瀛馳至揮軍殺入獲嘉練勇橫擊之斬殺
無數餘賊向東南奔叅將裴政侯補知縣尙賢繆萁聯督兵勇踵至延
津陽武兩縣勇練會之追斬二十餘里斃賊五百餘奪器械贏馬甚多
擒閻安妮韓玉法等賊分兩股逸一竄消縣之黃德集一竄新獲諸縣

境裴政等帶勇追至新鄉之辛店集賊方炊見官軍拚至出巢迎拒裴政身先士卒馳入賊陣手刃數賊新鄉知縣鄒鉞帶勇助戰斃賊二十餘擒馬賊六步賊十三追殺十餘里復獲數十賊回竄中和鎮初四日裴政等追至泰山廟與獲嘉知縣趙寶仁兩路夾擊斬馘五十餘追至南務北務焚李占標姚天英巢餘賊向西逸復結附近黨羽數百踞南務趙寶仁與裴政議以窮追非計西北百里則山西陵川縣境以賊貽鄰省尤非計乃調集勇練爲六路游兵一路爲策應以五路爲五衢合擊之法鄒鉞尙賢繆萼聯守備萬鵬程等分將之銜枚而進初八日黎明抵南務賊驚起五路兵勇奮力環攻前後左右槍礮並發賊人馬盡斃僅五六馬賊於煙燄中突圍遁陽武縣拏獲馬奔中魏成妮斬之其東竄滑縣黃德集一股知縣徐振瀛擊殺二百餘延津知縣林大本督同練總候選訓導李玉文閻廷等分帶勇練追至先約江西知縣暴大儒武于士修等集鄉團伏街中練勇大呼馳進賊衆死拒傷練勇

數人官軍用連環礮轟擊有賊首乘轎車而逃者姚天英也未出集中
飛砲官軍斬其首並斃夥黨二百餘擒夥賊三餘匪數十向西北敗奔
官軍沿途追殺二十餘擒陳文學馬振清楊仁妮檢賊屍有水晶頂帽
並功牌招勇諭帖令獲賊認之則賊首李占標也並言劉金山乘馬與
姚天英同行俱死於礮於是賊股盡滅初

朝廷以此事衅由招勇

令部議毛昶熙處分削張時中職迨不期月而匪黨悉平渠魁就僇出
力文武悉邀懋賞嚴樹森奏言張時中一迂腐老儒傳見時對臣涕泣
願立功贖罪是以號召鄉團協助官兵尅期奏捷請開復進士原資得
旨允行並留於嚴樹森軍營差遣此一役也匪首李占標姚天英
劉金山既伏誅而是年八月輝縣知縣韓經畬復稟有李占標聚衆於
獲嘉竄至輝境之趙固集肆擾月餘歸入東固是李占標猶未死云

會匪五

金樓寨在歸德府商邱縣馬收集之南十里寨首部永清其先習白蓮教已三世矣爲離卦大宗海內承平守令僅以邪教誅首惡永清之祖父皆伏法而子孫幸邀寬典永清不悛乘中原多故其教中徒衆有爲皖捻堂主者志益侈適堡寨之議興金樓寨築城浚池倡於衆曰大劫將至欲免者入吾寨八卦旗捻百劉狗王金樓謁永清執禮甚恭薪木無毀傷愚夫愚婦益信其爲衆土歸之者如市咸豐十一年欽天監言八月初一日日月合璧五星聯珠永清誑其衆謂祥由已謀以其日僭僞號約皖捻王明李永年入其寨復有吳廷瑞尤本立黑巴等爲之翼輔將襲馬牧而進圖歸德事泄遂反時團練大臣毛昶熙駐宋郡因勒兵至馬收集令南陽鎮總兵圖塔納率諸將邵春仁敖天印張倫興劉進貞程明禮左成元等進攻復調蔣東才隊由毫回宋助勦諸將壁寨外師久無功昶熙因令前御史尹耕雲往勞師且督戰事以陳文舉步


隊陳祿興馬隊從爲九月十六日也耕雲至軍周視壁壘乃與圖塔納
議近寨爲營掘地爲道出地道土壘山以臨其寨用古人距闔法於是
始以隄南爲老營拔老營精銳營其寨之西北寨形狹而長東西二門
敷天印張倫興壓西門而北邵春仁營正北劉進貞左成元營稍東陳
祿興初至恃其勇且生力兵至東門挑戰賊堅匿不出炮傷勇丁一人
祿興憤遂營於東門十八日試銅炮毀賊堞土山成復於山外挖濠壘
牆而移營就山愈逼近賊寨賊奔視者良久二十一日東南風大作圖
塔納尹耕雲令馬隊繞至寨南施放火箭寨中火發煙氣蔽霄而守賊
不亂復放銅礮斃其賊日夜三鼓賊大至由溝中直撲山營火彈及營
中五營並出礮之槍礮雨集晦暗中見火光射賊身紛紛倒地後賊竄
出前賊誤爲我兵截其歸路挺矛對刺死者益衆時賊中食充牣乃謀
於寨南挖長濠斷其接濟二十八日復進攻將東才由東北陳祿興由
東劉貞程明禮由西北張倫興由西南約以火箭三發爲號各隊齊進


諸將士或至外濠或越重濠已登梯近堽口寨內寂無人聲俄頃間刀矛森列火光如晝槍礮磚石如雨發我軍死亡相繼耕雲等急傳令收隊先是蔣隊將登賊死拒縋而下與蔣相持蔣乃佯退賊越濠追之蔣反鬪陳祿興壓東門截歸路蔣東才袒而大呼與所部壯士攢矛刺殺數百人賊稍懼十月初一日復進攻邵春仁左元成皆受傷春仁中鉛子從右後肩入流至脇下明日賊毀我土山於是益增設礮臺三面環攻期必克會劉狗以馬步賊二萬餘來援將至圖塔納慮諸將不足恃令全軍撤馬牧候進止十三日陳祿興蔣東才程明禮劉進貞四營先撤賊馬大至各隊均有失傷邵春仁敖天印張倫興營不撤賊撲之我軍斃賊五百餘其夜賊占各空營敖天印邵春仁等復率衆逐之殲其醜敖天印血戰亦幾殆是役以撤隊故爲賊所乘諸將知撤隊非耕雲意乃益臆就耕雲稟號令耕雲乃令其材官王廂出募死士八百人散伏於各寨擊樵蘇賊賊益無所得食諸將又出隊襲之賊乃留常立升


等以數百人戍金樓餘悉退邵永清死寨中以其弟妻邵姚氏爲女酋
發也當圍之將合悍賊王明已挈衆遁回奶奶山苟援賊不至卽至而
我營不撤稍持寨已破矣十一月復經營舊壘爲進攻計諸將鑿冰累
土賊屢爲賊乘僅乃得立張倫興獨身馳覘爲賊所獲王雙樓寨首王
冠山死其母居之爲宋喜元所紿奪其寨與金樓相犄角賊遂復熾同
治元年二月科爾沁郡王僧格林沁率師至宋十八日出隊以炸砲攻
寨毀西北角牆三段賊立八卦旗志甚得無餒意王怒撻炮兵或曰八
卦旗所爲豈其然哉宜賊黨之爲所惑也二十三日復轟塌賊牆十餘
丈二十五日亦然二十六日進攻邵春仁復爲炮子所中劉進貞亦受
傷是日炮發子落寨中風烈火起延燒數時始熄計所焚燬當十之六
七諸軍爲重濠鹿角所阻猶不得進僧格林沁毛昶熙各率所部日親
至寨下督戰愈力賊堅守如故留尹耕雲駐前敵任以巡察諸軍事日
有戰狀不具載四月二十八日耕雲率小隊數十人巡哨至陳祿興蔣


東才兩營濠上夜大風晦黑無所見忽成者然噴筒光徹濠外見披髮者林立繼復然睇之皆賊也賊疑我覺乃大譁聲震數里守者愕眙相顧失色耕雲下馬坐胡床止戍卒無錯亂先以手槍轟擊急調炮炮至復擊之前賊仆後賊猶不退侵曉乃悉遁回寨是夕苟無警備樹局將大壞蓋士卒久戰疲乏多困殆所樹鹿角皆繫鈴悉爲賊拔而一無聲聞矣賊由是無出意降者日衆五月二十八日方合諸將圍偏有羊角風起西南大可數十畝上亘霄際或黃或黑如浮圖然至寨門數激蕩而後入入則燾全寨並圍師於黑氣中咫尺不可辨久之乃移動出寨東門風沙隨之極目力所至終不散至不可見而後已是日我軍戰無功圖塔納先已赴南陽總兵任故僧格林沁毛昶熙獨以諸將不力責尹耕雲且令諸將各具狀期以三日破賊耕雲集諸將告之顧以戰不力爲已咎諸將皆憤請一戰以死至三十日兵悉傳寨外一鼓而登遂下之守賊猶巷戰時許肅殲之邵姚氏爲軍士所殺獻其首尤本立

自縊死鄚氏少子年十三牽至見諸帥無懼色引頸就刃計所殺千四
百餘口金樓平









豫軍紀略卷三

土匪一

自粵逆陷金陵犯河南中州土捻乘間竊發所在蠶起咸豐三年二月歸德府屬之永城縣有大股土匪嘯聚薛家湖馬頭寺等處肆掠巡撫陸應穀檄中軍叅將崇安開歸陳許道林揚祖督歸德知府陳介眉及永城夏邑虞城各官弁分路捕剿先後擒斬著名捻首陳七等九百有奇六月南陽府屬桐柏縣之黃岡一路復有土捻聚衆滋擾署知縣潘樹霖會同城守外委率兵往剿賊據山抗拒施放槍礮潘樹霖策馬直上中槍陣歿外委受傷落水南陽知府顧嘉蘅檄經歷婁鼎亨率勇赴援不及時戕官爲首之賊尙不得主名陸應穀在圍城行營據報以聞因檄南陽鎮總兵柏山移師桐柏會合顧嘉蘅勦捕別檄巴里坤總兵經文岱河北鎮總兵王家琳追剿粵逆請調陝甘精兵四千名來豫以三千駐歸陳以一千分駐南汝

廷議以陝甘官兵援勦河北不能

分撥命咨商陝楚就近酌撥於是正陽虞城永城夏邑沈邱諸縣揭竿並起六月二十三日正陽土匪糾衆突至圍攻縣城爲守城官弁擊退斃執旗匪目餘竄距城三十里署知縣周玉瓚以狀聞且言匪衆欲擾汝甯郡城時汝甯兵勇不多陸應穀檄知府廖鈺募勇六百名紳士葉道垠武生王平募勇五百名派前歸德知府陳介眉已革鄧州知州徐柱臣管帶會合汝甯叅將伊里綱阿官兵四百五十名分撥防剿復咨調經文岱督帶叅將慶瑞回援正陽而虞城復有大股土匪圍繞縣城焚燬居民屋舍永城散匪復聚中有周天爵行營散勇曾歷行陣槍礮器械畢具勢益剽悍光州屬之固始境亦有息縣擒首任二皮等糾集皖捻竄入搶掠勢將攻城虞城縣知縣張慶元永城縣知縣王樹漢固始縣知縣朱士廉各狀報請兵甚急陳州府知府朱師瀛狀言沈項交界之槐店有大股擒匪劉元吉等竄踞開封府知府賈臻狀言皖捻出沒不時欲至周口搶糧南陽解饒委員狀言確山老君堂有股匪樹旗

阻運道山西殺虎口副將德克津布北樓營叅將丁存英以赴勦正陽
經項城八里夏地界軍火車爲賊所掠奏叅摘頂仍責令追捕自效於
是陸應穀疏請旋省布置援勦事宜檄柏山赴固始堵勦已革兩廣總
督徐廣縉及山西甯武營叅將苗樟赴歸陳勦捕而以正陽竄匪責成
叅將伊里綱阿會同汝甯府知府廖銑辦桐柏餘匪責成南陽府知
府顧嘉蘅率屬接捕時夏邑擒匪以七月初八日竄犯縣城知縣徐本
立自率兵役禦之令武生馬殿安等以鄉勇襲其後賊列陣抗拒相持
自辰至酉兵勇奮擊斃賊首及夥黨數十猶死鬪因以大礮轟擊斃匪
三百餘生擒三十九餘衆始潰奪獲佛郎機大礮三尊賊訊稱擒凡七
股散首駱化南冉柱張莊總首路舉均死於陣云沈邱擒匪劉疙瘡等
以七月十四日竄入劉莊知縣馮諫率兵往捕匪衆拒傷鄉勇馮諫身
被數創猶力戰以匪將襲城始退守經文岱先得報令副將春明叅將
慶瑞率所部急馳往援已革叅將達凌阿帶兵繼進慶瑞等旣至城擒

首侯姓率其黨逼城下以雲梯仰攻慶瑞親放大礮斃侯賊奪獲雲梯
十四具賊始退適項城知縣沈棠帶勇赴援十六日與達凌阿會合抵
柏樹林擊斃賊四十餘擒擒首劉元吉趙省賈大小擒夥孫申等立斬
之餘衆南竄歸陳之匪一創於夏邑再創於沈邱凶鋒稍挫陸應穀旋
省據白其事因言歸陳爲南路門戶匪股衆多兵力不敷防勦歸德府
城僅有游擊常有官兵一百名叅將樂貴官兵四百名沈項二縣本有
山西存兵八百名近又抽調三百名赴汝甯徐廣緝苗樟所帶兵勇僅
千餘名所請截留副都統托雲保管帶之吉林兵七百餘名已奉
旨留於河北軍營並托明阿留防永城之綏遠城兵五百名亦調赴河
北陝楚之師皆以不能分撥咨復省城存兵不滿二千行營鄉勇僅四
百兵單賊衆請仍抽撥陝甘精兵四千並托雲保一軍來豫會勦而各
省大兵方聚河北懷慶城圍未解畿輔扼重河岸設防勢難兼顧一隅
議遂寢七月陸應穀復至汝甯巡視河岸旣訖事檄署廣西游擊常啓

雲署山西叅將蘇林游擊德興額帶領兵勇先後馳赴歸陳聽徐廣緒進止八月初三日有大股擒匪乘夜冒難民闌入夏邑縣境將攻城知縣徐本立諜知因督帶兵勇迎截立斃賊二百餘生擒賊二十餘遂逃散同時歸德屬境之馬收集牛王垆諸處著名擒首宋喜元等復糾黨分踞滋擾知府王憲狀聞徐廣緒檄夏邑虞城及江南碭山等縣營約期會剿初十日徐本立以勇從徐廣緒進至三官集遇賊迎擊戰一時之久徐本立密遣練勇楊無黨等繞賊後夾攻斃擒首司喜號南面大王及夥黨二百餘獲賊諜鞫知另有大股將乘虛襲縣城徐本立因率所部急馳回縣令生員彭作元武生馬殿安等分路伏自率前典史周爲芬督兵前進三更時大股賊千餘蜂擁竄至槍礮絡繹我兵佯北誘賊近城伏兵起併力兜擊殲斃約三百餘落水溺死者不計其數生擒擒首王慶雲等及夥黨四十餘奪大礮四餘賊竄逸馬牧之賊爲徐廣緒王憲等勦敗十二日追至夏邑境鄭家集陣斃百餘生擒擒首李大

漢等千總張慕松手擒著名捻首姚廣德奪獲重五百斤二百斤大礮四十四日追至牛隄圈復擒斬數十匪竄碭山爲碭山兵勇擊斃百餘生擒二百餘獲巨捻首盧四等餘衆四竄其躡入商邱者爲代理知縣陸成沅署典史陳必受弋獲巨捻田谷禮等方賊之戰於鄭集也徐本立以兵來會至李亢集遇大股捻匪擊退之格殺二十餘生擒劉興傅等焚其巢周爲芬偵知駱三羣等盤踞張家花園因會管馳往設法捕勦賊恃衆抗拒兵勇受傷益死戰斃夥黨二百七十餘生擒八十餘遂獲駱三羣等奪大礮旗幟以歸是役也斬獲共一千七百餘著名捻首四十渠魁畧盡匪始震讐奏上請錄諸將士功

許之陸應穀移營

彰德以粵逆自懷慶解圍竄山西復至直隸故北路戒嚴先是武安涉縣山中有土匪乘機蠢動候補知府何懷珍署彰德營叅將全福奉檄以兵勇三百名往旣以次捕獲懲辦至是復令庶吉士傅壽彤會合何懷珍帶勇五百名署內黃營都司陳楚書帶本營兵二百名駐楚旺署

陝西副將春明帶陝甘兵一千二百餘名駐豐樂鎮彈壓備防請截留陝甘總督舒興阿所帶陝甘官兵二千不報九月二十四日內閣奉

上諭礪河南巡撫陸應穀職授山東按察使英桂爲河南巡撫英桂以十月初四日馳抵汴梁受巡撫事 上命英桂徐廣縉進駐蒙臺

英桂以徐廣縉籍隸鹿邑素爲鄉里推重半載以來勦捕得力請留豫勸諭倡練資熟手 上從之河南學政張之葛疏言沈項匪狀請飭

新任巡撫嚴加考核察吏安民以表治本 上以疏示英桂初河南

藩司鄭敦謹督辦琦善糧臺駐宿遷及是趣命回任而以江南藩司楊能格代其事復命署臬司牛鑑交替印務馳往陳州會同徐廣縉專辦勦捕擒匪是時豫省土匪自陸應穀調派官兵分路勦捕已漸斂跡惟確山之溝竹復有匪衆嘯聚搶掠英桂檄南汝光道麟泰督兵往捕至信陽五里店諜知擒首高朗等屯聚卽督州營密往擒捕獲朱梁等溝竹之匪聞風解散歸陳本境匪蹤稍戢惟皖擒李思林任二皮劉疙瘡

等猶出沒沈項固始聞與豫匪相混合豫省官兵亦時出境勦捕云四年二月粵逆詐稱土匪由蒙城亳州竄陷永城夏邑回竄碭山屯踞豐工兩岸土匪乘間復起徐廣緒應援夏邑中途礮斃數百格殺百餘生擒二十餘軍始得進是月二十八日沈項擒匪千餘焚掠恣擾牛鑑率兵往勦擒斬甚衆比收隊忽大股七八千自東南騰至我兵猝爲所乘傷亡弁兵百餘壯勇十數十七日牛鑑偵知大股聚沈邱之榮樓辱食以進旣至賊阻河抗拒我兵奮擊敗之十九日追至李橋二十日至韋寨戰皆捷生擒擒匪劉東舉榮魁元等先後斬殺凡四百餘奪大礮刀矛無數焚燬賊巢十餘所時方得 旨命牛鑑駐潁州英桂疏請緩之永夏商鹿之匪益橫總辦團練太康知縣祝塏激勵柘鹿永夏睢州甯陵諸邑紳庶輸資募勇得二萬餘人竭三晝夜力奮殺窮追所戰皆克斃悍黨千餘斬擒著名擒首宋書太周保善方鐵頭姬連科朱洪得藍悅劉秉堂等盡犁其穴得大礮三擡槍鳥槍等械地方漸以肅清南

汝所屬自英相帶兵防堵隨時捕獲李在智王十一孟三等及餘匪不下千餘皆實諸法至是汝陽羅山下正陽確山新蔡信陽遂平等州縣先後擒獲匪夥復二千餘署汝陽知縣張紹英羅山知縣鄭元善署確山知縣黃衡偵知擒匪邱包張麻海鄧子劉文煥王殿成夏第四于獅子范守信夏富沅張又周趙恩高何小毛何春明盧羣李士道張格拉王記更薛狗娃楊銅鍾等嘯聚訛搶不法狀因各率兵往捕計生擒四十餘凡所斬殺亦四千有奇云六月十一上牛鑑等功加牛鑑按察使銜餘升擢有差湖北捐升知縣廖慶謀以能練勇剿匪奏留差遣七月署正陽知縣劉鴻勛捕獲沈邱圍城擒匪劉元瘠楊倫署信陽知州袁詵捕獲桐柏戕官擒匪井世法井世魁並實法驛聞十二月上歸陳勲捕功

賞王憲花翎交軍機處記名遇缺以簡放代理商部知縣彰德

通判陸成沅等十八員廣西游擊常啓雲等十九員紳士大挑候選教諭謝謙等五員各進秩有差徐廣縉陳介眉視壇功論最陳介眉格吏

議不得上徐廣經以張之萬疏劾畏葸祝瑩爲蒙亭民訟其越境恣殺
方察治故皆不與按檢匪蘇添福等數擾永夏爲祝瑩所敗直傾其巢
斬殺過當所焚村莊屋舍甚多於是蒙亭間民有訟其妄殺者論者或
言皖檢本皆有室家以時出掠至是寢成流寇未始非操之太蹙有以
啓其釁端而商邱武生李景瑞等復具呈都察院上祝瑩迭次勦賊諸
功狀言匪情畏憚始倡言尋仇冀惑衆聽公徐廣縉爲賊所紿富祝瑩剿
辦得手之際輒檄調回豫且多方沮尼云兼以狀抵學使者故張之萬
劾徐廣縉畏葸不前論訐紛紛卽當時已見聞各異矣

土匪二

五年四月楚省官兵迭挫所募豫勇潰散潛回汝陽正陽確山息縣結
捻肆擾所在州縣弋獲寘諸法散勇易添富林賢朱明義等本著名
巨捻至是糾衆於汝陽縣之馬鄉集遇調防外委陳大德呂作相劫奪
軍裝器械詐稱官兵以二十日竄至息縣之烏龍集嘯聚光州州判駐
烏龍集署州判汪兆琛率丁役往捕爲賊所戕害光州知州周注都司
汪長清以兵進抵馬家集與代理息縣知縣劉宗岱會合二十二日馳
至烏龍集之任家堰猝戰失利兵勇傷亡甚多時賊裹脅已衆聲言攻
城周注劉宗岱各馳回戒備息縣城久傾圮劉宗岱率勇駐東關堵禦
二十五日賊至勢張甚兵勇不敵劉宗岱中槍落馬賊擁入城放獄囚
肆焚掠汝甯府光州各請兵且言南陽鎮總兵邱聯恩素爲捻悍請飭
赴息勦辦巡撫英桂據報以聞因言湖北巡撫楊霽遣弁來豫募勇並
不知會地方官一律給予路票以致漫無稽考易添富等曾經充勇打

仗與尋常土匪不同因飛咨邱聯恩移師光恩令河北鍾崇安帶兵五百馳赴南陽會同雲南臨元鎮總兵慶德防堵先是英桂檄候補知府何懷珍候補知縣廖慶謀守備百順山東賈右營都司盧佑清等各帶兵勇赴光協勦廖慶謀馳至息縣會合汝甯府通判耿潛甯搜殺匪夥即日克復縣城匪因西北兩路官兵阻截悉向東南分竄二十九日戊刻至光州城下署知州周沆率官弁紳民守禦匪衆環攻兩晝夜各路援兵漸集擊殺悍匪數十城上礮斃十餘始退竄光山大埠口署知縣張紹英方截殺間賊忽鳧水由間道闖入縣城會邱聯恩率廖慶謀及留豫縣丞張曜馳至與張紹英合隊圍攻廖慶謀勇隊進攻北門獲勝繞攻西門斃賊百餘匪衆負隅死拒英桂復檄南汝光道邊浴禮馳往會合邱聯恩等伺賊守懈於五月初八夜令廖慶謀張紹英率勇由東面缺城突入廖慶謀奮勇躍登大呼賊匪衆披靡我兵乘勢擊殺餘衆倉皇縱火奪門而逸縣城克復邱聯恩謀知賊向東南恐其由墨斗

關新店一路復入楚境山自率叅將成景知縣廖慶謀乘夜急追留都司穆奇賢駐守初九日追至文殊寺賊方與何家坂團勇接戰我兵繼至邱聯恩揮令廖慶謀率隊繞前截擊自與成景攻其左右立斃百餘賊向西大山之鳳凰頭奔逸據山頂陳寨槍礮滾石如雨兵勇奮尸仰攻斃其紅衣賊目餘衆驚潰追殺三百餘生擒數十比及河盡棄槍械衣履梟水遁我兵渡河復多所擒斬時已昏暮始收隊賊竄羅官店忠心店其地直達羅山邱聯恩恐乘虛襲城因令廖慶謀乘夜率勇繞赴羅山而自督兵逐北初十日抵操鐵鋪知已由竹杆鋪北走至河口寨爲署羅山知縣鄭元善截殺復竄息境爲兼理知縣耿潛暗截殺殘敗僅百數十人向東北鄉竄逸至包信集糾合散黨勢復振英桂以捷聞劾劉宗岱張紹英奪其官周洸汪長清均革職暫行留任學政張之萬亦疏言始臣按試光州尙無匪蹤及試旋正陽息縣新蔡諸境匪已充斥使地方官加意勦捕原可卽時撲滅乃崇延月餘竟至愈集愈多

邱聯恩鄭元善廖慶謀皆賊所素畏或居要地或任邊防不能兼顧匪遂益無忌憚州縣雇勇多出臨時更難得力請分撥高唐奏捷奉

旨援楚之師二千名派大員管帶先由光州一路剿滅此股再行前進

上以疏示巡撫詰責遷延貽誤之州縣會劉宗岱等被劾邱聯恩等已檄調進剿旬日間克復兩城事乃解時易添富在阜陽之艾亭息縣之長陵糾衆數百將應援各賊林其賢在包信集邱聯恩廉知急率廖慶謀張紹英分三路進至包信斃賊數十匪遁集東三十里之黃胡店十五日追至擣其巢斃賊六十餘首惡林其賢受槍傷匿禾黍叢中武生姜作新文生彭長庚獲之梟其首十八日賊竄李莊橋十九日至三義廟皆爲廖慶謀勇隊所及斬殺過差二十日黎明至洪廟適邱聯恩邊浴禮周注張紹英金朝棟鄭元善耿潛僧錢鏗各以兵至獲逆首王黨悍目梁小振葉路熊儀厚等二十四日逆首羅苗意與其夥黨潰圍出至馬鄧時深秋高粱徧地賊恃爲隱蔽我兵迫及格殺四十餘生

擒羅苗意王燦余小介彭墨王春江文西王喜道王東河等無漏網者於是易添富股匪首從各逆斬擒略盡奏上請錄在事員弁功

許

之英桂以易添富朱明義尙未獲購之益急於是新蔡知縣馬筮乾弋獲朱明義汝陽知縣金朝棟於汝陽洪廟率同勇目喻洪安團長龐豁然捕獲易添富朱明義自殺不殊鞫實卽其地正法檻送易添富凌遲梟首傳示以徇按易添富本李士林夥黨李士林投誠充勇挈之入楚迫李士林陣亡易添富等無所隸遂遁歸爲亂朱明義本名朱貴充息縣役夙與皖豫諸擒匪通當城陷時密結李士林之父李際田代書周之翰爲內應罪惡綦重故皆置極刑檄各州縣搜拏餘匪於是羅山知縣鄭元善獲任奮子趙麻子姚喜鮑等復獲息縣監犯劉協堂及其子劉牛賊之攻城蓋劉牛啗致云汝南通判耿潛甫獲王鳳安韓春等光山知縣梁永城孫亦仁曹汶岐等光州知州周注獲王鳳安韓春等光山知縣張紹英獲羅山巨擒趙廷羣信陽淮甯沈邱項城商水永城夏邑光

州息縣光山羅山汝陽遂平西平新蔡正陽確山各州縣先後獲攻陷
光息擒匪徐小洛楊小振彭二得等巨擒張瑞明及夥匪邵紅碑劉安
仁陳羸子徐小道王二雙刀郭勛周攻劉紫軍馬強姚羊李大元韓谷
子楊老小王闖王文元任成沈月楊翠庭劉馬徐添賜羅漢定桑玉朗
阮馬等歸德知府王榮第在永亳交界渾河集獲潘逢春等夏邑知縣
郭鳳恩在寶鞍山獲呂西等邱聯恩蒯賁孫周注獲巨擒黃五雷蘇明
義彭希孟等新蔡知縣馬筮乾會同廖慶謀張曜在新息交界桃花店
獲擒首徐堡幘及齊鰲梁載淦于善國等又在西岩獲易添富之姪易
道貞廖慶謀復獲王路田玉脩張羸等潁州知府陸希提偵知趙聚集
匪將渡河侵犯阜陽卽率兵迎擊獲李洪鈞辛二等叅將慶瑞在烏龍
集劉家溝獲劉成貴等邱聯恩在已信集督固始縣丞達德獲史國勤
等復獲易宗泰等邊浴禮獲息縣戶書王永璫及通擒之翟振翼馬騰
龍皆易添富羽黨或奉 旨嚴拏之犯訊明皆寘諸法於是南汝光

肅清是役也通計擒獲不下千餘斬殺不可勝算邱聯恩廖慶謀之功居多按察使銜牛鑑以老病乞休

上許之命前福建按察使徐宗

幹赴豫幫辦剿匪事宜云六年四月上剿捕功

賞金朝棟花翎知

府用鄭元善花翎同知直隸州用廖慶謀同知直隸州用馬筮乾同知用張曜知縣用山西潞澤營叅將慶瑞副將用汝寧營叅將成景藍翎紳士翰林院庶吉士盧士杰授職編修勇目喻洪安之子喻協中藍翎把總用餘文職汝寧通判耿潛修等十四員武職佐領松志等三十六員紳士戶部員外郎劉尙書廩生王受誥等十七員各進秩有差復周汪汪長清官易添富既平之後十一月復有散勇滋事湖廣總督官文咨言軍功同憲章張玉桂耿立功等私將遣散各勇招集千餘暨立旗幟偽造咨文護票聲言赴安徽投效由河南魯山一路赴潁州恐沿途肆擾知會飭屬查拏據報商水縣有湖北散勇黃秀仁等四百餘人恃衆毆傷丁役撞門爬城奪船東走知縣張冲魁追至周家口察知非

向憲章等而凶橫實甚縣役趙沅會爲所拒殺受傷多名適淮寧縣知縣王樹漢率團踵至擊斃數十落水溺死者亦數十焚其舟餘衆向東南潰逸新野縣有投誠川勇數百由唐棗交界襄陽鄢家埠口諸處闌入所至焚劫至水壘村爲舉人吳怡集團格斃五人傷四人知縣倪正鑒率勇繼之匪乃遁走鄧州旋出境巡撫英桂請 敕下湖廣總督

各統兵大臣嗣後遣散各勇先以尺籍注姓名歲貫移會經過省分及原籍地方稽考 上是之六年遂有襄匪竄陷鄧州之事十月鄧州

知州姚慶溥狀言初五日突有捻匪二千餘竄入州境之樞林關裏脅焚擄慶溥急以刁河防勇數百名出城迎敵初七日匪股大至勇力不支退守州城辰刻匪附城下圍東南西三面酉刻遂爲所陷署南陽知府何懷珍赴援不及賊踞城內外自白洛堰樞林關北穰東迤南諸處賊旗林立裹人掠財四鄉幾徧獵及內鄉鎮平南陽諸境郡城戒嚴留防宛南候補道周鼎徵亦以狀聞英桂時在鹿邑行營因疏言襄匪闌

入豫疆旣圍新野復陷鄧州恐成燎原之勢東南剿務方殷無兵可撥請

敕陝西巡撫吳振斌酌給精兵二千隸南陽鎮總兵邱聯恩統帶進剿因檄邱聯恩先率所部赴鄧州會同雲南臨元鎮總兵慶德候補道周煦徵合力堵擊兼顧宛郡署陝西巡撫譚廷襄奏派副將龍澤厚帶兵二千赴皖

上命與邱聯恩會剿兼以匪眾由楚入豫詰責

官文胡林翼等不得以襄樊無事置豫省於不顧期以三省兵力痛洗悉數殲除勿留餘孽於是邱聯恩等至鄧州以兵力薄弱激勵鄧州新野紳民在籍知府高振宛等倡輸集團旬日間得眾數萬以初七八兩日進攻連戰皆捷先後斃賊千餘生擒賊目程四等州城克復復分派兵勇暨散內鄉諸壇各股擒斬匪首劉二幌楊九先余富潰周小蠻及南召匪首僧人覺明唐縣匪首殷四麻子鄧州另股匪首馬四黑子林大川等匪遂回竄襄陽十一月搜捕餘黨焚林家扒賊穴斃其黨百餘楚境秦家集有首惡秦大富等盤踞因率眾進攻斃匪百餘執秦大富

周祖惠等四十餘鞠得破城焚掠狀皆斬之薛家集有分股肆擾因會合湖北鹽法道常恩捕獲周小麻子王胡論秦大賓等前賓諸法我軍方由黑龍集都司衙一路前進會圍州大猾趙邦壁藉團練名招集痞匪行鄉里湖北巡撫胡林翼檄叅將文明鮑超馳往捕治以書來期英桂檄信陽桐柏唐泌各州縣設防而令邱聯恩合楚驍勦兼顧豫圍於是陳師境上邊陲爲之肅清初英桂奏請楚省酌撥吉林黑龍江馬隊數百來豫協勦楚以重要隘不能分撥爲詞且請豫省馬隊赴楚合擊至是令唐訓方率師赴襄樊七年二月匪由均州房州復竄入豫省浙川內鄉諸境內鄉知縣楊鏞率團抵禦賊伺隙闌入縣城知府何懷珍及紳士高振宛高振洛各率勇團馳往會合楊鏞勦斃匪衆收復縣城邱聯恩得報急回軍勦捕時所部不滿二千十四日至李官橋猝與賊遇擊斬數十人追二里許忽左右伏賊四起圍之數里士相顧失色邱聯恩連射數賊皆應弦倒因引滿注矢擬賊騎賊無敢追者旣出圍

步隊爲賊困復躍馬大呼入圍拔出之凡數入入輒手刃十數人近之者皆辟易或瞠目立如偶不能仰視是役也邛聯恩盡矢皆竭血冰刀環圍累寸許比至半札店籍傷亡兵勇流涕自責親爲裹瘡傳藥衆皆感奮期翌日復戰於文曲集賊聞大懼乃夜遁復回襄陽我兵追至楚約楚軍夾擊以三月初六日至柏家集痛勦斃賊數百生擒匪首余學中匪乃四散潰匿龍澤厚一軍時方至宛初令至鄧州旋復調赴光州惟邛軍往來浙內搜除伏莽而角子山大坪頭匪已日熾十年正月巡撫英榮請錄員弁紳團功報可

咸豐七年三月土匪高汝升糾合張第三等在嵩盧連界之樓子關明白川滋擾復有另股在嵩縣屬之龔王廟諸處立大旗持槍砲嚇索錢財署嵩縣守備吳師顏帶兵往勦匪衆緣山遁至汝源鎮沿途焚掠復裹脅數百人依險抗拒吳師顏以汛兵寡添集民勇奮力勦擊賊始退敗追及五里許賊分股由山突出民勇傷亡甚衆吳師顏請兵勦捕河南府知府樊琨以狀聞時巡撫英桂督辦三省勦匪事宜駐新蔡得報據以入奏因言上年襄匪竄擾皖境本地土匪因年歲荒歉乘機繼發什伯成羣南陽所屬各縣訛搶焚掠之案層見疊出延及汝州所屬之魯山陝州所屬之盧氏近則嵩縣又有土匪聚衆竄擾若不嚴行勦捕迅速撲滅必致釀成巨患時兵力悉聚東南西北空虛徵調不及南陽鎮總兵邱聯恩追勦襄陽竄匪不遑內顧團練未成情形孔亟宛南一路岌岌可憂

上以嵩縣完善之區豈容土匪肆行焚掠命英桂嚴

飭河南府知府樊琨認真督勦迅獲首犯解散脅從毋任蔓延陝西巡撫曾望顏就近酌派兵勇會合勦辦豫省各屬整頓團練於是巡撫英桂飛飭樊琨督帶兵勇往勦前檄南陽府汝州各率所屬一體堵截匪衆聞官軍且至由孫家店竄入魯山縣境汝州知州程廷鏡率魯山縣文武及寶豐郟縣兵勇迎勦合擊陣殲匪夥張第三等二百餘人生擒陳法潰等二十餘人賊衆潰逃裹脅四散餘黨闖入函召縣境知縣符瀚率兵夾擊復斃賊百餘生擒匪首高汶升匪目王明照等並寘諸法餘匪竄逸入山官軍擄捕悉平之二十一日巡撫英桂在旱陽縣驛口橋行營以閭宛南土匪抗拒官軍自此始宛屬裕州泌陽舞陽汝屬西平遂平確山等州縣交界之角子山素有匪蹤出沒號紅鬚子咸豐六年六月裕州土匪李大春張五禿以年荒失業起意結捻訛索酒食李太春有檢夥金小毛胡汶修管紹堂王四劉淙林邊長太宋五賊張九千歲王月李士旺張澱卿劉漢元馬祥劉合任隊郭二瘋子陰立子李

六麻陳顯明張滿區陳永亮曹十一羅秀李二魚陳毛丁謝記周大海
許治王文行張蠻子王有合葛才王得成夏振有石順郭七鍾穴子鄧
中獻關福林石磨頭薛懸李太生李太祥齊剛胡康劉澁劉萬和萬小
四胡堂胡中劉梓把崔羣忠侯年秀王喜徐汶得楊順蔡四李塊王四
老虎等六十人張五禿有檢夥陳汰安宋老五王東王寶張海雲鍾汶
詳蕭大漢何鰲趙幘秀胡旺張添成馬汶詳何喜任治禮王得西張十
張蝙蝠趙幘王老九杜得林李七閻王陳月臨張義潰陳濱李俊黃二
袁科崔六崔毛崔林崔忠王缺子胡玉脩王亮王安楊心田許旺王懸
孫騾子曹聚保余和尚李泳清李幅石振玉王小羊馬有柯位張遂王
雙明溫得金小撓單得舒青山李道史紅青徐圪抵王進潮等五十八
人所至訛索酒食包送私鹽泌陽土匪王四老虎有檢夥王充李中玉
王四麻子李歪嘴李二膽大傅大傅小麻子李進才賈漢林杜大進高
平安趙倫陳坤陳七許連榮馬柱張騾子趙士祿岳潮名李廣聚楊鐵

鍾聶馬娃王鳥彭之得李羣李中和李磨頭賈萬祥劉林計毛陳迷楊松苗興馬洸順祝成章袁明剛何第四郭金玉婉開崔大穰傅來關小娃李八千歲李瞻李蕓鄧林楊清沅張二瘋子張中和盧振法郭萬興王汝富張萬機李狗李懸屈汝習步第四徐老五徐老七程幘禿王太平等六十一人爲一捻以泌陽兵役查拏圖竄臨汝白沙一帶訛搶私鹽因與李太春張五禿捻合猶以人數不多添糾羅禿子李相劉仲陳騾子何全胡第二張淑敬謝居李搭拉確山王保王全曹子血林李牛陳敬王三李和尙吳妮子江義孟第二江明張禮張二皮李八黑臉茹林郭相喬松喬良喬潰毛麻子劉根唐狗黑閣立閣明珠許扶許拴等三十五人頻行時陳汰安管紹堂又轉糾得不知姓名二十八人入夥於是總二百四十二人會於角子山以二十七人各持槍刀器械出山二十八日至裕州之破城楊樓訛索錢食爲兵勇所逐八月初一日由葉縣新店龍泉至墳臺與知縣王聯陞兵相遇斃陳毛許治步第四楊順

初三日竄至辛店集刦奪號馬兵勇適至棄馬逃入平頂山煤窖盤踞
擄審工潘沅法朱來朱三董可強李明張四兒王保祁六蔡喜李三搭
李洛王青山曹漢沅段三等十四人逼令入夥背負行李初四日葉縣
知縣王聯陞裕州小賒店外委韓殿元各以兵勇追至殲其悍夥丁射
記周大海羅禿子李相劉仲陳騾子許毛陳迷何全胡第二李懸生擒
婉鬧匪竄賀家渡口復追殺不知姓名二匪生擒王汶行楊鐵錘張蠻
子王有合搜獲財物槍械午後王四老虎等竄至寶豐縣強陽鎮迤東
之花石嶺知縣唐知銑兵至即遁夥衆徐汶得屈汶智劉林李俊黃二
袁科劉萬和萬小四胡堂胡中劉梓把崔六崔毛與不知姓名六人爲
官兵追及悉格殺之初六日至魯山雲臺觀山下刦行商遂萬全羸馱
爲知縣李昌時截回格殺王缺子王亮王安楊心田許旺齊剛胡康李
六麻劉澁陳七杜大進及不知姓名十餘人生擒關福林王青山舒青
山史紅青李三搭袁明剛李洛董可強李明馬育岳潮名潘沅法朱來

朱三等匪因分股回竄角子山張五禿夥百餘竄至郟縣墳頭鎮爲知縣姜儻擊敗生擒王允李金魁搜獲財物槍械匪因四散巡撫英桂以聞因檄屬搜捕餘匪先後弋獲首夥匪犯王四老虎等提省勘問獄具斬王四老虎傳首以徇餘匪分別絞流杖徒傷病庾死者勿議是時宛南土匪初事蠢動治爰書者猶按律定擬不以軍法其後始有抗拒官兵之事而陳汰安管紹堂亦遂分股蔓延大肆猖獗矣七年土匪李汰春復糾另股匪首李中顯王二黨等數百人窩聚角子山煽惑飢民勾結散勇時於近村訛搶四月由葉縣舞陽至禹州神垕鎮架人勒贖神垕鎮外委姚中道勦捕受傷知州程佑會襄城營都司瑞林帶兵馳勦匪竄汝州武巡店汝州知州程廷鏡率郟縣寶豐兵勇截勦匪向葉縣確山一路山徑奔竄程佑請兵勦捕時巡撫英桂在阜陽行營飭司由省派撥兵勇四百名檄開封營守備程金陞候補知縣金寶符管帶馳赴禹州勦辦匪衆旋由確山西平擾及郟城初止數百人及至臨潁東

火縱掠知州金梁率勇禦之勇役潰散五月初一日程金陞金寶符帶
勇追及與金梁會議初二日進勦戰於繁城迤西樞澗保街頭殲匪數
十餘衆退敗我兵奮追忽另股由西北襲我兵後腹背受敵我兵全潰
程金陞金寶符受傷祥符縣把總王總明死之巡撫英桂檄令總兵邱
聯恩統帶南陽鎮官兵候補直隸州知州李徵松募勇五百名赴許合
勦奏請將前調來豫之甯夏兵四百名截留赴許時南召內鄉鎮平交
界之大坪頭復有另股土匪數百人嘯聚滋事因復奏請 敕下陝

西巡撫曾望顏將調赴竹山防勦之署延綏鎮總兵龍澤厚一軍飭回
宛郡勦捕均得 旨允行五月檄按察使周士鏗出省督辦十八日

匪衆二千餘由西平竄泌陽牛躡街知縣鄧國樞敗之斬擒百餘是日
復戰於老君廟陣斃二十餘擒斬匪目李祥蔚明尉十九日鄧國樞駐
沙河店匪衆分股來犯兵勇奮擊卻之二十一日竄至確山之三尖山

知縣姚錕會合泌陽兵勇截賊於樂山頂獲夥匪陳四麻子等立寅之法二十二日候補知府葉法帶兵由西平之窪張分路進剿匪竄錢店我兵追及陣斃數十匪衆越山東竄至走馬嶺田北城諸處葉法由窪張會合西遂泌三縣練勇偵知匪首任墜率黨百餘距窪張三十里之火神廟盤踞因分兵襲剿戰於小頂山擊斬之擒許旺女匪康李氏並寅於法遂平知縣金益謙諜知匪首皆在泌陽遂平山中因以二十八日率練勇入山搜捕約行二十餘里遇股匪數百兵勇奮擊匪亦力拒自辰至未接連七仗斃匪百餘殺黑旗賊目追殺至泌陽縣之大嶺適葉法以兵夾會二十九日復夾擊連勝之於北山溝起獲鎗砲百餘適分股匪首許五率黨二百餘竄至葉法令程金陞金寶符及前襄城知縣余錦淮分路搜捕獲許五斬之餘衆斬擒過半賊以我軍連日急勦因先據山下牛角溝恃險抗拒連開大砲程金陞金寶符西平知縣高慶頤各以兵進攻賊退守回馬嶺官兵逼至嶺下連環轟擊相持三時

皆暮收隊甫抵牛角溝賊突下嶺呼殺我軍嚴陣待俟其逼近鎗炮刀矛奮力轟擊匪衆大敗死者枕藉自是不敢輕犯我軍臬司周士鏜由舞陽進駐窪張議以角子山袤延三百餘里闊九十餘里自舞陽以南泌陽以北東界遂西界裕葉重山疊嶂路勢紛岐賊倚山爲巢非附近民團山行路熟導兵深入不能窮搜請酌留兵勇防堵窪張而親率各隊入山搜捕匪知南北兩路兵集因圖西竄周士鏜派兵先至舊縣迎堵自由窪張節進窪張以西山路陡險我軍魚貫而行比至賊已竄竹園爲裕勇截殺乘夜竄踞小頂山裕州知府李蓉鏡斬其紅衣賊目吳毛追至牛心山斃匪十餘落崖死者無數由黃莊拐河至核桃園復爲兵勇追殺始向西南敗逸周士鏜以西路當魯山要道督兵自赴魯山迎截匪因折竄南召境之鐵牛廟南召練勇邀擊未利傷亡數人典史陳福年歿於陣周士鏜急馳往援而匪已翻山北竄我軍由魯山之西馬樓石坡頭岳村諸處追賊至汝州之打魚店禹州之神垆鎮沿途擒

斬匪首王九魏根及賊謀王明鄭天等連日大雨山路泥滑我軍冒雨
進賊在蔡寺北面山頂搖旗呼譟周士鑑麾甯夏官兵奪路上山靈州
營把總杜仕珍戰歿十三日賊竄禹州新鄭交界之風谷山頂周士鑑
檄李徵松帶領淮勇與襄城兵勇進勦營帶淮勇東河主簿彭希良亦
戰歿於是匪勢益張周士鑑請添兵助勦省城司道亦以禹州密近省
城根本震搖請再撥兵英桂據以入奏祥符營千總王聰明靈州營把
總仕珍南召縣典史陳福年東河主簿彭希良均贈卹有差至是而前
調之署延綏鎮總兵龍澤厚副將閻丕敏陝甘兵四百八十餘名始陸
續到營英桂飭令馳赴禹州新鄭與周士鑑會合進勦而風谷山之匪
乃分擾禹密六月二十五日竄至汝州登封交界之白沙溝又折回臨
汝鎮鎮與洛陽連境往來大道於是河南知府樊琨謀知賊近率署嵩
縣知縣王萬齡帶勇分路截擊王萬齡由閭莊青石嶺疾追至朱家嶺
賊回拒死門兵勇疲潰王萬齡身受數十創歿於陣萬齡以進士服官

河南補獲嘉縣署溫縣所至廉勤有聲至是陣亡時論惜之奏上照同知例從優議卹登封死事團長監生王弼元其子武童王銘閣監生張振綱唐進德從九品閻基田亦附奏賜卹有差於是匪踞禹州之大紅山時大坪頭之匪竄入嵩縣之盤續溝傳店馬街伊陽之泰山廟上店諸處往來游駛英桂檄副將閻丕敏管帶陝西官兵五百名由鄧州會合候補道周煦徵南陽知府何懷珍河南知府樊琨分路進勦閻丕敏由馬市坪追賊至焦園賊竄伊陽之泰山廟伊陽團練猝不及防接仗畧有傷亡裹脅漸多匪勢益熾然猶避兵而行於伊陽邊界此擊彼竄閏七月初四日閻丕敏何懷珍偵知賊聚黃莊因率兵勇急馳直擣賊列陣抗拒我軍連放火箭火彈然燒賊陣火藥轟斃賊匪數十匪欲奪路東走爲南召練勇所截折竄南路爲內鄉練勇所截守備戴大春縣丞溫逢春陣擒匪首趙兆餘賊梟水逸溺死甚多僅百餘人由山嶺竄越適樊琨率嵩縣知縣陳時夏帶勇追及是日申刻復戰於飯坡殲斃

數十生擒詹潮等餘匪逃散初五日復搜獲逃匪李窠等先後奪獲槍
砲百餘驃馬數十閤不敏等各以狀聞英桂據以入奏因言大紅山踞
匪裹脅日多頃自禹州新密迄登嵩洛陽境均有匪蹤往來靡定恐蔓
延西路動搖山陝且以臬司周士鏜所帶本省官兵僅二百名甯夏官
兵暨龍澤厚所帶均客兵不相統屬事權不一請將督勦三省事宜暫
交副都統銜勝保親率所部赴禹密一路督勦

上從之十六日匪

由嵩縣回竄汝州寶豐葉縣交界之炭窑嶺龍窩山諸處屯踞龍澤厚
閤不敏李徵松各以所帶兵勇圍勦賊於山頂拋擲木石官兵不能仰
攻因乘勢奔竄至舞陽縣之北舞渡二十日周士鏜會合龍澤厚與賊
戰於土山復戰於泌陽之牛蹏其時裹脅約四千餘始有馬隊署遂平
知縣金益謙泌陽知縣鄧國棟集團抵禦以衆寡不敵失利八月初九
日巡撫英桂自潁州移營時太和沈邱兩潦載塗改由水路以十四日
抵周家口賊在泌陽之沙河店周士鏜龍澤厚由洪山進兵會合汝甯

知府祁之鈞夾擊賊聞官兵將至竄繞洪山迤西晝夜狂駛由窪張東北竄舞陽縣南之窰溝靨聚距城三十里周士鏜等於初九日乘夜進攻賊壘賊竄王店尙店其地西通小頂山南達南陽賒旗店英桂得報急飭何懷珍杜賊西竄周士鏜龍澤厚扼其北犯賊已由裕境小史店竄楊樓英桂策大兵趨裕州賊必回竄葉魯成尾追之勢因自臨潁改道駐許州相機堵勦何懷珍以郡城戒嚴尋亦帶勇回南陽十五日賊掠賒旗店衆約五六千勢張甚於是英桂親督馬步隊自許州迎勦二十七日抵襄城賊之入賒旗店也輜重多裹脅衆因分三股一竄大河屯羊棚汎外委王銘新率泌勇戰不利與團首貢生郝恆太皆陣歿團勇死者十九人其二股竄至唐縣源潭鎮放火搶掠知縣任愷偕湖陽汎外委張祥麟以壯勇八百駐城西里橋備賊二十一日黎明馬賊數十騎步賊四五百過河薄我軍任愷張祥麟揮衆擊之陣斃三十餘擒斬常林畢騰程汰宋老虎王五郝鐙兒賊由源潭復與大河屯匪股合


併盤踞二十三日邏獲馬賊供稱匪首崔姓派探唐縣城守盧寶欲合
羊棚匪攻城唐縣兵勇少勢甚急二十六日龍澤厚聞不敏以兵至城
下人心始定賊聞官軍至乃竄泌境之雙廟鎮諸處英桂以賊情詭譎
避兵而行必四面鈔擊方足制勝因檄河陝汝道夏雲岫親赴魯山督
各縣扼西路汝寧知府祁之銓赴遂平率各鄉團防東路南陽知府何
懷珍率鄧州勇由西南進合龍澤厚一軍相機擊勦臬司周士鏗督候
補知府葉法帶勇屯舞陽斷其回竄特飭總管格綳額德楞額副將伊
里綳阿雙慶等統帶馬步隊一千三百名馳詣泌陽迎擊而自駐葉縣
調度策應雙廟之賊忽分四股由唐縣一路焚掠直至泌陽二十五日
圍城放火武生李千城李衛城率衆伏關廂射卻之鎗馬步賊數十城
上復開砲轟斃賊數十始敗退去城十里屯踞龍澤厚何懷珍先後
到泌匪由二十里鋪竄高邑王店鄧莊鋪諸處脇從愈多我軍僅二千
餘衆寡不敵請濟師時諜聞裕州小頂山另有匪五六百將俟大兵進

攻襲我後巡撫英桂以小頂山爲進軍路卽檄格綳額等由小頂山
進兵先除此股再與龍澤厚等會勦泌匪仍飭龍澤厚何懷珍就現帶
兵勇偵賊所向併力躡追九月初二日賊由溝竹刑店小常店竄確山
去城十五里知縣姚錕嬰城守格綳額等軍至小頂山遇賊殲三百餘
餘悉奔散葉縣保安驛丞胡慶祺邏執匪首徐禪頭陳雷斬之初五日
格綳額抵高邑與龍澤厚軍合援確山初七日抵城下匪適攻壤北面
城門未及進聞官兵至卽返旗迎拒格綳額德楞額督馬隊衝突槍箭
齊施殲斃甚多賊猶不退伊里綳雙慶率海擊冷慶承惠督步隊衝入
賊陣勢少卻復有賊三大股漫山堙谷蜂至接應我軍屹立不動於是
知府何懷珍候補知州馬履泰候補直隸州知州李徵松候補知縣王
榮列分東西兩路繼進龍澤厚閻丕敏帶兵由城下繞至賊後鏖戰一
時各殊死鬥忽馬賊四百餘橫衝我隊格綳額德楞額各以親兵張兩
翼迎擊先敗其馬賊兵勇益奮匪勢不支始紛紛敗竄我軍追殺至五

里山下是役也斬首一千六七百級生擒一百餘奪槍砲千餘羸馬二百餘刀矛旗幟稱是屍藉徧野餘匪六七千越山逃竄確山城圍遂解我軍乘勝躡追由登秀山直至老樂山復斃匪五六百生擒百餘軍功李鳴山執黃衣賊首張景斬之鄧勇杜國楹格死肩輿紅衣賊目五黃衣紅袴賊目十餘皆暮收隊屯確山城北朱胡同附城匿賊搜捕悉盡格綳額以匪衆被創膽落宜乘其喘息未定併力躡追初八日黎明馳至老樂山胡家廟搜捕斬擒七百餘未刻始抵沙河店踞賊數百棄械紛竄奪獲千餘斤大砲一自姜莊追殺至張堂東突有賊數千我軍槍砲環擊復以馬隊鈔其竄路呼譟迎拒追斬數百擒紅衣賊目沈旺曹振清是役也斃匪復千餘奪槍砲刀矛千餘餘衆竄入角子山我軍由山口鈔進五里許捕賊二十餘以深夜山徑紛歧未敢深入暫駐沙河店是日敗匪之竄至蔣河者爲知府祁之銓遂平知縣汪斌才擊斃數十生擒匪首劉遂等其至上渠下陽者復爲官兵擊斃角子山股匪脅

衆萬餘倡亂數月蹂躪十餘州縣至是始大受懲創奏上得
事出力員弁俟肅清後彙奏請獎

旨



匪自張堂被創大股越山餘匪四竄英桂以老樂山徑路紛歧檄龍澤厚由南路何懷珍由北路德楞額等由中路約會進攻初十日中路官兵入山搜捕南北兩路失期於是賊復竄遁十二日突至保安驛練勇失利五品軍功方元燮死之時英桂駐葉縣馬步各隊悉出捕剿惟餘親兵小隊四百餘令副都統銜協領庫克吉太率以禦賊適德楞額伊里紉阿雙慶等追至會合匪不敢戰由裕州郭橋竄花子溝衆二三千登紅嶺抗拒潛以賊二百伏土山我兵悉殲之擒其執旗匪目趙林乘勝搶登紅嶺冒雨直進匪衆於半山搖旗迎拒兵旣交旋敗潰越山奔竄復追殺百餘至四十里之礪盤莊張堂竄匪之至遂平橫山者爲知府祁之銓截殺擒劉復義曹拴等至舞陽許灣者爲候補知府葉法截殺擒李騾子張的蠟等至姚溝者又爲葉法捕獲張圪意王成等至拐河者爲魯山知縣高天寵在籍府尹宗元醇候補都司白兆祥擊敗復

於交口大戰斬紅衣賊目六匪夥百餘擒王二劉五等奪大小槍礮數十刀矛不計其數追殺一百四十餘里於是由張堂回竄之匪略盡

上以陝西巡撫曾望顏奏南陽失守詰英桂以籌辦情形英桂疏連日戰狀以聞因言府城並未失守前調南陽鎮總兵邱聯恩自潁州來葉會剿至是嚴檄催之効龍澤厚何懷珍失期請摘頂戴裕州知州李蓉鏡西平知縣高慶顯堵剿不力請革職畱任皆允行紅嶺之戰牛嶺匪首梁道榮供言與陳汰安蕭況王三辦子管紹堂爲五大股旗分五色梁道榮爲紅旗首初蕭況與皖逆張樂行約欲攻下確山以九月至周家口合捻至是連敗計不得行十六日匪竄南召之曹集復糾合山內土匪二千餘德楞額伊里綳阿等急馳追及曹集在叢山之中因先以兵斷胡蘆灣出路揮衆入集斃匪二十餘匪由集後竄入半山我兵銜尾躍登匪衆據高矢石交下我兵蒙木板以進斃賊百餘追殺八十餘奪獲槍械贏馬甚多時大雨如注山徑泥滑我兵亦有傷亡賊遂翻

山由黑驢溝至李青店肆掠竄入馬市坪盤踞德楞額等規畫地勢以馬市坪在峪頭溝迤西溝長十餘里寬僅二十餘步三面皆山南面尤險惟東路繞山可以進溝山內溪澗紛纏水深二尺許人馬可涉議令龍汝元冷慶巴揚阿王恭烈乘夜分道潛進設伏馬市坪後時龍澤厚聞丕敏李徵松各以兵來會因令龍澤厚等於南面山後備邀擊十九日黎明大隊由礮溝前進節節設伏德楞額親率馬隊入溝誘敵匪衆二千餘迎敵相持未決馬市坪煙燄突起我軍見賊後隊動知伏兵起奮力猛擊與龍汝元等前後夾攻斃匪七百餘餘衆棄械登山復爲龍澤厚等邀截立斃四百餘生擒數十追殺二十餘里至石洞嶺復斬首百餘級生擒陳春王七兒等是日鏖戰五時之久斬馘千餘奪匪首銅釘甲一銅僞印木戳各一羸馬槍械不可勝計餘匪四散逃竄其竄魯山者爲高天寵設伏擒陳結生等格殺餘衆竄遂平者爲候補知府葉法知縣汪熾才生擒衛槎張朗頭等格斃餘匪逃回泌陽者爲練勇拏

獲喬惲保李六雲等斬之於是裕泌舞確尙有零匪潛匿山內是役也
匪眾喪亡幾盡或言王三辯子已死於兵蕭泥於戰敗時棄甲登山死
亂兵中亦難指實我兵傷亡數十人京營候補游擊龍汝元左手受矛
傷直隸候補游擊冷慶左手左臂受石傷英桂具以疏聞因言臬司刑
名總漚地方庶獄亟須清理奏令按察使周士鏗回省而以所帶蜜夏
官兵交龍澤厚統帶其餘壯勇交葉法李徵松營帶其風谷頂陣亡之
候選主簿蘇雲龍保安驛陣亡之五品軍功方元燮大坪頭陣亡之泌
陽汛把總張士位均於事後奏請議卹云初賊之竄擾多在舞裕平衍
之區至是屢爲官兵所敗計窮力竭因謀所以迂我師者始由嵩縣盧
氏入山蓋山徑蜿蜒我軍馬步不能成列用是遷延裹脅逆裔復張嚮
使各練勇嚴扼要隘不令入山則殘賊無多已就殲滅論者惜之於是
有三川街之戰賊自馬市坪分竄其小股百餘至焦園角村官兵追殺
略其大股數百由嵩縣孫家店搶掠竄至嵩盧交界之黑峪欒川先


是欒川山中有銀礦數處歷久封禁匪徒時或竊挖近數年招集亡命漸多賊之始至不及四百糾合礦匪復有衆八九百聞大兵追至復西竄其地叢山峻嶺徑路愈窄兵勇皆裹糧繼爭附而上所至露宿十月初一日抵欒川聞賊竄三川街蓐食以進盧岳知縣黃縉昌禦賊於白土街戰不利勇役亡潰陝州鄒州王詒以兵赴援道遠不卽至初三日德楞額龍澤厚伊里綳阿由楊樹嶺追賊至三川街三川距欒川百餘里土壤沃饒地勢稍卽平曠橫徑五六里我軍規畫形勢先以馬隊由街北鈔至步隊兵勇東西進攻賊殊死拒我兵奮擊擒其執旗賊目數十首二百餘級賊衆越嶺敗逃追殺二十餘里至八里堂山復斬首十七級生擒匪首崔大標等百餘餘匪僅二三百越山西竄是日奪贏馬百餘槍礮數十刀矛長竿數百抵暮收隊屯營三川街鞠據崔大標供言蕭況在馬市坪棄甲逃至黑峪欒川糾合礦匪復圖抗拒官兵今又被勦窮促其死黨止七八十殘匪不及二百欲自辛科嶺小溝河一路逃

竄云賊遞降詞德楞額以蕭況等罪大惡極法所不宥且詭謀叵測不聽請因議令龍澤厚聞不敏由小溝河一路躡剿而自與伊里紉阿諸將領由黑巖嶂繞越堯擊賊至小溝河官兵踵至持之甚急賊復遞降詞官兵爲其所紿猶豫間賊已乘間兎脫至七里砭朱陽關練勇二百人扼七里砭賊不得過因向五里川奔逸官兵至七里砭以書抵德楞額候進止越二日德楞額伊里紉阿雙慶等由黑巖嶂繞至七里砭與龍閭軍會合前進山路盤折動輒數百里以故軍行濡滯賊之迂我師者以此於是匪由五里川竄至陝西雒南縣境十二日我兵追至雒南之灰池子偵知匪衆盤踞陶坪東西兩山德楞額龍澤厚督兵進擊匪見我軍不敢迎拒遂分兩股一向西南藥莊一向東南大安山德楞額等議分兵爲兩西南爲陝省商維等境龍軍追剿之於是德楞額等督馬步躡抵大安山時已昏暮乘夜進兵於三更後呼譟登山匪衆驚擾自相撞擊多落崖死者我兵奮擊復斃百餘餘匪越山狂奔比明追及

復斬數十此股略盡時十月十四日也德楞額以樂莊竄股較盛龍軍
置弱陝境山路隘恐爲賊所乘因於是日未刻馳往策應比至樂莊
始知龍澤厚一軍由西坪赴龍駒寨與賊相左而賊衆已於十三日由
樂莊竄至武關鎮勇接仗失利匪衆遂由清油河諸處竄擾商南縣城
爲守城兵勇開礮擊退始遁走富水關一路回竄浙川廳境之西坪人
數稍衆我軍星馳前進十七日抵丁河店偵知賊自北山溝竄踞北峪
山時龍澤厚一軍尙未及賊十八日寅刻我軍鈔進山溝先令馬隊於
溝外斷賊鈔路德楞額等親率步隊驀越亂石嶺奮勇進擊匪衆六七
百蜂擁迎拒兩山飛石如雨我兵連開鎗礮斃賊七十餘匪忽由山後
鈔襲我軍爲馬隊截殺始敗退我軍馬步併力衝殺復斃匪數十匪向
山僻竄遁時日已暮山深箐密恐有伏賊因收隊是役也兵勇亦有傷
亡外委夏青山朱玉魁各受矛石傷獲夥匪于吉鞫稱逆衆因官兵痛
剿情急竄避陝境又爲我兵及陝省防兵截回意圖竄擾朱陽關西峽

口諸處並以山深路險官兵馬隊不能馳騁惟向山僻處行走俟裏脅衆多或回竄唐泌或馳擾陝境云陝西巡撫曾望顏添調固原官兵分赴商維兩縣協力堵剿英桂因奏言我兵馬步各隊自九月初入山道勦馳逐層巒疊嶂間每日跋涉數十里或百里不少休息人馬疲乏必須添派生力軍助勦於是飛檄邠聯恩一軍迅赴浙川內鄉會合德楞額等相機勦擊時確山等境南路伏匪先爲汝甯知府祁之銓督率遂平縣捕獲徐毛江利害王小明劉相一等兩陽知府何懷珍督率鎮平營縣捕獲李朝玉李四旺等魯山知縣高天寵捕獲常山等署葉縣知縣鈕達璋捕獲劉碩勁等及邠聯恩兵至復督率地方文武勦游擊柏英在象河關斃匪三十餘泌陽團勇在羊角北山斃匪十餘生擒楊有書等祁之銓率團在豹子山老君廟溝竹等處斃匪四十餘又捕獲匪首鄭成功匪夥李二能等署遂平知縣汪斌才及委員陳宗閔李店常玉堂等處生擒杜疋落等候補知府葉法督同舞陽縣捕獲匪首王

柱于代理裕州知州韓潮捕獲李禿成等礮山知縣姚錕捕獲陳老九
張滿昌等於是伏莽漸清而邛軍奉調前赴浙川內鄉矣英桂以捷聞
上以龍澤厚逗愒不進遷延長蔥襁其職仍留營自效



北峪之捷賊由內鄉竄米岩坪復竄軍馬河皆在萬山叢脊中十月二十五日我軍由蛇峪溝進至黃柏溝突與賊遇槍砲連擊轟斃數十匪退入溝死拒拋擲木石紛如雨下山皆亂石無路可通我兵因繞越蛇峪由雁嶺溝石坡呀諸處規畫獲賊譚翰稱賊於黃柏溝分兩股一股蕭況爲首由板城至夏管欲竄嵩縣等境一股王三辯子朱魁爲首欲竄伊陽汝州一帶因言王三辯子實不死前獲犯皆妄供云二十九日我兵追至夏管蕭況已率衆翻北山由青岡樹葛條爬等處竄入嵩縣之龍王廟我軍卽由慶園追躡十一月初二日及之於岱青溝賊於南山屯五隊山口或疊亂石或刨坑坎以限我軍初三日德楞額等奪路搶登南山斃賊數十生擒于安生等匪退往北山復追殺十餘以昏暮而止察賊隊人數似稍增者因鞠獲賊始知有崔狗娃者率二百餘衆新附焉至是蕭況死黨有三百餘裹脅復六七百約衆千餘云初七日

匪由梨樹街竄至廟灣復至舊縣集盤踞搶掠初八日我軍追及之由唐嵯沿河勢至任嶺過草橋擒斬賊叔夥匪賊退登鷄冠嶺北竄我兵銜尾疾追匪衆越嶺阻伊河將焚橋阻道路兵至滅火修橋且戰且進旣渡河斫斬悍賊十餘賊由楊坡嶺奔竄入溝我軍追至山下德楞額相度地勢山後秋樹嶺溝長十餘里兩山夾峙因派兵斷溝口親督各隊分路搶登兩山槍炮轟擊匪衆卻退至秋樹嶺分踞兩山頂各數百人山後突出悍匪三百餘與我軍短兵相接各殊死鬥天津勇隊奮呼先登龍澤厚率槍隊繼之立時轟斃二十餘匪始敗退我軍賈勇追殺二十餘里先後斃匪三百餘生擒楊陵兒等解散脅從甚衆是日大風雪士卒手足皆龜裂蕭况率其殘敗遁至秋爬諸處初九日德楞額率衆追至秋爬賊方聚食我兵掩至疾擊殺斃十餘生擒二十餘偵賊由永寧竄逸十二日追至永寧之七里坪永寧練勇與賊戰各有傷亡賊聞兵至由永甯之龍窩宜陽之蔡店竄至汝州之臨汝集沿途招集散

匪煽惑饑民復有衆二千餘踞蜈蚣山負隅抗拒其在山下者我兵追至殲斃百餘賊蜈蚣山頂槍石交下德楞額等謀誘賊下山陽令馬步退屯臨汝集潛於四路設伏復令步勇數十拾賊所遺槍械誘致之賊見我軍退接踵而下將近臨汝集二里許德楞額伊里綳阿等四路伏兵鈔出槍礮齊施刀矛並進立斃悍匪三百餘衆狂奔復踞蜘蛛山我兵乘勢上山復斃百餘生擒十餘賊南竄觀山是役擒斬共六百餘奪駱駝牛馬槍矛旗幟甚多委營總蘇克金追賊先登左手受矛傷十七日德楞額等追至觀山賊屯踞距山十里之葛料街因令馬隊先由嶺後鈔襲步隊繼進賊見官軍卽由沙菓園竄至寨山適龍岡各軍天津勇隊汝州團練均馳至會合四路兜圍登山攻勦時已昏黑瘴霧迷漫賊飛石如雨我兵施放噴筒火彈然燒荒草樹株乘勢斫殺甚多悍賊數百向東奪路與汝勇混合鏖戰互有殺傷龍澤厚等率陝兵奪勇躍登與賊鬪於黑霧中左右衝突斃賊無數把總龐秀文武舉姚必泰

劉開源外委李成李莊董積善徐鼎甲力戰陣歿守備戴大春爲賊所得罵賊不屈賊刳其雙目以火藥置眶中轟死之十八日賊分兩股一竄水磨溝一竄風穴寺德楞額以風穴寺逼近汝州卽馳援而匪已遁由麻溝盤泉寺老山坪至風谷垵盤踞有馬賊四十餘步賊十倍之德楞額令步隊潛伏礮谷間以馬隊鈔擊賊敗東奔伏兵紛起迎殺斃賊八十餘生擒喬仗頭等百餘匪勢潰散馬隊追賊至密縣之苟堂集復斃賊四十餘奪贏馬槍械甚多殘匪僅百餘人跳澗逃逆逆首蕭況李龔子在焉二十二日至大紅山寨我兵因一夜急馳百二十里比明抵佛山及賊陣斬二十餘擒匪目徐炳義等餘匪五六十徒跣奔逃二十四日卯刻追及柳架山復格殺三十餘生擒台洪保張林張順等蕭況李龔子率其死黨數十自禹州分竄李龔子爲知州程估弋獲復獲李二王雙印朱成等二十二人格殺數十人而風穴寺竄逃匪股殲除遂盡其水磨一股約四五百人十九日五鼓竄至魯山縣境脅衆復有千

餘知縣高天寵率團迎擊斃匪三十餘團勇初勝賊敗委員候補通判汪瞰歿於陣英桂得報檄開封營守備羅仲保帶兵勇會合葉縣裕州分路堵擊復檄鄆縣恩督兵進剿二十四日軍至裕州小史店偵知匪踞象河關因會合羅仲保裕州知州張應燁葉縣知縣鈕遠璋各以兵勇馳往兜擊匪衆登山抗拒官兵槍礮環攻斃匪數十餘衆翻山南竄復追殺百餘此蕭况分股也王三辦子分股由西溝口竄入嵩境之湯營練勇迎勦擒其夥黨呈觀等旋復失利匪漸竄入永甯境之程村先是經由宜陽知縣李恒率兵勇擊之斃馬步賊數十餘復爲永甯知縣張濟截殺牛擒向光澗等追至三鄉鎮而賊由鳴皋折竄伊陽之紅嶺知縣宋豹文蹙之十八盤中斬其執旗賊目賊又竄入汝州礮子窰知州程廷鏡會合伊陽練勇復斃擒數十餘匪分兩股各二三百一竄州境之桐樹里陽樓諸處爲河陝汝道夏雲岫擒殺百餘殘匪不多復爲裕州伊陽兵勇追至併力合圍斬擒殆盡一由伊陽之峴山竄至

魯山之北牧逆首王三辯子在焉知縣高天龍會右把總徐春芳典史
吳夏琛團總兩府尹宗元醇各以兵勇合擊鏖戰數時徐春芳奮勇手
刃數賊執逆首王三辯子於陣中賊隊大亂投崖死者無算餘眾敗北
追殺三十餘里殲除盡匪首宋魁及張汝化等亦以次就擒首逆解
大營斬首梟示餘悉併戮於市人心大快按角子山土匪以陳太安蕭
況王三辯子梁道榮管紹堂爲五六股黨聚爲餘首殺數十戰殲殄淨
盡惟餘數十人竄入南路王三辯子梁道榮已就擒其蕭況陳太安
管紹堂三人隻身亡命於是英桂奏言西路肅清河陝汝境已無賊蹤
而南路伏莽尙多亟應剿滅因令德勝移移勝之師與鄂聯恩及
地方文武會合按拏以期淨絕根株無留後患奏入
上嘉勦捕功
開復巡撫英桂革職市任處分加記名副都統傑勇以國恩總管德勝
額頭品頂戴黑龍江委管總儘先協領蘇克金副都統銜提千總銜藍
翎魯山汛把總徐春芳以千總儘先拔補並加守備銜候補通判汪職

署陝西東江口都司陝甘督標右營守備戴大春陝西署循化營千總
保安營把總龐秀文署秦安汛千總武舉姚必泰署定邊營把總武舉
劉開源署暑陽把總固原營經制外委李成署鞏昌營經制外委額外
外委李莊西固營額外外委董積善署臨洮營經制外委馬兵徐鼎甲
俱照陣亡例從優議卹有差

上以皖省六安未復霍山繼失舒桐

廬鳳徧地賊巢大軍卽日克復金陵賊必盡趨安慶皖北喫重

命

英桂回駐正陽關會合袁甲三扼守要隘英桂以角子山大股雖就殲
滅餘匪回竄入山難保不復圖嘯聚逆首陳太安蕭况管紹堂尙未弋
獲南路伏莽尙多非親督剿辦不能得力請暫緩行

上是之南路

伏匪其著名者如汪明陳國秀崔四等皆各有衆數百出沒不時其溝
竹蠟燭山諸處復有另股土匪或二三百或一二百往來游弋英桂慮
與南竄敗匪勾結合夥檄官軍及地方文武合力搜捕於是祁之銓汪
斌才在毋豬峽格殺執旗馬賊三人夥匪十餘人在確遂交界擒張殺

曹廷瀾斬陳平及夥匪等在挑溝會合蒯賀蓀擒趙汝冲等五人張應
燁在裕泌交界斃汪明股黨李二至等十二人擒王四老虎等三人羅
仲保在裕葉交界會合鈕遠璋擒郭三林臧玉來等汝州密縣遂平裕
州南陽確山西平舞陽泌陽各州縣先後拏獲李金聲柴秉魁岳毛劉
八千歲張玉石余盛苗小發物喬二劉喜成趙花狼劉來余海成袁甲
等數十人祁之銓復拏獲巨捻房明楊千添明等尹第二李歪子郭椿
甲王瘋子及逆首蕭況之父蕭第五等何保珍協同閻丕敏殲除崔四
一股蒯賀蓀督率把總石三元在水田山拏獲角子山首逆管紹堂伏
莽漸稀邱聯恩德楞額兩軍始得專意南竄之匪初南竄之匪由南召
拐河圖竄角子山自象河關敗後僅餘數十人南遁歷賈樓梅林寺陳
溝諸處沿途焚擾裹脅稍衆邱聯恩等躡及匪不敢拒緣山繞避因令
遂平知縣汪斌才率下陽團勇於陽店一路堵截汝甯知府祁之銓候
補知府蒯賀蓀各以兵勇由張堂進擊邱聯恩何懷珍自梅林寺前進

之吉林黑龍江餘丁各二百名以資調遣未幾 上以河陝汝境匪

股已就殄滅南路竄匪無多有邱聯恩一軍搜捕德楞額格綳額所帶馬隊應移緩就急卽由新息赴勝保軍營復因金陵已有克復之機攻破後逆衆必圖北竄命英桂親督大兵前往陳州駐紮爲勝保後路聲援英桂得 旨督勦益急二十四日賊由晒山黃草坪復至桐柏泰

山廟找兵追及陣斬百餘生擒史七等敗匪回竄角子等山邱聯恩德楞額復由泌陽一帶山內追勦沿路均有斬獲汝甯知府祁之銓及裕州遂平葉縣舞陽各州縣先後擒斬渠魁盛第二小王黨屈小發物李盡法等匪勢窮蹙適沈邱項城教匪事起英桂因以餘孽責成邱聯恩會合南陽知府何懷珍督地方文員勦辦而自引馬步各隊赴援光固檄陳州知府安奎馳赴沈項督各縣勦捕教匪因奏言前留吉林黑龍江餘丁四百名頭起百名已由信陽赴楚僅留後起三百名強半無馬軍械亦多不合擬添募壯丁整製軍火一俟齊集剋期啓程復請將湖

北駐防襄郡之營總舒保所帶馬隊暫調來豫一併赴援光固均得

旨允行八年正月賊在角子山毛草坪盤踞時德楞額等馬步已抽調出山邱聯恩何懷珍督帶兵勇以初二日抵毛草坪匪衆登山抵拒我軍槍礮擊斃其前鋒悍賊勇目侯允升執旗躍登賊飛石如雨侯允升陣歿兵勇奮呼繼進復斃悍匪數十匪始翻山遁越祁之銓以兵來會追殺至灰窰賊衆正欲上山我軍疾馳遏殺生擒侯成等餘衆星散追躡無蹤鞠據侯成等供言逆首陳太安因逆次被剿死黨殲殺殆盡官兵捕勦綦急卽圖遠竄云何懷珍密遣邏卒四出偵知陳逆潛匿娘娘廟山中因親率練勇於初六日馳至令候選知州馬履泰帶勇由東路進試用縣丞恩奎分帶南陽府勇由西路先占山頂候補縣丞陶鳴遠時奏官李斌壁壁直前收捕遂生擒陳逆械送大營磔以徇按逆首陳太安與蕭况等各糾衆萬餘分五色旗爲五大股迭與官兵接仗圍城戕官燒搶劫殺皆其主謀又爲首逆中之渠魁罪大惡極生民切齒

匪衆知我兵四面兜截圖奪路東竄先撲下陽汪斌才率衆禦之匪退登至頂山適邱聯恩等各以兵至斃匪百餘追至大頂山匪衆登山飛石抗拒我兵奮擊轟斃賊日復追殺謝山悍賊擒擒首張二紅史玉等賊敗遁桐山經石滾河復爲練勇格殺餘匪百餘奔角子山老巢邱聯恩祁之銓何懷珍等分路追勦十二月初五日至泰山廟賊方造食兵至賊衆潰入大山我兵越嶺急追至牛寨沿途斬殺餘賊越山遁時德楞額自舞陽田北城進兵至大頂山而匪已南竄與汪明股合勢遂復振知官兵大至圖避楚境旣至桐泌交界之黃岡爲外委黃懷太截殺邱德兩軍繼至擊斃百餘擒匪首胡倫修及夥黨數十復追至馬谷田復斃數十生擒劉振等而賊遂竄楚境矣於是英桂檄邱聯恩追勦竄匪德楞額搜捕各山兩軍遂分奏上搜捕伏匪功祁之銓 賞戴花翎蔭貢孫俟補缺後以道員用何懷珍開復失守所屬處分及原官頂戴汝甯營藍翎儘先把總石三元免補把總以千總儘先補用而以印

聯恩前調赴內浙兵不卽至効其遷延不進

上命摘頂翎示懲邱

聯恩者閩人世襲一等子累遷南陽鎮總兵勇敢有謀每戰必身先士卒善以少擊多紀律嚴明士卒親附時軍饟支絀邱聯恩所帶鎮標兵丁饑不時給輾轉濡遲職是之故巡撫迫於功令雖據事叅効旋以討賊任之匪之竄楚也復結黃草坪土匪數百亡命劫掠回竄唐縣之晒山龍泉寺十九日邱聯恩率知縣任愷追及匪據山頂我兵奮攻先斃悍匪數十把總胡鳳山深入陣歿匪衆乘勢下壓邱聯恩親督大隊拾登山坡鏖戰四時賊始敗遁先後斃匪百餘兵勇亦有傷亡任愷以練勇乘夜追殺三十餘里生擒崔二程麻子以歸賊復竄桐柏邊境黃草坪奏上儘先千總信陽營三關汛把總胡鳳山照千總陣亡議卹時六安逆擒句結粵匪意圖北擾徑撲商城之開順街武廟集竄固始縣之郭陸灘副都統勝保移軍固始旋馳往三河尖扼堵光州境之大河灣亦有匪蹤英桂得報復檄德楞額星馳南援奏留經過豫省赴楚補額

及是凌遲梟示人心大快初八日邱聯恩等進至鳳凰山與張汶成遇衆約三百餘望見官兵旗幟卽走迨追殺數十初九日至大頂山祁之銓率各團勇繼至與賊接戰自己至申歷四時槍礮齊發繼以短兵鏖賊數十餘墜崖死者復數十生擒馬萬林等於是匪復竄至三寨山占據山頂十二日邱聯恩等追至四面合圍指麾各路民團密布山麓自酉刻圍攻至三更東風大作月色如晝賊抵死下雷我兵益奮力噴筒火彈火箭鎗礮順風併發轟斃賊數十墜崖落澗者不計其數有分股數十人由山凹奔突爲何懷珍委員蔡德豫等截殺無遺是夜直至天明賊屢突均爲我兵擊退至十三日已刻賊饑凍垂斃我兵乘勢躍登山頂刀斫矛刺擒殺賊百餘竭一晝夜之力悉數殲除外委謝敬及兵丁受礮石傷者十數同時裕州遂平及帶勇文武委員先後拏獲擒首單第三孔黑子毛八等鞠稱此股內首犯杜和尚袁第二俱被擊殺惟張汶成竄遁云英桂以南路大股擒匪俱殄滅因於十八日督兵起程

赴援光固奉

上命駐軍汝陽已而邱聯恩於北山拏獲擒首李囊

子吳石匹等候補縣丞恩至小史店外委顧朝選由象河關深入叢山

拏獲匪首胡道元王成等二月初二日邱聯恩至南山復會督候補縣

丞嵇文輅署沙河店外委李廷選等四路竄捕於白毛梁拏獲匪首萬

格疑方繫子尙四老虎等又於青泥洞拏獲著名巨匪余小毛等同時

南陽知府何懷珍及泌陽桐柏唐縣遂平裕州舞陽各州縣先後拏獲

擒首呂二郎呂倉晃太運陳四木匠王訓劉遂李在行劉興虎石明玉

等遂平知縣汪斌才偵知大頂山石洞中有積年巨擒二三十人藏匿

因卽會合營汛督帶勇役猿攀蟻附直上山頂堵圍洞口賊擲石持刀

抵拒相持數時格殺悍賊七人執盛七等十四人斬之邱聯恩等復偵

知張汶成帶死黨悍賊六七十人潛匿嵯峨山最高洞中因乘夜率都

司柏英知縣汪斌才等擒至匪據洞焚石拒攻司僮王真魁外委劉體

仁奮勇入斃賊三十餘生擒張汶成及擒首白添作宗來汪孝鳥余水

安燭等並實諸法而以張汶成解送大營梟首同時裕州知州張應煒
拏獲擒首史老三董磚頭等署泌陽知縣姚詩雅拏獲擒小成等何懷
珍率委員於許衡山塔山白毛塚各山拏獲擒首孫小亮及李毛王第
二等遂平泌陽兩縣拏獲匪夥張黨等署泌陽知縣王珠麟委員裘德
豫於石牌山拏獲逃匪華克已紀天斬之各以狀聞於是北山漸就肅
清南山亦無成羣嘯聚角子山擒股遂平英桂奏上勦捕功南陽鎮總
兵邱聯恩請寬免失守所屬處分 賞還頂翎雲南臨元鎮總兵慶

德交部議敘候補道周煦徵加按察使銜已革署陝西延綏鎮總兵陝
甘督標中軍副將龍澤厚開復革職處分 賞還頂戴署陝西西安

城守協藍翎副將閻丕敏開復前在山東臨清營降級留任處分

賞換花翎署南陽知府何懷珍俟補缺後以道員用候補縣丞陶鳴遠
免補縣丞以知縣用 賞戴藍翎齋奏官李殿璧以把總留營拔補

僉得 旨允行先是匪竄西路英桂商於山西巡撫恆福得精兵四

百名駐陝州之紅渠平型關都司王琨帶兵四百駐盧氏至是悉遣
還陝西商維防兵亦奏罷之檄各州縣嚴捕蕭况期必獲以聞

土匪六

七年三月皖捻張樂行大股竄擾方家集圖占淮河衝要糾合南岸另股捻首鄧耀林等爲羽翼汝甯光州伏賊並受僞旗紛紛響應三月汝陽正陽新蔡交界之郭店張岡一路土匪嘯聚汝甯知府祁之銓會同固始縣知縣蒯寅蓀暨汝正新諸縣壯勇合剿斃匪數十擒首匪吳沅鞠言張樂行竄固境卽遣黨糾合趙國梁轉結各路土匪起事股衆甚多云五月正陽匪首張大安等糾衆數百復句結趙國梁及趙收趙龔子等在宋家店諸處焚掠知州劉鴻勳會同汝甯府委員陳宗閔馳勦擒趙收趙龔子劉大安劉包餘衆四散初五日追至梁家灣汝陽縣知縣唐咸仰會同委員吳坤昭把總胡鳳鳴先後斃匪二百餘擒趙仁和紀背張娃等祁之銓及光州知州鄭元善偵知捻首馬瑞雲盧景運句結另股捻首王添明郭谷子等於岳城包信諸處滋擾訂期以初十日

祁之銓由汝南埤至岳城鄭元善由長陵至包信會合夾擊既至馬瑞雲等列隊迎拒我軍奮擊斫殺郭谷子及餘匪二十餘候補典史陳永清擒馬瑞雲盧景運房安房上綸委員陳宗閔把總胡鳳鳴復追殺三十餘擒李大意李小意袁興溺死者甚衆候補知府蒯賀蓀署固始縣知縣張曜偵知積年渠擒馬顯武率黨百餘由張樂行股內竄匿固始劉家集因會同候補知縣廖慶謀密往擒捕匪竄清河集兵勇追獲馬顯武及馬沅等格殺數十閏五月十七日巨擒王添明糾另股擒首汪撈託等踞包信集祁之銓鄭元善馳至斃匪八十餘匪竄新蔡縣境入居民李鳳朝家無老幼皆殺之兵至賊憑屋以拒兵勇升屋擊傷王添明執之斃其黨百餘生擒汪撈託等復於包信夏莊岳城搜獲龔玉瑞等六月偵知房明揚股百餘踞息縣彭家店急率兵勇往捕二十日至王勿橋與賊遇勇目李正聲斬悍匪十餘因圍攻遂獲房明揚及周大倉等其黨王來成在汝新界秦橋屯踞兵往獲之殲其衆通前後所獲

並梟首傳徇英桂以聞時歸德境文侯馬牧濟陽馬頭寺等集餘匪爲
委員候補知縣馮景等招撫投誠者甚多八年三月匪張傳忠族先已
就撫之符繼圖魏樹德陰與劉大老淵等約爲兩股一擾馬牧一攻虞
城夏邑事洩馮景急以兵往勦獲傳繼周王思賢皆斬之進攻濟陽賊
巢擒首劉長安率衆迎拒會商邱知縣施幹督鄉團踵至合擊斃祁五
韓連喜魏樹德劉長安孟磨等生擒傅度等火其巢斃夥匪三百餘著
巡撫瑛榮以聞於是東南路匪蹤稍斂八年七月湖北棗陽縣境錢家
岡有匪三百餘肆擾所在文武擊散之已復聚二十一日黎明千總楊
世澤率兵勦捕斃匪數十以賊衆軍覆死焉匪因竄楚豫交界之石柱
山桐柏知縣張延齡偵知賊目爲王三義盧汶成李三箇子旋由石柱
山竄豫境張博士店之南山坡屯聚因會合唐縣及固始縣營守備平
氏營把總禦諸平氏南陽知府金梁狀白請兵署巡撫瑛榮檄候補知
縣溫逢春以南陽勇往復咨令南陽總兵邱聯恩派叅將成景帶兵數

百名馳赴唐柏會同知府金梁勦辦事聞

上命出境迎擊不得以

鄰爲壑於是桐柏泌陽等縣先後狀言七月二十三日匪竄唐縣之安棚栗園桐柏知縣張延齡會合唐縣及固縣營守備平氏營把總馳往擊剿匪衆登山抵拒山路險峻樹木叢雜兵至不得騁乃添集附近民團匪兄我軍盛越山遁兵勇奮追斫殺甚衆生擒楊萬欽等二十八日匪至白馬寺泌陽縣知縣王珠煒盡斃二十餘有騎馬賊目及悍黨數十死拒不少卻記名外委張照魁奮呼突入斬騎馬賊目復手刃數賊始敗退我兵追殺十五里殺賊三百餘擒高祿等餘訊稱此股仗頭繫紅巾爲號總擒首盧汶成已斃於白馬寺獨李三義及夥黨數十跳脫云九月四月院擒竄北舞渡邱聯恩戰歿裕州泌陽土匪乘機復起裕州屬之小史店有韓八千碎嘯聚金梁往捕匪竄羊册適兩獲李安娃韓大全等復竄大寨山裏脅益衆十一日至唐縣雙峰寺爲知縣截殺擒爲禿子匪因起山奔湖北棗陽境棗陽吏兵截擊因竄隨州屬之黃

山寺金梁會唐桐棗隨兵勇四路兜剿匪懼乃渙散餘黨入山伏匿旋
出獵食爲隨州團勇擊敗復竄豫省桐柏屬之黃山寺知縣張延齡會
營擊殺數十餘匪翻山遁爲唐縣截殺五六十生擒劉均才匪衆畧盡
而股首韓八千碎羅二花槍仍未獲六月泌陽屬之清涼寺大佛嶺及
羊册復有匪數百槍擄勒索謀言角子山總擒首蕭況在焉於是羊册
帶兵委員及小史店汎弁往捕獲匪數十生擒李繼先孫敬山餘由蠟
燭山竄桃花店楊河諸處盤踞分兩股忽離忽合以誤我軍金梁率勇
至桃花店匪已竄長老院因乘夜馳擊擒郭名飾等匪竄摩天嶺擲石
下擊團勇間有傷亡十二日至嵯呀山之紅石崖金梁率守備根齡汝
陽知縣王珠燁追及之斃匪七十餘斬首十餘級擒擒首劉第二等蕭
況率敗匪奪路逃竄兵勇追獲柳化染並前所獲寘諸法維時另股擒
首同第二率黨百餘滋擾檀木溝遂平確山泌陽各山皆有另股小擒
出沒金梁乃率勇回駐賒旗店七月蕭況同第二羅二花槍各以其殘

敗往來泌舞確遂諸山泌陽汎弁於老寨山遇賊擊斃十餘七月十一日遂平知縣劉鴻勛於摩天嶺轟斃悍匪十餘蕭況等仍踞險死拒會舞陽兵勇至合力攻勦蕭況身受數槍率衆逃逸擒韓化龍等南陽府勇復搜獲殷發旺薛麻五等太尉廟小史店鄉團復拏徐小毛謝鎖華禮等於是唐泌諸境漸就肅清十月十七日候補知府署正陽知縣廖慶謀會合羅山知縣任愷汝陽知縣沈鳳儀上蔡知縣金寶符獲蕭況於汝陽上蔡交界之任店及其黨薛書刪斬殺數十是役也廖慶謀論功最械蕭況送省城磔於市傳首以徇奏上廖慶謀

賞俟補知府

後以道員用任愷沈鳳儀金寶符交部從優議敘英桂引疾請解任弗許請陞見許之旋授山西巡撫調山西巡撫恆福撫河南不數月擢恆福直隸總督授瑛榮爲巡撫十年瑛榮緣公事鐫級改陝西按察使擢陝西布政使慶廉河南巡撫宛南伏莽時復蠢動五月竄匪禹法成李喜元陳第四等匪百餘由舞陽竄入泌陽塔灣莊架人勒贖兵勇往捕

旋逃出象河關遂平之上渠保復有張占鼈等匪二百餘在張堂溝周莊諸處派飯架人內有著名擒首高榜李合陳麻子李專等旋踞三寨山頂春水汛弁率隊入山搜捕兵勇受傷知府金梁選府城練勇馳勦巡撫慶廉檄舞泌確遂各縣合力堵拏前新蔡知縣周述康都司洪丹書率羅山練勇三百協剿二十日金梁進至泌陽羊冊鎮偵知匪首一爲李四礮匠一爲關雷方在桃花店派飯滋擾羊冊練長候選縣丞呂璈集民團隨官軍至桃花店匪已遁侯寨山適泌陽知縣陳桂馨率勇踵至因會合進擊匪衆抗拒轟斃數十乃四竄二十七日進至尖頭山裕州舞陽文武各率兵勇來會知禹法成一股已爲舞陽兵圍截擊潰散僅餘匪黨二十餘人李四礮匠股內於是復窮追至大塘口獲曹七兒曹紅內匪衆避兵而行或恃險爲蔽軍至嵯岬山大雨道滑不能接仗六月初八日匪竄樂山溝潛伏金梁督隊至山下兵勇奮力攻擊斃執旗賊目餘匪數十相持兩炊許殺傷畧相當忽一賊目往來山頂持

矛脅鄉民投石如雨署沙河汎外委王琦率隊仰攻受石傷甚劇裹創
力戰死之匪衆乘勢下壓我軍屹立不少動分隊出賊旁擊斃賊數十
生擒萬汝魁等比暮賊見我軍隊益整復遁匿裏溝樂山溝爲確山縣
境去城二十里許知縣吳坤昭兵不至金梁狀聞慶廉劾呈坤昭摘頂
而爲王琦請卹典議如制六月十二日春水汎外委郭殿成於泌陽天
頂山設伏擒擒首張占鰲及其黨馬第五自是賊惟黑夜疾馳忽分忽
合忽前忽卻以牽我兵勢十九日委員周述康洪丹書蹙賊於白毛梁
山南坡之南溝時賊衆不滿三百皆屢抗官軍凶悍剽疾猝與兵遇殊
死鬥我軍嚴陣待張兩翼包之壯勇數十持利斧直突斫殺悍賊十數
賊氣奪兩翼兵繞賊後腹背夾擊賊四散潰逸是役也鏖戰兩時殲殪
甚衆生擒擒首吳二雙刀夥黨十餘斬首數十級餘衆遁桐柏交界之
龍窩爲鄧莊鋪練長李春平等截殺畧盡獲李四礮匠及其黨張聶子
等惟高榜一名免脫慶廉以此股匪迅就撲滅請錄在事官紳功

許之時距事起未兩月也十一年五月唐泌餘孽劉象功等踞唐縣張灣樹旗糾搶知縣高天寵擊敗之斃賊二十餘擒頭目楊悅奪大礮二餘匪東南竄唐桐交界之石柱山復有楊五湯匪股數百嘯聚高天寵會合桐柏知縣恩奎率兩邑鄉團進剿至井樓團衆爲賊馬衝散桐柏武生梁鳳儀死之高天寵揮勇奮擊轟斃騎馬賊目生擒龔平匪始退竄時汝甯陳逆方熾不遑兼顧檄地方團練隨時勦禦而已匪亦旋散

卷之五
一、
二、
三、
四、
五、
六、
七、
八、
九、
十、

土匪七

咸豐七年七月直隸土匪起巡撫英桂以順廣所屬邢臺內邱沙河臨城贊皇獲鹿等縣均與河南交界山路紛歧賊易滋竄檄飭武安等營縣合力堵剿二十九日亥刻敗匪四五百由磁州闖入武安縣境之淑村知縣聯魁會同署把總徐紹先率兵勇往捕匪遁招賢清化諸處北竄西馬項村武生郭慶祥之父郭庭蘭率衆堵禦匪衆拒傷郭庭蘭乘勢入村搶掠適營縣兵役追至格鬪斃匪二十餘生擒王慶先郭成功匪卽西奔十八盤山竄入山西遼州邊境搜獲餘匪宋占奎韓黑子董安汰王二子楊三札古子王興倉鞠稱與直隸邯鄲縣人劉庫張老利等結夥曾拒敵官兵云因前斬之八月初六日匪竄遼州之羊角村其地界連涉縣署知縣管貽蔭先在磁州武安交界所堵聞警馳至本井村猝與匪遇格殺數賊擒獲張寶齊二煥子齊增耀郝汰然匪越山遁河北道張維翰署彰德府知府李希彬及武安涉縣各以狀白英桂檄

委試用知府德林馳赴彰德會同知府羅景恬率屬勸捐募勇設防而令河北道張維翰著河北鎮總兵伊里綳阿駐境督辦於是地方文武委員先後拏獲賈之道閣振清王二紅趙三標子宋七張合等斬以徇十一月初五日復有東省土匪二百餘由開州關入滑縣境之劉草坡村渡河竄湯陰縣境之五陵集由邯城江窩等村及濬縣之裴莊竄入西山各縣兵勇躡追初八日至林縣之東姚集爲鄉團截擊乘夜翻山竄往城東村適知縣會營率兵追勦斃匪十餘匪衆折回南竄湯陰知縣任桂督勇截殺斃其悍目二遂於初十日竄入淇縣之高村橋旋折向東竄濬縣之廟口諸處署滑縣知縣張仙保會合都司陳楚書出境迎勦至馬蘭斃其騎馬賊目一步匪十餘追及老安鎮濬縣知縣李德坊兵至會合前進直抵開州東明交界之司馬集匪衆正欲覓水渡河我軍乘其半濟轟斃溺死者不可勝計餘匪向開州東明分竄於是外匪遂絕八年二月湯陰縣聯莊會案內逸犯許大賓和尚與土匪郭魁

元等糾脅饑民在湯陰縣南鄉夏口等處殺掠滋事署知縣顧守埽會營往勦匪衆逃竄至湯陰濬淇三縣交界之黑山署河北鎮總兵伊里紉阿檄彰德營叅將穆特布馳赴黑山後冷泉等村迎剿匪衆逃散僅餘十數賊越山遁我兵追及降城村擒獲張幗明等斬之時復有林縣逃匪原思虎勾結山東饑民二百餘人在冷泉百羅村山邊嘯聚滋擾淇濬兩縣會同衛輝營叅將承聯擊散之河內知縣師長怡弋獲匪黨董玉合等並寘諸法本境亂萌亦息方直隸土匪之竄豫也內黃縣拏獲首犯張汰和械送省城鞫稱籍隸直隸大名縣與趙三標子魏起順薛四頭程明中薛三麻子王二紅等起意結捻稔知山西富饒欲同往搶掠魏起順邀賈之道王二紅魏五等張汰和邀閻振清等薛四頭程明中亦各糾八九十人趙三標子爲杆子頭邀史懷亮朱七等十餘人因人少併入張汰和股內約以七年七月二十六日至大名縣薛村空廟會齊合成大捻共推張汰和魏起順薛四頭程明中爲捻首同夥三

百七十八人卽日起手沿途殺傷鄉勇訛搶爲武安縣官兵擊敗逃往十八盤山闖入山西黃澤關沿途掠獲銀錢衣物牲畜無數拒殺至磁州胡家莊復爲大名道官兵擊敗逃至武安縣漳河灘爲安陽內黃等縣兵役拏獲云獄具斬於市八年五月十五日巡撫英桂因病乞假布政使瑛榮攝巡撫事以爰書驛聞九月二十九日奏請獎敘在事文武捐資募勇勞績彰德府知府羅景恬交部議敘試用知府德林 賞

戴花翎署安陽縣事孟縣知縣葉世槐臨漳縣知縣孫厚均署武安縣知縣聯魁均 賞戴藍翎內黃縣知縣萬鎮之開缺以直隸州用彰

德府學訓導黃德杰加六品銜安陽縣學訓導新選直隸東鹿縣知縣吳履泰加知州銜臨漳縣學教諭譚光燮以知縣選用前臨漳縣學訓導王穎川以教職歸大挑班儘先選用軍功守備劉鳳岐以都司升用先換頂戴疏入 上許之十年九月巡撫慶廉廉知滑縣及直隸東明開州長垣等境有土匪傳帖惑衆事密檄知府何懷珍往捕匪竄長

垣汲縣知縣尙國均獲焦多誦等鞫稱于克純爲首起意搶掠傳帖聚衆實與曹州府匪大水牛等密結云慶廉復檄臬司邊浴禮率兵二千往勦事聞 上以三省交界命直隸總督恆福山東巡撫文煜飭屬

會剿於是邊浴禮以八月二十八日抵衛輝與河北道張維翰先後弋獲徐二旺等滑縣知縣徐振瀛獲于克純獄具並寘諸法餘衆瓦解乃已其後山東臨清土匪以十一年四月擾及內黃之楚旺傷亡兵勇數十東河候補通判鄭履成附貢生宋承平戰歿後皆議卹如制同時曹縣土捻肆起團練失利自大朝集以東二十餘團皆爲賊脅騎賊四五千步賊數萬邊馬闌入考城旋亦出境濮范土捻數千由開州蹀入滑縣境王珠集及亂桿中召各村知縣徐振瀛敗之於白道口練總楊知芳復敗之於閭王廟匪退踞開州保安集築寨自固徐振瀛集練總楊知芳劉柱國武殿元聶鵬飛各以練勇越境會勦四月二十六日馳抵開州沙古堆遇賊擊斃二十餘破沙古堆土城斃賊首羅玉方餘衆

逃竄二十七日約會東明高圍團勇追至八公橋復斃百餘賊回竄保安寨楊知芳等乘勝躡追攻入寨門斃其匪首及匪黨數十生擒賊目董和尚趙均祥等斬之潰匪潛竄渡河復爲我勇追及礮斃百餘落水死者無算於是

諭賞徐振瀛花翎楊知芳等登擢有差

上軫

念河防特命直隸大順廣道聯捷假四品卿督辦防河事宜副以在籍內閣侍讀學士段晴川得奏事防河兵勇統歸節制於是聯捷率師駐懷慶是年秋東省濮州范縣有匪聚擾馬步八九千以九月二十六七等日由直隸開州清豐分股擾至豫省內黃縣境東莊黃辛集諸處蔓延數百里勢甚張二十七日直犯內黃縣城署知縣戴鴻經率勇登陴礮斃紅衣馬賊賊復蛇行攻西南兩門偪城根戴鴻經以大石擊斃之餘賊退向東南時西關外尙有賊騎二三百復募敢死士縋城分三路出擊左右鈔入賊陣斬首十數級生擒畢得高餘退竄東莊二十八日滑縣知縣徐振瀛督團出境馳抵開內交界之井店鎮賊竄王位村距

井店三里許徐振瀛督兵迎斬斃馬賊甚多二十九日賊大股回攻內黃縣城焚關廂攻南門尤急賊占上風施火箭槍礮守兵莫希文勇目賈元化中礮死文生張文燭等七人受槍傷戴鴻經親督游兵二百力守南城自辰至申四時之久城上兵役屹不動槍礮碑石齊下斃匪百餘匪氣索是夜數來攻皆擊退十月初一日馬隊竄運河東岸署彰德知府孫鳴珂叅將穆特布督兵嚴守西岸賊不得渡乃遁回院子村井店諸處初二日滑縣民團接仗不利初三日馬步賊繞至滑境什村河嘴前隊擾及滑縣之沙地屯村初四日攻濬縣城關知縣鈕達璋率民團出城截勦礮斃馬賊六步賊十餘匪繞攻東門復爲守兵擊殺數十乃遁竄焚掠道口街分股擾汲縣之新鎮初五日邊馬駛及上樂村距汲城三十里延津境之班棗魏邱皆有賊知縣徐保興督練馳禦匪折回汲境其大股仍退至道口新鎮盤踞巡撫嚴樹森檄河北鎮總兵牛浩然率所部由滑濬一路堵擊令都司楊長春守備劉興旺率楚勇千

餘人都司盧得勝率馬勇二百人馳由衛輝一路協勦疏言防河之師不能禦賊耗饑擾民請裁撤歸併一事權節靡費緣濮范匪徒潛渡也初六七等日匪踞道口新鎮時出窺掠淇縣所屬之衛集三里橋初八日邊騎犯衛輝府初九日薄城下署知府厲文煒汲縣知縣尙國均集民丁三千募勇八百登城守禦尙國均弋獲賊諜宋聚妮羅茹谷王麥妮孫老五訊言頭目李二令偵衛郡虛實將結土匪掠懷慶皆斬之十一日賊隊大至先於護城隄外游駢厲文煒等選精壯千人預伏關外延壽宮左右十二日賊騎蜂擁至比及關伏卒突起槍礮環擊賊大亂兵勇乘勝追殺十數里賊回竄濬縣之鉅橋鈕達璋禦之殺馬步賊百餘十三日至延津境之班村牛市屯徐保興率練總韓中榜等禦之殺馬步賊數十徐振瀛以馬村團勇數千自新鎮適至復擊殺馬步賊數百賊乃大創且聞官軍至倉皇思遁因於十四五等日由開州之交界井店出境回竄長垣圖歸濮范老巢嚴樹森毛昶熙以河北完善漕運

攸關議令北鎮官兵一千屯滑潞交界彈壓扼防近顧漕次楚勇一千駐北岸陳橋策應牛浩然一軍復撥省防楚勇千名移駐南岸與北岸軍夾河而壘兼顧省防而壯聲援並以團練本助兵力之不足而奸民則藉練爲名斂財肥己恃勢抗官糾聚旣衆要挾多端緩之則養癰急之則鑿險李占標聚衆圍成之案可爲前鑒請悉罷河北三府團練奏入 詔並從之十一月復有東省另股賊匪焦克昌等糾黨數千竄開州之柳下屯小集諸處焚搶初九日擾及滑境牛浩然徐振瀛率標兵團勇馳往迎勦嚴樹森以漕糧催兌緊要飛檄游擊李世玉等各率所部會同牛浩然一軍竭力堵勦復添派千總趙洪先帶襄勝前營武勇五百以游擊盧得勝馬勇百六十人輔之於十三日北渡馳赴衛郡會合各軍勦擊旋復令副將楊飛熊率所部三營楚勇千五百人渡河策應時賊分三股一竄向道口一竄善堂一竄水擔街以初十日擾及潞縣之紙坊街十一二等日由潞境白市屯子街竄湯陰之五陵集宜

溝嶧徑犯縣城知縣郭景僑擊卻之十七日至淇縣十八日至汲縣楊
長春等四營已抵衛郡冒雪進征距城二十里之下馬村遇賊千餘我
軍進擊兵甫交匪卽佯遁欲誘我遠追分襲我後因收隊嚴爲之備十
九日賊果分股由黃土岡下馬村兩路來犯楊長春分四營兵勇半守
營半出礮行數里前隊馬賊靨至甫壓退忽東北礮聲偵知下馬村股
匪繞攻我營回軍就之腹背夾擊賊不能支向西敗竄乘勝追殺斬馘
數十二十日黃土岡之賊復由趙莊偪郡城至北關我軍設兩翼進李
世玉趙洪先各率一營伏南北兩路盧得勝率馬隊由中迎擊楊長春
步勇繼之厲文煒尙國均親督勇團扼橋口賊衆列陣迎拒我軍馬隊
迭前衝突賊少卻步勇繼進賊殊死鬪並分路鈔我軍我兩翼伏兵遮
截之軍士皆下馬袒膊短兵相接鏖鬥時許賊始潰自相踐踏旗幟衣
物棄盈野兵團躡追至八里屯後賊馳至前賊復回門李世玉策馬督
隊以火器相持兩炊之久乘賊少懈揮兵縱擊大呼陷陣當者辟易斬

首四百餘級生擒二十餘追殺二十餘里救出難民千餘比昏暮收隊偵賊向新鄉乃派哨官劉正升等乘夜霧追及於新鄉縣境賊後隊數百方肆擄劉正升等潛施火箭噴筒賊驚遁其前隊於二十一日攻延津縣城知縣徐保興督率練總王占魁等擊敗之斃其馬步三百餘餘黨竄陽武原武等境其西一股於二十日擾輝縣邊界民團失利遂於二十一日攻縣城知縣瑞徵率衆敗之二十二日復敗之於雲門迨至新鄉槐村營擒斬悍目張山及夥匪數十匪由新鄉合竄原武嚴樹森因疏言直東間賊蹤徧野不下數十股已成蒙臺故智此歸彼出防不勝防請

敕下直東統兵大臣認真殲除掃蕩無震畿疆以鄰爲壑兼繪圖貼說以進蓋其時東省長鎗會匪方往來曹考焚掠甯陵凶醜孔熾兩次闖入河北者爲焦克昌劉四二股旣爲官軍所敗一竄輝境一由延津擾獲嘉陽武原武所至攻城皆爲地方文武擊退旋合竄新鄉復有另股馬步賊五六千自道口牛市屯來會聯莊會案內漏網之

土匪李占標亦自獲嘉糾黨勾結各股沿途裹脅焚掠楊飛熊督各營進剿以十月二十七日馳至新鄉偵賊在大陽隄一路屯踞因於二十九日寅刻親率驍壯營馬隊及襄勝前後中左四營步勇乘黎明大霧急馳進擊煙霾中隱約見賊分三股來犯我軍亦分三路迎之游擊盧得勝以馬隊居中外委趙洪先以前營步隊居左守備石得勝以後營步隊居右楊飛熊自率親兵督戰復令中營營官守備甄樹德左營營官都司劉興旺各率所部伏隄後爲應援兵刃旣接我軍馬隊衝突中路馬賊先卻步賊隨退楊飛熊以親兵乘之大呼陷陣賊大亂左右兩股同時驚潰我軍馬步乘勝縱擊遂大破之賊屍相枕藉追至大隄東北近各匪盤踞之所因整嚴部伍時霧氣漸消瞭見前途旂幟蔽空馬賊如蠶楊飛熊飛調襄勝右營游擊楊長春剛銳新前營叅將李世玉兩營助剿知會新鄉縣知縣丁世選在籍翰林院編修衛榮光派團扼守城南孟家莊策應各隊賊騎二千直前猛攻我軍靜以待之逾時步

賊益蠶至楊飛熊以賊衆十倍於我精銳悉聚中路乃潛出奇兵鈔其兩旁賊譁潰我軍追壓三里至小龍泉遇賊掠輜重車十餘兩楊飛熊傳令奪財物者斬因發火箭焚其車大半方奮追忽東北復有大股數千與正東敗匪合反旗來鬥我軍佯北誘賊復至大陽隄中左兩營伏兵突起前隊悍賊中槍紛倒後賊匍匐進我軍以刀矛格鬥戰愈酣突見黃衣紅衣數賊指揮賊隊一字排列以馬賊扼兩端縱橫馳騁意將包我全軍適襄勝右營及剛銳前兩營馳至兵氣益振李世玉楊長春奮矛大呼直入賊陣刺殺黃衣賊目生擒紅衣馬賊李喬海姜有桂吳登兒李二右營哨長都司陳大勝深陷重圍手斫數賊受傷殞賊亦披靡退敗我軍追殺十五里至張灣其地溝深水滑賊墮溝死者無算是役也斃賊四千餘生擒蓄髮老賊三百餘奪羸馬二千餘旂械四千餘訊獲賊供俱曹州人大頭目焦克昌副頭目侯老五領馬步賊萬餘其由滑縣續竄之股爲姚明禮領賊五千餘李占標新集賊亦數千將分

股一竄懷郡刼掠一護輜重同巢至是屢被挫劫不能復振云嚴樹森
慮賊之西也因令蘇謙馬隊由滎澤口渡河爲備而令楊飛熊扼衛郡
杜旁逸賊知我軍兩路進逼日夜東馳其後股在原武者爲知縣孔慶
鉞擊殺百餘旋竄至陽武之黑羊山爲寨民擊殺二百餘初一日薄延
津縣城爲知縣徐保興擊退追及於荊隆工復敗之初三日封邱知縣
駱文光會同在籍刑部主事邊其恒等率鄉團敗之於董家隄婁隄莊
殺斃二百餘斬黃衣紅衣賊目救出難民無算初四五等日敗匪由封
邱邊境回竄又爲總兵牛浩然滑縣練總于士修等截擊斬首百餘級
生擒十餘器械旂幟委棄塞道餘衆遁回東省豫境遂無賊報至嚴樹
森以楊長春等三營留駐衛輝令楊飛熊四營及蘇謙馬隊仍回省城
奏上諸將功副將楊飛熊加總兵銜叅將李世玉給敢勇巴圖魯名號
楊長春免補游擊以叅將用並給侃勇巴圖魯名號盧得勝免補游擊
以叅將用劉興旺免補都司以游擊用甄樹德石得勝免補守備以都

司用趙洪先免補千總以守備用都司陳大勝照叅將陣亡議卹並於
死事地方及原籍建立專祠以把總朱長明外委劉全勝余清太汪學
政沈文明畢高升傳得銀附祀皆同時戰歿並 賜卹有差

咸豐十年夏陳州府屬之沈邱汝甯府屬之新蔡土匪勾結皖捻以秦
宣袁曜春袁安愚張蘭張鳳林余萬祥等爲首股或一二百或三四百
四出焚劫而以阜陽之黃花嶺李家橋迎仙店爲巢穴官兵往捕輒恃
兩省交界此擎彼竄凶狡踰他賊巡撫慶廉檄沈項汝新及安徽阜陽
等縣尅期會剿又檄調南汝光道鄭元善所部練勇馳往協助於是各
路兵勇齊集瓦店偵知瓦店東南十二里之迎仙店爲捻首秦宣賊巢
聚衆數百陰爲誘致官兵計於各要路高粱地中伏槍砲如櫛比五月
十三夜突出悍賊四五百由東南北三路襲我營我軍分隊迎擊卻其
東南兩路其北路賊抵死不退以大礮轟擊立斃三四十始東遁十四
日黎明衆議破賊之計密遣間諜入賊中盡得其所設伏處使爲嚮導
規越前進直薄迎仙店賊憊解衣寢我兵至猝索槍械不可得裸而跳
追殺數里屍積道路火其巢翌日跡之附近各村無一賊盡越境矣兵

乃還時袁曜春率黨數百入袁家寨殺寨長袁廷拔袁紹等遂與袁安
愚張蘭等踞其寨張鳳林本在袁安愚股至是由長城竄正陽界之楊
家橋尋仇燒殺團練楊永錦等因自爲一捻檄所在緝拏於是正陽知
縣鄭修業獲張鳳林黨張其林吳襲成格斃黃學元等署汶陽知縣廖
慶謀新蔡知縣韓承宣獲秦宣黨唐云龍段三尙旺秦新秦禿秦麻子
燬章家集布家橋賊壘數所殺斃袁曜春股夥數十沈邱知縣秦篤新
會合陳州委員於張莊擒張魁林莊戲又獲秦宣之母連氏妻王氏及
其幼子張蘭爲秦宣等六捻首之一候選訓導韓大瀛用阜陽降賊周
好修等誘擒之奏上

賞沈邱練總李雲龍李璞韓文興藍翎錄韓

大瀛功待獎其後正陽縣知縣鄭修業新蔡縣知縣韓承宣及已革羅
山典史任浩復獲余小柏余勉之及其黨史驢子孫咬孫映采鄒振甲
李富李午楊成士呂懷德熊小有熊麥來余旺等於韓家店於曹樓確
山縣知縣吳昭坤獲高撈爲李四礮匠股內要犯凶黠冠諸賊及其黨

王牛薛繼境趙二曾子李樹容姬春楊新育會瞎子等於大西山沈邱縣知縣顧恩培獲楊鳳奇及其弟楊鳳儀礮傷擒首秦宣於李莊匪勢稍殺初各省辦團

詔加順天府丞毛昶熙都察院左副都御史銜

回籍辦理團練是年九月

上幸木蘭巡撫慶廉將率師北援因以

河南勦匪事宜

命毛昶熙督辦未幾慶廉坐與藩司賈臻互訐奏

吏議鑄級去官授湖北布政使嚴樹森河南巡撫而以河道總督黃贊湯暫行兼攝十一年嚴樹森既至汴時粵逆由廬桐竄霍山及商城毘連之毛坪古皮沖諸處復由麻城徑逼黃州勢將犯豫境皖匪姜太林衆二三萬由襄城竄擾郟汝魯山回掠西平光固大河以南州邑蹂躪幾徧孫葵心衆萬餘自廬州六安蠶入固始分股竄擾豫省城守設防分勦應敵諸軍應援不暇一時宿將如邱聯恩承惠王居廣後起敢戰之士如王榮烈田玉梅等俱相繼戰歿賊至惟總兵成景一軍尾之而西候補道張曜調守省城游擊王天保赴援汝甯而毛昶熙方慮成景

兵力不足檄王天保赴宛而以余萬明代之於是汝甯賊陳大喜張鳳林王殿書史狗娃等乘間並起與秦宣等響應張鳳林率衆千餘篡名孫葵心黨籍藉其聲援覬覦汝郡知府祁之銓會同汝甯營叅將柏英敗之於漆頭河官莊等處先後擊斃百餘賊竄上蔡爲練勇截殺復竄商水署知縣閔春熙率勇於廟霧擊斃匪數十匪夜攻縣城復擊退之餘賊至東北八里灣屯踞王天保旣至汝甯偵知匪踞萬家圩因會祁之銓兩路進擊匪衆出圩抗敵格殺數十匪入圩固守同時復有杜秉德者一名杜長榮皖境三河尖匪首李鴻禹聚衆千餘推杜秉德爲謀主出入汝正新息妖言惑衆乘孫逆竄擾後旬結各股謀不軌二月汝甯府通判張桐正陽縣知縣鄭修業偵知匪竄白土店劉家莊飛檄練總胡登第劉延煦等率練勇三千進剿千總海進魁把總王連三奮勇先入與賊相持不決劉延煦之子劉然鴻甥曹福大呼陷陣中槍并歿兵勇憤擊斃匪百數復潛遣壯勇縋出賊後夾攻始大敗之擒匪目李

李鴻等斬於陣劉延照深入賊巢手執擒首李鴻禹杜秉德以出李鴻
禹傷重旋死繫杜秉德及其父杜有同於獄究治奏上 上嘉勲捕

迅速進張桐知州鄭修業同知海進魁守備王連三千總練總舉人胡
登第知縣選用劉延煦鹽提舉銜並皆戴藍翎又息縣土匪趙國良糾
衆滋擾岳城諸處署光州知州張席珍屢敗之於臨河包信等處先後
斃匪四五百生擒劉二老開簡全德丁禿子等皆寘諸法又苗沛霖黨
潘四李六等焚掠固始東北鄉王宗雙圩朱臯集張家老圩田家老圩
復回攻安徽霍邱圍練楊天林寨圩固始縣知縣請兵防禦於是嚴樹
森奏舉臬司鄭元善歷任汝光十餘年德政在民間里謳思不輟汝光
紳民皆其舊部擬令馳赴汝甯信陽一路察探楚省逆蹤扼守三關兼
督勦汝郡土匪信陽汝甯光州商城固始五營及防剿各起兵勇均歸
調遣南汝光道趙書升佐之 上從其請而陳大喜張鳳林王殿書
等已號稱數萬初昭范寨王天保韓承宣勦之兵勇傷亡甚多遂益驛

三月初六日夜率衆圍攻汝寧府東關寨堡初七日五鼓分股直攻郡城北門祁之銓會同候補知府廖慶謀通判張桐汝陽縣知縣吳元浩以鎗炮火箭火彈禦之賊亦施放火箭火罐雲梯數十具蠅傳而上城上火器雜巨斧挺擊斃賊數十斧墜執旂賊目一撓鉤生致賊十一皆斬之賊乃退兵勇出城追殺得其雲梯攻具匪見北面備嚴乃合大股力攻東關寨堡益增雲梯百餘具疊渡外濠奮力猛攻叅將柏英知府廖慶謀率兵勇潛伏雉堞間伺其將近內濠猝然大炮轟之賊堵立排匝炮過穿其中如雨道然隨聚隨轟之自遲明至辰刻卒不得逼寨垣其越重濠者復礮石擊之匪衆相顧皆迨愕有引去者俄東北兩門告警廖慶謀等於堡內窺賊皆遙立呼詈知其已懈急選壯丁百餘帶火箭噴筒啓堡門突出奮擊賊隊大亂會余萬明勇亦至乘勢追壓斫殺千計生擒著名擒首史狗娃李萬興得雲梯百餘具砲械旂幟無算餘匪由十八里廟竄逸復麇聚於范寨陳寨諸巢是時新蔡西北界連汝

境數十里間民寨並爲賊迫蓄長髮供芻糧汝光賊勢始大張四月嚴樹森復檄候補道張曜馳往汝甯會勦我軍旣連復長審王岡諸圩匪衆遁回汝東平輿初二日夜攻陷霍莊寨初三日張曜會合庶吉士吳元炳督隊馳抵金鄉鋪鄭元善亦派兵由汝西前進殺賊數十屯姚溝初四日張曜兩路進擊比及寨濠匪出死拒我軍數盪決殺斃百餘生擒十一匪乃入寨固守初五日復進攻寨牆槍砲礮石如雨兵不能近因燬其寨外炮臺諜言賊約平輿大股應援並分黨四出擾新蔡上蔡及陳郡以牽我軍時項城有徐四萬等糾衆萬餘圍攻新輿民寨沈邱有阜匪周慙等踞沈邱寨爲知縣顧恩培力勦克復汝郡另股亦多蠡起新蔡有李向均等連破西北數民寨確山有段心元等盤踞藍岡派飯訛槍皆與陳逆互爲聲應諜者或言霍莊賊捆載鎗械計圖他竄者或言往逆東路援賊者初八日晚張曜選壯勇四百疾馳扼東路賊果出馬步數千東向遇伏旋遁入寨初九日夜狂風大作張曜派營總黑

龍江協領蘇謙候補都司劉自順率馬步隊將往劫寨適擒目莊有凡等領黃旂悍賊五百餘潛出霍寨欲赴角子山勾結以劉象功楊五湯等方暨旂唐泌張曜偵知令蘇謙等躡進初十日至王橋詢知馬賊數十步賊五百餘向確遂一路駛竄上蔡知縣金寶符署汝陽知縣張紹英派勇適至因遂合追至確遂交界知竄匪已爲署遂平知縣陳成志截斃數十於十一日由劉閣逼入馬牙山胡廟諸處蘇謙等分兩路鈔擊及之馬牙山匪衆列隊抗拒蘇謙躍馬入陣槍斃騎馬賊數人外委羅宗魁繼之大呼決盪殺賊甚多身被十數創戰愈酣匪衆披靡我軍乘勝兜圍剿殺略盡僅餘步賊十餘上山逃匿爲民團擒殺無一免者上蔡團總劉毓棠等獲擒目李培成曹里夥黨方淋龔娃及被脅入夥之李凡等七十餘分別斬繫訊知莊有凡等各頭目均陣斃此股遂滅嚴樹森毛昶熙請加蘇謙副都統銜劉自順以游擊用外委羅宗魁賞藍翎

上從之於是嚴樹森奏出省親督勦辦以二十三日抵陳州

因言路濠亟宜挑挖連年寇至萬馬紛馳平原苦無阻扼擬於大小路之兩旁悉挖濠溝路則斜正紛歧濠亦縱橫交錯要路扼以槍礮旁路或臨時挖斷或輔以梅花坑之類限賊馳驟利我邀擊莫善於此周家口爲水陸通衢前數次賊掠輜重均由沙河返皖擬於周家口設立礮船十二隻調湖北熟諳水戰之營官一員哨官二三員酌帶水勇百名來豫教練游駛以備水路堵勦我軍騎兵太少擬增驍果馬勇一營先招取戰回勇充之仍陸續徵募以備衝擊均得

旨允行十三日張

曜等復於霍莊誘賊出寨分路前進蔡溝鄉團爲頭敵匪由東西兩門出馬步二三千人迎拒鄉團怯退張曜親率大隊由西路別將率礮勇由東路督擊斃賊數百賊仍退守十四日匪由寨東門出馬步數千向東疾走寨內偃旗縱火示空寨狀張曜馳據高阜見賊隊行列甚整疑之旋見寨西門又出馬步千餘撲王西岡民寨因縱馬隊向西北鈔襲賊恐斷歸路急引還東路賊亦旋退入寨詢知難民寨內果掘坑設伏

欲誘我軍深入其狡黠如此計已破因於十六日出馬步六七千分三股以兩股犯金鄉姚灣一股趨中路爲左右策應張曜令蘇謙劉自順督馬隊衝入賊陣蘇謙劉自順髀臂受傷裹創力戰先敗其中路金鄉姚灣各步隊繼至迎擊復敗左右兩路殺賊二百餘追殺至寨濠十七日陳大喜之弟陳汶結阜匪千餘由平輿竄踞汝寧城東高平寺寨與霍莊相犄角鄭元善調撥馬隊添募壯勇令叅將柏英通判張桐督帶往勦匪由寨西門出馬步千餘迎拒柏英奮勇督隊排牆而進匪不能敵回東狂奔我軍轟開寨門寨內尙有悍匪數百張桐首衝入寨被斫傷面臂落馬各隊奮呼直前匪衆驚潰四路搜殺生擒宋玉貴等十餘盡得所遺槍械騾馬高平寺寨遂克復同時項城新興集徐四萬一股爲知縣恒倫密約寨內紳士夾擊擒斬百餘遁回阜境復將焚掠汝郡鄭樓之廟灣股匪勦斃二百餘其周慙一股亦爲顧恩培擊退沈項遂無賊毫西檢逆之犯鹿邑者爲叅將春林都司王守基會同知縣孫嘉

致以二十二日亥刻乘風雨夜襲賊營大破之追殺十餘里又有另股紅白旗賊西竄爲縣勇逆擊東遁於是陳逆外援垂盡而新正光息等處零股尙乘機思逞王倫等滋擾岳城李瞎子等紛擾楊家店楊心一燒搶長陵陳郡昆連汝阜之荒坡楊半葛嶺廟岔姜寨瓦店大馬張鯛陽城亦均有嘯聚或二三千或千餘數百所在蠕動嚴樹森檄都司李永祿率所部馬勇駐項城往來哨擊羈縻牽制不使與陳賊合陳賊因霍寨高深益負隅自固我軍培築營壘屢添造礮臺環攻進偪或深夜譟擊以驚之或佯敗設伏以誘之雖屢戰屢勝卒不能得手匪亦連出馬步撓我師二十四日馬步賊二千餘出寨西門分掠人和寨張曜親率隊擊卻之斃賊百數生擒史應翔等二十五日復出又擊卻之二十六日馬賊二百餘步賊二千來衝我軍新營張曜選川楚勇爲前敵佯敗誘賊賊蜂擁壓追我軍大隊橫截馬隊疾鈔其後擊斃馬步賊數十餘復入寨二十九日西門潛出紅旗隊四百餘馬數十匹向西北疾趨

將竄黃埠掠食張曜調川楚羅山勇隊預伏霍寨西門自率馬隊馳擊
匪已竄渡小沙河距黃埠二里許燒槍兵至衝殺匪殊死拒戰兩時之
久後始敗退伏勇奮起截殺斃賊三百餘得馬十一匹寨內援賊屬至
乃各收隊五月初三日賊復由西寨門出馬步二千餘直衝姚灣營張
曜偕庶吉士吳元炳親督各隊迎勦飛調叅將保英率余萬明王泰來
周登高徐烈松劉清源等以金鄉步隊夾擊蘇謙以馬隊鈔襲其後匪
乃大敗殺斃二百餘生擒方滅等捻首王殿書脇肋中槍負創回竄陳
大喜黨崔步雲者乘間逸出將密結他股應援匿張樓姚灣練總生員
沈潛獲送大營斬之旬日間兵勇力戰受傷數十所殺賊以千計奪馬
匹槍械無數圍攻愈力而賊擁寨自若也嚴樹森憂之嚴飭將士剋期
攻拔於是鄭元善張曜密謀以武生王冠軍假接濟油鹽投入寨使爲
間大兵攻寨見號火爲內應先是初五日蘇謙伏馬隊寨西樹林中以
羅山勇隊逼寨挑戰枕戈臥地示不輟匪果出黃旗賊六百餘自東門

五色旗馬步賊二千餘自西門我軍佯北誘之比及金鄉鋪張曜率馬隊繞後鈔襲斬紅衣賊目二馬賊三吳元炳等併力夾擊斃賊二百餘生擒陳元太等餘衆入寨初七日鄭元善派汝甯府縣練勇由東路進上蔡西平練勇由北路進張曜會同吳元炳派令叅將保英率都司李忠奎知縣陳夢蓮單體晉等隊伏寨左叅將吉昌率都司周登高知縣王珠煒吳繩曾等隊伏寨右知縣汪鼎和崔廷鑪鄭繼同分調銀濟張寨馮寨三路團練往來策應張曜親率蘇謙王泰來周明崑劉自順姬成功劉清源尼俊等攻其堅軍士架呂公車挈雲梯攔牌之屬長驅以進越重濠見寨中火四起知王冠軍等已得當因揮令將士併力齊擊匪衆驚亂吉昌王泰來首登寨勇衆燧附而上呼聲震天地寨內應之賊首夥三千餘冒死奪寨西門出復折向東北潰竄伏軍練勇齊出截殺寨內外賊屍枕藉張曜等入寨議留吳元炳及通判姚國仁搜殺餘匪安撫難民張曜督馬步乘夜躡追比明至轆轤灣匪衆回拒委防禦

巴彥克喜把總尼俊躍馬斬紅衣數賊賊始東向狂奔直趨平輿老巢
追逐不及乃撤兵還定霍莊是役也斬殺二千餘生擒王五等三十二
人獲六百斤大礮一山東州吏目裘長全戰死千總張欽海被執不屈
殺之焚其骸奏上

詔加張曜布政使銜交軍機處記名遇缺請

旨簡放叅將吉昌副將銜都司王泰來游擊用防禦巴彥克喜佐領
用把總尼俊守備用巴彥克喜尼俊並皆換花翎加武生王冠軍守備
銜以千總歸標補用翰林院庶吉士吳元炳四品頂戴餘存記卹裘長
全張欽海如制論者或謂豫省堡寨之立倣嘉慶初年堅壁清野成法
所賴以安全者利甚溥然一或不守則資寇兵齎盜糧害亦因之得失
之故難言哉

土匪九

平輿者漢之平輿川今隸汝陽縣陳大喜平輿人始以無賴充勇目或言爲事所激遂稱亂故以平輿爲老巢其自霍莊遁歸益深溝高壘運磚石築圍牆以自固分股盤踞王寨曹寨狀若連珠相爲犄角嘯聚死黨數千偪脅民寨數十煽動附近土匪糾約秦宣等股四出焚掠佔據圩寨爲抗拒官兵計嚴樹森檄鄭元善張曜等連營環逼進攻復添派游擊劉鳴岐管帶衛勇五百會同都司李永祿馬勇馳赴沈項爲之策應兼杜紛竄鄭元善等旣至汝甯屯韓莊諸處五月十九日偵知溱頭河一路有匪張曜馳往擊殺數十人旋即竄遁二十三日東路大股數千犯韓莊營都司周登高擊敗之追至曹寨殺賊百餘二十六日張曜督都司李忠奎等進取平輿行至高平寺迤東猝遇馬步賊千餘我軍分兩翼禦擊斃紅衣馬賊二餘賊驚潰追殺至平輿二里許高粱地中伏賊突出拚我軍步勇適至夾擊匪敗入寨我軍薄牆下守牆槍礮如

兩兵勇受傷者多乃收隊還沿途截獲載運輶料車百餘兩察附近村莊徧插賊旗人皆蓄髮良莠無別鄭元善張曜等議以爲不先破王曹兩寨不能進逼老巢不先絕外援不能進克兩寨於是分兵四出搜勦散捻以阻應援六月初一日派李忠奎周登高分由張埠韓莊兩路直趨王寨匪衆出馬步二千餘迎拒我軍力戰斃馬賊十餘步賊六十餘匪乃敗退初二日陳逆自率悍黨復犯韓莊營都司周登高等擊卻之追殺至王寨濠外斃匪百餘自是賊愈堅守不出務旬結煽動分我兵力捻首任一勤等圍攻正陽縣城火東南北三關民舍叅將保英及委營總蘇謙馬隊知縣陳夢蓮步隊會合往勦先於八里橋遇賊獲勝乘勢解城圍正陽知縣鄭修業率團下城夾擊斃賊百數十餘向東北紛竄保英復會同試用知府彭鉅等躡追斃馬賊數百黃衣賊目一匪遂遁入劉莊我軍併力圍攻以噴筒火箭注射焚燒覆壓斃賊以千計突出數百悉斬擒之其不及入莊之賊向北奔竄我軍馬隊追斬殆盡獲

偽印一黃旗四十面生擒王小贏等百餘訊言任一勤已死於軍云其確山牛仙笙股爲知縣陳憲元勦殺百餘生擒張恕等牛仙笙越山竄遁追及斬之全股撲滅其息縣李和雲股爲汝甯通判張桐勦殺先於王家店戰一時之久匪敢入寨我軍以火器進攻寨內草屋賊全數殲殄其沈項一帶散股爲游擊劉鳴歧都司李永祿及項城知縣恒倫勦殺迭獲勝仗黃廟集之戰陣斬匪首范達譚張巴黃坡之戰斃賊目劉套兒等夥匪三百餘解曹審江莊南李寨三所樓諸寨之圍復先後殺斃二百數十擒著名擒首李狗李拴等各以狀聞惟新蔡之時純一李向鈞等股擁衆四五千方圍攻縣城鄭元善等飛檄叅將吉昌游擊余萬明率隊往援沈邱縣雖莊有艾大羣等匪沿村派糧恣意焚掠姜寨有趙獅子等匪竄過泉河圍攻城垣皆陳大喜秦宣所煽結至是復嗾諸皖捻及苗練並起於是苗黨潘四等由霍邱闌入息縣詐稱五六萬潛結趙獅子秦宣股匪駛擾陳屬邊境皖捻雷彥蘇立楞眼等股圍

攻鹿邑趙浩然李加英等股竄擾夏邑洪樓諸處山東長槍會匪應之
淮寧奸民楊立等復起意句結姜太林股謀襲郡城爲知縣李澍委員
候補知縣鄒金生瑞徵姚國慶等覺獲並捕王金聲葛占魁樂一道馮
雲章等賊數十皆寘之法劉狗等股率衆萬餘竄擾睢甯金樓邪教爲
之響應閭閻塗炭羽檄紛馳歸陳汝光幾於徧地皆賊豫境爲之糜爛
府丞毛昶熙提一旅之師備防歸德勢難兼顧因檄張曜移平輿之師
援勦鹿夏而陳大喜遂以間復逞矣先是鄭元善將乘機進攻王寨適
新蔡被圍旣檄吉昌往援復檄李忠奎等繼進軍行至廟廠卽有匪股
迎拒爲李忠奎擊遁生擒邱老虎至龍口集復遇大股數千戰三時斃
賊百十餘擒賊數十奪牛馬鎗械無算焚其巢時擒首時純一等圍攻
縣城已歷三晝夜知縣韓承宣登陴固守絕城擊殺多賊奪其攻具城
圍遂解東面復有另股陳太常等分踞化莊集李忠奎擊走之時純一
李向鈞遁踞管家寨李忠奎會合韓承宣三面攻擊匪衆出拒槍斃百

餘賊退入寨我軍越濠牆上矢石紛下受傷十餘人匪亦不敢復出蓋新蔡匪股最與平輿近故先扼之始進攻王寨鄭元善挑帶各勇各挈雲梯分路進旣越濠偪附牆下士卒冒矢石仰攻守賊亦殊死抵拒相持時許大韓寨曹寨之賊悉數來援王寨踞匪復啓關出門我軍腹背受敵守備張文成馬隊後至斃賊百餘始撤隊還是日微張文成前軍幾殆自是屢攻不下七月苗天慶王金奎潘四等紛擾沈項爲我軍擊敗死拒高蘭寨十一日張曜偵知陳大喜抽調各股匪將隨苗黨合竄因與庶吉士吳元炳謀令叅將保英等選勇隊鄉團潛伏要路是夜五更時大股匪數千果由小王寨出竄我軍突起邀擊衝賊爲兩一南竄王岡一回奔小王寨我軍沿路拏殺追及小王寨濠外寨匪出援各勇隊雷力鑒戰賊敗潰遂燬小王寨餘匪竄至四陳寨我軍躡追入寨復斃賊無算同時老韓張七兩寨亦爲鄉團襲破生擒王駱等餘匪東遁十四日吳元炳保英進攻曹寨先燬其寨外礮臺牆上輒石密下我勇

裏創復進適知縣洪用勛率南李寨團練繼至四面環擊守牆匪衆被
創墜落者屍骸枕藉軍攻黃聘三率衆先登短兵格殺甚衆其潰圍出
者復爲周登高等截殺遂克曹寨生擒陳振等奪三百斤大礮二旗械
二百餘是役兩戰皆捷連復五寨復以苗黨糾合陳大喜捻股內之黃
梅舍時中旭張鳳林魏珍等徑竄息縣之包信集諸處圖回竄三河尖
舊路項城境尙有散股旬結早匪盤踞民寨因派李徵松劉鳴其李永
祿馬策勛及剛銳營官吳鳳笙馬步瀛等分徇郭橋張七莊諸寨皆攻
拔敗走之巡撫嚴樹森團練大臣毛旭熙奏白諸戰狀申言練兵籌饟
戰備攻守之策其詳具載饒匪部疏入奉 旨覽奏俱悉嚴樹森等

因得釐定一切豫省軍制饒章自是一變此陳逆踞巢煽結豫中最棘
手之時事也苗逆大股苗天慶王金奎旣橫涼豫境會亭營叅將吉昌
等戰死因復旬脅確山土匪惲明鑑等與陳大喜股合南竄確山信陽
交界之明港驛承趙貞死之張曜悅率余萬明隊追及正陽賊沿途

三級擒陶沅興等其大股以二十三日圍偃正陽張曜派叅將保英尹嘉賓疾馳赴援而白督大隊繼進前軍與賊遇正鏖戰間代理知縣張桐由西門帶勇突出夾擊斃賊數十殲執旗賊目二匪潰南竄城圍乃解翌日苗黨及陳大喜擒股續至保英督隊迎戰游擊劉自順率馬隊鈔其後斃賊數百生擒劉良駒等追殺二十餘里我軍陣亡什長千總王培外委姜沅二員匪各回竄時大喜擒股自我軍連復曹寨等五圩賊勢漸孤惟范徐兩寨與平興死結相爲犄角苗黨循淮回皖而皖股劉狗宋喜元王懷義蘇立楞眼等傾巢盡出五旗俱動粵逆復自楚境闌入信陽姜大林大股西竄沈邱東省曹鄆長槍會匪及濮范土匪並起滋擾新蔡土捻楊方衡袁安愚等勾結髮逆及各散捻圍攻縣城大河南北騷然震動嚴樹森亡祀熙督率鄭元善張曜等通籌全局分兵四出勦援攻守於是鄭元善專任平興張曜兼顧各路八月官軍方連

復洪樓等七寨擒首趙浩然遁回皖巢永夏肅清兵威少振將乘勝攻平輿九月鄭元善檄游擊王泰來率勇夜襲賊營斬首百餘有分股賊王裕幘者率衆數千竄踞曹寨附近之安徐兩莊阻我進路因復令都司周登高會同王泰來各選川楚勇分路進剿擒斃數十火安徐兩莊我軍乘勢進匪衆突出馬步千餘壓我新營周登高擊卻之追殺數里斃賊百餘火郭樓三皇廟賊卡進屯郭樓將於洪河西北分營扼布爲合圍計皖逆徐四萬等爲官兵擊敗糾衆復至平輿圖援陳逆出竄十月二十一日張曜等督率馬步進攻平輿距寨西四里聞賊營號礮各村賊黨紛紛四出張曜揮兵縱擊且戰且進沿途殲斃馬步賊二百餘生擒王小妮子等賊始卻我軍進薄賊圩屢越濠均爲礮石所阻前敵各隊移屯郭樓其地去平輿八里爲出入要道度賊必以全力爭預伏一軍於附近之大劉店潛爲策應陳逆糾集各捻五六千分東西兩路齊出直趨郭樓張曜乃派都司劉自順叅將尹嘉賓等由西路兜剿都

司周明崑千總賈蕙山等由東路包裹巴彥克喜以馬隊鈔賊後自率親軍當其前鋒兩路賊至我軍奮力抵禦自辰至未相持四時馬隊鈔至賊後馳驟衝突號起伏出劉自順巴彥克喜陣斬紅衣賊目二賊衆驚潰兵勇四面截殺伏屍數里陳逆奔至寨濠梟水得脫南鎮馬兵徐添福馬勇趙德才越濠擬生致之猝中礮殞餘匪向徐寨奔竄其不及入寨者悉爲斬擒斃馬步賊千數百奪獲馬匹旗械甚多擒蓄髮老捻賈柱等五十四訊言陳逆親弟陳汶於月前領賊千餘往助正陽捻匪張鳳林並赴羅山打糧鄭元善因密派隊往截陳汶並瞰張鳳林虛實張鳳林者素與陳逆合其黨先與吳大妮子等竄擾息縣之柳樹集諸處爲知縣李鴻藻擊殺甚多夥目霍光玉岳得洋等股復在息境上扶橋諸處嘯聚十月十四日分股圍攻范寨李鴻藻率勇赴援會集民團夾擊斃賊百數十餘匪解圍南竄二十五日偵知匪衆將攻城督團勇邀賊於城西南李家店鴻藻策馬大呼陷陣手刃數賊團勇亦奮力衝

殺戰兩時許賊至益衆勇勢不敵鴻藻陷重圍被創力戰陣亡賊割其
首去家丁趙壽徐魁同死之團勇傷亡甚多事聞 詔以同知陣亡

例從優議卹並於殉難及地方建立專祠嚴樹森因言陳逆負固平輿
時圖出竄其黨徧布汝正新息之交息縣匪徒自頃益熾擬於汝防諸
軍抽撥馬步千餘派得力營官管帶會同接署息縣知縣馮德綬相機
勦辦並催副將周鳳山迅統湘軍來豫會合張曜先將汝正新息土匪
節節掃除再圖肅清南圍復以濮范匪徒恣擾河北劾督辦河防四品
卿聯捷請裁撤防河兵勇以節靡曷議上奉 旨查察其後卒如所


請未幾被湖北巡撫之


命時府丞毛昶熙升授府尹旋晉內閣學


士鄭元善升授布政使及嚴樹森調任湖北乃授鄭元善爲巡撫擢張
曜爲布政使仍委以軍事而令巡撫委員署理藩司印務於是張曜遂
專任汝正新息勦務駐汝甯十二月十四五日平輿逆黨糾合各股衝
面敵營爲兵勇擊退二十二日邏獲逃民訊言大喜傳令各路檢首及

被脅村莊並糾約張鳳林等股同時裝旗出竄欲乘鄉民度歲抵隙飽掠又獲賊諜亦供言陳逆知官兵無多分派賊黨期於二十七日先衝郭樓韓嶺漆頭河諸營牽制我軍乘間進攻城關已製造雲梯及僞號掛欲冒兵勇入城爲內應張曜因令各營戒備部隊應機出擊馬隊扼要設伏檄汝甯府縣以團勇附郭偵邏二十七日清晨果有賊馬陸續出我軍邀截擒斬數二十八日二更郡東十八里廟數處火起賊衆分路駛突復爲我軍擊退二十九日夜馬步賊數千潛襲郭樓營我兵奮力環擊應聲而倒伏路馬隊前後夾擊斃賊百餘黎明賊遁回巢諜言匪衆將以元旦乘我不備徑犯郡城因傳令兵民各爲守備庶吉士吳元炳督隊以除夕進攻平輿游擊周明崑爲後應先發以制之是夕四更我軍行至平輿迤西突遇賊衆銜枚疾馳吳元炳揮兵擊之賊後隊益至游擊王泰來持弋躍馬奮呼入陣元炳督馬隊繼之所向披靡斬黃衣賊目一賊乃潰敗追殺十餘里斬首數百級燬張莊柳莊賊卡

至元日辰刻始收隊獲賊言李旗屯旗頭賈朝玉最凶悍是日爲諸賊率戮於軍故相率敗北云時張鳳林蕭汶信等嘯聚陡溝築寨自固與另股戴應華句結四出焚掠北至汝確南至信羅匪蹤充斥霍廣玉岳得洋等竄踞土扶橋裏脅日衆奸民揭竿相應附近民寨力不能敵亦多領旗附賊陡溝賊竄信陽團勇接仗失利因進圍州城分踞明港驛文報梗塞州城無援地方官請兵剿辦嚴樹森檄游擊穆正春部領剛銳八營步勇四千四百人吉林黑龍江馬隊並驍果驍健兩營馬勇四百騎取道遂平確山疏通驛路進援信陽當汝正羅息諸賊俾張曜專力平輿張曜亦虞息賊之撓已也令游擊李忠奎知縣單體晉率兵遏之於是大局差定此咸豐十一年自秋徂冬汝正新息間辦賊事也







豫軍紀略卷五

土匪十

同治元年正月陳大喜踞平輿糾合新項阜息捻匪史步廣李建宋玉徐四萬等股分踞郭臺尹莊陳莊劉樓大趙莊築壘爲平輿犄角復爲李旗屯挖溝設卡邀我後路庶吉士吳元炳方以戰功

特旨授檢

討仍留軍營用是戰益奮與張曜謀派游擊王泰來知縣余兆達率所部爲前敵都司周登高從九品桂鳳清率所部爲後應叅將尹嘉賓游擊劉自順都司周明崑佐領巴彥克喜率馬隊爲兩翼以初八日五鼓攻郭臺破之尹莊陳莊劉樓之匪悉衆來援張曜揮兩翼馬隊迎擊陣斬李建宋玉賊衆驚潰遂破尹莊陳莊劉樓賊壘平輿老巢突出馬步賊數千李旗屯匪從後邀截賊勢甚盛張曜與吳元炳分隊迎擊斬紅衣騎馬悍賊數十生擒宋應山賊始卻我軍乘勝追殺遂奪李旗屯是日破賊寨五斬擒凡二千餘大喜懼益結新項阜陽捻股及張鳳林正

息明港匪衆三四萬圍攻我營阻遏饒道窺伺城關以撓我軍自與其黨白餘股各踞一寨互爲聲援自汝郡距城二十里之孔海東達沈項新蔡距城三十餘里之黃灣南至正確信羅賊圩林立巡撫鄭元善以張曜兵單檄副將楊飛熊率省防剛銳五營楚勇吉林黑龍江馬隊及驍果驍健兩營馬勇馳往佐之比至張曜復連捷二十三日戰於城北東岳廟斬首千餘級二十九日攻毀楊樓賊巢方部分取平輿會另捻楊方衡袁安愚等煽髮逆圍攻新蔡甚急張曜赴援以衆寡不敵仍檄回鄭元善檄其仍扼前敵牽制賊勢令楊飛熊率所部由汝甯馳駐項城相機進援自率襄勝五營勇丁並親軍馬勇三千人取道陳項進勦於是兵又分而賊復恣張曜等詞知諸民寨附賊者半脅從者亦半因爲解散之計其拒賊之寨分兵救衛堅其志爲賊要援之寨務力攻之期必拔而後止正陽銅鐘店民寨號巨鎮偪於賊賊分股踞附近之魯店築寨挑濠以困之張曜令叅將尹嘉賓酌帶馬步復調集馬鄉傅寨

諸處練勇三千餘約以三月十九日黎明薄魯店寨下賊見我軍突至以半守寨以半迎拒尹嘉賓親督所部衝突砲中乘騎易馬復戰賊潰遁我軍追殺數里乘勝回攻賊寨塹濠樹梯蟻附上斬擒首李存道任玉琴同和尚張胡開王鐵鍾遂奪魯店寨時確境申河店寨亦爲知縣陳夢蓮守備唐漢平克復汝項適中地有董寨者因貧民內應爲賊襲陷各團驚懼欲潰射橋魏寨秦莊諸寨相距僅一二里受逼尤甚陳大喜黨之踞范寨者與董寨賊相援應張曜率馬步進扼射橋令吳元炳督前敵各營向范寨以分賊勢四月二十五日吳元炳會同叅將保英出隊誘戰范寨賊出拒平輿老巢亦出馬賊應援高捷營守備許得勝死之二十七日賊衆萬餘攻雍樂民寨我軍倚寨排砲轟斃數十乃退諜言陳大喜糾土殿書陳石頭史狗娃等股乘麥熟將大舉掠糧張曜狀聞鄭元善旣解新蔡圍因以五月初二日親率馬步進駐汝甯因與張曜等議以董寨北趨西平上蔡可斷我饗道必先取董寨而後直擣

平輿乃無患因令派赴確山之昌勝營楚勇千五百人輔以驍捷等營馬勇並陝甘官兵四百赴射橋由張曜督率進勦營總蘇謙叅將尹嘉賓亦並赴前敵其時沈項賊劉興馬丙等攻蔣莊尹嘉賓燬其土圩四正息賊張鳳林黨由吳寨攻王家店銅鐘店圖刈大麥復爲知縣方鏞擊敗大喜始無出意初十日賊騎突擾申店我軍密伏馬步伺之賊至齊出奮擊斬執旗及領隊賊目十數餘衆驚潰營總蘇謙乘勢追勦生擒李小保等奪馬百餘十一日張曜督游擊李殿元率衆薄董寨兵勇越濠躍牆而登奪關狂奔我軍追殺十餘里斃賊百餘遂克之張曜本駐韓嶺至是復還屯連營至郭樓以東近偪二王樓寨二王樓距平輿四里爲平輿門戶孔海寨者亦平輿之奧援十六日張曜率隊自孔海東南至馬灣高臺火寨外麥塌日以兵進攻二王樓二十二日徐寨出騎迎敵游擊劉自順擊敗之二十四日陳大喜出馬步數千攻郭樓大營張曜督所部擊卻之斬殺甚衆擒王進發等二十六日大喜復糾死

黨出戰我軍分路迎擊擒斬千計佐領巴彥克喜才傷七創猶力戰餘賊披靡遁伏不出尹嘉賓分兵徇正陽進攻閭灣之賊破其外寨守備胡士元戰歿兩旬間軍威大振張曜等滾營前進築壘二王樓之衝斷賊出入賊以死爭六月初一日四路來攻我軍奮擊斃其執旗悍目始少卻初二日復糾左右各寨擾我新壘我軍屹不動張曜潛調親軍及驍捷營馬隊鈔擊退之初四日五鼓各寨賊衆復湧出各賊嚴陣以觀其變傳令候中軍號礮同時奮擊賊見官軍整暇不敢偏相持稍懈我軍號發各營譟呼突擊游擊劉自順營總雙全各率馬隊縱橫決盪賊衆潰追至濠砲斃守塽賊十餘賊益膽落數日不敢出我軍遂於初九日寅刻悉銳進攻以昌勝中左等營及豫勝右營爲右路雙全馬隊並驍果驍健等營騎兵策應以昌勝後右等營及豫勝前營爲左路先鋒營馬隊爲策應張曜親率豫勝中左等營並親軍馬隊居中策應部分已定先以武成永固大炮向二王樓轟擊連發數砲聲如霆震屋瓦皆

飛武成永固者

仁廟時南懷仁監造攻堅神器也兵勇乘勢涉水

越濠疊肩而上知縣湯聘珍游擊浦本祥王泰來各持短兵督隊猛進
守賊憑壘死拒卒皆精悍砲石雨下湯聘珍左肩中槍子甚劇浦本祥
王泰來爲礮石傷已仆各裹創起戰如故自寅至午守賊不稍卻張曜
環濠躍馬大呼曰今日不破賊不退士皆踴躍湯聘珍浦本祥王泰來
分領各隊賈勇先登已革知縣沈宣昭挺矛直前賊傷左肋負創殺退
守賊張曜揮軍三面疾進卽以是日午刻攻拔二王樓寨斬逆首陳玉
川王次山郭步儀餘悉屠之方大兵之入寨也賈寨徐寨郭莊賊咸來
救分兵禦之張曜策郭莊踞匪不多可一鼓下傳令攻郭莊兵勇越牆
入並焚郭莊是夜復遣精壯至平輿附近火賊卡察虛實獲諜訊言賈
寨賊以二王樓之破殊恐求救於大喜云張曜與諸將議賈寨當我營
正南近在肘腋宜乘其驚懼未定克之免牽制因於初十日卯刻進攻
以三營扼東路備陳逆以兩營遏孔海以四營抵賈寨守賊開礮抵拒

我軍隔濠以炸砲轟然草屋衆譁潰兵勇奮入格殺無遺其奪門逸出者復爲馬隊追殺餘衆竄入史步廣巢兩日間拔賊巢三所斬擒三千餘起獲千斤大炮三牲畜旗械不可勝算我軍受傷哨官八員兵勇四百餘名陣亡兵勇十八名平輿老巢之圍遂合此汝軍絕賊沂援之第一轉機也官軍旣克平輿附近諸寨賊愈孤立因遠結外援將乘間出竄昌勝營官副將余際昌新募昌勝五營由槐店奉檄移汝會勦余際昌楊飛熊皆楚將之材武者旣至汝軍勢益振八月初一日賊至西平迤西之羅廟爲官軍擊敗因竄泌境由牛驢吳集沙河店諸處回趨確山復爲確山兵勇斬馘甚衆二十九日陳大喜結張鳳林等股匪七八千援老巢是日亥刻偵知賊千餘抵寨南十五里之兩路口俟大股豫勝昌勝兩營各出四成步隊輔以尹嘉賓劉自順靳玉書賈蕙山各營馬隊五鼓拔營進賊急迎拒張曜余際昌親督馬步縱擊賊殊死戰不稍卻已令馬隊鈔兩翼步隊擣中堅以劈山礮連環轟擊前隊悍賊應

聲倒馬隊乘之賊始亂潰我軍擒殺屍相枕藉餘匪奪路奔入兩路口
迤東之唐店寨追及寨垣踴而登寨民倒戈殺賊賊踰垣遁者皆入史
步廣寨援賊之後至者分踞高臺夕陽店安東諸處閏八月初三日犯
正陽之銅鐘寨爲都司田映唐哨官把總楊繼才擊殺數十賊四散奔
竄於是外援絕勢益孤初七日大喜率死黨五六千由十八廟北竄諜
言欲趨上蔡截饗道其守賊乘我分軍遠追卽率家口輜重突圍而出
云張曜乃屬余際昌追勦而自守前營令各寨預爲備余際昌追至汝
北河旦橋遇賊揮軍縱擊賊遂折而東走初八日馬隊追及楊寨斬殺
數百初九日薄項城西關我軍衝至相持未決叅領巴彥克喜見賊中
有紅衣乘馬指揮者手發一槍斃之馬步乘勢包鈔餘衆潰遁由楊埠
竄回南路各巢時官軍已克平輿惟老巢未下老巢賊果以初八初九
兩日黎明連犯前敵各營爲張曜擊退賊遂不復出我軍併力益攻陳
逆乃陰結陡溝明港各股匪擾遂確嶺項城擒匪劉興劉紹祿等踞寨

攻城誘皖捻姜太林擾汝郡分我兵力我軍四出扼剿而圍老巢不少懈陳逆刺知我軍前敵各營恃郡城米接濟叅將尹嘉賓所部駐高平寺通運道遂密邀正息新項及張鳳林皖捻張耀林馬步賊數萬麕聚高平寺附近之郭樓聯營二十四築壘挖濠橫亘十餘里謀阻運道覆我全軍尹嘉賓一營遂爲所困九月十六日張曜余際昌等選馬步各隊伏南北兩路另以小隊挑賊陽北以誘之匪衆出追伏兵突出夾擊斃賊四五百燬賊壘二是夕張鳳林大股來合併乘夜增壘阻後路步賊幾兩萬馬賊千餘裹延南北西三面包我營復於南北兩頭對挖長濠將以死扼因我軍糧饟不通已數日張曜余際昌激勵士卒於十七八等日晝夜出奇襲擊擒斬甚多而賊不爲動十九日張曜余際昌等親率各隊直向郭樓要道疾馳先於夜間密飭叅將尹嘉賓鞏玉林游擊周登高帶領馬步由高平寺進兵南北會合復分兵嚴困老巢援賊見我軍至卽出大股抗拒勢張甚我軍嚴陣待相持刻許伺賊少懈突

前奮壓槍礮火箭齊發賊前隊紛倒叅將徐連陞浦本祥知縣湯聘珍汪鼎和游擊王泰來劉自順協領巴彥克喜首陷陣刀斫矛刺斃悍賊數十賊乃大亂尹嘉賓等率衆大呼由後路衝入截賊爲二張曜余際昌分路追勦賊猶殊死抗巴彥克喜手斬黃衣馬賊二夥賊數人火器猝傷胸墜馬守備盧東成馳救賊矛攢刺同死之我軍憤戰益力匪勢不支盡棄營壘併向東南賊寨竄匿馬隊追殺二十餘里西北兩路及賈河南岸諸賊壘皆拔燬之守賊悉殲焉是日老巢踞賊散結隊將突圍爲守兵截殺亦甚衆是役也斃賊三千餘平壘二十四時劉興劉紹祿等踞項城之曹寨亦爲知縣陳桂馨守備王進忠而沈項縣丞嚴湘所破斬劉興之姪劉青山陳逆外援之賊旣皆敗而汝軍益振矣事聞賞叅將徐連陞副將銜冠勇巴圖魯浦本祥副將用游擊劉自順効勇巴圖魯鞏玉林副將銜王泰來叅將用振勇巴圖魯都司靳玉書游擊用湖北知縣湯聘珍同知直隸州用誠勇巴圖魯已革叅將尹嘉

賓復官協領圖爾塔齊巴圖魯巴彥克喜照副都統從優議卹建立專祠守備盧東成一併附祀論者言汝甯自陳逆倡亂諸寨應之幾於徧地皆賊無可措手當事者如理亂絲如撲燎原撥亂而反之正嗚呼難矣時巡撫鄭元善請另簡藩司

上改張曜官以總兵候補曜益自

奮勵與副將余際昌等謀以爲賊援斷絕我軍疊攻老巢雖濠深壘固未能驟克而寨中掘鼠析骸饑窘日迫各寨懾我兵威反正者固多懷疑者亦不少宜廣設購捕以離其黨於是有老黃莊賊目王秀中詣營乞降許之飭令縛逆首自效旋生擒馬行廉來獻訊果稔惡立斬之張曜卽親至其寨收撫咸薙髮復密誡王秀中選勇目數人授以機宜使入各寨爲內應張曜乃分令各隊進攻楊楹賊寨寨首陳會如者大喜之叔父本巨捻大喜謀反皆會如嗾之於是軍抵楊楹以內應破其寨搜殺無算陳會如遁竄霍灣我軍急追霍灣門不及閉擒陳會如尹娃並擒霍灣賊霍印等斬以徇因乘勝攻高潭寨亦內應破之翌日進攻

馬灣馬灣牆高濠深賊首馬行遠爲大喜謀主僞軍師馬克中在焉我軍由東路進飭汝甯府知府劉成忠率練伏汝河西兵勇至填濠越牆匪衆驚亂突出西門竄逸追斬馬行遠擒馬克中餘衆竄河西爲劉成忠截殺殆盡時盧岡賊寨來援見馬灣破卽回竄我軍躡之遂破盧岡獲擒首盧大幾賈強驢訊明與僞軍師馬克中並斬首傳示於昆軍威益振卽日傳灣寨胡老莊寨黃灣寨余樓寨關莊寨潘營寨熊灣寨馮灣寨閻灣寨劉寨萬和寨居民或殺賊來獻或縛送逆首匍匐泣訴願爲良民張曜余際昌等周歷撫諭飭令薙髮酌留器械以資防守咸與維新寨民感德畏威歡呼雷動惟李樓傅家兩寨堅抗不服兵至皆屠之斬擒首丁童許琳等計三日開攻拔逆寨七收撫民寨十二斬馘三千餘奪獲器械不可勝數反正居民萬二千餘戶於是在籍主事葉蔭昉余本初等呈請勸撫各寨張曜各資以兵因收撫張杏寨尹張渡口寨攻克黃寨寒凍寨李灣楊寨南傅寨孫灣熊灣馮老灣徐廟尹灣盧

岡寨收復楊莊姚寨諸處斬黃寨匪目張萬福周著子姚莊賊目胡啓
告等擒首張鳳林率黨旋復襲破楊莊姚寨留賊踞守並句結王倫袁
安愚等股三千餘賊攻撲寒凍爲余本初擊退是時正陽閭河店練長
魏訓亦率眾投誠余本初遂率所部由閭河店相機而進旬日間復收
撫魏家東寨永固寨張寨熊寨陳寨賀寨油房店張樓甘樓余樓雷堰
張五店並陳士正陽悅山喻魁王崑山余名山吳起元等十餘寨一律
薙髮東南百里通行無阻余本初遂留寒凍安撫新集之衆官兵所至
已拊張鳳林賊巢之背氣象爲之一變時鄭元善檄副將楊長春率所
部進屯平輿集緊偪老巢爲張曜等應援張曜余際昌等偵知老巢劇
賊悉從大喜出守賊無多恃邇北之徐寨爲屏蔽徐寨三面重濠垣壘
堅固陳逆之弟陳雙喜及擒魯邦彥王學禮等屯聚詭譎凶悍賊中
所最著計非先克徐寨則老巢不能猝拔因密遣間使爲內應以十月
十二日率馬步進攻寨西北隅火光火起揮軍越牆而進寨民徐豐年

等由內應之守賊驚亂短兵巷戰擒陳雙喜魯邦彥王學禮等餘殲除
暑盡因復以計破范寨擒擒首霍添祿蔣之成僞軍師王應林等皆斬
之復薄馮寨擒首馮殿選開寨出降於是小王史樓大劉小劉四寨亦
赴軍乞降張曜等授以機宜使同擊賊因以十一月初三日夜進攻陳
逆老巢是夕風雪甫定濠冰凝結遲明張曜余際昌等分督隊數路齊
進兵勇沿冰越濠直薄寨下俄寨內火發賊亂我軍乘勢躍登斫殺大
隊繼之大喜弟陳汶詭譎驍悍大喜事多取決爲衆惡冠率其死黨短
兵巷戰我兵奮擊生執之前獲僞軍師僞先鋒陳添爵等及大喜妻賈
氏妾尹氏陳汶妻李氏皆斬之餘夥搜殺截勦無孑遺起獲僞印二黃
色龍帽龍衣數事時初四日辰刻也復分兵徇四寨斬惡逆郅槐得馮
三祿楊成楊得正餘悉繳械薙髮與之更始正陽蓮花寺諸處民寨亦
聞風歸順先是毛昶熙檄汝甯知府劉成忠馳往正陽勸諭各寨令總
兵趙鴻舉副將陳祿興帶馬隊五百輔之劉成忠派守備王文行爲鄉

導廉知顏家寨壁壘甫成無反正意因引軍疾馳及寨匪以大車塞門
迎拒王文行大呼直入手刃數賊兵勇繼之匪衆踰垣遁陳祿興斬賊
首顏文模遂乘勝攻克楊家圍葉家圍孫家樓彭家圍方家圍楊莊水
圍六寨餘圩皆次第規復此汝軍斷賊外援收撫各寨攻克老巢汝屬
漸就肅清數月間時事也奏上得 旨余際昌以總兵記名叅將保
英以副將用游擊周登高黃貴誠以叅將用都司李廷彪以游擊用守
備賈蕙山喻國鴻慶祿以都司用千總勸玉明胡道元賈文田石三元
連雄陳萬鑑劉占鼇楊春祥王春遂把總羅輔臣陳朗山宋徵文均以
守備用佐領文凌以叅將留豫游擊李忠奎開復原官通判連翔以知
州用知縣姚國慶以直隸州用鄒鉞仍留河南還花翎崔廷鏞換花翎
縣丞劉與齡以知縣用貢生張之渠以縣丞用汝寧官紳劉成忠等亦
獎擢有差陳寨旣克大喜遠竄民寨百餘皆反正而賊之黨援猶未盡
滅 上令圖練勦匪大臣禮部侍郎毛昶熙移師汝寧與巡撫鄭元

善會勲於是祀熙元善皆駐軍汝寧先是豫省需兵鄭元善奏派前湖北宜昌鎮總兵李續燾募湘勇三千分爲威振六營來豫助勲以六月十二日抵信陽時楚師方越境協剿歐陽正鏞一軍已攻克上馬石賊巢進剿邢集周鳳山一軍連克數寨被脅民圩望風歸順已由閭家井拔營西向兩軍距明港驛東西數十里尙未會合鄭元善因檄李續燾統新集之軍由中路進期以聯絡楚師疏通驛道南汝光道趙書升導以鄉兵偵知五紀屯新店龍井胡椿店各寨賊相約阻我進兵之路七月初二日李續燾親督中軍右營取新店趙書升派防勇屯洋河爲之聲援所部鄧貴倫偪賊寨而陣賊出三路迎拒相持數時續燾軍由五紀屯至阜陽店遇賊卽擊所向披靡直抵淮岸以岸北長臺關賊麕聚不卽渡因由阜陽店折回鈔出新店寨後與鄧貴倫軍會夾擊勝之斬馘甚多明日戰復大勝五紀屯新店賊遂不敢復出龍井胡椿店賊尤悍且衆時出紛擾續燾會同署南汝光道蒯賀蓀派兵據守要隘戰屢

捷斬首復數百級八月二十八日續燾聲言攻龍井派前左兩營鼓行而進自率中軍勁旅及中右後三營兵勇銜枚疾走間道徑取胡楮店數道環攻礮裂寨牆數丈方銳進北門突出賊四五千鈔我後續燾急旋軍迎壓伏親軍於叢薄間誘賊入伏礮舉伏發衝擊決盪斬擒千計餘西向奔竄胡楮店首事胡永貴縛匪黨蕭文禮等十餘匍匐來獻瀝陳被脅狀察之信遂撫其衆令立功自贖三十日黎明胡永貴率投誠壯勇二千餘人薙髮至營聽令續燾已派隊進攻龍井因令胡永貴爲前敵蒯賀蓀派兵繼之比日出抵龍井寨濠轟斃執旗賊目賊死拒磚石如雨續燾令撤隊陷賊出巢賊果出躡我後都司陳清海撥馬陷陣手刃數賊續燾揮軍奮擊生擒紅衣騎賊兵勇乘勝拚殺斬首及落濠死者不可勝計餘衆奔竄入寨訊知紅衣賊爲寨首吳彥章之弟吳紹志素凶狡卽陣前斬之胡永貴降衆各以首級槍械獻因令回寨自守胡楮旣受撫龍井勢孤益結外援將以死拒陡溝蕭曹各寨恃龍井爲

門戶分黨入助賊勢日衆閏八月初七日夜刻賊於東面排隊出約數萬已刻抵洋河續燾慮兵力不敵亟令鄧貴倫率後右兩營斷賊歸路而自率中軍親兵暨前營副將李白衮馬隊都司馬策勳各以所部從西南路邀截復飛調曾廣星等自新店渡港扼北路既俱集號發鄧貴倫率所部大呼突陣前營親兵及馬隊繼之三路夾擊鏖戰二時擒斬三千餘賊退入寨益堅閉不復出續燾因以其間分路設伏邀截援賊焚毀近寨房屋擒僞官李時雲寘之法會湖北候補道歐陽正鏞因隨州應山相繼告警撤軍旋楚邢集踞匪亦分衆赴援龍井我軍恐腹背受敵圖攻龍井益急二十四日派前後兩營伏寨北左右兩營伏寨西中營伏寨東自率中軍親兵及驍果營馬隊伏寨南策應方嚮明西北南三門啓各出十數賊後營副將董新元揜至寨門將突入爲所覺出賊沿濠大呼曰閉門閉門牆上槍礮遽發內賊整隊出我軍奮起擊之斃賊三四百賊復入於是益圍攻斷其樵汲九月初二日有杜九鳳者

詣營泣言願與守南門之雷得雲獻門爲內應續霽祭其意誠許之初
三夜聞寨內人聲鼎沸知有變急飭鄧貴倫李先致李白袞賀星明董
新元並武生李南軒等各帶隊伏北門左右都司馬策勳等以馬隊距
北門三四里潛伏縣丞易方李續侃帶隊攻西南兩門而令前左二營
分哨東門自率親兵往來策應三更時寨內西南隅草屋爲噴筒火箭
所然風烈火猛聲愈譁如格鬥者然有頃大股賊隊開北門突出伏兵
以槍礮截擊賊衆驚潰自相踐踏鄧貴倫賀星明等率馬步窮追至淮
岸殺斃三四千落水死者不計其數餘賊星散寨內被脅良民殺賊自
效縛逆首吳彥章斬陡溝蕭曹頭目黃正文蕭文義杜魁首級以獻我
軍入寨搜殺逆黨千餘遂克龍井泉吳彥章以徇翌日進攻蕭王寨寨
目許自新請執陡溝賊贖罪續霽許之爲退軍初五日陡溝賊怒許自
新攻其寨續霽收之殺賊千餘擒三十餘皆斬首初六日許自新遂以
陡溝悍逆何登桂趙琴聲劉開運首級來獻因收撫其衆胡永貴來言

蕭曹店民將執閻景州自效爲所覺遁陡溝陡溝熊次三殺之亦欲以
首來獻續燾咸推誠納之於是蕭曹店縛閻景州父兄叔姪閻鳳先等
詣營就撫且言陡溝逆首蕭文信有加兵脅制意續燾以十一日挑六
成馬步潛入蕭曹店安撫降衆爲之備已而陡溝賊衆數千果至見官
軍旗幟急返遁官軍追之殺賊數百奔回陡溝於是續燾復勦長臺關
蘇家樓皆連勝淮南岸肅清淮北岸之淮河鎮三官廟楊家寨諸處亦
相率薙髮投誠明港賊首陳玉林苛虐寨民爲其黨所圖誘至藍店殺
之並殺從賊三十餘及其家族陰有殺誠意候補縣丞吳秉桓嘗權明
港驛丞民素德之偵知其變密以告南汝光道蒯賀蓀因令吳秉桓偕
六品軍功馬萬選信陽紳士楊運往察虛實會確山知縣王觀瀾告以
境內藍店熊莊李從店楊店四寨與明港驛路相距不遠熊藍二寨尤
近大道欲疏通驛路必先克此數寨因令與千總王得萬外委王鎮方
集團往勦且相機收撫於是藍店文童楊輝斗率郭克林張玉華擒斬

賊首張正德張正富張正道來降熊莊首事熊培遠李從店首事李松
蔚亦綱率反正郭克林楊輝斗復入邢集殺賊首胡大發夫婦並胡文
斗胡義生胡敬時等以自贖吳秉桓因與楊運胡永貴等謀作書與明
港驛民反覆開讐數千言有李聯階者復書言陳逆已除尙有老毛莫
制必得馬萬選其人來事可濟云云秉桓因白請馬萬選資之行守備
許萬邦率勇繼之比抵明港陡蕭各賊皆在老毛閉門上牆守馬萬選
已先得入乃開門逆萬邦進胡永貴楊運等率各寨隊亦俱進陡蕭賊
率老毛以遁李聯階籍罪不可追者二十二人誅之續燾軍至明港已
定於是李軍副將李白袞迭敗邢集賊之圍攻寶峰寨者殺賊數百撫
駐明港副將董新元攻熊王寨破之斬其目戴通和及悍黨數百復擊
退王唐寨援賊追殺十餘里驛路遂通附近各寨均無梗阻維時陳大
喜竄陷蕭王寨死灰將復然巡撫鄭元善因公鐫級 上命吏部待
郎張之萬署巡撫事甫受替尙未至軍此李續燾蒞賀蓀勦撫各寨疏

土匪十一

陳逆之復踞蕭王寨也西有邢集東有陡溝爲之翼衛項城正息各逆爲之應援勢將復熾毛昶熙張之萬議令李續燾督所部進圖邢集余際昌一軍由正陽直擣陡溝同時並進復派劉鴻增陳朗山勇隊七百進屯明港歸李續燾調度分撥將領馳徇各路項城擒首李金棠徐四萬擾新興集南廟仝諸處爲叅將尹嘉賓所敗擒斬李金棠新蔡土匪吳心田楊春成龐四一等拒抗官兵知縣唐咸仰會同尹嘉賓攻剿斃匪數百斬吳心田楊春成汝陽屬之木香店新匪暨旗尹嘉賓馳往剿殺略盡平其巢練總廩生史維書戰歿項南踞匪劉興陳升爲我軍設計離間自相殘殺劉興陳升及其黨皆焚死唐咸仰尹嘉賓復會勦陳寨賊巢設伏誘斬賊首百餘級汝甯知府劉成忠派守備王文行集團偕副將陳祿興所部往攻正陽東南之何岡寨破之擒何大鼻何老毛燬其寨陳祿興復進攻正息交界之正和寨降寨首王倫翌日匪黨率

衆來犯擊退之遂焚正和寨劉興寨首趙喜拒勦爲副將保英叅將周登高擊敗斬擒尤衆余際昌兵至正陽屯王家大塘附近劉夾道魯臺二寨出乞降方部分取老巢偵知東北小王寨首雷清和率黨盤踞將阻我兵路際昌因令守備楊長林游擊李大成率隊先進叅將徐連陞游擊鞏玉林副將浦本祥三營繼之副將李殿元直隸州湯聘珍策應親督圍攻適總兵趙鴻舉馬隊踵至肉薄數時把總王萬倉死之徐連陞浦本祥李大成裹創復戰卒拔小王寨斬首二千餘級復會合張曜趙鴻舉率陳祿興等攻克藍靑店寨斬其魁李小成吳毛程炤劉元賀夢王路殺守垛悍黨二百餘於是陳逆計窮張曜復用王次山陳玉川爲鄉導誘擒陳逆母朱氏於郭溜寨大喜度勢不可爲乃自焚寨由陡溝渡淮西走復爲藍店民團截殺因竄繞邢集以北會楚檢林振山者追藏邢集因與大喜合竄湖北隨州之倒石橋以十一月二十九日攻破隨境擂鼓臺寨十二月初一日焚掠小麻店初二日馭擾守順寨裏

脅日衆漸復披猖南汝光道蒯賀蓀信陽知州孫嘉臻以狀聞張之萬
飛檄張曜選撥馬隊探踪追擊而自拔隊由許州赴汝會合毛昶熙和
機勦辦大喜旣破擂鼓臺寨盤踞草店諸處脅掠初七日爲楚省總兵
沈俊德所襲擒馘甚多棄寨遁復回竄豫省桐柏縣東之固鎮吳城諸
處衆尙三四千張曜率馬隊追至平昌關距固鎮六十里山路陡險人
煙絕少軍士裹糧進大喜恃險與其黨築壘挖濠負隅拒抗余際昌暨
剛銳昌勝各一營馳往助勦李續燾亦派道員葛承霖率威振三營及
馬策勦馬隊由邢集合二十七日移屯王家岡二十八日鼓行入山由
徑叢雜馬隊不能馳騁遂率步勇登山頂俯瞰山麓一河隔岸賊旗麻
立鱗集蟻渡我軍槍礮下垂不能得力因發矢投石斃數賊不少卻張
曜指揮各軍分左右中三路齊壓伏一軍於山側以爲策應部勒旣定
直衝賊陣礮石交發互有死傷張曜復調各營全隊親督角戰呼聲震
山谷斬首數十級賊乃退遁兵勇乘勝追躡過河賊黨傾巢接應鈔襲

我後敗匪亦各回鬪我軍三面受敵賈勇直前人自爲戰短兵相接浴血裹創愈戰愈奮賊不能敵始四散回竄我軍追之直至菊花嶺遂駐軍二十九日張曜令各軍乘夜追搗賊巢三更後銜枚疾趨直抵固鎮負土填濠攀曳而入賊衆驚起殊死迎拒副將周見思叅將左敬軒都司瞿盛南守備左長清深入戰歿悍賊數百乘亂由西南潰圍而逸比明搜捕餘賊始知陳大喜已與死黨竄赴西南童子叛諸處我軍追至熱河口不及始旋軍是夕斃賊二百數十奏入死事者從優議卹張之萬復奏言地方官弁於賊入境旣無狀報復不以兵團接應得旨南陽知府金梁革職留任桐柏知縣邵仲坦固縣營守備張錫升皆革職陳大喜旣遁湖北隨州境爲楚師截擊復由豫省確山屬之石滾河溝竹店竄至新店爲豫勝前營營官王泰來擊退莫入陡溝合併復爲駐防陡溝之昌勝營擊敗因折而東趨張之萬策其必投土扶橋因飛飭駐防銅鐘店之守備田映唐嚴陣以待已而賊果至田映唐率所部

擊之斃二百餘擒二十餘大喜被追落水幾就執遂遁入土扶橋霍廣
玉寨張曜等亦尋至時二年正月初七日也越日部署合圍由正陽逼
進而大喜已乘間襲破息境之王李二寨以初九日至岳家坡初十日
至王谷橋總兵趙鴻舉蹙之於新息交界之包辛集十二日張曜追及
於賈寨皆有斬獲大喜遂由宋家岡遁入新蔡之袁安愚寨安愚本大
喜老黨薙髮投誠衆知其必叛歸陳逆張曜急調馬步星夜合圍余際
昌率五營助之尹嘉賓一隊策應復挖長濠爲久困計馬隊甫至賊已
出寨因縱擊斃其執旗賊目二衆立敗退入袁寨濠內我軍馬勇下馬
槍濠賊垂就獲忽寨牆槍礮如雨門遽啓出悍賊數千與陳逆衆合直
衝馬隊我軍自未至酉縱橫決盪殺賊數百生擒李小友陳觀得楊心
和等斬之更餘步隊始判遂令與馬隊列陣三更後大喜率悍賊四五
百突陣東竄叅將崔廷桂把總王彥邦中矛傷馬勇有死者袁寨猶開
礮助賊張曜令步隊屯袁寨扼禦自與余際昌將輕騎逐之至練村大

喜等見水渡溺死者甚多我軍追殺紅衣賊十數比至河岸欲渡北岸陳家空檢首陳大常率衆數百以槍礮抵拒我軍因由上水渡河馳抵華莊陳逆已遁入華莊迤南吳老莊寨距陳大常寨七里其地有賊寨互相比附未可遽攻乃共謀徵調合圍之策而太和一路睨檢大至全豫震搖兵力不能專注大喜遂又以其間得脫矣汝寧之亂大喜與張鳳林各樹一幟流毒三府一州之地蔓延幾及千里沈項新蔡汝陽之賊奉大喜白旗爲號令確遂桐泌信羅商固之賊奉張鳳林黃旗爲號大喜旣失其穴豕奔免逸幾瀕於殆而卒莫能檻獲張鳳林復百計牽制分我兵力使不得盡銳成功方大喜回竄陡溝張逆陽與之違實陰爲之助陡溝衆於元年冬嘗乞降且縛藍青店賊首夏廷渠以獻富寧者未之許鳳林復詭詣營泣訴請執大喜自贖毛昶熙張之萬陽納之令張曜等收撫挈往固縣鎮勦賊張鳳林已微窺其意日與張曜等行止必相距五六十餘里啓候至帳下必擁小隊迫張曜等深入長臺

關復假餼糧不給請回寨措資資張曜密曰毛昶熙張之萬使陰圖之於是毛昶熙等飭余際昌以所部屯茅家壩與張逆老巢環逼西至明港皆我軍營壘揆其將至必損滅黨羽貌爲恭順待其過明港執之諸軍嚴陣基布其徒必不敢逞計定因執之及其黨並確山擒首張幅林分別凌遲梟首以徇時二年正月初三日也復飭趙鴻舉陳祿興以譚家寨監生李玉山等爲嚮導攻克正陽之李寨主事余本初攻克尹灣寨斬殺數百平其巢皆鳳林死黨負固不服者於是張逆殲而陳逆愈窮此元年冬二年春汝郡漸平之軍事也奏上擒張逆功得 旨叅

將黃貴誠以副將用都司南宮寶以游擊用練總守備宋培基以都司用餘存記大喜之竄吳老莊也我軍駐華莊以扼之時豫省擒股勦撫畧盡大喜計窮因結皖捻爲外援皖捻分兩股其與大喜合者則陳大常袁安愚秦宣孫四牙張鳳昌洪馬瞎等其劉狗孫臭一股則由鹿邑菜塚駛竄爲科爾沁親王僧格林沁所部追勦於是亳汝擒蹤遂合息

縣范家橋股首王暴牙爲知縣劉鴻昌剿擒其子王大平王小平及其黨趙均何本立等誘破其寨王暴牙亦竄入大喜股二年正月初八日皖檢秦宣陳啓等竄犯華莊新蔡縣知縣及叅將尹嘉賓邀擊敗之陳大喜恃皖檢踞吳老莊侯家寨諸處勢復恣巡撫張之萬以大喜遁竄効張曜褫職留營李續燾摘頂是時陳逆踞杜清源寨余際昌軍屯吳老莊南張曜復調阜陽民團輔以李忠奎一營屯油店橋十八日張曜率尹嘉賓與陳逆戰於吳老莊北鏖賊甚多追至秦宣寨方部署攻寨北路皖股大至油店橋一營已隔斷因飛咨余際昌軍會合堵剿時臺檢甚衆其西竄各股已至商水縣之朱圩沈邱槐店亦有賊蹤毛昶熙張之萬分撥扼勦日不暇給陳逆率其醜類麇集迭攻我營毛昶熙以張曜余際昌兩軍間隔復派游擊邵春仁左成元各率所部馳往接應十八日張曜率尹嘉賓以民團爲嚮導夜馳至侯寨破賊壘三所斃悍賊二百餘擒檢首獨角虎周馬及髮檢二十餘皆斬之有竄至油店橋

者爲李忠奎截殺數十十九日張曜等與賊戰復勝余際昌偵知臺檢已由油店橋竄過華莊乃整隊進勦適陳大喜陳大常率衆來犯卽揮隊擊之俄臺檢馬隊數千馳至包鈔我軍接戰數刻賊聚益衆包圍十數重際昌策馬督陣往來盪決馬賊少卻步賊復進昌勝前營爲賊截數段候補知州陳學仁力戰死之叅將徐連升奮鬪得出兵勇悉爲賊困際昌復挺矛大呼陷陣手殺十餘賊拔衆出圍暫駐茅家岡賊復環攻數時始退張曜慮余際昌營後路隔絕因以二十日夜緝率數百騎由頓家岡往來沖突以會邵春仁左成元亦至賊疑大兵雲集且諜知後來大股臺檢已於鹿邑爲僧格林沁馬隊所敗乃以二十二日焚巢西遁圖攻新蔡縣城又爲邵春仁渡河擊敗殺傷甚多生擒李勝等賊遂折而西北竄李莊橋廟灣一帶滋擾李莊橋與平輿切近四面皆賊寨正北荒坡各寨尤負固舊有豫勝三營扼守爲張曜所部張曜恐賊衆復陷平輿疾馳出賊前至馮莊與三營聯絡扼賊進路二十五日賊

陷汝陽屬之史樓二十七日豫勝中營合民團襲破之二十八日陳大喜率黨千餘竄入汝陽屬之棗王寨將入荒坡爲負隅計張曜偵賊夜運輜重赴荒坡密檄游擊南宮寶汝陽練長劉長倫等率兵練乘其出進攻之二十九日五鼓抵寨下大呼奮登賊衆驚潰越牆遁遂毀棗王寨賊度荒坡不可復踞乃以二月朔攻新蔡屬之宋培基寨游擊周明崑擊退之初二日率衆南竄周明崑追斬賊百餘徐四萬等股之未隨大喜竄者皆留匿荒坡寨張曜以初五六日由張灣渡河逼之賊依寨出拒初七日傾巢出戰爲我軍擊殺數十張曜各營遂留攻荒坡先是毛昶熙張之萬策正陽東南賊寨尙多張鳳林伏誅後其黨仍踞張岡汝陽所屬汝南埠諸處新撫各寨亦易搖動陳大喜旣不克踞荒坡勢必南犯因檄汝甯知府劉成忠駐正息交界之雷堰鎮撫降寨以王文行勇隊隸之復檄主事余本初集團扼汝陽屬之寒凍爲之聲援檄總兵趙鴻舉副將陳祿興游擊邵春仁都司左成元率所部屯正陽屬

之劉夾道阮店茅家店油坊店諸處遏賊南趨而令余際昌軍出賊西探蹤迎擊至是陳大喜等果南竄至河岸爲趙鴻舉王文行擊殺數十岳城土扶橋擒首鮑金朝徐文田霍廣玉王暴牙等迎之由岳城渡河趨楊莊逼近雷堰汝南埠民寨徒避一空賊衆遂襲破雷堰西北之馮徐二寨並占踞汝南埠空寨劉成忠派軍功諭魁率勇數百乘夜潛往由圯牆擁入匪衆驚潰及晨王文行諭魁整隊出遇賊於馮家寨外王文行下馬解衣大呼奮擊斬髮擒數十馮寨賊亦遂出逃正陽擒首戴應華蕭文信李存道等率黨乘隙突入張岡裝旗圖竄遠近爲之震動魯店亦有賊黨潛回將踞寨以應張岡絕官軍進路李存道者本正陽教匪踞劉夾道寨其母李陳氏尤兇狡游擊南宮寶捕獲送大營斬之存道隻身遁至是復逞謀聞毛昶熙急調陳祿興由阮店移營魯店令趙鴻舉等爲之策應初二日寅刻祿興兵入寨搜殺數匪賊馬已至寨外見我軍先入乃遁去初四日李存道出竄祿興隊鈔擊之生擒悍匪

李和尚訊言陳大喜方與臺檢謀集張岡進攻魯店云初五日賊果犯魯店趙鴻舉率邵春仁等往援與陳祿興夾擊殺賊百餘圍乃解是日賊竄王家岡逼近寒凍余本初隊方出哨候選知縣李嘉謨及弟嘉端遇賊邀殺七十餘生擒林振山賊黨潘士魁等適余際昌軍由寒凍渡河初六日與賊遇於張岡北戰亦勝之於是毛昶熙張之萬議以張曜所部併力規取荒坡余際昌趙鴻舉陳祿興等聯營扼守斷賊勾結兼以鎮壓各寨以守爲勦而陳大喜已於初八日率臺檢由正陽屬銅鐘店一路避兵南走張中戴應華林振山等股馬步二千餘留張岡復分踞旁近楊寨王文寨戴家寨相犄角爲牽制我軍之計昶熙等因復檄陳祿興一軍規取張岡趙鴻舉蔣東才邵春仁左成元等分勦旁寨而令余際昌追賊初九日軍至銅鐘店知賊已入土扶橋霍寨因進圍之賊夜棄寨遁初十日至息縣賊已於龐家灣渡河而南知縣劉鴻昌都司田映唐卽半渡擊之其前股竄中和店淮南民團堵擊復折回與後

股合竄羅山竹竿店知縣賀錫福截擊斬首三十餘級擒賊十三賊遂由河口集范寨將寨諸處遁入光山縣境十一日際昌等軍勦之賊遂竄曰雀園回旋楚界張岡賊以十三日率馬步數千出竄陳祿興蔣東才擊之遁入楊寨十六日進攻楊寨方填濠奮進張岡賊衆來援陳祿興王文行迎擊援賊趙鴻舉等攻楊寨賊勢殊猛我軍奮擊殺六百餘陳祿興等策楊寨夜必無備令馬隊截東路防竄逸率步隊以四更與王文行祝林清朱安瀾等越濠進王文行大呼先登安瀾等繼之呼聲震地賊不及拒門開東門遁復爲蔣東才江學詩穆清遠等馬隊截殺略盡殲紅黃衣賊目數十楊寨旣克張岡之勢孤矣時張曜攻荒坡荒坡爲項南巨患與曹窰馬寨呂寨路閼莊高蘭店各賊勾結蔓延初七日曹窰馬寨股衆圖竄項城爲叅將張士元都司馬榮勛截回因進攻之初九日我軍攜大車門板柴草等具填濠銳進槍斃守牆悍賊十數馬寨賊出援馬榮勛擊卻之張曜因以其間逼攻荒坡附近胡寨擒首

時純一從賊南竄張曜計破其寨斬純一兄精一知縣唐咸仰亦以其時攻克王莊斬擒首王庚分軍拒高蘭馬寨援賊而荒坡勢益蹙諜知寨中良民有反正意乃密令練長劉傳綸往開諭約爲內應十二日午後風大作張曜令各營多備火器二更後兵勇逼濠火寨牆草屋煙燄四起賊衆大亂寨民乘勢啓門張曜親督游擊周明晃姬成功叅將周登高知州汪鼎和率隊擁進我軍大呼縱擊殲斃無算陣斬逆首王中四餘賊越牆逸復爲副將保英等截殺殆盡擒王文庭等六十餘賊置之法獲七百斤大礮四大小槍礮百餘是日張士元馬策勛等攻曹寨亦令軍士縱火圍東西北三面虛南面縱之出預伏兵於隘截殺略盡殘賊遁入馬寨張曜等因進攻馬姜高蘭二寨十七日官軍至寨下寨民老幼開門環泣具言被脅狀納之寨首閻丁爬陰結馬姜寨賊陶海樓陶學禮董金梁高得時曹小兒等詭降將復爲變立擒斬之十八日馬姜寨路閻莊皆以次乞降斬路閻莊擒首吳玉江魏元林王盡臣嚴

連中董驢等馬姜寨首吳萃亭爲商寨店奸人勾結率衆遁去旋爲張曜所部及陳州知府劉拱宸在籍郎中袁保慶等以地雷轟塌寨牆執吳萃亭李如松並積惡徐四萬王九現等汝東項南各境一律肅清此二年春張余分勦各戰事也



土匪十二

二月臺捻由白雀園東竄商城循六安諸境冀旬結粵逆余際昌軍追之屢戰皆捷然所部止數千傷亡疾疫賊衆逾萬毛昶熙張之萬檄副將孫之友叅將敖天印率所部馳往會勦未至半日而際昌已亡於方寨時四月初九也戰狀詳皖匪部於是汝臺諸捻復會合分踞正陽屬之方家寨萬安店及附近之黃寨大小張寨與張岡聯絡聲勢賊馬四出蔓及寒凍北距汝甯府城僅六十餘里正息民寨告急請兵者日至張之萬等議以張岡之圍不可撤乃飭總兵趙鴻舉叅將敖天印等固守派王文行自帶奮勇七百人先援賊攻諸寨而令孫之友馬步往來游徼斷張岡外援四月十一日髮逆數千攻正陽屬之吳家寨練首吳錫庚力拒之勢甚殆十二日王文行軍至奮擊賊不能當竄入萬安店十三日文行遂攻萬安店賊出列陣抗拒文行繞賊後大呼陷陣敗之左腰中槍傷裹創力戰不少卻十四日黎明追至熊寨北二里許練總

陳鳳雲率鄉團佐之賊自相踐踏死者枕藉哨長王允能手刃悍賊四文行奮馳入陣復兩被矛傷戰自若張之萬奏其驍勇由守備擢游擊賞猛勇巴圖魯名號賊遂竄張岡忠心廟諸處爲孫之友擊退復敗之於殷家圩張岡踞賊乘外援屬集出悍黨千餘屯寨外爲趙鴻舉所扼適孫之友余本初各帶隊至會合勦殺以千計千總汪印千斬紅衣賊目馬尙際等李承先斬黃衣賊目何小妮等餘衆奔入寨十五日諜言內賊將延外賊檢討吳元炳總兵趙鴻舉諒其詐以爲內賊欲攻營爲是語誑我全軍出以乘我間因部令李承先劉宏亮馬隊於正南李玉德汪印千馬隊於正北孫之友馬隊於正東陳祿興以步隊趨西北邵春仁左成元以步隊趨正南爲策應東南步隊防內賊出撲救天印統之蔣東才扼其正西王文行扼其正東嚴陣以待是日午刻援賊六七千蜂至寨外搖旗聲應我軍奮擊卻其援賊寨賊復出數百攻我後路皆擊退之明日復如是又擊退之追至周水灣皖捻旣不得併入張岡

又不得逞志於外寨其枝乃窮遂向東北旁竄將潛渡汝河由新蔡遁回皖境汝捻之散佈河南卑諸處者尙充斥時豫中將領足當一面者李續燾方圍攻邢集未下余際昌戰死惟張曜一人毛昶熙等因與議令孫之友王文行兩隊歸張曜調度以厚兵力曜言新蔡屬之宋丕基寨爲賊北竄沈項必由之路宜扼守於是張曜馳抵宋寨賊已全股由汝南卑來犯參將保英擊退之賊遂由李莊橋渡河列北岸是夜復爲我軍所襲賊東北竄追二十餘里其分踞汝南卑寨之賊又爲孫之友王文行千總喻魁高自秀等所蹙礮斃及溺水者千計其竄新蔡者又爲知縣唐咸仲叅將尹嘉賓設伏斬首三四百級擒捻首徐卯等正法餘悉東竄孫之友尹嘉賓及代理知縣蔣彙之連戰復敗之遂遁回皖境大喜從之去豫軍由是得專力張岡矣小彭寨者張鳳林黨寨首彭玉升旣死其弟彭小案踞之當大喜結皖匪南竄小案應之附近降寨幾爲搖動正陽知縣方鏞守備王文行密結寨民爲內應攻破之並破

其西南十里之小楊寨執玉升甥李名山人心乃定李續燾之攻邢集
斬殺甚多確山知縣王觀瀾因寨民鄭啓明等有反正意白於南汝光
道蒯賁蓀賁蓀單騎入邢集諭以禍福寨民感泣乞降遂收撫之斬其
怙惡方恆秀趙二信尤萬友方恆清吳作霖等衆遂繳械誓不復反事
皆在皖檢未遁前故張岡賊益欲與皖檢合及皖檢既遁汝檢之散布
方家寨及黃寨大小張寨者復爲知縣裘寶芳把總袁連三率吳寨首
文生吳錫庚熊寨首武進士熊際泰等以次攻克斬張得讓張萬明李
辭奈胡爹子張鳳亭涂占富張振國張大安張亮王傳科等裘寶芳槍
斃賊魁張振全斬其首實與戕余際昌之賊也張岡内外援旣俱絕我
軍圍之數重毛昶熙親臨前敵張之萬復添檄道銜候補知府尹耕雲
赴張岡與張曜吳元炳等會籌進取因縱間使檢首張鳳舞殺悍賊戴
應華等賊心渙散惟霍廣玉糾合蕭文信王暴牙等誓以死守六月十
六日我軍掘穿南面引溝洩南濠積水明日復掘北面未至濠丈許守

賊礮石如雨兵勇多傷亡張曜因列仗蔽溝頭於陣後隧以進十八日通水口北濠積水洩盡復於南牆濠外築木城建礮臺晝夜轟擊寨賊死者甚衆諜言霍廣玉將率黨突圍出張曜吳元炳尹耕雲等謀以圍師嚴密霍逆出必不得逞聲言突圍實陰圖竄逸二十日晚伏兵近賊濠潛易長濠口號邏伺之二更後霍逆果易裝出爲縣丞單體晉營官宋徵文執獲因部分進攻適寨賊黃心敏數十人來營乞降具得寨中虛實急令副將陳祿興選所部精銳攻西門副將敖天印率所部攻東門張曜親率中營親軍及豫前營從南路進邵春仁左成元蔣東才王文行各營銜尾繼進策應各路堵扼東西寨門以永綏曜南各營截其北面布置初定時已四鼓毛昶熙於礮臺上申嚴號令吳元炳尹耕雲分路督隊而前張曜策馬先馳手刃退縮者數人兵勇奮進直逼寨根以噴筒火箭焚寨中房屋煙燄障天人聲鼎沸我軍乘勢擁登砍賊爭入賊衆知必死率黨巷戰我軍冒火縱擊愈接愈厲衢巷賊屍枕藉比

明懿悍賊千餘斬著名首惡蕭文信擒著名首惡王暴牙羅宗邦夥匪彭雲章等及張鳳林家屬共千六百七十餘名口餘黨殲戮無遺其逸出寨外復爲伏兵截殺無一免者摻獲張總愚僞印一旗械資糧無算脅從老幼婦女二千餘赦弗殺盡焚其屋舍火三日始熄寨牆平毀霍廣玉王暴牙羅宗邦解汝營審之信駢戮梟首以徇奏入得 旨嘉

獎知府尹耕雲徐恆曾以道員留豫記名遇道員缺出請簡放皆賞戴花翎 上以逾格特恩傳諭勉勵張曜賞還提督銜副將陳祿興李

殿元游擊邵春仁靳玉書蔣東才都司連美宋徵文王占鰲左成元羅中魁守備殷華廷楊新發驍騎校木克金布縣丞單體晉等及在事弁兵紳練咸擢賞有差張岡平昶熙復還宋防之萬奏暫行回省移駐許州居中調度分撥各隊扼守要隘與地方官弁搜捕餘孽此汝郡大股擒寨肅清之時事也張岡旣克陳大喜入皖出沒無定汝南逆寨投誠者相繼而梗化者猶時反覆光息伏莽尤多九月息縣土匪方寨首逆

張振之弟張正謂張正行等乘大兵西剿亳擒潛結夥黨數百以初七日三更襲破正陽屬之楊莊駐防息縣總兵李殿元會合正陽知縣朱淦息縣知縣蔣彙之攻破之擒張新張大書等餘向東北奪路竄守備劉泰成把總陳大德陣亡十月皖擒程二老坎由楚境回竄息匪吳添鳳路李寨句召皖黨圖抗官軍李殿元蔣彙之率兵勇襲破之於是汝光餘孽復蠢然思動張正謂竄遁談家園程匪股夥敗散者皆歸之士匪曹魁亦乘機糾衆起巡撫張之萬令汝甯知府劉成忠親赴寒凍雷堰駐紮聯絡寨團相機撫勦叅將王文行都司連美等隊駐汝南埠鎮扼二十日曹魁股匪襲破雷堰南十餘里之杜家樓文行等進軍勦之曹魁率衆馳突文行被創戰益力賊遁入王寨復棄之走二十六日我軍與戰復勝匪因四出勾結與其黨王占魁徐心田何小關王廷幹鮑進朝等半皆梟擒散歸者狼狽肆虐而均以談家園爲窟穴十一月初三日賊逼息境馮寨縱火爲永綏營游擊甄樹德王鴻鈞等擊敗是晚

復攻小劉寨甄樹德等分兵夾擊斬擒甚衆把總何明亮戰歿初四日
匪復乘夜襲破汝南埠西二十里之王寨適王文行巡路至截殺打糧
馬賊四十餘是日程二老坎黨李允劉三貓等由太和界首集循沙河
西竄近槐店爲副將徐連陞擊敗擒悍黨張玉成等陳大喜亦率苗黨
三千餘與之合劉成忠令王文行連美及練總南宮寶宋培基分路擊
之遂以十二日偕劉李股同入談圍與土匪張勾曹魁王廷幹合夥十
三日一夜陳逆率賊騎四百竄入正陽之小王寨並由談圍運糧米爲久
踞計談圍賊張勾等亦連日攻陷正陽之袁家寨楊家店諸處毛昶熙
自歸德起程復至汝寧督勦十五日汝寧知府劉成忠令都司王玉佩
連美等攻王寨正陽知縣白渠把總袁連三馬鄉練總安體道等攻袁
寨衝入枚疾馳填濠奮進王寨袁寨同時並克餘衆西南竄分撲銅鐘陡
溝諸寨王文行等追至寨民開寨夾擊斃賊無數餘衆擾及信陽州境
之華州王洋河龍井諸寨南汝光道蒯賀孫飭州勇四出應援苗黨高三

牛本潁州悍賊因苗逆伏誅西陽集石弓山賊巢燬率衆亡命出合正
息土匪七八千謂知州勇外出伺隙圍州城蒯賀蓀及副將巴揚阿率
知縣宮國勳及紳士李兆端鄭錫恩禦之數令守備張希榮率練勇宮
兆驥杜中選張金斗等縋城擊殺並以夜霧劫賊營設伏擊之斬殺數
百擒王志全等城圍乃解賊遁以二十五六等日至游河馮河駱駝店
盤踞蒯賀蓀巴揚阿等復引兵追之適副將黃貴誠率隊合擊至吳家
店復有另股馬賊迎拒都司潘輔山隊殺賊馬步二百餘賊乃由楚豫
界之尖山竄遁蒯賀蓀以狀聞李殿元等軍攻談園久不克知府劉成
忠與叅將王文行都司連美王玉佩賈文田鄭永泰等計自汝南罕移
營正陽之白土店七里灣連美哨經周梵寨寨衆出阻擊殺數十余瞎
子者息之巨檢聞官軍至以重利啗文行乞撫文行卻其賄許爲道地
翌日率隊出不意攻之旣入寨賊猶死鬥殲殺甚衆兵勇亦多受傷者
二十六日余寨克軍威爲之一振復以南路之賊黃梅寒鮑景朝二股

亦最強旋降旋叛劉成忠等設計誘之十二月初二日黃梅寒鮑景朝從四百餘人詣文行所各與其死黨數十入營受撫文行留梅寒送景朝於守備楊繼才營安置是夕文行密約游擊連雄都司連美王玉佩鄭永泰賈文田各軍以次日鳴礮爲號齊出截殺劉成忠調練策應初三日辰刻文行伏勇營側自入邀黃梅寒同飯坐定礮發文行抽刀斫梅寒仆伏勇齊進執之營弁喻魁王起山朱靠山田玉芝各掣兵刃出截賊黨殺傷三十餘營外悍賊百餘聞聲內闕我軍開門逆戰連斃十餘乃敗退楊繼才營聞礮聲亦舉事鮑景朝警覺率悍黨奪門欲出繼才親率小隊堵截斫傷鮑景朝仆地其黨出火彈燃帳房我軍且救且鬥殺賊二十餘餘奪門與外賊合遁連雄連美王玉佩賈文田隊及劉成忠勇分路截殺悍黨三百餘殊死戰有身受數傷不退者其凶獷如此鄭永泰亦身被數傷裹創前門所率馬隊沿途斬擒直至距鮑寨三里殲殺淨盡賊首黃梅寒鮑景朝及悍目傅大嘴皆檻送郡城梟以徇

鮑寨餘孽負隅抗守毛昶熙親督翰林院侍講吳元炳汝甯知府劉成忠率隊進屯初八日匪衆夜劫楊繼才營鄭永泰王玉佩喻魁各率馬步往援賊見官兵大至乃驚退各軍躡擊斬賊數十十五日吳元炳親率叅將邵春仁王文行游擊蔣東才及連雄連美鄭永泰王玉佩等分布鮑寨四面防衝突移游擊李大成一營屯寨東北守備楊繼才一營屯寨正北方築壘忽寨南突來賊黨數百寨賊出應犯我新壘我軍列隊迎擊殺斃甚多始退入寨我軍乘勢急追寨牆槍礮如雨傷斃都司巴振德戰馬勇目李景堂中礮左腹洞穿未得入是日風雪甚大我軍僅屯兩營餘隊暫撤雪霽後蔣東才邵春仁等復移營進逼吳元炳以我軍尚未紮齊恐賊乘夜出撲密令蔣東才帶勇伏營外備不虞又令李大成等率奮勇數十於夜間至濠邊施火器以擾之二十三日四更諜報聞河南岸來匪無數潛入鮑寨我軍嚴備竟夕二十四日黎明寨匪突出馬步八九百乘霧直攻蔣東才營勢甚剽竄東才率勇迎勦賊

合力包圍外委蔣尙鈞魁梧多力素以勇健稱赤身徒跣大呼陷陣往來冰雪中手刃十餘賊當者披靡刀爲之折易刀復戰把總王九如繼之殺賊亦十餘正酣門間邵春仁李大成楊繼才於大霧中間槍礮聲知我軍與賊戰各以勇隊分路策應鈔賊後衝賊爲二賊退不及殊死鬥適王文行帶隊踵至見賊陣內有逆首王廷幹卽會合副將范文英策騎衝賊陣欲牛致之王廷幹倉皇迎戰身受數創回馬奔竄餘衆驚潰奪門進寨我軍交乘之賊自相踐踏死者甚衆於是賊守益固連日復大霧我軍以壁壘新成未出戰二十六日晚邵春仁隊聞寨中人聲甚囂似將出擾因會蔣東才嚴陣待派哨官守備劉華生把總蔡明山外委蔣尙鈞選銳勇伏寨外伺賊離巢急起襲寨復知會各營出隊接應部分既定賊開寨門擁出犯邵春仁營我軍陣營外以槍礮迎擊賊知有備急退劉華生蔡明山已於夜霧中襲入寨門殺退守賊蔣尙鈞率勇隊由寨牆蟻附登火彈噴筒一時併發王文行李大成連美鄭永

秦楊繼才等隊均至呼聲震地遂克龍寨敗匪見寨內火起歸路斷相率西竄寨賊亦由西踰垣而遁爲我軍盡殺大半於是汝南鉅匪惟餘談園王廷幹及白土店朱鶴寺岳城尙有口伏莽迺熙飭各營乘勝掃蕩奏入升賞各將士有差息檢鄔大年乘太子殿元移軍赴汝糾衆攻陷民寨勢漸張張之萬時在汝州行營飭光州知州任重光調團往勦重光乃親率馬步練勇三百餘名烏龍集團男四百名進屯光息交界之劉家寨飛調各鄉團勇既皆集重光輕騎先至大年寨外審度形勢濠水深闊惟東南地勢窪下水可洩因令鄉團掘濠堤練勇列陣以護寨牆礮石雨下我勇受傷十二人烏龍烏槍子登樹擊斃數賊自己至西洩水三尺蒙板填濠進賊死拒未得入是晚有逸出者爲團勇截殺越日重光部令烏龍集練總段軾濂率團攻其西軍功盧其恕率團攻其東自率州勇攻其南獨缺北面誘賊出先令守備張俊率練勇伏叢樹中亭午三面並進奮力攻擊賊衆懼有數十賊由北出竄張俊截殺數賊

生擒徐鳳有訊知寨中糧盡重光嚴斷接濟越二日復攻先伏勇寨西
敗堵間令把總陳裕德率數百人挑賊賊牆開大礮傷勇三人裕德陽
退誘之賊遽開門出逐至寨西伏起裕德回軍復戰斬首十餘級賊退
入寨重光令軍功李仲倫諭賊黨趙國良使爲內應會大風雪國良取
寨中火藥盡溼之密招外兵於是段軾瀛羅鳳魁張俊盧其恕孫成德
等各率團勇進攻東西南三面仍缺北面令魏鳳魁孟毓藻帶勇設伏
匪衆倉猝登牆風雪愈大火藥不然我軍乘勢仰攻登牆擁入短兵巷
戰斃賊二百餘斬鄢大年割其首生擒悍賊二十餘餘黨搜殺淨盡燔
其巢亦十二月間事也三年正月汝軍進攻談圍談圍舊爲徐心田徐
文田所居毫匪過擾羣賊入踞心田避居寨外文田曾充副將范文英
營勇文英諭令效力贖罪使復入爲內應初四日知府劉成忠侍講吳
元炳副將范文英部撥精銳分起前進文田啓門文英策馬先馳各隊
踵赴呼聲四震賊衆驚起格鬥奪門欲出相持猝不可解叅將王文行

從寨後踰垣入前後夾擊賊乃大潰悍黨張正辛張鳳汝曹罡等約二百並殲焉遂克談圍成忠元炳等議乘勝攻王廷幹寨審附近之王占魁王寶柱王烈五王美玉各寨及邵寨鄧寨賀寨等爲之援必翦除諸寨而後廷幹可圖乃趣令守備王漢章率精壯數十詭言自談圍竄逸乘王占魁他出入其寨副將范文英叅將邵春仁游擊呂振河領馬隊銜枚疾趨夜抵寨漢章發火內應賊衆不知所措踰垣遁我軍遂入分隊搜勦是日王占魁寨亦克初五日叅將王文行都司王玉佩守備楊繼才喻魁文生茅際幸從九錢汝鑑等復克王寶柱寨初六日復克邵寨初十日復克鄧寨斬著名賊目尹國富尹國有鄧會士等餘賊亦鮮得脫王美玉寨賀寨因震懾乞降成忠等審其被脅許之入斬怙惡數賊撫定其衆方我軍之克王寶柱寨也首逆王立柱遁匿成忠等密授計息縣練總王勤學誘之降挈小隊四十人入營予以號衣令陰圖王烈五贖罪復諭王烈五使陰圖立柱且言及期以官兵往助破鄧寨日

我軍分隊預伏王烈五寨側王立柱率小隊衣號衣入王烈五寨約降王勤學以寨民二百從之烈五見號衣意爲官兵遽集黨起搏立柱奮敵勤學佐之殺烈五殲其黨我兵間門突入與勤學會復執立柱斬之於是諸附離廷幹之寨皆克廷幹大懼諸營乞撫成忠等以廷幹罪雖不赦然老檢爲各寨所觀望因羈縻使爲導薙髮効力自贖時黃梅寒寨屢攻未克因令王廷幹從范文英王文行連美楊繼才喻魁王漢章等往攻十五日克之斃賊二百餘餘奔入黃家岡朱振聲寨十九日范文英破黃家岡寨王文行破朱振聲寨邵春仁呂振河蔣東才李大成巴振德王玉佩周興國等破趙長久寨因並李瞎子寨破之殺李瞎子及其子姪遂攻入余敏寨其時范文英王文行連美鄭永泰等復攻破陳樓司灣兩寨生擒逆首陳小運王猪娃餘黨殲殺畧盡范文英王玉佩攻小趙寨克之復進克蕭寨擒擒首蕭勉蕭渲蕭申蕭起皆正法王文行破余寨時檢首盛德秀鄭繼祖詐言投誠文行調察其僞陽與之

至盛寨門呼盛德秀出計事我軍乘隙揜入殺德秀及其子三人諸盛死黨十餘平其寨牆文行率十餘騎急馳過鄭樓詭稱腹疾誑賊冀入寨門甫啓文行驟入刺殺鄭繼祖梟其首賊黨爭以長矛拒寨門復閉寨內良民喜鄭逆誅爭開寨門文行始得出我軍隨入盡殲其黨鄭樓亦克七昶熙移營進駐息縣以息縣東北二十餘里徐來聘寨賊與徐能小時兩賊寨相勾結時出擾因令副將范文英督各隊往攻經徐能寨賊開槍礮撓我軍我軍怒因先進攻立拔之斃老捻百餘奔竄者爲馬勇追殺淨盡遂迫小時寨寨賊以徐能寨破不敢拒守竄入徐來聘寨我軍乘勝進攻來聘寨范文英徐連陞邵春仁王文行蔣東才李大成呂振河等馬步各營分路圍攻寨濠水深因伐樹枝雜秫稭填塞以進賊悍甚比將登輒爲刺傷兵勇負創甚衆李大成蔣東才及同知馬駿皆中槍自辰至酉數登數墜是夜三鼓范文英等帶隊復進圍其三面而設伏於南路賊以我軍晝受傷不虞夜至斫殺數十人大呼躍而

登賊黨驚潰搜殺截斃不可勝計擒著名逆首陳海馬吳添喜傅炳西
周臭回曹旺書鄭泳鄧氣包等並正法寨毀二十九日事也先是二十
四日光州洪河口劉一里亡寨前忽有船泊州判閔賅會慮勾引外匪
令紳士段軾濂李景韓率勇往覘之劉逆出隊格鬥李景韓刺劉逆弟
劉殿山馬下割其首奪馬以歸從九任宗昉洪承錫各勇繼進匪衆涉
河爭竄劉一里亡遁去寨亦平光州知州任重光狀聞昶熙並奏之按
自鮑寨至徐來聘寨數月間連下不止數十壘如拉枯摧朽諸將或以
力敵或以智取解衣酣鬥梯攻肉薄或身被數刃裹創復進驍敢稱一
時資獲之勇信有之哉此二年九月至三年正月汝光軍事也

土匪十三

同治三年三月汝甯帶兵翰林院侍講吳元炳以母喪回籍解營務初三日范文英王文行率古息里練總余廷幹胡莊里練總劉浩然攻聞家寨克之斃老捻四十餘生擒捻首朱應死孫麻子孫小戲董平黃鑼鍋正法會大雨十三日霽文英等復進攻小陳寨都司王漢章傅守巽先登斫殺守牆賊數十衆驚潰竄入陳固寨因乘勝擣陳固亦克之搜殺略盡俱平其寨垣十八日攻小鄭寨逆衆聞兵至棄寨遁我軍追殺百餘擒賊十五小鄭亦克趙寨者捻首趙國良所踞陰結死黨爲遁逃藪圖緩我兵詭遣趙之清乞撫文英等察其奸陽許之令以二十二日率精銳來營助攻別寨之清諾而去二十一夜文英密伏兵寨外二十二日辰刻之清率悍黨百餘來踐諾我兵伺其離寨遠遽起擊之殺之清殲其黨是日我軍於寨外築三營明日復築七營挑濠塹以困之同時信陽州龍井寨首杜珍投誠復畔知縣宮國勳因周大山周照爲內

應設計奪門入殺杜珍及其黨張安張同正陽周寨積匪周夢麟等時
出劫掠寨長周玉鼎禁之殺玉鼎家糾蕭曹寨及確山之楊寨匪將裝
旗起事知縣白渠遣把總袁連三在籍都司袁丕基確山練總馬萬選
等破其寨殺周夢麟等擒周萬營周器周成功周平一王省等正法餘
夥有竄入趙國良寨者國良恃其濠壘深固復倚簡世然寨爲翼援益
負嵎死拒范文英令都司王漢章誘執世然寨藏匪張鳳林之姪張句
及惡黨張喜斬之光州州判閔賅曾令練長洪維新率烏龍集勇進攻
世然寨世然族簡克勤懼乞降因先收克勤寨殺簡麻佳陳禿手等於
是附近之簡家樓王家莊趙家寨林家莊賊巢皆克並擒獲著名巨擒
王早獐等寘之法趙國良寨外援既絕食將盡我軍圍之益力世然因
僞降以緩死自詣營懇被脅狀毛昶熙納之二十五日令南汝光道蒯
賀蓀率同知馬駿都司王連三及親軍壯勇箝世然往清寨至寨使世
然指諸不逞者三十一人皆駢誅籍資糧收軍械安撫良民既訖事乃

牽世然出面縛斬於市梟以徇國良聞益懼數遣其黨出攻皆爲趙鴻舉等擊退二十六日初更後東西門忽大開匪衆全數衝出游擊蔣東才都司雷瑞廷王玉佩守備楊繼才分路截殺百餘人賊大駭繞寨北奔越降勇王廷幹徐雙喜營守備王鳳鳴力禦之身面被數創眩而顛賊遂乘隙遁趙鴻舉飭邵春仁以兩營入收寨自督范文英王文行馬步躡擊趙國良率敗賊竄岳城是夕入王姓水圩踞之趙鴻舉追至令都司巴振德雷瑞廷王玉佩攻東南叅將王文行守備楊繼才攻西北游擊呂振河都司鄭永泰以騎兵誘賊出游擊蔣東才以步隊截歸路賊果出千總蔣尙鈞橫衝之趙國良擁衆死門蔣東才巴振德被數創不少邵士氣益奮格殺悍賊二百餘生擒國良之姪趙安等國良引敗匪遁徐心田寨復遁劉時安寨二十八日五鼓我軍抵劉寨誠寨首劉時安毋爲所脅國良審將出以死抗王文行躍馬入寨刺國良洞胸死餘黨殲殺無遺於是息北之堅巢悍逆誅鉅略盡矣聲王廷幹徐雙喜

堵勦不力罪並其黨皆誅之而令趙鴻舉王文行等會息縣知縣蔣彙之往討徐心田及心田兄文田以納趙逆故毛昶熙張之萬上戰事賞蔣東才叅將用巴振德王玉佩游擊用楊繼才王鳳鳴都司用千總王枝發守備用二十九日王鴻舉等既至徐文田徐心田寨分兵伏要路乘夜進攻適匪衆出逸伏兵起擊殺百餘餘遁入王得官王海山寨復襲陷張寨小王寨爲犄角勢鴻舉等入兩徐寨平毀牆濠旋進攻王得官寨毛昶熙別令南汝光道蒯賁蓀等進攻張寨四月初一日張寨黨衆出拒副將徐連陞游擊陳安邦都司雷瑞廷奮擊之斬頭目張永旺賊乃潰遁我軍追至濠密道間入寨諭良民使內應二更時寨內火起匪衆奪門逃我軍乘勢斬百餘遂克張寨時悍黨多聚小王寨中趙鴻舉自以兵牽制王得官寨令徐連陞王文行呂振河各率隊進圍小王寨步兵連營騎兵往來策應挑濠爲久困計賊懼以十六夜冒死出撲我軍先有備徐連陞率巴振德周興國由東南兩路禦之王文行率

楊繼才喻魁王玉佩由西北兩路禦之呂振河率穆清遠李玉得禹元順等游截於濠外匪衆左右馳突輒爲我兵擊殺急欲回巢而寨門已爲蔣東才奪據因回竄李大成傅守巽戢宗英鄭永泰馬步分路截擊殲殺悉盡小王寨克官軍乘勝進攻王得官王海山二寨王得官寨跨河立分東西兩堡與王海山寨相距不遠我軍攻得官寨海山寨輒出賊應援十八日王文行王玉佩等挑賊出戰先入得官東寨黨衆悉歸西寨閉門堅拒我軍日以炸礮轟燒寨屋潛伏兵麥地伺其變二十日初更賊傾巢出竄伏兵截擊各營繼之乘勢入寨縱火海山寨見火光出救呂振河以兵邀阻戰良久殲殺大半餘匪欲退回寨而寨上已徧立官軍旗幟矣是日斃二百餘賊搜斬追殺無數時汝南強賊惟餘新蔡時玉洗一寨爲最堅我軍進攻之月餘知縣章慶保執殺其兄時玉衡游擊南宮寶擒其悍黨王套趙小辦玉洗震懾南汝光道蒯賀蓀誘之出降繫送毛昶熙大營五月初四日入寨安撫獲黨惡四十六人斬

之平其寨垣昶熙以玉洗同黨尙有梁家灣寨張家大圩隸阜陽與新蔡犬牙交錯皆積年巨捻不及時撲滅餘燄復然重煩兵力因於十三日令蒯賁蓀趙鴻舉率都司穆清遠傳守巽新蔡知縣章慶保以馬隊往逼張家大圩因寨內良民張萬祥內應克之格殺悍賊數十逆首張五禿子率死黨出逸爲練長黨錫齡所獲並擒王榮張得意張小妮張保立張獅張小墩張梁張利害張臭糞等梁家灣寨首梁淦義聞官軍至詭言乞降游擊南宮寶責令交出悍黨梁心誠宋漢雲梁雙銀梁馬喜戴景梁小奴等同赴新蔡隨營效力贖罪翌日解送至大營與張圩賊皆斬首王文行等急馳赴其寨搜殺餘匪兩寨俱克復先是我軍攻克徐心田劉一里亡等寨二徐及劉逆遁亡至是叅將王文行息縣知縣蔣彙之光州州判閔賅曾廉知徐心田匿息縣梁莊劉一里亡亦名劉周城匿商城期思集因令把總程長保縣丞胡簡密往弋獲徐心田及其黨徐在田徐步高馬東香萬庚山李定徐小蓮黃城柱黃學一黃

落等練長洪逢源獲劉周城及其黨齊麻子等併送大營正法心田弟
文田自道光二十七八年間結衆倡亂屢句粵皖各逆圍攻新息罪尤
不赦趙鴻舉蒯賀蓀廉知文田與著擒王占魁同竄汝河東阜陽縣境
因派前正陽知縣王承楓會同都司馬正心息縣知縣蔣寅之率練總
姜磐逸彭長庚等分路躡捕王承楓等追至小孤莊賊首夥數十以槍
礮死拒勇隊排垣入立斃三十餘擒文田王占魁及余逢因周小路劉
鬧送大營分別凌遲斬梟同時息擒廖金漳見息境擒寨次第掃平因
自焚寨率衆夜遁爲都司馬正心練勇截獲並其黨數十又新蔡東鄉
巨擒陳太常一名陳崇常焚掠多年受髮逆僞封燕王知縣章慶保派
紳士劉先慎陳端木等破其寨並黨惡鍾老虎鍾三木匠及其家屬俱
執獲摻得金龍紅毡風帽一僞印一光山紳士任鳳詰同縣役詰獲王
庭幹弟王庭蘭及著名擒首熊添福均送大營處死新蔡知縣章慶保
復先後弋獲逆黨杜鼇城徐花狼程慶印劉得陳二麻張保淦韓奮子

米步五黃套徐鼠等擊殺時名書擒其黨李元中時文書曹本立時文
甲吳青山等攻克馬長秧寨擒長秧及其夥戚來臣張小落張淦淙李
大闢王李義允杜大礮楊扒鉤等汝寧知府劉成忠捕獲馮利張大
林並其弟張三林四林五林馬大添周見國楊向秋等總兵趙鴻舉派
勇捕獲錢萬清之黨王狗饒于瞎子徐故敖等息縣知縣蔣寅之獲匪
首錢萬清於朱家樓並夥匪錢順里獲丁萬斗於固始之游家店並夥
匪丁萬堂丁狗又獲巨擒李鳳潮陳道寬李位繁等正陽知縣白渠獲
趙獅子趙松林等皆正法梟示汝光漸次肅清張之萬由南陽移營赴
汝甯兼防粵逆毛昶熙亦自息縣回駐汝寧與張之萬會商善後事宜
之萬倡議練兵代勇調南鎮標兵五百名令候補知府湯聘珍管帶會
同汝甯知府劉成忠訓練備防復以豫省擒亂多由地方官撫綏未能
周洽因講求吏治慎擇人才爲正本清源之議改廬城夏邑沈邱項城
泌陽桐柏正陽新蔡確山光山十縣爲赤緊遇有缺出比邊缺例擇用

才能勝任者補署不拘常格汝光所屬汝正新息各縣自陳大喜等倡亂官兵進勦頻年田畝荒蕪村墟寥落因議招徠流亡勸課耕種分給牛犁籽種檄候補知府師長怡王珠炳總理其事復於各縣施粥賑濟民賴以活者甚衆十月毛昶熙移營回歸德張之萬亦南向勦擒匪飭地方官撫恤窮黎搜捕餘孽四年三月光州州判吳世銓獲息擒李鳳高王麻子於霍邱朱家荒坡圩獲李鳳先於阜陽劉家店息縣知縣蔣彙之獲巨擒鄭樹中襄城知縣羅雋獲鹿邑縣人郭廣濂爲擒首李合僞軍師素以符水惑人汝南卑通判王延燁獲張鳳林之姪張沅皆正法於是漏網各逆亦以次就誅毛昶熙張之萬奏汝光肅清上在事文武戰功請獎時科爾沁親王僧格林沁戰歿於曹州 上方震悼責皖楚豫督師諸臣救援不力交部議處用御史言停汝光保案俟皖擒全股肅清再行具奏 上從之其後七年豫軍平張總愚八年巡撫

李鶴年始援成案奏之四月團練大臣兼辦剿匪吏部左侍郎毛昶熙

奉命入都巡撫張之萬亦旋改河東道總督擢湖北布政使吳昌壽爲河南巡撫此汝光土匪殄滅自三年三月至四年四月時事也大喜自二年二月距襄陽之黃龍壩瑜山將由樊城老河口回竄救白土岡賊寨爲官兵所阻三年二三月間與張總愚同竄南陽擾鄧州鎮平內鄉至桐柏合粵逆竄棗隨粵逆滅遂入總愚股後不知所死或言死曹縣爲官兵所殺至於汝光諸逆寨屠戮慘矣其先或迫於賊脅其後習而化之然所誅滅擒寨居多始終抗拒者什二三反正者皆免順逆之機有足爲世深戒者故特詳著之

土匪十四

同治元年四月直東水套匪首就擒餘匪屯踞濮州荷澤一路 欽

差大臣勝保赴援潁州奏以正白旗漢軍副都統遮克敦布督勦水套餘賊豫省仍戒嚴十二月山東冠縣教匪張錫珠滋事竄入直隸冀州甯晉諸境旋渡衛河衝冀鹽匪景德馬賊麴起應之竄臨清州之桑園村清河縣之董家廟威縣之子集村南宮縣之梅花鎮冀州棗強束鹿均有賊并踞南宮縣城一晝夜而去勢張甚河朔動搖臨漳內黃土匪崔興支文炳等乘勢竊發張之萬檄副將楊長春李士玉督兵往勦士玉病以游擊李文全代領其衆比至崔興等股已爲地方官弁率團擊散搜捕餘黨數十置之法因令駐防東匪於是楊長春駐安陽之豐樂鎮李文全分屯二臺聯絡守禦十二月十八日匪由肥鄉竄成安復竄邯鄲東距臨漳數十里李文全出隊迎勦楊長春繼之二十日遇賊於臨漳縣境之羊羔村斬擒數賊二十二日馬賊千餘蜂至楊長春擊之

斬首數級生擒悍賊二奪旗械多件匪竄西南二十四日賊復至三臺渡漳河安陽知縣金寶符會營往勦焚橋賊梟水樸岸爲民團擊殺甚多擒執旗賊目一賊謀一賊懼乃北越成安縣境楊長春復回屯豐樂鎮二年正月內黃縣知縣印錫齡廉知賊首崔興潛藏滑潞交界之劉莊沙嘴村謝三家卽會同楊長春王玉佩等往捕獲之械送道府勘問得實梟首示衆 上以謝三窩藏聚衆首犯何以不卽置重典爲問且勒緝支文炳支文炳窮蹙欲投張錫珠藏山東觀城縣之夏溝二月初四日內黃縣知縣印錫齡會同楊長春往執之以歸訊明亦正法土擒遂除而東匪益肆初三四日竄擾館陶冠縣馬步約數萬館陶獲賊諜訊言賊中乏糧欲竄豫境就食豫省因益嚴備十一日大股賊馳抵龍王廟下五里渡河而西約三萬賊騎駛黃金隄距大名府城十餘里距豫境臨漳不及百里勢甚張地方官以狀聞請添兵堵勦之萬因令楊長春李士玉率所部擇要堵禦復檄游擊徐連陞李大成分帶昌勝

圖銳步勇各一營輔以游擊馬策勦驍果營馬勇馳往協勦歸河北道周煦徵調度十九日東匪由北路竄近臨漳楊長春率所部由豐樂鎮東下二十日黎明抵距臨漳二十里之張里集火光四起邊馬數十騎迎犯我隊楊長春揮隊禦之斫倒騎馬數賊賊卻走我兵追至七八里外遙見塵土蔽天賊大股悉南駛諜報賊馬百餘繞臨漳之南張村邊馬已至三臺楊長春折回堵勦是日晚賊馬二百餘由臨漳屬之曹村孫陶各口偪河岸欲潛渡安陽縣知縣金寶符叅將穆特布督率兵練乘其半濟薄而擊之斃馬賊十餘始退去三鼓後復有步賊數百潛行鳧水亦爲防勇擊退楊長春之與賊戰於張里集也李士玉亦出隊與賊戰於羊羔村敗之明日賊攻城關爲兵團擊退斬首數十級匪竄張村集迤東以漳河北岸橋毀南岸鄉團力扼不能渡折竄東北二十一日李士玉追至縣東柏鶴集羊羔村截殺後股賊數十乃遠遁成安縣界我軍逐北二十餘里賊游弋於成安肥鄉等境夜輒遙見火光二十

五日復竄臨漳二十六日賊騎數百薄縣城餘踞西北近城各村焚掠李士玉出隊雕剿賊退夜復蛇行近城下將爬牆知縣曹敬率兵民禦之賊於隄外竟夜馳擾二十七日李士玉率所部出城奮擊斬馘四十餘乃向西北敗竄我軍追之出境三月二十六日成安境之柏寺營接壤臨漳有南樂縣閭王廟人秦姓冒團練肆擾李士玉會同叅將徐連陞通判吳若烺等率隊馳抵成安境之金山劉家甘落等村勦殺晷盡距臨漳二十餘里之鄧家莊復有直隸清豐縣土匪數百嘯聚焚掠士玉等以二十八日督隊往勦匪衆拒敵我軍擊斃百餘生擒其魁馬調元薛蘭亭及夥黨三十餘餘向東狂駛於是近豫土擒悉除東匪愈遠嚴漸解六月李士玉奉調守永城楊長春旋授河北鎮總兵官九月宋景詩餘黨楊澱一朱登峯劉厚德程敬書岳金聲等爲直東官軍勦急竄開州聶固村進窺滑濬楊長春自豐樂鎮率隊迎勦初三日丑刻匪竄滑境知縣孔繼中率團禦之八里營斃賊數十擒杜欒等賊遂竄入

潛境偏縣城知縣杜傑魁礮斃二十餘人復會營汎出擊斬首三十餘級生擒王松山黃堅衛輝營守備萬鵬程亦擊殺悍賊二十餘擒邵成姚廷芳沿途寨團遇賊卽擊匪衆向西北疾走是日楊長春隊至張官屯遇馬賊四百餘騎擊敗之初四日賊分兩股一竄安陽縣東白倍集一竄安陽東北楊家新莊長春派彰德叅將穆特布馳赴白倍集而自以所部至楊家新莊見賊騎數百北駛我軍列長陣鈔擊賊返拒槍礮對發時許長春率馬弁十餘大呼突陣手槍擊斃悍目守備王仕旺楊長生等繼之斬首數十餘級匪潰竄白倍之賊亦爲穆特布擊敗兩股會合由孫陶河岸竄往臨漳南駱村長春躡至村外賊殊死拒知縣曹敬率團踵至因夾擊斃賊目胡太喜楊五馬三及騎馬執旗賊餘衆竄逸我軍追至徐村賊乘夜竄肥鄉李林鋪初六日長春追至李林鋪賊竄邯鄲之蘇漕爲僧格林沁馬隊截殺四百餘殘敗四散長春復追至沙屯斬首十餘級申刻追至雷家堡復擒賊三是夕我軍屯肥之王安

望初七日敗賊已過廣平相距益遠僧軍馬隊由臨洺關緊躡長春乃
由邯鄲成安各境沿路哨巡撤回臨漳

土匪十五

南陽土匪自角子山勦平後餘孽猶有存者同治元年十月十一日擒首李合周二紅生等四五百人屯泌遂舞交界之白石崖舞陽縣知縣王元緒會同把總錢獻璋督練往勦擒王合等餘賊沿山竄遁山路延亘四十餘里王元緒錢獻璋議分路堵勦十四日錢獻璋由東路先進步行登山擊斃執旗賊目忽中飛石仆地外委楊樹勳勇目劉金山趨救同時戰歿練勇奮擊獲斬夥匪六級元緒以狀白且請兵時汝軍方攻陳大喜老巢楚師合圍邢集陡溝巡撫張之萬因檄駐宛副將劉車龍率所部會勦賊由舞境竄泌陽之象河關入嵯峨山盤踞二十三日團勇乘賊不備以夜入山搜捕斃賊數十擒擒首許振奇侯姓等李合乘隙出竄爲勇丁追獲梟其首脅從解散三年髮逆皖擒交訖於南陽土匪乘機蠢動唐縣著名擒首楊五湯及凶黨石蒿歐麻子段成金段三夜貓任小集等嘯聚抗捕張之萬駐軍宛南檄叅將崔廷桂會地方

官入山搜捕先後獲楊五湯石蒿等及其夥黨唐維漢鄭復泰陳泳詳
陳泳懷陳四鄭黑臉張汶到周金桂鄭聶子王建泳張長法陳汶學段
青春段禧方張明情周恒彩陶光斗等復於泌陽之畢店大河屯澗嶺
店諸處弋獲積匪郝到進賈鳳儀丁老大單金升徐魁等置之法崔廷
桂始以余際昌陣亡救援不及奪職至是復其官六年十月襄城縣土
匪程岱因與宋莫坤涉訟起釁程岱子得寬糾衆二百餘人以二十八
日夜假尋仇攻縣城南關縱火焚居民屋舍知縣羅雋會營往捕獲匪
黨王昇平李東萬孫保成等程得寬率衆南竄許州知州葉世槐狀聞
巡撫李鶴年檄總兵崔廷桂率防河歸德鎮標兵千名馳往會同南陽
鎮總兵趙鴻舉南陽知府劉拱宸勦捕是股以程岱程得寬馬明如楊
百萬劉中五人爲首各領夥匪百餘人數十人不等將東竄泌陽角子
山諸處勾結起事崔廷桂等馳至一戰於襄城之常村再戰於寶豐之
少可皆連破城甚多十月初七日匪踞龍山憑險抗拒飛石下擊官兵

鼓勇仰攻殺斃數十擒賊十餘復乘夜襲登山頂以步隊分路進剿馬
隊扼要隘一晝夜間全股殲殄畧盡餘匪二三十人翻山遁逸於是游
擊郭廣泰葉縣知縣溫德懋寶豐知縣秦家駒密縣知縣張遇升登封
知縣周起俊等先後弋獲張拴程建之任用奇楊百萬畢四沅畢五沅
程建德何義黃汶俊翟平安馬明如程得寬王喜太趙萬鄰李占元劉
中程岱韓振魁等分別凌遲斬梟以徇事聞上以奏功之捷賞擢崔廷
桂等有差黜襄城營都司杜芸以千總降補削襄城縣知縣羅儒職泌
陽土匪聞風潛煽七年四月匪首張十一李振基花得春聚衆數百人
以二十五日由泌境竄入裕州山中知州沈祥年會營汛督紳士袁書
田及羊冊民團馳往堵剿先於賈寨沿山扼守要隘匪懼二十六日薄
暮率黨出山衝突我兵斃匪六十餘復遁入山將翻山竄泌境沈祥年
預令民團由小路鈔截二十七日戰於酒店復斬數十匪遂入角子山
盤踞糾結日衆附近各州縣均以狀聞巡撫李鶴年檄總兵崔廷桂前

往會勦崔廷桂派弁崔愉經易裝密探盡得賊狀並藏匿所在因分兵由襄葉臨鄆兩路星夜馳進復號召各局紳團王萬松徐紹三郭文光葉永吉等合力堵禦閏四月十七日至泌陽之沙河店殲斃匪百餘生擒張泰春冷麥高喜等察知大股麕聚不遠因選馬步隊由澗嶺店偵賊所向二十三日夏老莊遇匪衆百餘我軍進擊斃匪八九十擒夥賊九匪竄道觀曹場竇莊諸處我軍沿路搜殺至常營賊數百自廟擁出崔廷桂以洋槍隊連環擊斃數十人四散紛竄馬隊追躡各屬團練分路截殺不可勝計是股遂殲盡獲賊張十一訊稱李振基被迫自戕花得春懼捕已颺逸去崔廷桂趙鴻舉分搜餘黨五月初八日唐縣把總張鳳錫獲花得春於湖北隨州之安居店並悍黨劉四械送回豫崔廷桂等復獲巨匪江明修齊廣成薛元烈等唐縣知縣錢德昌獲李七赤扒脚等各數十人皆置諸法七月皖捻蕩平河防凱撤李鶴年因檄崔廷桂以所部歸德鎮兵移屯南汝等境督率地方文武隨時搜緝凡

著名刀檢及爲害閭閻不法棍徒先後捕戮不下數百人角子山一路素稱捻藪至是肅清崔廷桂論功擢提督餘升賞有階八年宜陽刀匪張野貓陰結匪類擾害居民巡撫李鶴年檄河陝汝道廣隆河南府知府陳肇鏞捕治未獲九年二月張野貓及其弟張花貓踞黑山頂紅澗溝至泰山廟糾衆搶掠地方文武查拏嵩縣營守備李占松與把總周金科外委王朝玉均遇伏被害李鶴年方閱伍至河南府急檄記名提督崔廷桂河北鎮總兵楊長春叅將玉壽各率所部馳往會勦効廣隆陳肇鏞摘頂宜陽知縣恒倫革職留任三月匪踞宜陽岳山雲蓋寺憑高恃險嘯聚日多山徑叢雜隘口紛歧李鶴年恐其突出蔓延因令楊長春督副將裴政叅將金齡玉壽率兵千名分扼各要隘廣隆陳肇鏞各帶勇團於岳山下凹裏寨諸處設伏其界連嵩縣之官亭八里臺永寧之紅葉村伊宜之寨子街均飭各縣率團駐守親軍入山捕擊匪衆聞風南竄爲嵩縣團勇擊退擒匪黨張英王流逆衆復撲三道濠爲兵

團截殺十餘人擒匪目張獻書張文成李馬均正法勢漸窮蹙自拔來
歸者日數十人野貓詭欲乞降廣隆等令知縣恒倫守備劉鳳歧魯山
汎把總張應鶴入匪巢諭散脅衆遂挈張野貓張花貓及徒黨四百餘
人以三月二十七日詣行營讞定斬野貓於市散其衆歸農事已奏開
復廣隆陳肇鏞恒倫處分

賞劉鳳歧張應鶴花翎

豫軍紀略卷六

皖匪一

豫省東南接壤江皖蒙亳潁壽民俗故強悍往往聚衆剽劫多至千餘人少亦數百人各推賊中桀黠者爲之首自號爲捻不相統壹吏斯土者多以搏擊爲治否則不可制雖在承平已患之矣咸豐三年粵匪陷安慶踞金陵分黨破鳳陽歸德進圍大梁於是皖豫之交匪蹤蠶起捻首李士林劉疙瘡劉元吉任二皮等聚黨橫行而張樂行起於蒙城雉河集尤凶悍狡黠爲羣賊冠是歲六月潁州賊赴周口購糧窺豫境任二皮結江南匪擾息縣劉元吉先由鹿邑趨沈項界連之槐店復與劉疙瘡竄沈邱之劉莊店知縣馮謙擊賊受傷賊以巨礮雲梯攻縣城總兵經文岱遣叅將慶瑞等赴援賊敗退復遣叅將達凌阿繼進項城縣知縣沈棠以練勇來會行抵沈邱柏樹林賊驟至合兵擊殺四十餘人俘擒首劉元吉趙肖賈大小等並寘之法賊黨南竄踞阜陽之瓦店方

家集巡撫陸應穀檄副將錫普常阿會陳州府知府朱師濂堵剿九月

上礮陸應穀職擢山東按察使英桂爲河南巡撫以粵逆方據武

漢窺荆襄諭英桂防南陽十一月劉沅瘡乘間擾項城之新橋婁堤店

時陝甘總督舒興阿軍次陳州遣委協領柯克僧額等與朱師濂會剿

賊逸追至鯛陽城及馬大莊俘賊七十餘進至新興集擊斬擒首孫大

爛馬淑明等焚韓老家擒集餘衆潰散時固始擒首李士林任二皮李

鳳岐等糾黨二千餘焚掠朱臯集英桂駐信陽檄叅將希拉布都司楊

鼎金等往勦任二皮伏誅李士林仍恃衆抗拒寢不可制道光間周天

爵知宿州用法頗嚴峻素爲皖匪所憚軍事起天爵督師駐宿州賊震

讐不敢動至是天爵歿廷議遣副都御史袁甲三督勦起前兩廣

總督徐廣縉於家與署按察使牛鑑會勦歸陳土匪於是皖豫之交軍

事日亟其與本境土匪分合不一或有雜見於土匪者要其大股則悉

詳於是編云咸豐四年潁州擒首李士林勢日熾袁甲三移營宿州距

穎四百餘里穎郡西南與豫省接壤袁甲三奏請河南巡撫派員捕剿

上命英桂飭牛鑑徐廣縉越境討之英桂奏言徐廣縉練團歸德光固偪楚烽臣駐汝靈策應均未能遽離已飛檄署臬司牛鑑卸篆後酌帶陳州兵勇督皖豫各州縣擒捕牛鑑尋以辦理情形奏聞得

旨以賞給五品頂戴之員不應自行奏事嗣後仍由撫臣代奏牛鑑以陳屬防兵僅千餘所部銳勇亦祇千人不敷調遣請將護送陝甘總督關防過陳官兵二百名截留二月十一日袁甲三奏言鳳穎土匪冒粵逆竄入穎上蒙城請 敕牛鑑徐廣縉會剿時賊已由西北竄亳州

陷永城初九初十等日圍夏邑甚急徐廣縉督歸德府知府王之斌往援斃賊數百生擒二十餘道甫通而夏邑已於十一日失守署知縣徐本立與同城文武及親屬幕友均死之王之斌至夏邑賊委城竄碭山於馬收集獲賊戴連升鞫稱正月間賊由六合分股至穎上蒙城將自歸德渡河因歸德駐兵從永夏折回碭山北竄援直隸被困賊蓋至是

始知竄入豫境折赴碭山者乃粵逆之冒土匪也先是粵逆自靜海獨
流突圍竄聚河間豫省北路戒嚴東西兩路逼近皖楚賊氛英桂奏請
江南等處官兵馳赴皖楚會剿又因南路較急仍駐汝寧扼守未幾肝
胃病發請簡派大員幫辦旋以東路有警回省調度至是上

命僧格林沁勝保遴員帶兵來豫調陝西提督桂明帶兵一千五百名
徑赴歸德未幾諭令馳往直隸出賊前進剿三月袁甲三駐軍臨

淮奏言皖省霍邱一路土匪披猖請飭牛鑑進駐潁州

上命刻日

馳往英桂出省赴援歸德信陽兩路英桂以陳州勦捕緊要請牛鑑暫
緩赴潁四月安徽霍邱縣檢首李兆受竄入商城之王家院牆署副將
春明並備弁兵勇均遇害鄭敦謹遣牛鑑帶兵勇二千餘名往勦劾署
商城知縣郎仲連先褫其職仍責自效陣亡被害諸員及傷亡兵勇嗣
經查明請將署陝西定邊協副將春明交部從優議卹建立專祠同時
死事之代理陝西秦州營守備郭建極署陝西會審營千總馬萬圖河

南陝州營千總屈凌霄署陝西靜甯協營把總何映桂署河南魯山汛把總胡錦標署陝西靜甯協營經制外委馬梯雲署陝西靜遠協營經制外委卞向春署河南商城汛經制外委劉殿榮勇目武生羅必得附祀得

旨允行

朝廷以霍邱與正陽關毘連爲皖豫扼要地時

提督秦定三帶兵駐正陽

諭英桂等會合夾擊毋相推諉始英桂

請假以布政使鄭敦謹兼攝至是假滿回任奏言擒匪踞卞家店後署光州知州趙登峻兵往勦分兩翼進攻斃賊數十生擒擒目周魁陳玉順陳金旺冷舍曹春仔葛瑞清杜應科黎大柳鴨子姚正元陳永堂李澤登李澤成等寘諸法餘衆逃潰首匪李北受竄商城匿皖豫交界之青峰嶺先是朝廷命牛鑑專辦陳州勦捕事務牛鑑激勵士卒每戰必克三月間勦辦沈項大股生擒擒首燬其巢民藉以安四月初八日自槐店拔營越二日至長官店督同潁州府知府陸希提新蔡縣知縣馬筮乾署沈邱縣縣丞黃以清並附近聯莊團勇於十一日抵華集

未列營賊黨六七千由南路來犯牛鑑整隊迎勦追殺六七里生擒賊三十餘陣斬百數十大雨連日官兵營於華集距阜陽之方集三十餘里偵知方集附近村莊多李士林黨又艾亭會龍高堰等集皆有匪嘯聚各一二千遂遣陸希湜至會龍集由東路進馬箠乾至艾亭集由西路進牛鑑將移營由中路進與將士謀曰賊知我軍分路進使潛師宵加於我我師必殆乃軍爲二以一軍守營一軍出伏誡曰賊初至守兵力戰再至則伏兵齊出擊之部署甫定日已暮賊數千來刼營力戰卻之乘夜再來再卻之四更以後悉眾來犯伏兵四起與營中兵合擊之斃騎賊二斬擒百數十乃大敗遁去奪獲旗幟礮械甚多十七八等日進攻方集行至李老莊李士林糾眾萬餘來拒見官軍勢盛始漸逸槍礮終夜有聲十九日進薄方集之三里橋橋折不得進且戰且成橋擁而入賊奔逸棄礮械旗幟馬匹爭渡落水死者甚夥官軍焚其巢詢之居民稱李士林在華集與官軍八戰皆敗十六日回集驗其眾折二千

餘人聞官軍攻益急乃大懼率其黨劉疹瘠等傾巢出復敗於李老莊
夜散五六千勢窮蹙渡河遁英桂以捷聞 加牛鑑按察使銜隨勦

之紳士朱玉瑾等以次論功獎敘有差牛鑑病請假英桂遣留豫差委
江西候補知府陳鼎雲往陳州協同彈壓前留護送陝甘總督關防兵
丁二百名仍遣赴江南歸琦善調用霍邱擒首李兆受敗走後復糾股
闖入商城固始等縣境光山土匪結捻應之英桂遣候補知府景昌游
擊全喜帶兵勇六百赴光督各州縣圍捕李兆受勾結江南匪黨十餘
股衆二千餘於六月十七日圍攻商城在籍紳士周祖頤率其子副貢
生周文灝督民團隨代理知縣劉宗岱固守兩日夜勢危急周祖頤督
團首陳長湖羅必興等礮斃擒匪三四百斫死爬城賊數十槍斃擒首
馬四馬五時順天府尹楊霽在光山防堵派兵往援賊始退復嘯聚東
南鄉周祖頤父子偕署守備李輔清督兵勇追至距城四十里之順河
集李兆受糾匪數千迎敵團首陳長湖羅必興營兵馬正明等陣斃賊

百餘會固始縣知縣蒯賀蓀都司何春元六品軍功張曜等各帶隊踵至周文灝以大礮斃匪數人然其火藥賊衆多有轟死者遂立潰亂官軍乘勢渡河併力追擊斃匪千餘生擒擒首四夥匪十七奪獲器械旗幟無數夜抵葉家集燬賊巢英桂以捷聞得旨出力員弁紳勇擇尤酌保以昭激勸李士林之敗於方集也復糾擒蠹動固始縣知縣蒯賀蓀購之急士林竄匿息縣烏龍集知縣陳棠捕之不力牛鑑廉得息縣丁役朱明儀張俊杰劉萬有王二梁四與李士林通導之他逸復於烏龍集賊巢獲錢糧冊籍有朱明儀得財狀蒯賀蓀亦以爲言英桂飭候補知府景昌帶勇赴息查拏朱明儀等訊究咨會牛鑑飭潁州府知府陸希湜會同汝光文武合力兜擊陳棠懼賊不可制自固陳折回給景昌以李士林爲兼署湖廣總督楊霽示諭招安景昌卽許士林投誠令由羅山縣取道九里關赴楚英桂以未得楊霽咨會景昌擅釋放陳棠縱役庇匪情節顯然違奏劾陳棠褫職逮問責交丁役候質景昌及

汝甯府廖姓均摘頂戴李士林糾眾四五月於九月十三日行次羅山沿途滋擾十六日至青山店廖姓飭各路兵勇追擊十七十八兩日共擊斃生擒三百餘把總任春茂歿於陣李士林至楚楊霈令帶勇數千隨孝咸縣知縣李燮華攻漢陽且以文來告英桂奏言李士林爲著名捻首猖獗凶殘人人切齒且詭詐百出其悔罪投誠未敢遽信萬一不聽約束爲害閭閻或陽爲助剿陰則勾結粵逆回竄不特豫省再遭荼毒於楚北軍情亦大有關繫請

飭楊霈相機勦除弭後患十月皖

省軍情日迫永亳一路力難兼顧袁甲三奏請豫省官兵會勦時永民怨亳民日甚每以搜拏匪首蘇添福爲名互相殺掠上謂此等凶悍之徒擾害良善豈得以民人自相報仇置之不問周天爵招撫之張樂行以保守雉河集爲名實則狼子野心難保其不暗結土匪命英桂諭令帶兵文武相機勦捕其從賊紳民袁甲三欲稍寬查辦似爲解散起見此等無恥喪心之徒不使畏威豈能懷德正未可博寬大之名而

受養奸之患是時蒙臺擒匪已竄回皖境永商被害居民積恨蘇添福張樂行等團集萬餘人俟官兵到後殺賊洩忿先是英桂在信陽行營抽派官兵一千名壯勇八百名往歸德令候補道張維翰助徐廣縉防勦與皖省約期進兵謀定後戰嗣以徐廣縉疾作宋郡防勦事宜張維翰接辦先後在濟陽集地方拏獲擒首王三凶等在郭灘樓拏獲擒首武生郭償諸等又獲擒首盧新文孟繼峰侯妮陳小生劉長法余得合等附近擒蹤爲之稍戢英桂前令南陽鎮卽聯恩移駐固始策應六安預防皖匪竄越並嚴勦光屬擒匪清內患卽聯恩拏獲擒匪首夥六百餘十二月十六日督同蒯賀蓀將巨擒丁心田擒獲皆帶勇赴楚之降賊爲楊霈所遣回者另獲要犯李鳳岐及阜陽擒首數名俱寘諸法

皖匪二

咸豐五年三月蒙亳擒匪張樂行蘇添福糾衆出沒皖南軍事急未能兼顧英桂駐軍信陽防堵粵逆皖豫之交惟張維翰帶兵扼守維翰與潁州府知府陸希湜亳州知州繡綸候補知府張家駒叅將全喜等帶兵赴亳擊賊泥臺店獲勝賊勢稍挫而未受大創四出如故商邱縣武生李景端赴訴於都察院歷言蘇添福肆虐永夏祝塏屢率鄉團破賊於裴橋耿皇寺包河等處賊中流言來爲報仇徐廣縉爲其所紿致將祝塏撤回賊遂大肆淫掠擾及豫疆居民橫被荼毒諸情狀事聞

上以徐廣縉如果畏葸退避命英桂嚴叅治罪英桂未及覆奏而張樂行蘇添福於是秋猖獗益甚陸希湜兵敗廟集賊三路犯渾河張維翰與達凌阿督隊進剿達凌阿力戰於泥臺店中槍陣歿張維翰突出重圍八月二十九日賊破馬牧集犯歸德時聯莊會匪方內閔英桂親赴河北剿辦維翰報至乃遣防守陳州之湖南長寶道王建泰游擊巴哈

布按察使余炳燾叅將成齡先後往援江南河道總督楊以增安徽巡撫福濟亦派兵扼勦張樂行等知大軍至遂糾衆南竄福濟與提督和春疏陳三省勦匪必遣大員帶兵河南學使張之萬亦以爲言 上

乃命湖南提督武隆額由山東赴亳州其富明阿所派侍衛容照楊以增所派徐州鎮總兵興慶和春所派游擊武全英桂所派張維翰等悉聽武隆額節制時張樂行大股圍攻亳州分黨掠蒙城鹿邑而以雉河爲巢穴以蘇添福王貫三龔得等爲羽翼余炳燾謀於諸將謂救亳州不如直擣雉河使賊反顧其巢則亳州自解僉曰善於是令祝塏防鹿柘令瑚圖凌額任愷駐鄆城令馮景等扼永宿交界之黃口集十月二十五日炳燾自率兵勇由永城進至麻種集馳書宿州約容照馬隊與徐州兵勇協勦炳燾號召永城鄉團一時裹糧效前驅者萬人軍聲大振二十八日師抵雉河張樂行斷橋梁憑河爲險率死黨三千開礮拒敵炳燾以游兵更番迭戰多出旗幟金鼓亂賊耳目密遣人自下游搶

成浮橋兵勇爭先渡河擲火罐火箭焚賊壘煙塵漲天將士踴躍奮擊殺溺無算張樂行乘間遁官兵發其祖墓賊之圍亳州者聞風解散時炳燾祝塏瑚圖凌額等三路之師皆赴亳賊知麻種集成兵單弱又永城空虛復由亳州沿河迤南連夜折向東北徐州兵勇禦之於麻種集失利賊由馬村橋竄永城十一月初三日集城下張樂行攻東門王貫三攻南門翼得攻西門蘇添福攻北門甚急余炳燾督諸軍由鄆城至丈八集倍道馳至賊三路來犯官軍亦三路應之順風施槍礮中賊旗旗仆賊陣亂官軍益奮追殺十餘里斃賊七百餘獲大礮四十餘圍立解初六日武隆額乃抵永城次日遣成齡會祝塏所帶鄉團擊賊於麻種集賊列隊以拒鄉團戰不利勇隊舉槍礮轟斃賊四百餘賊殊死戰成齡單騎入陣鏖戰二時賊來益衆騎賊由西南出我軍後成齡麾士卒戰益力小腹連中賊槍幾不免滿洲營佐領候補游擊巴哈布下馬解衣然礮轟賊復上馬入賊隊手刃多賊被七槍墜馬殞把總王百年

外委尙魁元死之陣亡兵勇一百八十餘人英桂以聞因言賊衆不下三萬武隆額兵勇僅五千容照興慶之兵旣未前來和春前派壽春鎮總兵鄭魁士亦久未至請

敕催並爲巴哈布等請卹如制先是

諭令總兵史榮椿所帶直隸官兵撤回歸伍至是暫留協勦命托明

阿酌調吉林馬隊赴援

諭英桂督崇安邱聯恩等出省迎剿十月

初九日張樂行自泥臺店竄會亭驛犯夏邑大營史榮椿等截擊於渾河集胡橋左右次日午後賊來益衆官軍槍礮齊發斃賊無算賊欲退忽分股趨西北官軍慮其往歸德鈔前遏之賊乃旁趨夏邑十二日武隆額督夏邑知縣郭鳳恩帶兵出禦官兵方接仗於東賊由西殺傷守門團勇竄入縣城旋棄走十四日犯歸德焚東西北三關官民奮擊斃賊多名十五日賊馬步自東來者絡繹不絕環城隄皆徧槍礮歷兩晝夜不稍息十六日武隆額密遣兵勇縋城殺賊守陴者譴譟以助賊驚擾潰散武隆額奏報解圍

上責其毫無布置

命英桂馳赴歸

德督辦三省勦匪事宜以前福建按察使徐宗幹副之是時張樂行蘇添福等經柘城等縣鄉團追擊遂載所掠財物遁回雒河英桂謂賊方飽掠回巢欲厚集兵力直擣其穴徵兵江皖俱以各守疆宇遷延不進乃師徒未集而賊已傾巢復出矣是年八月霍邱固始之交擒匪李兆受薛小等聚衆首亂築圍於寨集蓮花諸山九月初八日自牛皮疔竄至霍境攢板冲爲練勇鄢立功所敗留豫縣丞張曜越境勦斃賊百餘李兆受遁回麻埠王庭蘭與張曜聯師進逼擒斬其黨朱之貴於廟灣而攻李兆受於麻埠追殺至流波疔陣斬擒首李兆慶等百數十焚燬山寨李兆受薛小遁入英山以乞降給安徽道員何桂珍收爲勇目至是復踞英山戕道員何桂珍擁衆以叛投入粵匪英山知縣蘇秀槐把總高長慶均遇害六霍商固一帶皆爲震動云咸豐六年正月英桂督辦三省剿匪事上旣以武隆額容照所部並江南安徽各營悉歸調度英桂旣遣邱聯恩與都司保英各以其兵自信陽馳赴歸德至是

復請添兵助勦於是

朝廷益命武全管帶潁州兵徐曉峯管帶中

正勇由亳州進攻朱連泰管帶兗州徐州兵自永城折回會擣賊穴鄭
魁士已督軍抵豫託明阿所遣侍衛伊興額協領德昌帶吉林馬隊五
百名取道滁州入豫令英桂催提會於潁亳其塔思哈一軍由和春飛
催赴亳悉歸英桂調遣英桂馳往交界扼紮撥兵會勦英桂遂督叅將
承聯開歸陳許道徐繼鎔候補道周士鏗候補知縣廖慶謀等分率兵
勇先後馳抵歸德時商邱夏邑虞城永城上下數百里焚掠一空皖豫
界上無行迹井泉堙塞豪梟徧地皆賊自豫至江皖驛路梗阻各路到
防隊僅三千武隆額所部大半傷亡潰散直隸大名兵尤不得力江皖
防兵糧餉久缺其餘徵調兵未至所在土匪蜂起英桂議以先勦內地
匪徒疏通運道而永城鹿邑兩縣被匪攻擾潁省宿州亦同時被圍英
桂分兵永城其宿州潁郡一路責令鄭魁士塔思哈就近援勦於時張
樂行及夏白任乾等圍宿州日急容照登陴守禦叅將塔思哈等出城

殺賊擒首匪孫開貞時傳振邦帶兵往援十七十八等日在夾溝驛符
離先後殺賊五百餘奪馬二十五賊自符離敗回會城內官軍突出前
後迫逐卽向西南竄遁宿州城圍解而東西南村莊尙爲夏白任乾等
盤踞蕭縣西南有藍旗賊五六千自永城宿州分路來犯大股屯濉口
窺徐州其時瓦子口兩面受敵戍兵九百名馬裕椿率之退爲蕭縣城
守徐州鎮道遣叅將高培往援兵勇僅五千賊之撲鹿邑也知縣宋劭
經率會首馬成龍擊之老鴉店斃賊數百馬成龍爭先出復殪賊百餘
中賊槍墜而殞其子馬雲青痛父歿隨宋劭經力戰於姬家橋斃賊百
八十有奇獲馬十餘刀械百餘匪衆向淝河逃竄新鄉縣知縣祝塏集
商邱柘城鹿邑太康亳州五屬團勇數千擒賊巢謀知黃旗擒首周崇
實有衆數十屯寺兒集祝塏派團首孔廣貴軍功寶鉦等分兩路進二
十四日在陳店斃賊二百餘生擒擒匪郭振郭振山陳添齊賓諸法移
營亳州之鄭店賊復糾衆四五萬分五股於二十八日撲樊家鄧陽棗

子等集祝塏禦之於棗子集相持三時之久賊縱火囂叫鄉團奔潰英
桂遣叅將成齡游擊瑚圖凌額援永城以候補道周煦徵張維翰爲之
策應成齡等師至會亭聞首匪王貫三領衆數千於十七日駛入夏邑
知縣郭鳳恩失利成齡恐請濟師而後進遇賊於太邱集戰不利張維
翰抵樊家集距永三十餘里賊衆蔽野力不能支亦退於是邱聯恩自
鹿邑馳抵石榴壩站周煦徵踵至合營夜見火光起滅知賊越會亭由
西南繞至穀熟集距宋郡四十餘里邱聯恩徹夜戒備黎明賊馬步五
六千分三路以中路衝大營南北兩路抄我後邱聯恩單騎迎擊周煦
徵督後隊由東面兜勦日向午官軍連開大礮刀矛相接賊抵死不退
官軍戰益力賊始向西南敗卻邱聯恩急追之殲賊千餘生擒三十餘
而永城之圍未解鄭魁士塔惠哈之軍方攻宿境賊巢興慶等方牽於
蕭縣之賊均未能抽調通計三省兵勇不過萬人又各自顧藩籬不相
呼應孤軍受困於是英桂奏請江南安徽添撥精兵各守要隘自請督

軍力遏西北進逼東路復請伊興額帶騎兵馳援永城爲合兵直擣雉河之計並留西安協副將樂善於軍

上以英桂總司三省會勦必

須聲息相通不得株守一隅屢諭令出境英桂乃令邱聯恩崇安等併力前進二月初九日至蔡道口東大股蠡至縣亘三十餘里我軍列陣以拒賊從左右鈔越衆寡不敵遂大衄賊乘勝逼郡城存城兵勇僅五百邱聯恩收集敗殘卒伍亦僅千餘人心震動英桂以敗狀聞夏邑縣知縣郭鳳恩城陷被執賊脅之降罵不絕口拷掠不少屈賊支解之請優卹建祠並請調北路精兵另簡大員代其任自以調度無方請嚴議上諭和春福濟飭鄭魁士等由宿州馳援歸德諭漕運總督邵燦飭傅振邦由徐州進勦諭直隸總督桂良酌調精兵二三千名交英桂調遣令英桂飛提徐宿兩路兵仍督邱聯恩等出奇制勝英桂復瀝陳歷次辦理掣肘及兵勇無多力難進勦情形其畧曰張樂行等踞雉河老巢夥黨蔓延穎宿數百里漸及徐宋有司初視爲土匪糾聚不以實

聞致益鵬張皖之英霍以北江之蕭錫豫之永夏商邱幾於民賊不分
臣兩年來以防堵楚皖逆氛不及親往查辦前撫臣陸應穀奏派徐廣
縉駐歸德防勦前學臣張之萬奏保祝塏總司歸德團練徐廣縉與祝
塏各持意見勦辦不力至撤回祝塏專辦陳州團練徐廣縉旋引疾復
派張維翰往勦以乘勝窮追失利賊醜愈熾嗣派余炳燾會諸軍進解
永城之圍及武隆額到宋與余炳燾又不能和衷商擢各自分兵愈形
單弱武隆額敗退歸德賊遂圍城臣奉 命督勦馳抵宋郡永宿同
時被圍三省無從呼應而張樂行蘇添福王貫三翼得韓狼子李越等
樹立五色旗幟每股二萬餘全壓宋境邱聯恩力不能禦匪衆逼郡城
見城內有備遂分兩股退去一竄劉家口復東趨碭水一竄潁亳等處
臣以有限兵力防且不敷勢難進取迭據盤獲賊間有張樂行與粵匪
勾結情狀臣與徐宗幹急籌補救非三省疆臣各清各界不能遏其竄
越非有統兵大員駐亳州適中之地不能絕其滋蔓如有剿無防賊必

何巢四出有防無勦賊必堅壁負隅奏入

上謂封疆大吏畀以督

剿重任應統籌大局催兵進勦不得希圖卸責前諭直隸山西陝西派兵馳往歸德此兵續到即可分撥英桂居中調度總當令帶兵各員由北而南方操勝算連鎮帶兵得力人員已飭部揀發赴豫前據僧格林沁奏稱西凌阿善帶馬隊史榮椿善帶步隊應卽察看委任又所劾邱聯恩崇安失利情形得

旨均視職留任崇安並摘去翎頂責後效

賊回竄皖境分踞潁毫而歸德附近復有股匪牽制英桂以皖省緊要止鄭魁士等來豫卽由宿州探蹤迎擊令邱聯恩剿歸那股匪由近及遠其進援永城之軍由鄴陽胡橋穀熟集出隊碭山新募之勇鈔出賊前擣之二月十一日薛家湖火燒店鄉團糾集五六十裏糧助官軍署永城縣知縣劉鴻昌守備張邦瑞率兵團出城內外夾攻斃賊五百有餘騎馬賊首五十餘擒劉五等城圍立解英桂重賞鄉團並請將出力官紳團練分別給獎又以歸德之警傳振邦稱防守本境鄭魁士以進

剿懷遠俱未赴援請

飭和春福濟邵燦按實以聞邱聯恩史榮椿

等搜勦歸郡土匪日有擒斬道路漸通進駐穀熟集擒首翼得王貫三等合黨二萬由杜集來犯邱聯恩列東西兩哨在穀熟集東南接戰連環槍礮投以火箭火彈賊殊不動史榮椿督刀矛隊伍自中路躍而入邱聯恩揮騎卒自左右襲其後賊始奪路狂奔馬步各隊緊躡追殺斃賊千餘生擒張占魁等賊四十三奪獲礮械無算馳三十餘里賊四散而逸其另股之在江皖者鄭魁士於二月十七日戰於懷遠之茅塘集獲大勝斃匪三千餘生擒張禿子等三十四賊伊興額在雙溝集蘆溝集孫町於二月十九二十四等日與李大喜接仗先後斬殺三千餘生擒賊百餘追及於蒙城縣境至是鄭魁士馳抵河溜集與另股擒匪褚澱耿萬金孟小頭目四十餘起接仗親督叅將塔思哈等軍三面夾攻前後鈔襲匪衆自相踐踏敗走西南追至鉏家橋渡河逃竄多落水以死斬五百四十餘級載耳記七百餘生擒擒首褚澱等四十一賊實諸

以馬隊連環鳥鎗斃騎賊六十餘賊見官軍深入四面兜拒官軍亦分
路衝擊戰久之賊衆披靡斃賊二千餘生擒賊一百三十七傅振邦營
於瓦子岡時張樂行以永城薛家湖團練助勦銜之切遣其黨李益元
等五千餘人焚掠薛家湖會合保安山賊俞得和等於二月二十五日
直犯瓦子岡傅振邦奮擊之斃賊三百餘追殺百餘里殲殪百餘自是
蒙宿懷遠匪蹤漸斂

上命鄭魁士將蒙宿餘匪悉殲卽進屯亳境
豫軍由此路進攻爲會擣雉河之計宋郡紳民竇世銓等四十五人以
擒匪焚掠情形赴京呈訴並單開逆匪姓名住址及被掠各村集繪圖
以進其詞曰咸豐三年粵逆滋擾歸德以來豫皖之界土匪蜂起其時
各自爲股僅圖搶劫未敢攻城去秋張樂行蘇添福龔得王貫三侯實
爲等分五色旗僭稱王號僞刊璽文設僞軍師司馬先鋒名目八月十
七日張維翰失利於泥臺店集達凌阿陣亡賊至會亭鎗炮器械悉爲

所有遂東掠夏邑虞城至碭山之鼎新集屯數日二十九日西攻歸德之馬牧集六品軍功任蘭舫率義勇五千拒戰孤軍無援翌日賊陷馬牧任蘭舫兄弟親丁死者十二人家屬及集中義勇男婦老幼死者三千餘商賈寄居者又千餘賊破馬牧後近逼郡垣九月初八日悉衆南旋所掠婦女輜重車輛馬匹絡繹二百餘里英桂派余炳靈進勦互有勝負十一月初六日武隆額到永城初九日與賊接仗巴哈布陣亡武隆額旋退夏邑賊至會亭武隆額退至虞城賊踵至夏邑武隆額遂回歸德十四日賊至郡燒四關民房近城四十里焚劫一空十七日西擾柘城復東回雒河集旬日間夏虞永商柘五縣十燬八九無業游民爲賊招誘亦思蠢動今年大隊圍永城分隊至鹿夏夏邑縣知縣被戕自亳東十九里溝至蒙城渦河兩岸百五六十里東西百八十九里所在皆賊由皖及豫東西三百餘里南北二百餘里皆無人煙賊過之區糧食農具聚而焚燬輪姦婦女卽老婦亦不能免童稚捆入碓磨春爲齏

粉刻下賊衆約在十萬以上安徽勢難兼顧英桂所帶兵勇僅當賊十分之二三賊巢均在皖境擄掠已盈即擁衆運回瓜分既盡仍復散出非大兵四面圍剿恐難擒逆首而絕根株所開逆匪姓名附錄於左

張樂行偽號大漢明命王公議盟主住雉河集張老家黃旗總目樊香立偽左營總目賈開泰領千餘人高振寶住壽州

龔得即龔瞎子住江南亳州白旗總目鄒煥爵左營總目徐化德住雉河東北徐海子餓狼住曹氏集侯世偉偽號

平西王住雉河集北趙萬金前哨陳架海又名梁雉河南陳大莊余小二住雉河姚常春王

侯老營子紅旗總目宏先二人爲左司馬段開憲韓萬倉二人爲右司馬宗雨住雉河南閆錫純武舉毫東閭集人孫廣德

住臨蔡老映住劉店集張學淵廩生毫境人王老僕雉河集大王莊邵永河山東單縣人鄧葆善監生

亳州湯馬波白龍王廟西王老家郭東林郭長太住劉集西劉樓姚存義住雉河北十里許王家春住石

王墓人拱葛昌住暫高集侯貫一葛海住暫高集馬守家住寺集徐二科子泥臺集總目李廷彥住毫

州領二燕增即燕魁余小山周崇寅即周照住大寺集丁奉林大新集劉莊住劉如夏鳳廟

臨田興侯興久

住龍廟西

李小徹李重法李廣友

三人住李家集

劉六劉三

住劉奶廟

王成孫有道鄧省仁馬大山

俱住雒河集

秦永太朱天保秦照

皆住雒河田集左近

秀升魏倫韓萬金魏來孫拱

住白龍王廟東孫老家

田廣義張牛楊和尚

住觀音堂

新王塊郭四大王

皆住大新集

袁鐸

住袁集東南袁樓

秦小妮

號胡樹大王

燕體仁

住燕牌坊任

連登賈永良張太和張太初耿萬金鄧作賓尹甲田廣升楊立法楊

治

住五馬集

侯豹

住大王集

閆明

住閭家集

李文掌李如梅

住雒河集

周紅緒

紅旗中大頭

周廣漢

侯龍標劉廣漢趙藍英張文雅譚懷春侯純標侯恒劉學張標劉二

宏侯學開張香張法張進忠宗老廣侯應求譚直林趙二天爺秦宏

道王祥秦小二鄭玉堦彭布元趙奉祥鄧道侯麥鄧狗侯長袁奉山

以上各逆俱亳州人

以上係江南逆匪頭目

王貫三人住夏邑西三官集王樓 陳玉山集人 傅繼周住陽縣 彭心正住道口

魏黑住魏路口 張廣張興張機坊莊人 張羣羊住牛王垌 劉運昌號烏嘴大王住劉堤園 徐得林洛集

人 李老總河住道忠寺李樓 宋喜元住牛王垌集 王思忠洛集東王樓人 張安牛王垌人 李琨玉牛王垌人

周廣禮為王貫三大將 劉步雲王胖住王樓 張二紅任八千歲住王樓 侯黃樂住侯廟領同姓

二百餘人 宋喜柱宋馬侯宋喜元之弟 張黑張富鄧小禿程學顏劉正王魁住牛王垌集

侯妮朱魁元張餘賓住張公集領閭集人 李東川號八大王住李花園 李黑狗住李樓 李琨山李

松李二麥三人住李樓 張小保張短辮子住大張閣 張百順住張公店 孫八住胡橋孫樓 喬天

福住喬集 宣立志張世太樊六濟陽集人 張綸宿秦倉人劉樓 袁朱四袁牌坊 劉鄧

住劉奶 袁三升住袁牌坊

以上係河南夏邑縣境內逆匪頭目

張傳忠張澤廣張三與王貫三同先鋒住張三座樓領張姓三百餘人 曹明義劉店集人 黃珍界溝集黃旗總目

焦香黃塚集焦樓總目 王志義杜集 曹松先曹松堂城東曹樓人 魏書得大魏人 閆小千

歲閆集 魏文山大魏人 劉洽沙岡店集人 丁獻考丁樓人 丁三元丁樓人 梁金箱杜集人

屈中元小侯集人 許連海許心孔大侯集人 李中昌湯樓人 趙龍標豐樓人 張利人界溝人

耿皮箱張三座樓人 解海解登解樓人 許龍山許虎山陽樓人 陳鳳居杜集人 何朝臣

大侯許亮海大侯集人 徐華山孫閣東南徐老人家人 韓黑韓閣人 田春田大莊人 楊安楊樓人 劉景

路馬頭寺人 徐心郎江樓人

以上係商邱縣境內逆匪頭目

蘇添福偽號順天王住蘇家寨 李月偽將軍住永城東南 馮麥住永城南 趙浩然住賈頭集趙莊 張景芳

住胡陳豹住回春集 孟繼元住回春集 蘇添祐蘇添正以上三人原單未載住址

以上係永城境內頭目

劉常安與劉運昌同夥 丁振邦陳店人 張孚張連仲陳店人 杜保安常發李二鐵匠

劉二太牙 銀河寺人

以上係虞城境內頭目

都察院據以奏聞時有疏請設勇營並呈章程四條者先後並發查辦英桂正督邱聯恩史榮椿移駐營廓集規取雉河而懷遠捻氛復熾鄭魁士先於老西門列營七座賊以數萬人逼濠邊中正勇當其衝立潰散次犯壽春營時撫標兵已先潰僅存壽春頭起兵二百餘名叅將福珅都司柏雲章冉廣興守備朱介福同時陣亡賊由雉河沿攻壽春二三起營傅振邦率親兵數十名匹馬先衝賊隊手刃數人賊圍之數重刀矛攢集身被二十餘創墜馬後隊至力救乃免 朝廷以鄭魁士待援急諭英桂馳赴皖豫交界直擣老巢分賊勢歸德防剿事宜交前副都御史袁甲三籌辦時袁甲三已奉 命隨同進剿云

穀熟集之捷邱聯恩進次營廓翼得王貫三等在五馬溝糾衆三萬餘分道來襲另以賊趨鹿邑圍攻東南兩門英桂謂邱聯恩史榮椿曰賊意奪我營壘其分擾鹿邑者詐也翼王二逆敗則鹿邑圍將不戰自解賊素畏騎卒乃悉出存營騎兵併西安馬隊爲一千七百騎合力進剿三月二十九日賊屯界溝集邱聯恩史榮椿整隊往賊列陣相拒風逆不得施火器持之有頃知縣宮國勳縣丞張學醇率西哨衝賊陣格綳額以馬隊出賊後邱聯恩督游擊馬春華自東堽圍史榮椿督叅將成齡等直擣中堅賊四面受敵棄兵械奪路向東南敗竄追擊三十里斃賊二千餘生擒賊首張拴等數十戮於軍奪槍砲刀矛旗幟無數是日崇安營於北十字河賊來犯德楞額以馬隊衝擊樂善珠隆阿張廷璽各軍追殺五十餘里斃賊六七百擒擒首張裕隆等數十寘諸法奪獲大小礮位三百有奇大車二百兩有奇騾驢牛馬四百有奇鹿邑圍立

解事聞 上嘉其功復邱聯恩崇安樂善張廷璽等官格綳額等各

晉階有差賊合股踞臺境之五馬溝四月初八日邱聯恩督西凌阿馬
隊及各營將弁分三路進西抵閭集賊來益衆而悍格綳額領馬隊由
中路蹙之崇安與樂善德楞額自西鈔襲邱聯恩史榮椿以西安馬隊
乘之於東鏖戰良久斃賊以千計擒賊目于孝文等三十餘賊眞諸法
獲槍炮三百有奇大車百兩有奇牲畜軍械無算僞印二先是永城賊
踞大回集三月二十一日傅振邦伊興額等擣之擒斃賊二千獲賊目
孟繼沅牲畜車兩軍器以千百計燬其巢未幾張樂行自蒙城北來其
藍旗隊及灘口二十五日傅振邦伊興額等由瓦口行營馳至灘口迤
北丁家樓賊衆二萬來拒官軍擊之殲二千賊棄輜重誘追師傅振邦
焚之麾將士逾灘水而南斃其衆吉林委叅領開奇哩死於陣兵勇傷
亡者十餘人 朝廷至是屢降 嚴旨責豫軍進擣賊巢英桂統
籌地勢賊情謂雉河周圍三四百里皆賊黨屯踞須漸次疏通免爲所

江皖與豫省聯爲一氣乃可大舉具疏以聞四月初十日夜賊衆五六萬至界溝火光四起邱聯恩等申嚴戒備天甫曙賊大至邱聯恩與史

榮椿崇安並出擊賊正相持忽分股出官軍後毀我壘士卒驚擾斬亂行者以徇乃定賊復併力攻崇安崇安以馬隊張兩翼衝壓賊殊不動樂善德楞額墨爾賡阿承惠等率馬隊由西鈔擊賊始卻其東北有五色旗又將鈔我後崇安督軍壓追樂善德楞額等衝入賊陣格綳額由北路夾攻賊遂潰追三十餘里斃賊千餘擒李福厚等寘諸法獲大小槍砲六百三十二旗幟三百四十二他物稱是是役也樂善以奮勇轉敗爲勝

加總兵銜千總南宮寶委營總富倫保以戰不力褫職令自效十八日邱聯恩史榮椿復敗賊於小奈集德楞額圖克唐阿兩路追殺斃賊七百餘生擒周老虎等於是翼得又分遣賊衆踞穎上十八里鋪窺穎郡另股捻首祝國安林掠穎上縣之韓擺渡將犯縣城穎州

府知府陸希滉穎上縣知縣程鈺先後斃賊二千餘始敗退永城夏邑
鹿邑各州縣俱有賊牽我師候補知府鄭廷錦駐鹿邑防勦四月二十
五日督亳境廩生李承謨以二千人擊賊油湖集轉戰至三义口獲勝
又敗之賈家集江信溜集殺賊五六百進駐十字河扼鹿邑門戶夏邑
縣知縣陳桂林以鄉團陳萬金敗賊於李家窪孟樓等處賊竄永城永
城知縣劉鴻昌守備張邦瑞擊走之四月二十八日袁甲三以舊部皖
勇與邱聯恩崇安等會師進勦謀於衆曰亳州北郭外久爲捻逆淵藪
亳人閉門守逾半載矣必出彼不意先破之然後可長驅入也遂密約
朱連泰爲接應以騎兵出丁家花園以南沿途擊斬廬廟小奈集之賊
申刻抵亳州城下賊堅守各巷隘洞牆壁以放槍砲而設伏四圍官軍
擁而前擊散其伏乘勝逼賊巢火箭噴筒槍砲連環不絕朱連泰與亳
州知州博銘以兵出城循渦水南夾攻之賊勢不支潰向東南騎兵追
殺二十餘里先後斃賊千餘擒盛哇等七十餘擒獲匿賊六十餘斬之

奪槍炮二百二十五重二百斤至九百斤大炮十五其他軍器無算
被擄婦女三百餘人朱連泰移營五馬溝賊糾死黨踞翟村寺五月初
五日賊由東路犯朱連泰營戰卻之初六日袁甲三率其子翰林院編
修袁保恆親督兵勇與邱聯恩崇安等分路進攻至翟村迤西見賊五
色旗幟橫十餘里又偵知翟村西南及田家溝各有伏賊官兵分隊截
之邱聯恩崇安各率馬步東西並進鏖戰兩時之久適西南伏賊爲官
軍擊散賊始駭馬隊乘勢壓殺大軍繼之賊乃狂奔火其巢田家溝伏
賊驚起與戰敗之賊分路奔官軍追殺三十餘里斬殪焚溺四千餘陣
斬擒首僞平西侯李士成高九鄧作仁等三十餘生擒戚廣德等百餘
竄諸法於是賊由蒙城增兵來援屯於白龍王廟跨亳水而壘與雉河
爲犄角之勢初八日袁甲三諸軍自翟村寺拔營次日至白龍王廟西
張樂行韓狼子等領黃藍兩旗列隊伏禦龔得王貫三等領黑白二旗
沿河南岸爲策應預伏悍賊千餘於浮橋將以擒龔我軍我軍先以三

千人由集西夾岸與戰斃多賊賊稍卻官軍奪據橋口伏賊不敢出大隊由集北進攻管帶滑縣練勇陳衛林單騎先出中砲殞邵聯恩崇安等軍戰益力袁甲三揮西凌阿馬隊沿河而東鈔其後賊腹背受敵乃潰散見水者多溺死追殺二十餘里殺賊五千餘奪獲四百斤以上至四千餘斤大礮十九擡槍擡礮七百餘旗幟六百餘摻獲木刻分營統領偽印九銅鑄管兵萬戶府偽印一繪龍黃輿一他物不可勝計英桂以捷聞請將陳衛林照守備議卹請 飭和春傅振邦等派兵扼賊東南迅圖藏事雉河集之賊知大軍乘銳深入乃跨渦河爲營西北高壘深溝東南築長圍橋口設大礮多方戒備拒官軍英桂飭諸軍乘其喘息未定攻之十五日袁甲三等進至燕家小樓賊從東南來犯列陣十餘里官軍以騎兵張兩翼步隊居中排牆而進鏖戰逾時賊始潰走追二十餘里擊殺淹斃者六千餘生擒五十餘袁甲三乘夜進至趙旗屯設二浮橋以濟師崇安樂善德楞額等由河北馬家橋東太清宮進

連泰由白龍王廟渡河而南扼守老金樓顧後路十七日向午諸軍齊
抵雉河賊於兩岸迎拒北路官軍先令騎兵鈔賊後步隊奮鑿槍砲雨
發賊遁回壘官軍乘勢入賊棄壘奔南岸自相踐踏斃於橋船下者屍
相屬也南岸官軍與巢內外之賊戰益酣巢外之賊先潰馬隊復由黃
家莊鈔裹步隊擁至巢下內賊旗亦亂官軍以車炮轟其土城火箭焚
其幕舍踰溝入賊黨既奔竄猶於集西巷口縱火絕追路我師繞越搜
殺追三十餘里陣斬及焚溺死者二千餘擒田士得等百餘分別正法
賊中譌言擒首蘇添福中炮殞李越及韓狼子之子韓廣張樂行之姪
張海姚長春李文明等六十餘賊俱斃於陣僞軍師劉鼇中箭赴水死
張樂行亦中砲傷其黨掖以乘馬得脫云餘衆向東南紛竄雉河賊巢
以平奏入 上嘉之復察哈爾都統西凌阿官袁甲三以三品京堂
候補維時宿州一路傳振邦偕徐州道王夢齡等攻燬柳集賊巢石弓

山以北賊勢稍斂進軍臨郝集杜賊竄宿州而珠克登郝光甲等赴臺之師尙駐龍亢不進龍亢距雒河旣遠中間蒙城一路故無重兵於是張樂行率敗賊三百餘至蒙城之郭家集沿途脅脅句結李二謨等竄潁郡之江口新集旋渡沙河犯潁上之廟臺集垂岡集時褚家湖至蒙城數十里擒匪號稱三十八股數逾萬人張樂行併爲死黨勢復張傳振邦郝光甲自東路馳至潁上英桂進駐臺州令袁甲三赴潁督剿副將樂善叅將成齡佐領松志與袁保恒等兵俱集潁上賊欲趨正陽關爲侍衛多慧擊退折而西袁甲三飭諸將繞出賊前樂善等分道躡賊於黃岡寺南照集擊之獲勝適三河尖被圍乞援急袁保恒偕諸將馳往三河尖已於是日辰巳間爲賊攻破時六月十六日也三河尖者距固始九十里水陸衝要商賈輻輳賊擄其人衆勢復熾袁甲三督戰急於是伊興額袁保恒郝光甲傳振邦張學醇徐慶峯馬步各隊分東西兩哨與賊接戰斃賊數百有另股賊來包我東哨南面賊層疊圍裏

我馬步合力擊退而東路賊忽向北截我歸路士卒奮勇卻之互有殺傷時已薄暮遂駐師曹家集英桂慮賊犯光固將白臺赴陳州就近調度而先檄邱聯恩由雒河至固始與王廷蘭等相戴家廟節節進勦飭候補直隸州鄭元善署光州蒯賀蓀候補知縣廖慶謀張曜等率勇團堵禦賊聞官軍至遂以舟駛正陽關多慧塔思哈等跨河爲營伐大樹繫鐵貓沈水底以阻賊船二十八日賊至汪家集船不得進與南照集所泊賊舟俱西駛登岸樂善於潁州六十里鋪遇賊接戰斬獲甚多時將秋成禾黍芄茂伏賊突起圍裹我師士默特佐領奇密特多爾濟驍騎校音登額力戰死之賊遂於曹家集李家集等處屯聚袁甲三等由潁郡水陸並進抵馬家飯棚沿河賊二三千將奪我舟官軍隔河以槍砲擊之多死傷紛紛鳧渡對岸官軍槍斃其衆數十砲斃紅衣騎賊四勢稍卻夜半復欲潛渡袁保恒伏兵厓下棚以槍立斃及落河死者百餘賊乃宵遁官軍陣亡二人受傷四人七月初二日賊由潁郡東南來

犯袁甲三督諸軍四面迎敵各隊俱有斬獲惟東面步隊傷亡數十人
當戰酣時賊在下游縛筏偷渡袁甲三預以兵守沙河故不得渡初七
日賊窺潁州府城其來自東面者見兵卽走而另股由城南西向計乘
虛襲我官軍備之擊斃三十餘賊生擒擒首張惠等斬之初八日賊來
益衆官軍擊諸城東北斃賊五六百守陴士卒復轟斃賊百數十官軍
轉戰而進賊抵死回拒通永協左營都司朱淮源玉田營都司祿泰山
永協蒲河營浪窩口千總楊德傷重殞斂兵入城賊焚北關袁甲三遣
三百人潛出西門擊其後賊前軍方力戰後隊忽自亂官軍乘勢追殺
先後斃賊以千計初九日復來攻城上舉大砲擊之有賊目執紅旗指
揮轟斃之騎數十擁之去餘賊折回十八里鋪四十里鋪盤踞侍衛伊
興額率騎兵援潁遇賊獲勝賊來愈衆伊興額且戰且退兵卒傷亡數
十人營總勒布佐領訥勒布領催珠勒剛阿豐林披甲占祿依順德壽
俱戰歿賊乘沙河水淺悉渡北岸板橋展溝及西陽集分竄英桂以雉

河爲賊老巢西凌阿崇安嚴防扼守益之以關保伊興額兼顧臨渙
賊自蒙城分三路爭雉河西凌阿等以衆寡不敵退營寺集待援雉河
復失其時興慶營於臨渙七月二十二日賊乘夜劫營興慶迎勦宿州
才宇和以練卒助之二十三日黎明興慶戰於大柳樹戰垂勝東南另
有賊鈔後路練卒驚懼與明山所帶吉林餘丁同退走遂失利棄臨渙
披甲武凌雲多隆武戰歿興慶回屯蕭縣瓦子口袁甲三與聯恩史榮
椿等馳至亳州格綳額帶馬隊出剿行至渦河口擊賊勝之賊游駛於
雉河東北聚散無常英桂以戰事方亟江皖諸軍不用命遇有征調輒
遷延遂奏劾郝光甲達思哈明山褫職留營以松志隨袁甲三每遇戰
守藉詞退避並劾之自是帶兵將弁有不遵調者 上命袁甲三會
同英桂隨時叅奏並嚴諭福濟飭諸軍毋仍前玩泄取重咎時袁甲三
等旣勦東南兼防西北分兵兩路進二十七日袁保恆自江信溜集整
隊行至清水河遇賊與戰賊突出西北村圍左哨勢危甚袁保恆直前

衝擊朱連泰等繼進槍礮無虛發斃賊千餘獲槍礮二百餘輜械無算
甫收隊龔逆等領白旗五六千自南馳至將橋口練卒衝散據之袁保
恒趨趙王河北岸都司金泰趨東岸甫成列黑白藍三旗賊衆於集東
渡河欲誘我迎剿鈔截我後適邱聯恩以所部馬步鼓譟而前賊驚愕
四散大隊乘之斃賊二千餘生擒張狗等六十餘寘諸法是日兩戰皆
捷賊料我軍罷乏二十八日悉衆來攻各軍已先備槍砲競發轟斃賊
七八百賊乃卻伏賊出溝中向後堯裏兵勇回戰互有殺傷候選通判
倉景涵戰歿八月初五日賊分股由渦河北岸圍崇安營以衆寡不敵
失利初八日賊復乘間來犯袁甲三以大營均在西南密遣練首倪元
灝伏兵北路賊果直趨西北倪元灝施放連環鎗砲轟斃執令旗馬賊
數人餘匪三百餘格綳額德楞額等復斃匪三百餘賊向西南遁是日
有綠旗賊首薛小素驍悍亦斃於陣云賊分股漸趨西北袁甲三以西
路兵單遣格綳額德楞額等馬隊趨鹿邑王鳳祥等以步隊繼之格綳

回賊夜半潛至郤之十一日辰刻復以騎賊來營總關保擊斃賊三十餘賊見馬隊西向渦河北岸賊全集南岸營於大清宮等處時王鳳祥整隊進期與格綳額馬隊合十二日格綳額等遇賊於鹿邑東南三路出戰預遣數十騎在西南馳驟賊與官軍戰方酣見西南塵起疑有伏自驚潰官軍追殺連破其五營殲斃二千餘落河溺死者無算其敗竄之匪與王鳳祥步隊相遇斬刈過半賊退守雉河英桂與袁甲三合謀遣邱聯恩關保等循渦水南岸進崇安德楞額格綳額等先濤北岸設匪仍與邱聯恩爲援時南岸賊悉避兵北岸邱聯恩亦渡河而北二十五日崇安遇張樂行於耿皇寺格綳額德楞額以馬隊郤之二十七日偵知龔得踞趙旂屯與張樂行爲犄角崇安邱聯恩分路擣之邱聯恩將薄趙旂屯龔得不逆戰悉衆南渡邱聯恩臨河而軍爲崇安後應崇安旣與張樂行戰於劉奶奶廟乘勝追殺至潘家樓次晨將趨龍山得

邱聯恩馳報知龔得且由趙旗屯渡河乘虛襲我後乃折回與邱聯恩會合甫至龔得之衆已悉渡撤浮橋沿南岸列隊官軍以槍礮卻之九月初一日賊復以浮橋渡河紛撲渦北勢甚剽疾官軍傷亡百餘人大隊動崇安馳至格綳額德楞額等率馬隊自左兜圍叅將賽沙布王鳳祥都司冷慶_率步隊自右鈔裏崇安樂善等力戰於中逾食頃賊不能敵渡河遁追殺二十里斃賊千餘生擒二十鞫稱王貫三於前月十二日之戰已落河渰斃云賊退至馬村橋迤南扼橋口阻進兵路初五日邱聯恩崇安等商派德楞額樂善與都司承惠等於吳家河丁家集密置二浮橋渡河設伏令格綳額關保等由吳家河以南銜枚疾進另以大隊直取橋口賊死拒兩路伏騎並起賊奔潰官軍追殺三十餘里斃賊千餘張樂行仍遁龍山旋麇聚於雉河白廟集會合龔得宮吉寺之賊將由寺集十九里溝渡河北向袁甲三督副將朱連泰叅將張會川等沿河堵勦乘夜攻卻之十四日崇安等南渡次姬家橋賊來衆萬

飭檣紉額德楞額分馬隊官兵爲南北哨鈔賊兩翼崇安以各營步隊戰於中官兵不利賊伏騎起壓我中路步隊動死傷枕藉終賴兩哨馬隊力賊始退十五日賊由王皮溜而西英桂慮賊犯周口且西路兵力單乃檄崇安趨鹿邑出賊前十六日遇賊於羅家橋斃賊三百餘賊不敢進盤踞戴集左右窺陳郡郡內外戒備嚴密賊不得逞又聞袁甲三崇安兩路官兵將至慮腹背受敵遂由太康柘城分竄道出鹿邑魏家橋袁甲三令張會川擊諸姚莊斃賊數百生擒田極兒等賊遂南歸分屯宮吉寺張斌營崇安以淖落賊後乃至亳州合袁甲三之師先是英桂以賊西竄謀乘虛擣東路花溝集三丈口賊巢旣遣史榮椿由瓦子口進兵專顧北路更檄郝光甲等攻賊後計甫定而鉄佛寺之賊李月已先期撲瓦子口八月二十七八等日史榮椿與賊力戰其永夏虞城一路復有捻首李建泰滋擾墨爾賡阿將馬隊往李建泰已由豐碭趨攻徐郡是以史榮椿郝光甲等諸軍爲賊牽制未能與邱聯恩崇安聯絡

一氣云十月初六日英桂自陳州進次鹿邑適察哈爾馬隊到營英桂遂抵亳州選千人以穆騰阿托津阿爲之將偕格綳額德楞額崇安鄭廷錦等馬步兵團於十九日由雙溝東發殲伏賊於姬家橋二十日由江信溜集分三路進至三丈口顏懷忠鄉團與賊遇甫接戰兩路兵勇齊集殺賊七八百生擒百餘踏平賊壘二十一日諜知翼得以數萬衆駛至太和將西掠周口穆騰阿等令鄭廷錦顏懷忠率鄉團回駐雙溝防宮吉寺老巢賊西竄自督馬步渡河南追二十二日至舊縣集賊大至馬隊卻之乃益前衝擊近村突出伏賊數千復擊退之賊回門叅將賽沙布王鳳祥各以所部迎戰鄉團自西譟而前酣戰逾時賊來益衆官軍佯退賊直前追逐崇安督羅仲保張學醇等兵勇鈔賊後穆騰阿托津阿格綳額德楞額指揮馬隊左右盪決截賊數段兵團氣益厲追至茨河西岸殲斃二千落河死者無數賊向東北狂奔鄭廷錦截殺數百賊慮官軍乘勝進聚黨踞立德寺花溝集宮吉寺爲死守計招張樂

行李廷彥由渦北渡河回援英桂檄穆騰阿崇安自南壽其巢檄朱連泰趨東北與墨爾賡阿會勦援賊時墨爾賡阿方偕徐宗幹搜捕虞夏匪黨殲殺千餘擒斬捻首王雙林王成張二紅磚李福廷彭雷等賊二十五日將由會亭集馳往永城適張樂行自蕭颍掠食取道夏邑濟陽集狂奔而南墨爾賡阿逐之截其後隊數百人賊之大股誘逾渦水南竄二十五日墨爾賡阿抵五馬溝與朱連泰會遂以百五十騎馳赴穆騰阿南路軍營二十八日官軍至三丈口迤東張樂行以馬步逆戰關保等張騎兵爲兩翼張會川以綏靖勇陣於中珠隆阿以通永兵陣於左龔耀倫以徐州兵陣於右朱連泰往來策應距賊二里許關保衝入賊中槍斃無算賊殊死鬥朱連泰以步卒環攻之馬隊往來衝突察哈爾一軍尤驍捷敢戰賊遇槍斃遇箭斃紛紛委地至不能自辨其黨追及楊家小莊復殲三百餘擒李柱等九人所棄火藥糧食悉填於道官軍悉焚之其穆騰阿崇安一軍搜捕茨河伏匪二十七日由高公


廟渡河二十八日營於店子集墨爾賡阿以兵會次晨知賊將來犯疾馳至立德寺迎戰穆騰阿揮馬隊縱橫決盪賊立潰遂毀其巢追逐間突遇黑旗花旗紅邊白旗賊萬餘三面叢集鋒甚銳崇安朱連泰各以兵馳至爭前環擊槍箭刀矛無虛發殪賊三千積屍橫野兵勇亦間有傷亡所獲鎗礮旗幟以千計奏入

上以兩次獲勝並未殲厥渠魁仍諭迅速進兵務擒首逆十一月三十日崇安朱連泰進攻花溝集宮吉寺賊巢斃紅衣賊目數名匪黨千餘平其壘察哈爾驍騎校拉什旺丹把總馬騰蛟以首先衝賊歿於陣十二月初一日張樂行龔得收集殘敗糾合藍旗匪黨萬餘仍踞雉河沿村設伏以禦大軍穆騰阿等次第斬除伏莽直逼雉河賊於橋上及沿溝排列大礮而以精銳沿河拒守官軍進軍察哈爾佐領綽克圖達賴鼐受矛傷負創衝陣崇安朱連泰督馬步齊進賊不能支由雉河東遁斬殺首夥二千雉河賊巢復平初二日追至西洋集偵知張逆由高樓集龔逆由西洋集渡河向


曹市集去初三日官軍至曹氏集賊已先竄臨汝其後陽五百進及於會河橋復斃其衆三百天昏黑暫屯橋北三更時賊分四路劫營官軍禦以火器賊多死傷殊不退日將午賊圍益急士卒力戰已兩晝夜人馬饑疲殺傷過當於是墨爾賡阿張會川裏創復戰馬隊咸憤怒鎗箭所至洞胸穿脅斃紅衣賊目十餘營總關保擊翼得落馬匪黨爭護以逃官軍乘之賊始大退穆騰阿等以人馬無從得食慮賊斷歸路乃撤回雉河賊連來犯亦未得逞遂踞廟集浚濠築壘爲負隅計十九日夜突出悍賊數千攻營鎗礮如雨官軍卻之直隸游擊德祿河南駐防滿洲營佐領松志歿於陣兵勇多死者穆騰阿黑夜追賊墜馬傷臂二十三日賊以死黨繞越西行圖截後路朱連泰要擊之殲賊二百生擒賊目董麻狐等斬之賊踞廟集堅匿不出崇安格繃額乃計誘其出巢十二月初二日佯令大兵撤退伏於西令守備羅仲保挑戰賊輕我兵追殺二十餘里大兵競出圍勦殲賊四五百賊且戰且退廟集之匪復


出援應崇安格縹額分路拚殺戰至初三日黎明賊始潰散我軍入廟
集毀其巢賊向尹家溝趙旗屯竄逸初七日尹家溝賊以官兵進攻退
守王家圍其趙旗屯賊經副將伊里縹阿營總富勒德恩布叅領法克
吉布攻之未下當賊之竄雉河也福濟請自赴臨淮勦賊既而以巢湖
之役不果 上復命秦定三鄭魁士又不果至是福濟乃派吉順金

光筋各帶兵勇五百赴北路福濟劾關保赴調遲延英桂亦劾郝光甲
株守懈遠斯時也不獨皖境亢旱赤地千里士卒無從得食卽將領之
忽東忽西亦稟承無自矣英桂前在陳州旣獲褫職留任之譴旋復屢
奉 嚴旨督責而雉河一再攻克均因江皖諸將失師期致賊挫而
復熾論者謂初次尤爲失機蓋所關匪細故矣









豫軍紀略卷七

皖匪四

咸豐七年正月

上以匪蹤四出英桂調度無方與屢次敗退之察哈爾都統西凌阿並交部議河北鎮總兵崇安屢次挫敗恒怯無能交部嚴議西凌阿崇安均來京候議西凌阿所部馬隊交穆騰阿管帶勝保以副都統銜幫辦勦匪事宜代崇安爲河北鎮總兵官卽統其軍是時徐宗幹補授浙江按察使已自歸德赴新任英桂駐軍亳州偵知張樂行糾衆數萬期以正月犯歸德及陳州之周口蓄髮結粵逆爲援嗾其黨韓狼子由臨淮正陽關導之入豫英桂咨照皖省嚴戒備督諸將分路進攻請益調馬隊助剿始賊敗於尹家溝趙旗屯後十二月二十一日翼得之弟翼義率悍黨數千自王家園突出計鈔大軍後托津阿富勒德恩布朱連泰崇安等將馬步隊追擊至亳州洪家廟山永協副將珠隆阿首先躍入賊陣腰中礮傷負創力戰擒斬翼義於陣乘勝疾

追斃賊二千餘其著名擒首雷燕李復亮楊興旺魯珍龐敬等俱斃於陣我軍外委高振標戰歿珠隆阿回營以傷殞後俱議卹如制時方歲闌英桂度賊將擒至乃飭托津阿等整隊進勦除夕遇於王家店殺賊二百餘生擒擒首黃得等二十餘賊斬之賊敗退元日黎明屯聚王家店迤東官軍至散而走斬首三百餘生擒擒首白豹等斬以徇初六日諸軍進攻趙旗屯賊出巢拒戰斃賊三百餘賊棄巢潰走諸軍擁入生擒李振山等二十餘賊搜殺夥匪百餘敗賊鳧渡渦河遁踞尹家溝次日朱連泰等渡河薄尹家溝十八日黎明托津阿等馬步並進賊伏土圍施槍礮官軍連開大礮賊應聲仆官軍乘勢奪賊圍斬殺以千計括其巢獲財物軍器甚多搜擒擒首張鳳等三十餘賊鞫稱張樂行先期南竄冀得於破圍後逸先是亳境之南爲擒匪西竄要道英桂會商袁甲三派知縣張學醇委員鍾德建扼高家寨賊以千餘人突至爲張學醇等擊敗故未越而西惟亳州南至潁郡數百里所在皆賊羽翼鄧家

圍孫村店諸處各有逆黨築圍死守牽制我軍沙河北岸復屯聚大股拒南追之師英桂以鄧家圍爲肘腋患飭朱連泰督隊進攻二十七日師薄鄧家圍圍高丈餘鑿礮眼三層賊於圍內施大礮我軍於圍外擲火彈傷斃賊甚衆千總萬壽慶把總楊起山外委魯占魁中礮殞士卒多死者阻不得進張樂行翼得竄潁州南照曹家等集英桂以其地當水陸要衝與三河尖周家口均接壤乃令西凌阿以馬隊二千赴潁截堵又以皖撫福濟奏粵匪與捻通令侍衛穆騰阿帶察哈爾馬隊五百赴皖助勦穆騰阿行至潁州六十里鋪夜爲賊所乘圍之數重穆騰阿奮戰得脫札米彥普所部百餘騎隨穆騰阿折入潁城適西凌阿援潁至遂以其軍交穆騰阿接統而遵

旨回京穆騰阿馬隊交托津阿將之赴皖以道梗未得前袁甲三初以徐州告急將赴援旣知賊竄龍山奏明中止二月初六日勝保與英桂袁甲三會於亳州以張翼二逆肆擾阜陽潁上分踞霍邱三河尖其地與固始息縣相連據形勢要害

勝保乃統山東河北兵馳往督勦英桂援應後路留袁甲三駐毫督朱連泰攻鄧家圍姚家圍踞匪兼顧歸德門戶自是亳州軍事由袁甲三經奏初九日勝保赴穎英桂以十三日繼發時賊由三河尖犯橋溝初六日署固始知縣張曜會各營迎擊賊稍卻追至淮河官軍奮勇截殺另股賊橫出鄉圍右鄉圍驚潰王庭蘭所遣把總程長湖死於陣賊進攻固始縣城初九日焚東關勢甚急光州知州鄭元善等馳援固始與王庭蘭張曜嬰城守賊駸駸西犯時勝保所部馬步僅三千餘人英桂所部兵勇千人馬隊纔百餘於是檄鄭元善等募勇禦賊檄邱聯恩赴援英桂由太和向沈邱布置防軍扼周家口要道號召槐店諸處鄉團飭汝甯府文武馳扼新息飭沈邱知縣秦篤新候補知縣丁世選馳扼阜陽縣之沈邱集堵賊西竄並飛函與勝保聯絡聲勢勝保派穆騰阿以馬隊六百渡淮副將樂善步隊繼之遂自穎州移營三塔集時三河尖左右賊巢林立南路聲息不通勝保留兵守三塔集親督軍繞道西

南進十六日師抵驛口橋謀稱賊分踞方家集渴援兵勝保率穆騰阿樂善進逼方家集賊隊縱橫列河岸穆騰阿擊賊之渡淮奔烏龍集先後斃賊百餘生擒擒首錢萬榮等二十餘賊十九日官軍縛筏渡淮奪烏龍集賊敗退次日糾三河尖中心岡賊黨犯方家集大營勝保指麾將士迎戰賊騎佯退誘敵官軍追及李家集深林敗堵間突出二百餘騎步賊六七千勝保戒步隊勿動令馬隊出盪陣賊抵死相持接戰兩時步隊槍礮漸進馬隊左右馳騁斷賊騎爲三步賊稍卻士卒乘勢謀殺所向無前賊駭愕狂奔斃賊千數百割賊首二百餘圍攻固始之賊漸由東南抽調西北自期思集至城關數十里賊衆布滿復以大股屯楊家集周家埠口勢甚盛其地皆稻塍狹隘值天雨沮洳難行時英桂已抵新蔡懼勝保孤軍深入檄汝寧營叅將成景帶兵五百羅山縣知縣廖慶謀帶練勇一千取道光息赴固始自新蔡會勝保於艾亭二十三日勝保進次期思集斃匪數百二十六日穆騰阿樂善馳赴楊家集

賊馬步分起來犯官軍三路接戰殪賊二百餘追至龍港集伏賊驟起
尤剽悍騎兵方對陣步隊疾趨直前鎗炮環擊殲賊殆盡生擒檢首四
十餘其另股賊之在吳家樓者舉旗助勢官軍猛擊之焚其壘勝保復
飛調光州勇二千並成景所部尅期齊集二十七日五鼓乘大霧進兵
黎明抵周家埠口賊迸散卽督馬隊追殺渡河直達固始西關附城賊
自焚其壘火光中見賊東奔不成隊伍旗幟器械牛馬縱橫委於地城
圍立解勝保入城留成景廖慶謀駐守二十七日督隊至蔣家集賊糾
三河尖老捻悉銳來拒橫亘六七里勝保察知賊五股約七八千我軍
僅千餘非出奇無以制勝賊置陣長首尾必不相救乃遣親軍馬隊百
餘繞賊後賊猝不及防自驚亂斃賊千數百生擒四十餘奪大砲十二
刀矛鎗械千餘旗幟數百焚燒灰奪回賊船五十餘踏賊壘五我軍旬
日間獲五捷疏入請將出力員弁紳民擇尤保獎復查明歷次勦賊死
事之河南滿洲營佐領松志直隸候補游擊德祿察哈爾驍騎校拉什

旺丹河北鎮標千總馬騰蛟候補府經歷陳謨候補千總陳鈞慶外委王太魁山西把總殷鶴齡徐州鎮標外委尹寶讓六品軍功任繼雄山東千總萬壽慶直隸把總楊起山河南經制外委魯占魁等十二員請從優卹並請調火器營員弁來營俱得 旨允行勝保之援固始也

粵逆連陷六安霍邱圍壽州甚急李兆受實爲之導福濟疏請勝保赴援 上以固始用兵方亟遣袁甲三赴正陽關督金光筋先解壽州之圍諭勝保分兵以助及是金光筋已擊退壽州圍賊穎上復告警勝保於三月朔駐軍方家集攻上莊賊知西南未可驟犯遂北擾穎州之三塔集柴家集諸處會托津阿阻未赴皖勝保令駐守三塔集賊至復戰敗察哈爾佐領達爾瑪滿噶拉戰歿賊大掠穎南勝保督穆騰阿沿途追勦賊回竄柳溝添築四圍集衆二萬往來趙集滋擾初八日穆騰阿帶馬隊馳至趙集三戰皆捷賊復以死黨六七千由小田市集渡河來犯勝保派徐州馬步官兵分途要擊屢戰不退穆騰阿自趙集馳至

合戰郤之賊又出馬隊千人自西至官軍幾不敵勝保畧陣見賊勢盛
急自將親軍百餘騎繞出其前大呼陷陣士卒併力戰賊始敗走斃賊
五百斬賊目一賊見官軍阻遏東北潁郡未易犯又懼我師擣柳溝集
三河尖巢穴遂分股旁趨西南之王家壩華家集游騎達且縣將由光
固通粵逆是時李兆受已會合粵逆陷正陽關圍潁上甚急聲言破潁
上後趨潁郡犯歸陳另股薛小楊小復由霍邱擾烏龍集自皖境之六
霍暨豫之光固息商所在皆賊樹旂張示伺隙而動廬郡嚴未解文報
不通

朝旨諭袁甲三由正陽赴六安以分廬州賊勢袁甲三因毫

州多伏莽疏請先清北路再南下勝保以柳溝賊巢未破潁上危如累
卵將悉銳赴援又慮拔營後賊必乘虛北犯爰與英桂審度形勢以潁
郡驛口橋爲南北要衝須屯重兵以扼賊於是英桂自新蔡馳駐驛口
橋其光州邊防責令王廷蘭成景鄭元善廖慶謀張曜等以堵爲勦勝
保存營兵勇分守要隘外敢戰之士僅及二千英桂所部數不滿千因

泗陽軍捕盜勇兵丁不敷分有情形請調楚省防兵三四千來豫前請
飭史榮椿自蒙城進援潁上 朝廷謂史榮椿已赴亳州楚軍別有
征調 諭令迎提大同馬隊二百名及直隸防兵到營相機進剿

皖匪五

賊踞柳溝聚南路悍賊四五萬抗我師謀乘隙北犯而以另股及皖中
粵逆圍穎上勝保偪賊巢扼北犯路英桂駐驛口橋爲勝保後援會霑
雨連旬師阻不得進三月十九日賊乘雨夜分股至土碑集掠糧駐守
之察哈爾馬隊二百人不能禦英桂令黑龍江佐領蘇克金急馳往救
賊退擒張汝黃燈兒等十餘賊斃賊數十奪回所掠資糧牲畜二十五
日天始霽二十六日進攻柳溝步隊分兩路進馬隊張兩翼護之英桂
堵截後路勝保自扼河口麾諸軍進巢內悍賊林立持滿待我軍我軍
開槍礮賊應聲仆我軍冒煙火蛇行蒲伏進越重濠摩壘火彈噴筒齊
發斃賊無數而賊巢棚帳以雨溼終不然鑒攻三時三河尖援賊麕至
勝保見黑雲蔽日雨勢甚重卽收隊援賊渡河鈔擊勝保回馬拒戰斃
賊甚夥賊始退二十八日賊傾巢出馬隊橫亘八九里勝保令穆騰阿
率馬隊樂善保衡率步隊三面迎敵馬隊直前賊堅立不少動時火器

營甫至軍射以火箭賊多墮馬我軍乘其驚擾擊之賊再進再卻積屍滿陣來益多我軍大呼四面馳下賊隊亂自相蹴踏死者不可勝數火器營伊昌阿全廣等暗以火箭伏坡側奔賊至悉斃之近營村舍伏賊尙萬餘勝保密遣死士夜攜火具襲賊營賊駭奔洞胸穿脅焚殺復無算是時柳溝賊巢食將盡張樂行糾三河尖霍印馬賊三千暨夥黨王懷義等悉衆決死戰計衝大兵營壘竄西北掠糧旣不得逞乃自三河尖分股四出一由旺流集竄光固一由青皮淺竄息縣謀牽我師勝保英桂計分兵非策也於是檄蒲賀蓀由汝屬帶勇赴光固會同鄭元善等盡力堵禦穎上告急則檄代理知府文光叅將蔡昌言往援而進攻柳溝之師不少動蒐軍實申號令奏遣察哈爾馬隊請調黑龍江餘丁以帶隊得力加穆騰阿勇號以士碑之失摘札米彥普頂戴並効直隸防兵赴調遲延分別賞罰振作士氣專軍併銳圖柳溝四月初一日三路進攻勝保親扼邵家橋樂善統兵勇首先過橋以火器斃賊甚衆賊

河尖援賊且二萬勝保以爲不殲此股柳溝終不可取乃於橋北占寬地嚴陣待悉縱精銳逾橋迎擊而令穆騰阿帶營總穆克登布墨爾賡阿等列馬隊於西南防騎賊鈔越賊衆蜂至其悍黨皂水逕渡與橋下伏賊並起時樂善所將精卒轉在橋南勝保乃躍馬橫戈立橋上士卒見主將親臨陣勇百倍刀矛格鬥橋口鎗礮並發中賊輒仆富勒德恩布縱馬過橋樂善回兵截擊川勇與親兵合橋下伏賊四百餘盡殲之西路馬賊亦爲穆騰阿擊敗賊自是不敢進巢徹夜列巢外備官軍越二日張樂行翼得糾合三河尖逆衆悉銳來犯先以騎賊當官軍官軍逐之卽退往復十數次是日逆首皆在陣前賊衆倍往日不能以力勝廼設伏佯退以誘之賊易我軍來追入伏中於是馬隊回轡衝壓川勇伏近村譟而起火箭蠭集賊馬足及腹馬駭奔䟽齧賊隊大亂斃賊四五百穆騰阿方追北林箐間有黃衣紅衣賊目二指揮賊衆急令飛騎

聞道鈔擊鎗斃紅衣賊其黃衣賊中二箭逸縱兵追殺數千百賊益懼
踰伏巢外是夜伊昌阿全廣持火器率川勇四五十銜枚劫賊營賊聞
角聲人聲疑官軍入其穴昏黑中自相殘殺屍骸枕藉遺槍械衣履塞
於道張樂行龔得等勢益蹙翌日復糾悍黨萬餘渡河來決死戰勝保
及其半渡而擊之賊被鎗中箭屍屬於河餘賊不能渡望風靡官軍自
上游濟者已出其後衷而擊之擠諸河殺溺無算哀號之聲達遠近是

夜三更我軍傳於賊巢巢內餘賊猶開礮抵拒初六日黎明我軍越濠

登殲其衆遂克柳溝敗賊向三河尖及化集分竄英桂令蘇克金格洪

額追至南馬寨迤南斃賊百餘生擒郭灼石長明等二十餘賊復派馬

隊四百步隊一千跟追至汝陽新蔡一路三月二十九日與匪自固霍

交界之大山泉河鋪北竄王庭蘭成景等擊諸石佛店殲賊二百獲偽

丞相檢點諸旗幟信陽營外委何振聲陷於陣四月朔紅衣匪髮賊二

三千由柳村店間道趨固始軍南關攻東南兩門夜半攻稍懈王庭蘭

成景張曜等選死士四百由西北縋而下劫南關賊營城內啓關鼓譟
出兩路截殺逆衆驚潰擒斬悍逆陳忠沅僞指揮余常等賊由徐家嘴
皂水遁王庭蘭等慮賊復至請兵助剿先是光固告急勝保英桂檄邱
聯恩往援又以楚北之警南陽士民固請留聯恩不聽移師至是乃檄
龍澤厚自鄧州馳赴光固而龍澤厚是時猶在秦剿匪固未來豫也勝
保英桂旣克柳溝念穎上被圍久望援切又諜言張樂行等遣李金甲
冒難民賃居穎州府城暗挖地道爲內應委員往驗如所言捕寘諸法
於是益知賊之涎於穎上其聲言分股北犯蓋欲牽我兵力於西路得
乘虛致力於穎決計移師屯李家集圖三河尖賊巢而出銳師倍道疾
趨援穎上時久雨泥深沒蹀穎上賊以爲官兵必不能猝至且已分股
由化集繞越西竄綴我軍穎上可旦夕下不知勝保之師轉向東南四
月初十日勝保所遣營總法克吉布叅將蔡昌言紳士倪元灝勇目賈
金勝前隊之師已宵加於穎次六十里鋪矣自克柳溝賊失門戶之蔽

而穎郡偷掘地道之謀又敗至是復聞勝保大兵至穎上守愈嚴計益窮是夜乘大雨粵逆竄正陽關擒逆竄三河尖穎上圍立解德克吉布等勦餘賊距穎上三四十里遇賊載所掠輜重東北行要擊之斃賊二百勝保統大隊回駐李家集圖三河尖老巢三河尖北二十餘里有黃岡寺中心岡賊以數千人分據與三河尖犄角中隔洪河屬偏地積潦官軍擒至黃岡寺斃賊六七百馬隊賊爭渡洪河溺死無算乘勢進勦中心岡斃賊四百餘生擒長髮老捻二十餘奪獲槍礮旗幟甚夥救出被難婦女二百餘口匪巢平毀三河尖北岸賊略盡當柳溝之破其分竄化集之賊踞吳老莊分築四壘堅匿不出英桂令蘇克金格洪額帶兵往剿勝保亦派兵會之十六日官軍併力合攻吳老莊拔其壘賊向東南竄逸時陰雨浹旬洪河暴漲毀三河尖迤北橋梁賊焚舟阻我軍不得進勝保乃會英桂於驛口橋議以重兵扼西北暫緩三河尖之攻留樂善等守李家集營盤自統所部連夜至化集十七日次高家堰

閭闔盡知。簞沙布與賊戰，疾趨抵功上莊，見賊幟如林，橫亘東西數里。英桂所遣兵相距在數十里外，賊恃衆呼譟往來，衝突勝保嚴陣待。自巳至酉，相持五時之久，賊漸懈，或下馬坐臥。勝保潛師襲賊後，皆暮賊不辨多少，紛然退。官兵乘勢追抵賊巢，是時張樂行據三河尖，其黨薛小楊、老小分布光息，既不得逞，志於北嶺西路，敗匪竄踞方家集。方家集跨洪河爲水陸要隘，都司戴世熙知縣丁世選戍守。龔逆驟至，戴世熙等斂兵退賊，遂潛溝築壘，聚所掠資糧而守焉。前分屯於附近之韓家灣，聞遣其黨掠烏龍欄村。趙家古陳倉等集洪河南，賊徧地我軍，乃於洪河北倪新莊大橋集沿河設守。令樂善等仍駐李家集舊營，以分三河尖賊勢。勝保自駐高家堰，相機調度。二十一日，密派法克吉布以馬隊三百潛自艾亭渡河而南。二十二日戰於趙家集，藍旗韓獐子列陣於南，白旗龔得列陣於北，藍旗陣而不整。官軍先擊之，賊潰。龔得復糾合長髮悍逆，自北應援我軍，奮勇追逐三十餘里，殲馬賊百餘步賊。

千餘落水死者以千計奪獲礮械旗幟無算二十三日勝保益令墨爾
賡阿帶隊赴烏龍集與法克吉布合連戰皆大捷斬獲甚多自古陳倉
至欄杆集數十里賊蹤畧盡法克吉布等屯南岸勝保將移師功上
莊先令賽沙布戴世熙等築濠壘二十五日向午興道率悍賊萬人五
股來犯賽沙布不能禦賊衆西駛勝保統親兵往與賊正相持賽沙布
戴世熙之兵見天向暮繞營而退各隊爲之動賊乘勢夾偏勝保急與
穆騰阿合兵邀截槍礮連環擊之賊始退回巢於是劾賽沙布戴世熙
暨葉方家集之丁世選俱褫職令自效賊踞方家集濬濠培壘老我師
勝保知賊中資糧未乏二麥方熟乃飭居民先行刈麥商販必官給印
票方准行運出產硝磺之區禁止出境賊以糧乏相率逃日數十百人
勝保貸以不死復於陣前樹旗招徠之解散五六千翼得乞降勝保不
允五月初二日穆騰阿榮善等東西進攻西路之師先到噴筒火彈並
發逆衆鼎沸東西出賊三千餘圍我軍穆騰阿等以馬隊衝擊步隊如

縣進則屢創屢前大戰良久殲殲甚多勝保計賊黨分踞沙河兩岸衆少於北北岸防密於南攻其一面則彼得抽併精銳以相抗會檄調邱聯恩及蒯質蓀廖慶謀等所部兵勇至初八日夜勝保令邱聯恩等伏方家集南岸初九日夜遣穆騰阿樂善先發勝保督後隊策應適大霧迷漫銜枚疾進黎明霧斂我兵薄其巢殺賊騎數十越其濠賊併力拒輒爲火器所焚驚駭囂呼中猶死鬥我兵且戰且攻破其壁濠寬逾數丈不可越邱聯恩薄南岸賊壘賊潰亂官兵縱火焚洪河浮橋然及廬舍值南風大作火益烈賊黨徒跣呼號冒火撲北岸官軍前後夾擊轟殺焚溺者三千餘河水爲之不流勝保料賊將夜遁乃伏兵於徐家橋地里城賊果夜馳至官軍截殺敗退回巢於是張樂行恐三河尖不能久踞先以舟三百載輜重順流歸雒河行經正陽關金光筋擊沈其舟數十官軍連日進攻終以濠寬水深未能速下十一日東北風起官兵以灰瓶毒煙乘風投賊巢賊出巢迎拒兵勇三路卻之夜遣健卒襲賊

營躍矛叢刺使自相駭殺或舉千斤大礮傾其屋宇邱聯恩蒯賀藻等復於南岸火賊多舟賊徹夜邏守不敢歸巢十四十六等日賊出馬步萬餘穆騰阿樂善張兩翼待之賊知有備不敢前十七日五鼓勝保督令樂善率格洪額王鳳祥等統直隸河南山東步兵川楚正定各勇三路進攻方家集鼓行而前賊奪路狂奔轟斃甚多我兵擁入賊牆縱火燒木柵其未及逃出者尙一二千盡殲之立將方家集平毀馬隊沿途追殺屍橫遍野遺棄衣糧器械牲畜填塞於道賊竄王家壩與三河尖爲犄角初賊分五色旗每旗緣以雜色爲二十五隊蜂屯蟻聚自柳溝攻克穎上解圍各旗殲斃過半惟白旗翼得狡悍善戰此次攻取方家集白旗匪黨僅存十二三粵逆亦大受懲創張樂行爲之奪氣云於是勝保移營中心岡扼賊要衝親至三河尖規度形勢三河尖居豫皖之交水陸衝途人煙輻湊淮汝滙流四面環繞夏水漲發渺瀰無際賊收船入港長河數十里無片板得小舟溯洄而上之流灣曲動嬰賊鋒其

勢固難飛渡勝保所調黃良楷邱聯恩南北兵勇一時未能遽集然賊勢既窮蹙若稍遼緩敵復張乃就見兵先攻王家壩翦賊羽翼穆騰阿率馬隊分東北兩路截援賊策應步兵二十日我兵薄其壘賊初猶施槍礮抵拒火箭射入燒房屋賊相顧駭愕爭拔柵門竄殲斬無算詰旦張樂行等率死黨馬步數千直衝中心岡勝保揮兵迎擊斃賊五六百追至三河尖剷除附近賊壘二十二三四等日小曹集童家樓劉家店柳溝口各壘次第削平斬馘千餘其順流東駛之賊爲固始署令張曜叅將成景截殺二百餘生擒張麻子等一百餘距三河尖東北六十里鋪爲賊回竄雉河要道賊以死黨據守勝保輕騎襲之賊潰遁殲斃五六百賊迭挫衆心渙散逃者日百數十賊首互相誘咎或爭奪門殺勝保謂乘其內鬩可一鼓下也二十五日選善泅者數百人背壺盧藏火具潛渡南岸越西北緣土圍而登賊之守也密於夜而疎於曉故得登縱火譟而入逆衆不相顧亡命東奔立將三河尖克復賊竄南照集道

軍踵至殺賊數百餘賊見水爭渡我軍以鎗礮乘之溺河中礮死者浮屍蔽流下旬日間連舉堅巢時方炎蒸赤地千里晝夜轉戰軍多病邨聯恩樂善穆騰阿惠時疫英桂喀血勝保力疾督師故將士尤用命焉從聞加樂善提督銜賞卹聯恩圖薩蘭勇號游擊格洪額加副將銜知縣廖慶謀換戴花翎復直隸前平谷縣余啓咸職以守固始縣功最予王庭蘭三品卿銜餘升賞有差先後查明死事將弁陳州府屬陣亡之佐領達爾瑪滿噶拉委叅領德隆委防禦富和驍騎校旗录成德薩音烏玉圖密吉克僧額旱陽縣方家集陣亡之防禦阿克棟阿驍騎校關喜署內黃營千總司泉許州繁城陣亡之開封營千總王聰明固始縣橋溝集陣亡之把總程長湖固始縣石佛殿陣亡之信陽營外委何振聲內鄉縣大平頭陣亡之把總張大信等俱奏請議卹如制

賊自三河尖敗後舟載輜重東下兩岸賊夾護以行勝保督軍由南照集北岸追勦五月二十七日抵潯河集焚近岸船隻賊趨南岸二十九日師至潁上縣士卒刈麥而食進次黃岡集分兵擣沙關賊壘沙關在河北與正陽關爲犄角賊恃近巢穴糾衆出拒我師乘其未陣擊之斃賊三四百詰旦賊自正陽關來援帆檣如織據八里塚造浮橋跨河而軍我師先攻八里塚步賊擁衆出巢馬賊陣林木間我軍分兩翼鈔殺斃賊六七百餘賊爭浮橋不及擠入河漂沒大半我軍燬浮橋擊沉數大舟賊由下游遁入正陽關遂拔沙關關內餘黨多自經於樹搜獲張樂行之弟張易斬以徇鞠知張樂行翼得自三河尖敗存賊僅二萬奔正陽關畱韓狼子守關張樂行等赴霍邱依李兆受薛小諸逆將乞援於粵匪勝保念霍邱在正陽潁上南若渡淮進攻則正陽賊將乘虛北犯惟先正陽而後霍邱可以疏通河道顧全潁壽又念霍邱密邇固始

乃檄邱聯恩蒞蓆廖慶謀等會同王庭蘭張曜分扼固霍接壤防竄
越時河水盛漲官軍營北岸不得渡會署廬鳳道金光筭以礮船來助
閏五月初四日勝保令金光筭造浮橋濟我師自督軍由北岸進剿賊
見官軍卽由西北浮橋擁過數千人我軍張兩翼俟賊近鈔其旁斬執
旂馬賊十餘殲步賊百餘賊敗趨浮橋官軍追斬五六百賊急斷浮橋
梟水逸官軍槍礮尾擊之遙見南岸金光筭兵直抵關下將登猝有伏
賊鈔其後壽春鎮練勇先潰賊乘勢壓下金光筭在礮船督戰似爲飛
子所中猶屹立炮船頭指麾士卒岸賊乘之舟人急解纜溜急舟覆金
光筭歿於水北岸軍以浮橋未成不得渡勝保以狀聞得 旨照布
政使陣亡例優卹光筭武功爲皖中第一其死也遐邇士民俱揮涕勝
保旣失金光筭益憤怒激士卒規取正陽關顧其地西南北三面爲皖
豫各河所滙大雨時行河流漲發距關十里悉巨浸無進兵路潁州府
光州承造砲船不能以時集而賊船甚多乃令副將慶瑞駐賽澗鋪叅

駐紮沙布都言冀世熙駐左家園叅將蔡昌言帶銳勇及金光筋舊部駐洙河口其東往壽州之路令游擊成桂都司吉昌駐兩河口而以皖撫所遣之叅將吳秀駐正陽關以東與護廬鳳道黃元吉力遏要衝又密遣營總穆克登額西蒙額烏爾棍扎布升紳等將騎兵渡河潛赴東路三十里鋪相機截擊布置定會英桂亦移營駐潁州爲勝保策應偵知潁郡以東沙河以北板橋集胡家集王家屯廬家廟諸處均有賊而尹湑爲之首非翦滅此勝保不能無後顧患乃派營總蘇克金往廬家廟勦捕斃賊二百餘生擒劉全張麻子等賊派總營德楞額副將伊里綳阿叅將襲慶等馳往江口集斃賊數十生擒馬大枝等三十二賊焚其巢餘賊東竄我兵追過肥河斬馘無算板橋集附近居民均反正時李兆受糾合粵逆久據霍邱之葉家集以大兵方攻正陽關乃伺隙擾商固商城縣知縣戴鴻經守備李輔清與邑紳周祖頤以兵團禦諸黑樓陣斬僞正將軍朱沅興生擒僞檢點傅炳榮狀聞勝保英桂令邱聯

恩王庭蘭蒯賀蓀進駐黎家集賊聞大軍且至退竄東南開順街搜獲
賊目李喬年等數十李兆受竄六霍交界之大林畈石婆店商固遂無
賊勝保益專意正陽關十六日黃元吉穆克登布率馬步兵勇至雙橋
集賊騎三路來犯官兵亦三路擊之賊敗歸巢復密遣守備黃開榜駕
所奪賊船襲賊汪家集由任家溝駛至霍邱距城十二里賊船屯聚如
林我軍入其圍發砲沈數舟奪大炮一大船一餘賊驚擾者終夜十七
日勝保慮正陽關下游黃天澗賊易偷越遣副都統德勒格爾營總訥
恩德善等以馬隊搜勦斃賊甚多於時官兵炮船有先成者乃令慶瑞
黃開榜率以進攻十九日黃開榜由沐河口駛近正陽關沿賊圍牆順
流下駛乘風舉砲轟塌賊牆數丈守賊應聲仆遂奪舟俘馘而還二十
一日慶瑞進攻黃天澗乘雨後風順利駛近北岸黃頭岡賊船迎拒我
舟乘勢入賊隊槍砲環擊沉其六舟賊衆隨流漂沒步賊緣岸救復砲
斃四五百乃整隊回沐口停泊二十四日新河口有賊舟數十自霍邱

揚帆而來黃開榜以炮擊之賊落水無數敗賊趨南岸抵暮黃開榜復與敖天印乘賊不備突前拚襲賊船槳櫓未具傷斃二三百沉溺無算奪舟五次日復接戰賊爭開槍砲我軍避櫓牌後注藥熱火待時炎暑賊砲頻發熱甚不能用我軍鎗砲齊發斃賊三四百賊大潰僅以四舟遁先是勝保統大兵壁垂岡集扼正霍北犯路至是炮船益多乃於二十九日親督各軍進攻正陽關由沫河口繞湖入關內賊蹲屋脊瞭官軍近關水次列舟迎拒官軍擊以鎗砲屋上賊多顛突有舢舨百餘排檣鎗分路飛擢至我軍佯退俟其近出砲划四面圍之焚燬過半斃賊三百餘謀言逆首以糧盡多傷亡謀由懷遠蒙城逸又慮我舟師阻截乃散處東岡黃岡頭棚帳鱗次一望無際勝保慮其東竄乃派樂善等至沫河口督同防勦六月初一日賊衆三四千水陸並進樂善先於要隘置千斤大砲令水師佯退誘敵賊船近大砲轟發擊沉賊船三餘船四散追擊大敗之我軍收隊將炊賊營忽出無數小舟擁巨艦飛擢趨

北岸奪大砲把總黃鳴鐸駕小舟十餘乘風使附賊船以手鎗擊舟左賊舟右賊悉趨於左短兵接鬪悍賊八九十餘賊墮水攀舷舵擁舟南竄未抵岸舟覆皆溺死時黃元吉於雙橋集豐店鋪迎河集諸處遇賊殲斃一百餘擒雉河老捻邵甲陳讓等斬於軍追至黃練堡先是英桂飭德楞額等搜捕沙河兩岸匪黨斬獲甚多被脅愚民悉薙髮歸正月初六七等日進次展溝闕踵宋家圍郭家橋諸處初十日渡淝而北勦劉家集之賊賊乃黑旗捻首李越之黨李越既爲伊興額所誅其黨劉老淵等竄至劉家集游駛遇我兵向西北狂奔我兵追殺百餘生擒捻首王獻林等跟蹤至胡家澗殲殪甚多十一日德楞額復帶馬隊追至亳境楚店集韓家圍迭有斬擒於是北路賊日蹙勝保以正陽關左湖右河賊負險死守未易攻若漸平關外各巢則賊勢孤立又以大軍現屯沫河口八里商賈居民漸復業由臨淮達潁州帆檣不絕設下游再遭蹂躪則收拾愈難於是咨商皖撫叅將尹廷善扼守臨淮嚴飭護廬鳳

道黃元吉等堵截各要隘並齊集霍邱東路鄉團助剿令副將慶瑞督黃開榜黃鳴鐸等由水路進攻密遣兵勇由黃天澗渡河繞出賊前二十一日賊以二千人攻東路鄉團經官軍鈔擊敗退次夜復來拚襲傷團練二十餘人賊乘勢東趨我軍四起圍擊截追至河邊適柳林內伏砲船鎗礮齊發斃賊二百餘二十五日賊衆千餘由南岸鳧水山東練勇伏不動賊徑前伏起短兵接戰殲賊無算二十六日勝保以蔣家廟賊巢未破親赴黃天澗擣賊巢賊出戰我軍排立不動俟其鎗熱藥聲譟而前鎗斃數百人賊敗入巢我軍擲火器賊不能支潰圍竄柴家岡士卒追及再破之遂平蔣家廟柴家岡新集黃岡頭各賊巢其賊舟在黃天澗者樂善飭叅將蔡昌言由沭河口分帶礮船更番迭進沈其舟數十追及關前復截奪其舟擒斃其衆東路水陸賊營殲除略盡矣餘匪南竄枸杞園劉帝城諸處亦有遁回正陽關者先後俘擒首張麻太王慶邦韓來發李恆張七等十餘砲傷任乾魏老頭等皆悍賊也二十

八日勝保渡淮至南岸令穆騰阿馬隊會黃元吉等進勦七月初一日
穆騰阿由蔣家廟進攻板橋集賊初不設備官兵驟至立潰亂南奔官
軍毀其巢逐北至枸杞園賊竄入巢與守賊悉衆出拒穆騰阿飭營總
法克吉布楚勒岡阿等分兩翼撲壓賊屢前屢卻相持逾時始敗退我
軍跟蹤入其巢斬首三百餘賊潰圍竄劉帝城劉帝城有賊營六座擒
首韓狼子劉餓狼魏蘭等均竄伏焉於是初三日勝保預派穆騰阿帶
馬隊樂善帶步隊慶瑞帶水勇分道進攻自乘砲船赴南岸督戰賊首
見大軍攻之急分三股出拒馬賊勢尤悍我軍奮力阻截賊來愈衆穆
騰阿樂善分馬步爲三路中路佯退而兩翼不前賊果追中路行二三
里賊將止士卒再卻走賊再追我兩翼出賊後亦漸前營總墨爾賽阿
法克吉布楚勒岡阿等帶馬隊自東南鈔襲鎗斃騎賊三四十全股敗
逸自相蹂躪我軍馬隊縱橫馳驟步隊鼓譟而前三路前集賊衆死傷
載道會黃元吉吳秀所帶壽州兵勇亦至由東夾擊賊愈披靡逆首亡

命窮奔遺棄砲械旗幟衣物填委於路追至劉帝城北賊人馬淹沒於正陽關南湖中者約五百餘餘匪搶船逃至關前復經慶瑞鈔越邀擊悉數殲斃其自陸路逃赴正陽之賊行至二道橋口亦經炮船兵勇堵遏斬擒殆盡正陽橋賊將傾巢接應我軍截諸橋口炮傷復數十人是役也吉林馬隊最爲奮勇升用協領富隆阿首先追賊中砲殞議卹如制管總墨爾賡阿請賞勇號把總黃鳴鐸加都司銜賞藍翎張得魁以千總補用檢首韓狼子等屢敗勢益孤而霍邱檢首張樂行龔得薛小等至是將率衆赴關應援勝保謂龔得與之合則賊勢復張宜乘其離霍邱未到正陽出不意邀擊之則事半功倍適者檢張金桂願投誠效命乃令潛赴霍邱解散脅從遣勇目陳萬金等赴汪家集會同已革霍邱汛把總朱天祥號召民團選精壯千數百人齊集划船砲船百數十隻繞赴城西湖閘道疾進初十日行抵湖南岸值大股賊水陸圍至陳萬金中道橫截之前起賊船以風利下趨不能轉鬥遂旁竄後起賊船

開砲抗拒我軍蔽以檣牌三面兜圍鎗炮齊施逆衆應聲落水我軍躍登賊舟刃殺多賊焚其槳櫓餘船折竄霍邱岸賊迸散陳萬金朱天祥率全隊追至霍邱西門賊自縱火焚舟闖入城適投誠之張金桂出城接應大呼曰賊敗賊敗賊惶急不知所爲陳萬金督隊疾馳城不及閉我軍擁而入賊巷戰死者數百遁東南追斬不可數計遂克復霍邱縣城其前起賊舟乘風下駛新河口敖天印帶礮船迎擊自朝至晡相持不下適張得魁馳往策應勇目梁玉亦以步隊至敖天印在重圍中見援兵踵至奮勇夾擊賊三百餘奪舟三十餘奪獲砲械無算奏入陳萬金擢守備朱天祥復職餘彙獎其上年進解臺圍及勦洗白龍王廟賊巢出力諸員至是上其功自徐宗幹伊里綳阿等以次進階其先後在方家集陣亡之驍騎校武勒西蘇前鋒校圖們吉齡噶勒山東東昌營額外委孫金科暨三河尖遇害之阜陽舉人朱鳳鳴弟朱鳳岡子朱祛患等及轉戰長淮從征文武以積勞病故之副將保衡鹽提舉何

分別陳請議卹如制富皖匪之竄三河尖也大兵追賊南下汝光土匪竊發倚角子山爲巢蔓延禹密一帶官軍力單事權不一於是英桂自請前往督辦暫以三省勦匪事宜屬之勝保令袁甲三赴潁州爲後路聲援蓋自是正陽關剿務悉由勝保專章入告矣勝保分兵克復霍邱後逆首翼得受創竄六安張樂行韓狼子跽伏正陽關勢日蹙而迎河集股匪與六安粵匪竊據劉帝城故壘爲關內援應勝保密派樂善率水師自下游攻之殲斬殆盡二十四日東北風暴作大雨如注六安山中蛟起淮沙兩河驟漲營牆外樹椿築壩以禦水溢塞沫河口增築兩岸營壘阻賊乘漲潰圍下颿賊勢愈窮食將盡刳驢馬雜野菜食之其投誠之張金桂潛於關內宣言投首免誅於是逃者日衆蒙臺老擒接踵至慶瑞黃開榜黃鳴鐸等各帶炮划分路攻擊奪賊舟糧械不可勝計生擒擒首張尿子張存性魏成劉茂皆張樂行魏蘭劉文敬等弟姪

悉寘諸法是時關城三面堵禦嚴密惟南至六安一路接濟未絕於是
派黃開榜黃鳴鐸等赴米家臺一帶潛師截勦八月初一日賊舟數十
自迎河集乘夜上駛官軍殺賊奪舟獲糧二千餘石守備郭光祺率壽
州團練勦賊於王家廟雙門鋪署壽州任春和帶領兵勇民團截賊於
陳家店酒流橋均有斬獲外援絕糧道不通勝保令邱聯恩樂善帶水
陸各隊撲東面濠牆擁入東關賊槍砲雨發街衢木石墮塞樂善至街
口槍斃賊目二以脖項傷不能進勝保憤甚益督將士力攻忽諜報李
兆受率衆五六千由六安至柵柵園劉帝城聲言與正陽賊會合竄懷
遠鳳陽諸處勝保急遣湖北勇目劉尙義千總何天保張玉榮常振清
等帶勇隨邱聯恩追勦令馬隊渡河鈔擊劉尙義裏創戰甚力賊敗退
次日乃大至張玉榮堅壁守賊三犯不得入適水軍自沭河口馳至開
砲轟擊賊始大潰其時關內賊已乘間由北關橋突出一二千爲我兵
砲船分鈔擊敗擒斬過半援賊竄屯劉帝城柵柵園勝保乃至沭河口

指揮設伏有老撿牛元章者最悉賊營情勢勝保釋不誅用爲嚮導集諸將弁授以機宜二十五日子刻各營分道進直薄東北關守賊開炮死拒我東路伏兵襲取東關擲噴筒火箭賊倉猝不能救我北面諸軍旋亦會合轉門環攻無不一當百鏖戰兩時積屍成阜賊譟而奔我軍追至南關河岸尙藏二百餘舟賊皇遽登舟向六安淖河竄叅將格洪額帶礮船轟擊衆帆齊落我軍三面合圍賊之不及投河者摠斬無遺十餘里河水盡赤老撿魏藍耿萬金張茂馬鳳林傅老虎陸耀宗俱斃焉生擒楊大鵬高兆安等二百餘人賊之死黨俘斬殆盡捷聞 賞勝保頭品頂戴其首先入壘之副將慶瑞加總兵銜叅將格洪額以副將用都司黃開榜以游擊用黃鳴鐸加游擊銜換花翎其餘晉秩有差陣亡之都司馬翰忠縣丞李光裕議卹如制先是英桂以禹密告警將北行 上旣命袁甲三移駐潁州屬勝保患病乞假卽令袁甲三暫統諸軍袁甲三以攻韓圩方急未能卽至八月初九日英桂去潁州時

陛見迎擢北上

朝廷責令折回九月十

七日勝保旋正陽關與袁甲三會商兵事時安徽布政使李孟羣復請調邱聯恩赴六安助勦勝保以宛郡寇猶熾邱聯恩習宛南情勢飭回豫助勦另派叅將饒沙布都司玉輝帶勇千餘扼霍邱之河口集爲李孟羣聲援其韓圩餘黨劉老淵等擾及甯陵商虞各境歸德府知府孫鳴埏商邱縣知縣水安瀾等卻之會朱連泰史榮椿亦自亳州會合夾攻賊由五馬溝紛竄渦肥兩河餘黨聚散不時蒙亳一帶道路尙梗勝保移駐潁州居中策應奏言俟北路肅清再爲進勦六安計得旨報可九月二十七日李孟羣挫於獨山退軍廬埠於是六安賊竄至洪家集顧家店李廟商固情形又急十月初七日勝保由潁州進屯三河

又遣穆騰阿法克吉布等隨樂善前往堵賊竄入州南之路賊保壽同
穎州督史榮椿法克吉布平劉家樓賊圩令苗沛霖圍攻豐圩賊壘清
北路龔張兩逆窺勝保移軍乘隙將復竄雉河繞由洪家集河口集葉
家集分趨固始十一月二十八日勝保馳抵三河尖賊復回遁六安時
粵逆大股由潛霍北犯李孟羣失利黃開榜等力不能禦賊遂犯固始
六安擒逆亦陸續西竄勝保以軍情驟變請添調馬隊助勦兼請英桂
赴援英桂先勦辦宛南土匪漸次殄滅已奉 旨復職諭令回駐正
陽英桂以殲除未盡疏請暫緩至是復從勝保所請 飭駐陳汝並
令德楞額格綳額領馬隊由新息馳赴勝保軍營蓋是歲自正陽關克
復後皖豫之交遂乏戰事可紀逾年乃有固始解圍之役

與夫國朝之文苑若夫天下之文章皆由乎此

今之世雖有文苑之名而其實則無文苑之實

蓋文苑之實者文苑之文也文苑之文者文苑之

人也文苑之人者文苑之文也文苑之文者文苑之

人也文苑之人者文苑之文也文苑之文者文苑之

人也文苑之人者文苑之文也文苑之文者文苑之

人也文苑之人者文苑之文也文苑之文者文苑之

人也文苑之人者文苑之文也文苑之文者文苑之

豫軍紀畧卷八

皖匪七

張樂行翼得自正陽關敗竄六安求援粵逆粵逆僞國宗韋志俊方爲楚師挫於蘄黃遂糾合張樂行由安慶走潛霍咸豐八年正月圍固始勝保駐軍三河尖遏賊北竄僅英桂赴援英桂令德楞額等勦兵待疏請湖廣總督檄營總舒保移師來豫尋以皖境阜陽教匪侵沈項英桂赴汝郡籌堵勦飭光州知州鄭元善帶勇援固始李孟羣派叅將張得勝亦以師至賊由徐家嘴渡河踞固始城東之南岡分股四掠偷挖地道三品卿銜王庭蘭署知縣張曜登陴嚴守破地道三所城外大股麇集黃開榜張得勝等不能禦撤屯東北勝保馳抵戴家店敗賊於馬家埠鄭元善進抵大橋棚約會剿正月初四日夜城東奎星樓地雷發城塌數丈黃旗賊擁而上張曜身蔽缺口揮衆槍堵刀矛礮石雨下斃執旗賊目暨紅衣長髮數十他守者亦擊斃多賊棄雲梯十餘具逾兩時

賊始退十四日勝保擊賊於西關斃賊七八百十八日賊復以地雷轟
塌東南城牆十餘丈張曜率弁勇短兵接戰賊抵死不退勝保乘虛攻
賊巢賊回顧守者乃得築缺處城復完二十二日勝保募死士田玉梅
等齎火藥軍械入城二十五日擊賊獲勝賊匿土壘不出二月初二日
勝保誘賊離巢以大礮火箭連環轟擊斃賊甚多適英桂所遣馬步隊
亦至分路鈔擊殲賊六七百賊以固境無所掠食分擾商固交界之郭
陸灘樟柏嶺商城戒嚴

上以固始被圍久責英桂赴援並嚴防商
城一路會勝保五戰皆捷李孟羣親抵宋集龍澤厚亦至會戰斬殲千
百計初九日城東南隅復爲地雷轟塌以堵之力賊不得入勝保逼賊
而陣以大礮攻其北面二十日賊分掠光州之馬岡龍澤厚聞丕敏汪
長清等與鄭元善分路扼殺斃賊六百餘生擒二十餘時湖北舒保軍
已至商城復因故調回楚英桂疏請暫留豫境調遣二十三日勝保誓
於衆曰固始被圍已兩月上煩

聖慮近給事中毛昶熙復以爲言

今日不解圍必於諸將取之遂親率馬步合李孟羣龍澤厚諸軍大戰賊敗退焚近郊賊壘直抵城濠王庭蘭張曜亦遣隊縋城夾擊大軍乘勝剿殺斃賊無數踏燬南岡諸賊壘斬僞翰天侯袁得厚及檢點等各僞官城圍立解逆首韋志俊敗竄六安其分竄樟柏嶺之賊商城縣知縣戴鴻經會同舒保擊走之勝保進攻六安約英桂駐軍潁亳屬潁州擒匪尹老藏西竄太和練勇戰敗賊循白馬驛迤西掠鹿邑知縣林大木率練勇堵賊日肆焚掠凱攬淮甯三月初三日英桂馳抵項城初五日移師陳郡趣後隊由新蔡項城疾進賊知有備未敢深入遂於鹿邑之張胖店紅山店毛碑橋口築四圩爲負隅計又亳擒蘇夢月劉大老淵等糾衆三千餘由閭集竄入商邱之馬頭寺冀與鹿邑賊合委員馮景帶勇迎擊商邱兵勇鄉團繼進賊大潰追奔三十餘里斃賊三百餘英桂檄總兵朱連泰知府張學醇知縣周廣德各以所部會蘇克金剿賊於鹿邑並檄署羅山知縣廖慶謀以練勇助之賊知官兵大至十一

日竄回亳州朱連泰等督率兵勇並鄉團馬青雲等會合追擊沿途斃賊數百踏平張胖店諸賊圩餘賊爲老鴉店張完集十字河諸鄉團殲斃無算竄亳州之雙溝迤東朱連泰蘇克金追躡搜捕十六日進駐亳州察知亳州東南觀音堂三丈口圩寨林立民賊不分其剽悍馬賊聚廟集趙旗屯諸處十八日蘇克金朱連泰略地將至廟集賊數百出集迎拒我兵斃賊四十餘賊鳧水渡河逸沿河道斬百餘蘇克金馳赴趙旗屯有騎賊數百向東北狂奔蘇克金疾追二十餘里殺斃百餘二十四日會合朱連泰廖慶謀進攻三丈口賊拒戰不及我軍斬獲無數生擒馬賊王馬田崇等十餘時擒首劉添幅任乾韓狼子劉老淵劉大喜等糾衆數萬分掠徐宿蒙亳懷宿之交縱橫四五百里築圩負固蔓延永夏商鹿捻首趙浩然復掠永城爲之應 朝廷以徐宿告警屢諭英桂派得力將弁赴援英桂尋以朱連泰援徐不果行時擒首劉狗劉尿等竄回亳境之刁山築三圩與藍旗逆首任乾張龔子等合出沒無

之彪裏鋪花溝集雉河諸處相勾結徐宿敗賊已駛入太和一竄元牆
集一竄李興集聲言赴陳州之周家口水寨英桂檄蘇克金馳往鹿邑
堵勦令朱連泰確探亳境賊會各營勦辦賊聞大軍至改竄東南潁州
知府才宇和擊斃甚夥賊匪復竄柘店集歸德擒首張懷中與先已投
誠之傅繼周魏樹德謀約劉大老淵分道舉事委員馮景廉知其狀擒
傅繼周寘之法會同商邱知縣施幹剿平濟陽集樂樓賊巢魏樹德等
殲焉初英桂患喀血至是病增劇疏兩陳得請四月初三日旋省請飭
署撫瑛檄駐省調度瑛柴亦自請暫緩出省於是擒首劉狗陳萬幅由
碭山竄及永夏交界之望家堂十五日竄夏邑之韓道口八吉村鄉團
不能禦賊由太平莊掠桑堍集委員馮景擊退旋回東南龍山石弓山
諸處刈掠二麥入亳境丁堍寺焚近城村莊二十六日夜半賊襲朱連
泰營我軍奮力卻之黎明復大至我軍以大礮斃賊賊始退二十九日

蘇克金督馬步兵勇至亳賊退屯十九里溝五月初一日蘇克金朱連泰四鼓出隊循渦河兩岸齊進將至十九里溝獲賊諜知賊在丁壩集蘇克金馳往令叅領勝德富里布等直前衝殺二十餘里賊勢披靡奔至渦河汊口其地三面皆水我軍步隊就鈔之溺死過半渡北岸者四百餘朱連泰追斬殆盡先是勝保克六安張樂行翼得等敗竄懷遠分陷臨淮欲回竄雒河瑛檄請以德楞額朱連泰兩軍分駐鹿毫得

旨報可五月陷楚黃安麻城之粵逆侵光商邱聯恩廖慶謀等擊敗之竄六安事詳粵匪部亳州擒匪尋竄永城至薛家湖副都統伊興額擊之南走而劉狗餘黨由亳州寺兒集竄宋家店朱連泰乘夜擒殺殆盡亳之東北擒首宋喜元周廣禮裝旗出竄六月初十日委員馮景帶勇馳至黃營遇賊擊斃擒首趙暖等三十餘十五日宋喜元循湖橋犯商邱縣境十六日馮景擊之濟陽集追殺二十餘里斃長髮擒賊七十餘十七日賊竄夏邑之何家橋清凉山山西叅將巴克唐阿等追及斃馬

賊三十餘十八日賊踞嚴家樓拒我兵我軍奮勇追攻賊走東南二
十五日黑旗擒首李廷彥竄亳東之金家莊朱連泰承惠屢卻之七月
十二日擊賊於五馬溝追至新集生擒擒首宋成前夥賊吳迎宋秉二
十六日丁壩寺有賊屯聚朱連泰會同蘇克金馳往擒擊賊渡河敗走
是時張樂行翼得仍踞懷遠廬州復陷於賊

朝廷授鑲黃旗蒙古

都統勝保爲

欽差大臣督辦安徽軍務

命袁甲三督辦三省

剿匪事宜袁甲三方駐軍宿州勝保赴清流關受李兆受之降徵兵於
豫豫皖之交擒首李廷彥朱喜沅孫懷新高九等永突狼奔蹂躪無虛
日張樂行等圖回竄雉河瑛榮所部存營馬隊不滿三百卒僅三千
且乏員統帶於是奏調陝西延榆綏鎮總兵楊昌泗來豫並請釋崇安
自戍所赴營差遣俱得

旨允行八月初一日擒匪黑白兩旗竄永

城之東興集叅將巴克唐阿知府常文遴等與永城知縣劉鴻昌合擊
卻之賊竄宿州石弓山擒首孫葵心大掠蕭碭陷豐縣圍單邑分擾虞

城之石老家署虞城知縣李瀛卻之十二日折回劉家集復連卻之十四日賊竄曹縣豫境蘭考睢商同時震動蘇克金自鹿臺馳剿扼賊北犯賊逼考城爲兵團所遏十八日犯甯陵縣城攻北門爲練勇擊退復急攻東南兩門適鄉團二千餘人馳至知縣龍德照與之內夾擊斃賊千餘賊始循商邱勒馬集遁入皖其同日竄虞城賊萬餘李瀛扼諸王家集賊東竄商邱馬牧濟陽等集馮景璧諸曹家橋擒斬甚多二十日蘇克金要賊於營廓集獲勝是日朱連泰承惠亦與孫葵心劉狗李廷彥楊興泰等戰於孫老家賊敗走薄暮追至小奈集附近村莊突出馬步賊數千鈔我軍協領德隆阿奮勇衝突朱連泰承惠左右前進斃賊數十二十一日五鼓復剿賊於盧家廟承惠德隆阿分南北出戰朱連泰策應後路門逾時士氣益奮承惠長驅陷陣北賊敗向南趨承惠見南路賊方困德隆阿乃自北面大呼奮擊內外夾攻殺傷過當德隆阿已被十餘創力竭戰歿其永宿交界股匪築圩於陳小莊巴克唐阿

九月初六日蘇克金承惠兵至十九里溝遇賊騎三百擊之散十八日進剿丁垵集竄賊擊斃百餘二十一日賊屯寺兒集朱連泰承惠等分軍往賊數百出拒敗輒退匿馬隊追入集賊死拒逾時殲斃百餘我步隊繼至槍炮環集賊中鎗輒仆餘賊東竄追斬首數百生擒李萬倉陳錢等鞫稱賊大股在沙土集官軍進距集數里有步賊六七百與潰竄馬賊三四百伏集後突出鈔襲我軍擊斬過半二十三日偵賊將乘夜劫營乃留步卒嚴戒備選精騎疾馳迎勦至釣魚臺賊大至殪其前鋒賊錯愕回奔進擊又大勝之賊退數十里復夜至盧廟小奈集窺伺西路蘇克金朱連泰承惠等於五馬溝泥臺店丁垵寺諸處擊勦日有斬擒而賊之來者日益衆蓋自勝保由定遠規復盱泗楚師亦自舒桐進駐廬州東南逼賊漸緊而穎壽門戶洞開懷鳳間寇醜愈熾於是賊分三股鑣走而西一爲劉狗孫葵心李大喜等取道蕭碭豐沛將掠曹單

濟寧以達虞永一爲張樂行翼得分竄正陽關壽州水陸並進欲循潁
州直趨陳郡之周家口其一則屯踞毫境牽制官軍淮沙兩河岸賊股
首尾聯絡勢成燎原十月初八日官軍剿賊於邢家岡甘州營外委王
得福以首先衝賊歿於陣初十一等日李樓于莊諸處均有斬獲嗣
知賊大股將至記名道趙書升等自鹿邑以馬步八百馳援亳州十五
日朱連泰承惠禦賊於石家營十六日賊乘夜自沙土集繞廬廟營廓
以偪宋郡蘇克金承惠帶馬隊由宋集鈔出賊前洽慶史亭雲羅仲保
巴揚阿各帶步隊由營廓夾擊馬隊至鄧六莊賊以馬步二萬餘與蘇
克金相持步隊至合力奮擊衝賊爲兩一敗向東南衆約千餘承惠洽
慶等併力殪之一西奔衆約萬餘蘇克金揮隊追殺至十字河是日斃
賊千數百訊知賊將西趨蘇克金夜自高口拔隊馳至柘城之西塔寺
超前截擊十九日與賊戰賊來愈衆退屯高口二十日候補同知馮景
會亭驛縣丞余宗沅候選從九品施汝讓率練勇戰於田集後路爲賊

所鈔勇潰馮景余宗沅施汝讓死之二十四日犯郡城歸德知府孫鳴珂商邱知縣施幹以大砲卻之折竄柘城張家口委員祿旺戰歿二十五日竄太康知縣延豫禦諸清香集二十七日竄周家口通判王可思督勇堵剿以策圩未就賊大隊擁入殺王可思於署焚其屍舉家殉焉賊犯周口北岸爬子街官軍與鄉團逐之袁甲三聞陳令傳振邦袁保恒以馬隊馳援十一月初一日至鹿邑與趙書升議由青泥淺李興集卷甲疾趨截賊歸路於是游擊巴揚阿羅仲保以步隊與蘇克金承惠會師於李興集初三日賊衆萬餘在李興集東南之磚橋渡河袁保恆號召鄉團助聲勢令馬步隊進至橋口賊輜重前行以悍賊斷後我軍一麾過橋三路衝壓賊抵死不少卻我馬步各隊鎗箭刀矛縱橫攢刺賊棄重狂奔傳振邦禁軍士毋取財物督馬隊疾追適趙書升所派滿營馬隊亦至擒殺四十餘里白茨河至淝河屍橫於道邱聯恩亦以是日由槐店追賊至高王廟要擊獲勝各路擒斬賊千數百巡撫恒福

以捷聞英桂病痊入覲移撫山西以恒福代之奏入總兵傅振邦以提督遇缺題奏編修袁保恒

賞伊勒圖巴圖魯勇號恒福以莅任伊

始疏請暫駐省城以歸陳防勦事宜責邱聯恩請裁山西大同鎮防兵一千五百名移置歸德鎮標奏卹馮景施汝讓余宗沅王可思榮連祿旺申六典張載揚左明文馮扶清等俱如制劾趙書升庫克吉泰富陞馬春華春海獎趙鵬飛文光政令一新矣賊自李興集敗後擒首劉天祥糾衆數千由豐沛竄山東城武曹單恒福檄張曜巴揚阿赴考城防勦益以伊里縐阿之師檄蘇克金承惠赴考城堵擊賊知西路有備分股東竄一趨金鄉嘉祥一循黃河故道薄虞城十一月十六日虞城知縣李瀛敗賊於李興集其別股攻縣城回軍郛之賊回竄廬賢集謀以十八日攻縣城蘇克金承惠廉得賊情是日丑刻帶隊迎擊斬首三百餘賊奪路趨夏邑蘇克金派隊截之于桃樞集賊且戰且走及大陽集復回拒守備王永慶統練勇暨虞城鄉團適至三面攻之斃賊八百餘

賊由礪竄回院是役也蘇克金功最前以李興集之戰不親行被劾至是奏復其官時朱連泰勦賊於十九里溝賊乘虛襲營朱連泰擊走之又於馬老莊寺兒集五馬溝諸處擊賊屢勝十二月初五日復剿賊於十九里溝亳州練勇會合力戰追斬無算叅將巴揚阿駐永城擊賊小旺集賊將犯縣城叅將巴克唐阿與知府常文進縣劉鴻昌督軍截勦方朝霧蔽野賊不虞官軍至驚愕奔潰擒張光得等擒首趙浩然不知前股敗復自李家口圍永城亦爲官兵擊退賊游駛鹿邑商邱渡沙河北岸焚掠散旗土匪狡焉思逞矣張樂行翼得仍踞懷遠糾孫葵心掠江口集三河尖聲言犯光固恆福令邱聯恩派兵扼槐店衛沈項檄知府張曜赴光州與鄭元善會勦請增調吉林黑龍江馬隊三路大舉三路大舉者袁甲三通籌全局請飭東豫合兵入皖擣賊圩朝廷諭恆福集精兵令邱聯恩將之以前諭崇恩亦如之均會於永亳豫軍由亳而東東軍由永而南傅振邦由宿州而西商議未果行而賊已

於來春分道四出矣咸豐九年正月恆福旣以軍事責成邱聯恩復親赴鹿邑與商防勦機宜朱連泰亦自亳州來會恆福閱視諸營還始建堅壁清野議論歸陳南汝光各屬築堡禦賊分遣候補知府傅壽彤蒞賀蓀張曜何懷珍候補直隸州駱光裕勸諭興修以候補道周煦徵董其成時穎霍寇氛日熾捻首趙浩然掠永城陳家集叅將巴克唐阿自趙家窩追擊至澮河殲溺甚衆亳州余集丁壩之賊朱連泰屢次進勦殺傷畧相當二十一日邱聯恩馳至亳州令直隸州張鍾翰勇隊會同吉林騎兵由渦河南岸進擊牽賊勢翌日邱聯恩朱連泰親督馬步大兵由渦河北岸進距余集三里許賊列陣迎距我軍先以馬隊衝圍步兵繼進鎗砲斃賊甚多追至泥臺店與援賊遇邱聯恩揮左右馬步各隊南北夾擊殲悍賊二三百追及李家橋復斬首百餘級張鍾翰渦南之兵亦敗賊於十九里溝賊東逸邱聯恩追賊墜馬傷左脛暫回鹿邑其沙河北岸賊渡河焚掠知府張曜叅將程金陞等禦諸黃岡寺調朱家

圩民團與官兵夾擊走之擒首孫葵心暨旗於太和王市集賊二三萬
聲言分股出陳郡至周口會齊掠禹州邱聯恩令都司柏英率所部並
鹿邑分撥兵勇禦諸沈邱二月初十日賊由盧廟竄商邱之烏橋集游
擊奎英都司伊克唐阿擊賊七垆堆賊且戰且走十一日分三股一踞
商寧交界之觀音堂一西赴睢州一由溝香集犯甯陵縣城夜攻城急
知縣龍德照戰敗於東關身受重傷入城巷戰城陷龍德照死之十二
日歸德知府孫鳴珂候補知府傅壽彤叅將金齡等帶兵馳至賊出城
迎拒官兵速發劈山大砲斃賊甚多棄城走追至華豐堡練總武舉史
演龍率練勇出擊無不一當百史演龍斫倒賊旂官軍先後夾攻斬首
三百餘級賊東南奔其掠睢州賊十三日入余家屯知州王聯陞帶勇
斃賊四十餘勇日甸鈞以深入歿於陣十四日孫葵心劉添幅大股自
會亭驛西竄十六日犯歸德焚東西關孫鳴珂等登陴守禦發千斤大
砲轟斃紅衣賊目賊少卻開城出擊賊退屯水池鋪十七日圍睢州王

聯陞與伊里縹阿俱失利王聯陞調集南路鄉團翌日再戰賊圍之數
重夷傷略盡困不得出賊陷州城吏目王庭蘭戰死於獄前州判史存
禮被執死之其姪史博良史博學團勇楊可智楊青嶺均及於難史存
禮與王庭蘭被害尤酷後俱議卹有加賊踞睢州分股掠杞縣邱聯恩
督師赴援遇賊於張公堡揮兵擊之斃二百餘擒潘狗等十九日抵睢
州城賊見之輒走邱聯恩與蘇克金飛騎蹴踏王聯陞乘勢出重圍復
州城邱聯恩追至太康界上斃賊七八百擒王林等賊以是日午刻竄
至太康之楊廟知縣廷豫堵截賊竄沙窩呂潭通許扶溝西華臨潁諸
邑均有賊馬游駛初恆福以寧陵之陷劾邱聯恩連勦遲延奪其職於
是邱聯恩戴罪勦賊戰愈奮二十一日偵知賊攻西華次日馳至戰於
西夏亭賊紅黑兩旗來犯衆各萬人我軍兩路迎擊決盪一時之久殺
賊十餘西華城圍解賊分股竄鄆城之五溝營及舞陽之北舞渡邱聯
恩以五溝營之賊屬叅將穆特布而親督兵勇三千向舞陽窮追二十

五日至北舞渡聯恩分馬步爲三哨以擊賊賊衆數倍我軍顧不肯前但縱騎賊四面圍已又鈔我後官軍戰良久殺賊過當士卒死傷如積聯恩瞋目一呼所向輒披靡稍稍拔出重圍又遇伏日薄暮風霾四合聯恩身被重創賊來益衆乃與山西叅將福瑞均遇害部將亡者二十餘員敗軍退至許州人心震動時恆福升直隸總督未去汴乃與巡撫瑛榮計以游擊承惠護南陽鎮篆領其軍以副管雙全代蘇克金領馬隊合詞奏聞請復邸聯恩總兵官照提督陣亡例從優議卹山西太原營叅將福瑞並議卹如制聯恩故將家子束髮卽在行間戰必先豫勦匪有年羣賊憚之如虎馭兵嚴而有律士民愛戴倚若長城一旦發憤戰歿論者惜之後瑛榮復爲奏請祠祀酬衆望也先是徐州鎮總兵傅振邦督辦三省軍務副都統伊興額副之偵知賊入豫疆令伊興額自宿州赴援行次許州奉 命統帶河南官兵督辦防勦二十四日抵商水賊自北舞渡回竄伊興額擊之出境狀稱殺賊五千窮追三晝

夜由沈項直抵太和殲除步賊殆盡

朝廷既錄其功尋爲勝保劾

其欺飾革去頭品頂戴派黑龍江副都統關保接辦防勦事三月初一日賊由西華回犯陳郡知府安奎與候補道周煦徵叅將穆特布淮寧知縣李澍督兵勇守禦大礮轟斃賊數百適襄城都司柏英馳至合擊賊敗走迨至戴集外委朱煥甲陣亡賊循鹿邑回亳其北擾杞縣賊竄考城署河北鎮總兵伊里綳阿等暨地方文武鄉團沿途扼擊賊不敢戰由歸德東竄既回巢仍豎旗圖西犯三月十四日馬步賊數百游騷亳城外朱連泰卻之四月初六日竄商邱之營廂集石榴岡站歸德府文武會同在防將士馳往蔡道口夜襲韓信店賊營賊衆驚潰東南逸擒首李廷彥築圩孫老莊逼商鹿承惠與朱連泰計乘其未就而攻之初九日合兵疾進賊大驚潰撻殺老擒七八十初十日賊分五色旗由永城掠夏邑之胡橋劉隄圈諸處另股由雒河北竄碭山之黃家口承惠雙全兵至賊已分途遁時當麥熟匪衆四出打糧計共劉狗盤踞大

寺集欲乘夜渡石家營圍攻兩河口民寨五月初四日承惠夜薄石家營賊已破兩河口民寨據河爲險深溝高壘承惠併力圍攻守備宋慶首先鳧水渡河兵勇從之守備苗玉榮躍登寨牆承惠伊與額驅將士從之畢登殺斃守牆悍賊其越牆逃者復爲騎卒擒斬寨圩平燬餘匪竄楊橋爲都司楊春林擊斃擒首劉狗負傷遁歸捷聞擢叅將承惠爲副將守備宋慶爲游擊守備苗玉榮加勇號其餘員弁升賞有差時伊與額已稱病去關保抵鹿邑六月初二日朱連泰承惠擊賊於王老家丁壩寺追至渦河南岸山東濟東道黃良楷擊賊於永城徐家樓初十日賊在亳州湯王墓諸處沿河焚掠是夜朱連泰乘賊上岸奪其船悉以所獲犒軍士二十二日賊窺東省運糧將至黑旂捻衆由永城東南向北竄冀阻劫黃良楷擊諸早道口官兵前後鈔圍賊驚竄追至洪家岡永城營守備宋大有伏兵截殺餘衆南奔會諜言捻匪糾粵逆陷定遠皖撫移駐壽州廬郡定遠間粵捻諸逆合勢東路梗塞張樂行翼得

密遣其黨千餘薙髮冒作鄉勇販散布潁州諸處爲內應南路捻首
孫葵心尹滔各股裝旗欲西竄瑛榮以粵捻交乘兵單賊衆與東撫崇
安河督黃贊湯合詞奏言逆捻屢經摧敗死灰復然咸豐六年閏英桂
袁甲三自歸德轉戰至亳州迤東破雉河老巢張翼兩逆僅以數百人
逃復糾東南大股捲土重來七年英桂勝保擊賊至潁郡迤南連復霍
邱正陽關賊以數千人困踞六安未幾粵逆圍攻固始官軍往援賊乘
虛回竄又肆鴟張近日捻粵合而爲一賊勢十倍曩日師老財匱年復
一年若不預籌蕩平之策其患何堪設想科爾沁親王僧格林沁勦除
粵逆久著聲威現在天津海防馬隊萬餘悉稱勁旅一俟天津撤防移
師南下則功成可操左券

上謂津防未可議撤傳振邦關保所部

足資攻擊不得希冀增兵致稽時日七月十一日夜賊頭隊千餘人突
至亳州南關樹雲梯攻城朱連泰先已會同知州博銘布置城守勇目
羅鳳岐擊退爬城賊奪其攻具天明朱連泰整隊出城令守備苗玉榮

都司胡永忠前後屢擊賊敗退自在園我軍追至河賊亡命鳧水適北岸賊爲承惠戰敗追至河邊遂與朱連泰南北夾擊斃匪無算十四日夜賊復糾衆來犯承惠揮兵迎截賊由淺水渡河竄承惠鈔出賊前王鳳祥自洪河口馳至會戰遂大敗之二十二日關保進屯亳州規畫進勦偵知渦北有宋劉張三姓賊圩而宋家圩爲巨捻宋喜元宋宗元巢穴實爲諸圩首附近之泥臺店于集宋集五馬溝居民遷徙各莊皆爲賊踞二十六日派王鳳祥承惠先攻宋圩分遣馬隊扼守渦河牽制泥臺店各莊踞匪二十七日我軍火宋圩斃匪百餘餘衆棄圩竄其劉張二圩賊聞風散泥臺店各莊亦焚燬二十八日賊至田家溝渦河南岸亦有馬賊西駛關保令王鳳祥承惠與朱連泰合擊田家溝之賊令游擊伊興阿叅將桂春截渦河南岸之賊擒斬相將黃良楷駐永城賊掠李家林諸處良楷會同文武兵團擊賊於鄆陽柘樹雙橋諸集平毀胡家屯賊巢八月初四日劉狗因關保駐軍亳州自趙家屯聚藍黑旗賊

四五千間道北趨分擾鹿邑及永城邊境百善站諸處又與孫心檢一股由宿西永東分途北犯關保乃留朱連泰守亳州而自回鹿邑檄承惠帶領烏勒喜春等馬隊赴永會勦承惠等至永城賊已散而丁香鋪之賊劉小方裝旗欲西竄距亳州二十餘里關保乃令承惠由永城西南馬頭寺界溝赴丁香鋪迎勦以營總常陞爲之策應十三日敗諸界溝又追至丁香鋪二里許覆其衆賊踰橋逸承惠與常陞合追而丁香鋪伏賊出應敗賊與俱東我軍因溝水縱橫徑路叢雜未敢深入八月二十一九月初二等日黃良楷屢敗賊於甘茶廟閭家橋車家集諸處其自商邱迤南至亳州檢蹤出沒關保號召鄉團由棗子集隨勦隨進王鳳祥擊散馬老家之賊旋會朱連泰夾攻丁垆寺關保繼至揮兵拚殺斃賊三四百以渦南匪蹤略盡關保請加總兵朱連泰頭品頂戴總兵王鳳祥勇號委叅領伊興阿以協領升用疏入報可是時皖北藍黑白各旗逆捻在保山裝旗由碭山太平集分掠虞夏初八日虞城知縣

李瀛千總徐汝紳擊退護城隄外賊夏邑之賊由臨集韓道口至西北之牛王垆諸處焚掠初九日逼縣城知縣陳上達總勇士會關外民團繞賊後衝殺城上然大礮擡槍賊潰向東南初十日黃良楷博崇武等敗賊於李家窪十五日承惠等又敗諸盧家廟追至小奈集賊雖屢敗猶不下二三萬十七日夜在商邱之黃塚營廓等集四出焚掠分股由韓信店犯商邱由邱集繞越柘城西竄關保令承惠赴歸德與慶文會勦十九日至杜集毀賊營數處追至營廓遇賊大股承惠立馬指揮三路擒殺斃賊甚衆我軍亦有傷亡承惠請濟師關保令王鳳祥以步隊二千援之二十二日賊至柘城勒馬集直犯睢境二十四日承惠兵至寧陵知賊偪州城連夜援睢州二十五日至東關賊於城外列十三隊馬賊四千步賊萬餘承惠首先衝擊追賊里餘近村伏賊齊起又有馬賊鈔我後衆寡不敵遂大敗二十七八兩日賊犯杞縣知縣王蓮塘與陝西叅將岳汝忠禦之賊退屯榆廂舖龍臺岡分掠蘭儀煙垆集蘭儀

故無城知縣高長齡扼河口外委范奉標訓導李鍾山戰歿省垣戒嚴
瑛榮令前河北鎮崇安出省剿賊又慮賊長驅而東請募勇徵兵並暫
留黑龍江西丹馬隊之赴楚者二十九日崇安躡賊賊由曲興集退竄
南路及考城縣境三十日載所掠輜重行至白茅集舊縣集練總蔡文
茂約曹縣團練截回輜重牲畜甚夥餘賊東奔十月初五日傅振邦派
副將博崇武叅將高玉振等至宋郡會慶文敗賊於王橋追至業廟河
其南竄賊圍攻尉氏通許縣城折入洧川長葛禹州諸境十月初二日
掠許州玉皇廟各屬城守嚴賊遂由襄城竄北舞渡其時踵而至者爲
姜太林侯四維李大喜等衆二三萬由太和沈邱溯沙河而上及淮寧
欲於周口偷渡署周口通判嚴圻商水知縣汪斌才集團截殺河水漲
賊無船不能渡由賈魯河西堵河東向西北逸先是關保自鹿邑追賊
屢阻雨不得進及行抵陳留奏劾歸德鎮總兵慶文進勦器延二礮職留
任 上謂關保尾追落後任賊飽掠屢下 詔督責十月初八日

關保抵許州繁城鎮偵知姜太林沿圍城洪河西竄令王鳳祥承惠等堵勦初十日戰於洪河北岸十一日各擒擁至臨潁北關關保與崇安親督戰適瑛榮所遣知府李徵松亦至我軍分路圍鈔陣擒孫葵心姪孫套斬以徇時賊後隊屯徐莊鋪承惠拚其不整殺斃無數關保夜選健馬四百騎士銜枚疾走大軍策應近土橋集賊營鼓譟直前賊倉皇潰自相蹂踐死者甚衆詰旦賊來援我軍三路擊之迨至軒莊斬賊七八百賊分竄鄆陵扶溝太康各鄉鎮關保疾驅杜其北犯十五日戰王隆集太康知縣祝堽助勦賊遇伏敗狂奔回皖孫葵心一股已悉出境其姜太林侯四維等股阻隔沙河欲乘虛竄鹿邑關保念糧饟重地立回軍二十二日次洪山廟與賊遇王鳳祥等鏖賊甚衆追至韓家凹二十三日賊二萬餘衝我軍鏖戰至日中賊出輕騎三四千左右鈔我委叅將春亮守備傅致盈陷陣死我軍血戰良久賊始退方鏖戰際賊分股窺城知縣孫嘉臻力禦之博崇武高玉振等亦自陳郡躡追二十四

日敗諸棗子集賊兩路回巢歸德鎮總兵慶文以功復職關保瑛榮請
將殺賊立功及團練出力員弁擇尤給獎並查明先後死事諸人若在
杞縣陣亡之嵩縣營守備呂長春已革考城營守備梁樹業陝西留壩
營千總張全得在甯陵陣亡之署陝西甯羌營把總雲騎尉馮永吉在
襄城縣大營莊陣亡之儘先把總源潭汛外委張殿英汝甯營外委王
昇在山東金鄉縣遇害之前延津縣典史蕭葆仁在舞陽縣北舞渡陣
亡之撫標右營守備本祥左營把總劉其東河北鎮毫左營千總張景
周開封營把總周承清衛輝營把總朱玉魁南陽鎮標右營外委丁建
成署陝西固原提標驢茶營都司史倫錦署固原提標左營守備白思
舉署中營千總馬得喜署利橋營千總尹榮署隆德營把總張克勤署
永安堡營經制外委登雲署紅德營外委徐俊智署甘肅甯夏鎮標洪
廣營游擊王萬年甯夏鎮標平羅營千總高永富寧夏鎮標後營把總
徐枝前營經制外委馬成得興武營經制外委王悅甘肅提標左營經

制外委王兆熊直隸河屯協千總劉漢章在亳州界溝陣亡之山西湯
方口汛把總王躍龍河南撫標把總黃殿甲河北鎮右營把總程志旺
南陽鎮外委王之漢甘肅署寧州汛把總武舉楊生花在睢州北關外
陣亡之岫巖正紅旗滿洲防禦永桂齊齊哈爾城正黃旗佐領那蘇巴
圖魯布特哈正紅旗驍騎校富里布黑龍江城鑲白旗驍騎校德克吉
布布特哈鑲黃旗驍騎校安順吉林城滿洲正紅旗驍騎校八十盛京
正黃旗驍騎校劉得正黑龍江城鑲白旗驍騎校賽綳阿正紅旗驍騎
校和綳額正黃旗驍騎校富隆阿鑲白旗驍騎校臥倫春齊齊哈爾城
鑲白旗驍騎校富勒德恩布墨爾根城鑲藍旗驍騎校舒凌阿陝西鐵
爐川營守備王喜魁南陽鎮標外委任萬章山東沂州營經制外委王
守信河北鎮衛輝營外委張合在臨潁縣陣亡之山東撫標右營經制
外委潘清在太康縣王隆集陣亡之山東兗州鎮右營經制外委王文
標在鹿邑縣韓家窪陣亡之察哈爾鑲紅旗叅領阿玉爾札那盛京正

黃旗防禦王自楊吉林鑲藍旗驍騎校魁順河南撫標守備馬鳳超署陝西陝安鎮標中營把總成鵬程山西大同鎮左營外委趙維垣南陽鎮標千總南召汛把總劉愔等俱疏請議卹如制是歲粵逆屢犯六安窺光固前光州牧鄭元善已簡授陝西漢中府升湖南長寶道恆福瑛榮以其素得民奏請暫留光州與張曜辦團練及是楚師攻皖北粵逆陳玉成悉銳赴援光固緊要元善張曜乞師援勦瑛榮關保奏調馬隊不得請諭李續宜繞由光固進兵截其竄豫之路由是楚師克復懷遠規取臨淮擒匪東竄無路仍合股由宿永而西十一日擒首李加英劉添祥分竄蕭碭銅山並攻陷濉溪口大營十二月初三日犯夏邑知縣陳上達禦之分股掠虞城知縣李瀛扼之初五日回攻夏邑陳上達疊戰卻之賊遁胡橋夏邑圍遂解先是瑛榮以歸陳接壤蒙亳爲擒匪西竄所必經築堡團練須擇在籍大員主持首以袁甲三爲請旣袁甲三署漕督乃以前順天府尹宗元醇代其事至是秋擒匪屢犯豫

疆蹂躪日甚乃謂關保臨陣勇敢而臨機決策實非所長於是創畫地分防聯兵合剿之議請分皖豫徐宿爲三路選威望大員畀以將帥之任於勝保袁甲三傅振邦三人中派一人來豫而以關保爲之副是以逾歲有特簡勝保來豫督辦之舉而宗元醇病歿旋授宗人府丞乇昶熙爲團練大臣云

咸豐十年正月

上以勝保日久無功奪

欽差大臣仍令來豫

督師以副都統關保爲之副毫東捻首王懷義劉天福孫葵心等分道圖竄虞夏一由單縣迤北渡河一直趨豫西初八九日賊騎逼虞城知縣李瀛禦之礮斃馬步賊二百餘城圍解賊掠夏邑之仁風李亢等集知縣陳上達選壯丁千二百持所獲賊旗雜賊中上達開礮擊之賊陣亂我軍內外衝擊斃賊四百餘十二日騎賊夜火鹿邑南關關保擊退之追至薛家廟十七日騎賊由馬鋪竄柘城李家寨練百韓文炳郭大乾禦諸張龐莊大乾馳入賊隊殺悍賊三十餘適關保所派總兵承惠副將王鳳祥追至賊狂奔虛將犯省垣時巡撫瑛榮因事左遷慶廉受代甫抵任聞報布置城守三月十七日勝保由皖赴汴至距城二十五里之白酒店遇賊騎麾副叅領成祿將百騎卻之其已至八里窪者叅將黃得魁守備李殿甲合兵逐之進至陳留會承惠大隊縱橫夾擊

賊奔蘭儀由考城折而西旁趨禹密聲言將犯河洛掠關中三十日黃
得魁追賊於禹境之白沙敗諸菱角寨賊走小郭日暮風起咫尺不見
人方具食千總任治國掄入殺斃千餘乘勝追至許州北關再戰黃得
魁身受矛傷裹創戰益力遂大勝之賊乃折而東閏三月初六日承惠
等遮賊於柘城東北乘大霧鈔擊斃賊四五百分股攻縣城承惠緊躡
敗之復西北聚於順河集初七日承惠整隊向賊賊列馬步七仗抗我
師承惠令步隊分三哨馬隊張兩翼以應之短兵相接自朝至晡殲斃
悍逆千數百賊來愈盛不下數萬衝我軍中路馬賊從兩旁鈔襲承惠
與都司伊齋斯徵俱被重傷兵勇亦死傷相繼適柘城縣知縣周廣德
帶隊接應練總韓士明由賊之西北來助戰賊恐斷歸路遂由胡襄城
毛堽堆回竄城塚店諸處我援師游擊王崐崙都司李永祿要擊敗之
十四日賊後隊由太朱康口集回竄關保令川北鎮總兵王鳳祥率兵
禦於馬埠我軍列爲三隊中書張志誠游擊李忠華都司王仕林以東

楚勇先出戰旣勝各隊繼之衝壓十餘里援賊大至五色旗蔽地來我軍奮益前賊來益衆四面圍我軍王鳳祥與荆子關副將王慶長都司王仕林俱戰死賊長驅而東狀聞王鳳祥等均優卹如制四月勝保至宋郡派兵分屯高辛集宋集包公廟十字河各要隘調歸德各屬團丁協助官軍築營守禦復會關保於鹿邑遣諸軍攻克李河溜暨黃莊賊圩五月勝保奉旨以三品京堂回京命慶廉督辦河南防剿六月初九日慶廉自汴赴宋時龍山起蛟平地水深丈餘賊巢均淹沒苗沛霖又連破賊圩賊勢益蹙窺永城空虛屢至近郊掠食十二日游擊王居廣遇賊於鄆陽集獲勝追至碭山是日駐守宋集之都司王天保規取盧廟集賊寨擊退擒首劉狗等密遣商邱民團入盧廟集爲內應馳師夜襲取之十三日叅將明慧都司陳廣譽守備宋大有等悉抵永城馬頭寺劉狗聞大兵踵至奔東北至甘雨集爲練總苗文彬扼截轉戰及劉家河越潘路口追躡三十里賊竄蕭縣之李家石林李大屯諸處

是時盧廟迤東之劉營三里灣黃灣復有擒首宋喜元李珍等伐樹
爲營圖西向十七日守偕莊義升外委莊義慶挈營廓集練總李福祿
高玉等往勦至賈樓賊分隊來拒兵練爭先逆戰追擊至李河溜迤東
二十三日王居廣同王天保王允升三路薄賊巢王天保由東路王居
廣由西路立將劉營三里灣樹營焚燬黃灣賊營見兩處火起王允升
兵亦至遂奔竄官兵仍回屯宋集盧廟慶廉以諸軍雖屢勝究未能掃
穴擒渠於是統籌全局備言豫省馬步兵勇合計不過萬數千人均非
訓練之師歸陳練丁守望則有餘迎敵則不足臣與關保兩營吉林黑
龍江官兵能進伐者不過三百餘名不足以資衝擊而龔得孫葵心王
懷義姜太林劉狗各擒不下數十萬宿亳蒙懷廬壽沿豫邊境所在皆
賊我軍分路扼防此勦彼竄請飭袁甲三傅振邦移兵規取賊巢並以
苗沛霖自破程暴民賊圩聲勢甚壯請飭移屯蕭永邊境與駐守商永
各軍互援應扼西北以勦東南庶可制賊死命奏入

上從其請慶

廉又以大舉進勦必先清肘腋廬廟東之黃園有捻首李大廷李庫屯聚阻我師行七月初六日慶廉親至高辛集令王居廣等規復圍師進騎賊突出我軍馬隊直前斃賊數十追至濠邊濠水寬濶賊據以爲守王天保見圩西賊少率勇練鳧渡越濠手斬悍逆數人而入都司于允中從九品王汝舟繼之斬首三百餘級賊潰而東平其壘慶廉以捷聞請賞王天保花翎王允中游擊先用餘優敘得

旨允行是時蒙亳

大水田廬浸沒盜糧乏絕捻首雷彥劉狗等窺豫境秋稼將登傾巢出掠七月初五日分撲薛廟大營關保令營總依興阿叅將馬春華游擊羅仲保往援甫行十餘里賊已擁至三路包鈔我軍馬隊以衆寡不敵退步隊力戰有頃賊來愈衆繞犯鹿邑東關我軍回顧城防營總依興阿馬蹶死焉游擊羅仲保在五里廟接戰身被四十餘創與千總羅青雲候選從九品哈明璧俱戰歿兵弁死傷相繼賊亦創甚且慮援軍至退據萬集劉集趙村民寨初八日承惠督馬步隊進勦賊率衆迎拒而

潛自他道襲我軍承惠稔賊詭計令步隊分路迎擊勢漸卻適趙連標馬春華等來策應賊乃潰追至魏橋是日有另股賊自李河溜犯宋集營爲何天保所卻宋喜元犯棗子集亦爲練總王益德所敗狀聞依與阿照副都統羅仲保照副將羅青雲哈明璧各照官階均予優卹其後股援賊續至圍攻邱集民圩前製雲梯圖鹿邑游騎及柘太於是承惠等分兵三路令叅將馬春華記名道趙連標帶兵勇千餘由趙村迤南進作疑兵知府張曜王榮烈帶馬隊游擊苗玉榮千總馬天祥帶步隊爲前敵承惠同候補知州陳學仁帶各起勇隊爲接應關保督後路由北面進攻初十日黎明師傳萬集寨賊出馬步數千迎拒張曜督隊衝擊賊登寨牆守承惠王榮烈陳學仁親督各軍冒矢石奮呼躍而登賊奪路狂奔官兵縱橫掄殺屍橫遍野時馬春華趙連標方進攻趙村賊猝不及防亦奔逸其屯踞劉集並圍攻邱集之賊聞萬集趙村先後攻克紛然潰竄渦河兩岸越日犯柘城邊境及太康之柳河踞張莊圍

攻安平民寨承惠張曜王榮烈等會叅將百順等軍鼓行而前賊在渴
河北岸焚掠阻橋口拒我軍張曜策馬指揮隔河施槍礮疾呼衝擊爭
橋口斃賊數百賊循河西奔我軍追至李元寨解其圍十三日五鼓張
曜同蘇謙帶馬隊由李元寨迎勦分步隊於丁口橋爲三伏黎明王榮
烈率劉鳴歧馮得勝由中路進承惠率百順苗玉榮陳學仁由左右進
賊奔渴河南岸占橋口張曜王榮烈直前衝壓伏兵起賊腹背受敵東
南潰官兵過河道近安平寨賊大股正圍攻見我兵乃轉鬥我軍屢勝
勇氣方銳斃賊七八百餘衆負創遁寨圍解追殺十餘里所占張莊同
時克復賊於是折而東糾後來捻股圍鹿邑縣城圖洩忿十四日承惠
追兵至與關保所派之叅將馬春華等合兵堵擊王榮烈躍馬爭先各
路兵勇譟而從之軍聲雷動承惠揮兵左右盪決追殺二十餘里賊屍
枕藉翌日軍臺城論功加承惠提督銜趙連標鹽運使銜百順苗玉榮
副將銜王榮烈勇號記名簡放知府擢張曜以道員用蘇謙以叅領先

用附劾游擊王居廣前在宋集堵勦不力革職留營令自效先是傅振
邦攻蒙西賊圩連破小澗西陽十餘處賊窮欲他竄會渦淝盛漲賊廬
被淹遂糾衆十餘萬掠食澮南襲民圩屢犯官軍及承惠等追賊出境
賊被創暫歸尋復傾巢四出二十四日劉狗雷彥宋喜元蘇立楞眼張
朝皆楊興太等由界溝黃塚分路出游騎遍野火光亘數十里承惠令
敖天印夜襲賊營賊竄田集順河集諸處二十五日承惠王榮烈田玉
梅等自包公廟由渦河兩岸躡賊所向至田集以西擊敗賊騎張曜亦
帶兵至且戰且進追至烏檣集斃賊數百賊東奔我軍暫止高辛集後
起賊衆忽自東南來陸續渡河承惠領馬步衝擊賊勢稍卻突有另股
悍捻鈔我軍馬隊佐領奇克唐阿以衆寡不敵先退承惠步隊亦退張
曜見事急躍馬入賊陣大呼馳突賊衆披靡始敗走西南賊之前股已
由閭集李口趨宋郡河北鎮總兵崇安知州陳學仁帶勇馳勦賊由馬
牧集趨虞城知縣溫逢春襲之於胡家橋賊分撲狼橋口宋集大營爲

三令張曜田玉梅帶領馬天祥等步勇益以蘇謙馬隊爲頭起王榮烈帶領南陽羅山及李祿興等勇隊爲二起承惠率領六十七敖天印等兵勇爲三起均於二十六七等日繞出賊前截擊二十八日賊循胡襄城大仵集犯柘城知縣謝國輔帶團禦之越日圍太康老塚寨知縣任愷出援集適官兵至承惠張曜田玉梅等揮令各隊直前任愷指揮鄉團從後路鈔擊賊大潰敗寨圍立解八月初一二等日賊由鄧城窺陳郡見守禦固遂薄周口初三日我軍出其前扼之賊氣沮由李家堡走商水上蔡犯汝陽知縣廖慶謀與承惠張曜擊賊於廟灣賊敗走辛店馬鄉初四日攻汝陽之官莊毀寨牆將闌入練丁并力死拒承惠等援至圍立解其分竄上蔡射橋賀店之賊折回蔡溝爲上蔡知縣金寶符斬殪無算賊奔汝陽之北水屯是時賊衆不下三四萬而承惠諸軍僅八千餘慶廉檄游擊孫之友赴援又爲亳東捻首雷彥李庫所綴不果

行而承惠之軍益孤且奔命已逾月矣先是高辛集之戰慶廉以官兵堵勦不力劾佐領奇克唐阿等奪承惠提督銜以示貶承惠已愧憤誓滅賊以雪恥至是慶廉復嚴檄承惠等鈔賊前賊蹤甚熾承惠乃與蘇謙張曜王榮烈田玉梅馬春華王居廣百順苗玉榮等馬步各隊三路迎勦初六日抵汝陽城南三十五里之野豬岡賊屢爲官軍所扼亦志甚思血戰是日逆衆蔽地來望無際我軍連壓不動賊噤聲死鬥自日中至暮我軍輒不利復有悍逆自大石橋襲我後路馬步包鈔截我軍爲二承惠困重圍身被數槍猶奮呼衝殺手刃執旗賊目數人軍潰力竭遂與王榮烈田玉梅王居廣百順苗玉榮死之委防禦和陞額叅領德色勒布委營總賽吉爾胡府經歷閻漢璞縣丞熊錫彤都司何天保守備海進忠楊遇文領催喀勒春布委防禦伊蘭從九品周其偉把總辛占元俱歿於陣承惠固將材王榮烈田玉梅皆勇敢善戰爲賊所畏憚其死也全軍爲之奪氣田玉梅者湖南人機警有膽畧嘗以布衣從

江南向榮軍習賊言語號令聞入江寧城約內應請於向榮潛即襲城謀泄內應者爲賊磔死王梅乘賊亂僞爲捕逐奸細者竟脫去嗚呼亦可謂智勇矣而以是役死惜哉至是慶廉請還承惠提督銜照提督陣亡例從優議卹其王榮烈田玉梅等均各以其官優卹並請於汝寧及官莊建祠以祀祀死事各員俱如制賊由正陽分竄羅息張曜與鄭元善分路扼剿賊趨光州鄭元善張曜馬春華追至固始斬馘七八百由霍邱張家集回巢

朝廷方命順天府丞毛昶熙爲團練大臣頒

給章程來豫先是慶廉與勝保會辦團練抽調歸陳練丁助防要隘以輔兵力之不逮並劾地方官舉行不力者及毛昶熙於七月抵宋郡以抽丁不便於民奏徹民勇而用鄉團由是歸陳抽丁之事遂寢是時海上事亟京師戒嚴


上以八月初八日舉行秋獮駐蹕熱河召慶廉


勤王命毛昶熙接辦剿匪事旋命慶廉迅派副將黃得魁帶勇赴京師歸勝保調遣慶廉奏以其子候選道恩麟統師先發至正定取進止慶


廉親督後軍赴彰德會款局成京師解嚴擒匪方擾濟甯勢將蔓及豫
疆諭慶廉領援兵回豫自九月以來擒匪張樂行糾合粵逆踞正陽關
圍壽州攻鳳陽勢益熾臺擒大股竄清淮未遂折而北掠山東郡縣鄆
城鄉團遮擊於歸家莊丁官屯賊渡河而西掠豫邊慶廉遣記名道趙
書升統兵扼蘭考蘭儀監生栗麟善王璽考城游擊蔡若珍團總蔡文
茂越境追殺賊由商邱丁道口回巢時臺擒股衆此出彼歸往來紛擾
劉狗劉尿等聲言往西路打糧另有紅黑兩旗由臺境張五集雙埠口
竄小廠劉寨十月初五日在鹿邑東南游弋關保方以病假居宋郡乃
令趙連標馬春華會合毛昶熙所派勇練整隊迎擊賊以萬人掠汲水
集與我軍相持復繞道而西初六日賊攻鹿邑東南民寨趙連標馬春
華以火炮擊走之二十日焚掠營廓東南村舍守備莊義升擊走之二
十一日賊至安家溜往來游駛旋糾河東股賊犯狼橋口大營守備李
玉龍千總陳文來兩路擊走之十一月初三日紅黑二旗擒首孫從翟

步漢丁海等竄永城程家樓焚掠知縣陳灝以鄉團擊走之時亳宋一帶匪蹤出沒靡常其由他道出者則有劉天祥趙浩然竄宿北魏希元趙克元由臨渙北竄羅麻子等由劉奶奶廟竄西北孫葵心姜玉太侯樹維田獻張敏行由板橋集竄入鳳陽屬境蘇立楞眼劉大老淵劉二老淵李加英等由閭家橋胡家莊竄確山之東山套其南路捻衆復逾金鄉犯濟寧奔城武掠鉅野之獨山江皖東豫之交烽煙滿目矣是時欽差大臣科爾沁博多拉噶 聖親王僧格林沁統帶馬隊勦賊山東於曹單一帶殺賊數千鄰省民無不望之若歲所在捐備芻蕘豆麥以待王師而巡撫慶廉方與布政使賈臻互相訐奏俱解任去湖北布政使嚴樹森於是拜巡撫河南之命云

萬一







豫軍紀略卷九

皖匪九

咸豐十一年春正月毫捻姜太林糾合董朝選王懷義等衆三萬竄豫境苗沛霖令其黨築寨三河尖並於往流集諸處抽釐誘附練總楊林川等十三寨勒派糧石而孫葵心一股萬人自廬州六安回竄由固始石佛店西竄光州是時豫省汝寧有陳大喜等土匪歸德有金樓等處教匪又有山東長槍會匪及粵逆四眼狗等縱橫蹂躪來去無常團練大臣毛昶熙方駐歸德檄幫辦軍務臬司鄭元善赴陳州防勦巡撫嚴樹森則以臬司事繁請

飭鄭元善回省另疏調江蘇候補知府張

汝梅辦河陝團練請

賞李雲麟五六品京職來豫帶勇

上方

以羣盜如毛勦辦棘手諭各路統兵大臣曰皖省捻匪滋事以來疊經官軍剿辦斬馘甚多而此勦彼竄蔓延東豫愈聚愈衆本應悉數殲除以彰撻伐惟念此中良莠不齊其被匪裹脅並非甘心從賊者正復不

少若概行勦辦恐人數衆多久煩兵力且擒爲粵逆前導抗拒官兵身
罹鋒鏑而粵逆則坐享其利其愚亦屬可憫著袁甲三穆騰阿鄭魁士
毛昶熙嚴樹森於皖豫境內剴切曉諭解散脅從有能悔罪輸誠自拔
來歸者概予免戮其中如有才具可用者並酌予錄用如李世忠屢立
戰功亦可渥膺懋賞倘始終抗拒執迷不悟惟有嚴行勦洗亦不能任
其猖獗云時捻氛正惡姜太林等大股由歸德疾趨朱仙鎮犯省城因
戒備嚴乃奔尉氏之韓家集署知縣方美縱擊郤之賊由洧川犯中牟
據七里岡嚴樹森檄總兵成景將本部扼其西竄調駐防槐店之游擊
西爾納赴援省城咨商毛昶熙調候補道張曜來省助勦檄河南營叅
將文志扼守老韓坡令張汝梅會同河南府知府樊琨號召汜禹密新
鞏偃登嵩等州縣團練協助官兵守虎牢關各隘候補道朱燮元集登
封練勇萬二千守岳嵒口洛陽縣知縣任桂帶勇防興隆鎮西路各州
縣督本邑勇練擇要扼守賊偵知有備乃折向南趨二月初一日攻長

葛縣城知縣金緘三擊走之由涓川竄許州初二日署知州葉世槐擊走之擒賊張黑等賊奔西南臨潁縣知縣查以謙敗賊於大石橋初三日由潁橋犯襄城爲兵練擊敗竄踞葉縣之新店初四日攻城知縣秦茂林迭敗之擒賊黨馬拴葛夢周等賊奔裕州署知州孟宣泗禦諸魏家岡賊焚賒旗店掠源潭圍唐縣分擾瓦店初十日陷唐縣城十二日回攻南陽府城晝夜不息城上連發大礮轟斃二百餘賊向西南退十四日圍鄧州知州黃縉昌率各鄉團練禦之賊分二股一竄光化之老河口一竄襄陽之黑龍集嚴樹森命張曜援勦南陽接統成景兵賊爲楚軍所扼回竄孟家樓朱林橋適成景令營總蘇謙都司李忠奎守備范文英將馬步隊邀賊鄧州二十四日敗諸刁河店賊由鎮平趨南陽二十七日成景會同署知府傅壽彤督隊迎擊斃執旗賊數十追至潦河店又斃賊數十三月初二三四等日我軍連與賊戰把總江成奎武生楊甲三軍功金勝文戰歿賊奔裕州攻城知州孟宣泗嚴守六晝夜

縋城出擊奪獲雲梯三十二具初十日成景等兵至內外夾擊遂解城
圍賊分兩股一由北舞渡東回皖境一由襄鄩趨臨潁知縣查以謙會
同成景邵之賊東奔鄆陵扶溝攻太康知縣任愷與成景保英等併力
擊退賊向東疾竄三月二十五日乃遁歸老巢其孫葵心一股之竄光
州者署知州張席珍督勇迎擊衆寡不敵退守州城正月二十三日賊
攻州城張席珍等登陴嚴守乘夜霧縋城出擊殲賊百餘乘勝追殺復
斃賊數百擒賊四十七賊沿淮河分竄一由息縣埠子口奔東北一由
光山寨河口奔西北光山縣知縣阮鼎出勦賊賊兩股鈔我後千總朱
玉生把總張佐勳均戰歿賊西竄羅山之竹桿河羅山知縣金朝棟禦
諸河口二十七日督勇追擊斃賊百餘擒張春湖等賊遂折向東北會
合前股肆擾於息縣正陽候補知府廖慶謀帶勇至銅鐘店會同正陽
知縣鄭修業於二月十九日夜襲斃賊百餘賊由閭河店狂竄三月初
二日賊擾溱頭河官莊諸處我軍躡及斃賊數百賊向上蔡奔商水初

六日署商水縣知縣閔春熙扼諸盧廟霧臺賊退據八里灣尋由周家口犯陳州府城初八日都司王永慶同守備趙光先出城邀擊趙光先深入賊隊手刃十餘賊戰歿王永慶鏖戰四時賊始退十一日賊由試量集犯鹿邑副將圖塔納等卻之賊由薛廟一路出境於是毫氛稍戢而苗沛霖復駭駭犯豫境自率大隊圍壽州分遣其黨黃毛獸以借火藥爲名闖入霍邱令潘四逼勒商固民寨領旗息縣一路按畝派糧詞訟決於練總於白雀園金家寨蔣家集戴家店黎家集設僞官自攻破吳家圩後馬步大股全趨潁西號稱五六萬王金奎等至大田市集朱品三等至小田市集苗金開等至陳家集分三路進欲襲潁郡陰結汝捻陳大喜趙獅子秦宣等分擾陳汝邊境沈邱之白廟皮營項城之黃廟集均築賊壘嚴樹森檄叅將巴揚阿統游擊陳占鰲都司陳廣譽守備王同聲勇隊一千五百名防光固一路檄候補知府李徵松統剛銳驍果各營馬步勇並吉林黑龍江馬隊扼沈項一路其原屯沈邱之守

備王承慶原屯項城之游擊劉鳴岐都司李永祿馬步各隊均歸李徵松調遣正布置間而亳州擒首雷彥蘇立楞眼等糾大股由渦河安溜等寨另股由亳西掠薛廟五月二十九日圍鹿邑縣城爲駐防都司王守基等擊退三十日攻賈灘寨約軍功宋淵洲爲內應知縣孫嘉臻偕王守基等率衆往援兩面夾擊賊東竄斬宋淵洲於陣六月初二日賊回攻補村寨孫嘉臻會春林敗之追殺二十餘里初三日孫嘉臻密約春林王守基等於四更時潛師鈔賊賊驚潰獨黑旗雷彥一股抵死抗拒孫嘉臻調尙橋團勇助戰擒擒首張虎身並斃其執旗賊目追至亳境礮城集斃賊三百餘賊遁歸巢另股擒首李庫盧和尚等方據亳之盧廟集七月初二日偕劉狗等大股由三丈口犯鹿邑之張斌營王皮溜觀音堂生鐵塚諸處知縣孫嘉臻會同王守基及都司張玉敗賊於王皮溜七昶熙檄郎中袁保慶督守備李古元等赴鹿邑會兵截擊而擒首宋喜元蘇立楞眼方據商邱之金樓張三座樓朱樓馬牧集文集

諸處趙浩然李加英等股紛擾夏邑陷據洪樓寨毛昶熙遣叅將孫之友會同敖天印等肉薄攻之不克於是附近之太平集各寨皆爲誘脅宋郡軍事日棘而苗沛霖稔豫軍疲於奔命遣苗天慶王金奎等由潁西突竄沈邱知縣顧恩培會同王永慶敗其衆於王寨賊據荆寨王永慶乘夜進攻斬賊二百餘賊奔白廟皮營我軍日雕勦之賊乃退至銅陽城諸處當是時劉狗分黑旗白旗花旗三股由寧陵張弓集竄睢州攻踞周堂寨其地當宋郡衝賊深溝高壘抗我軍嚴樹森調李徵松馬步各隊由太康杞縣進毛昶熙飭游擊陳祿興會之六月二十三日賊分股攻陽驛鋪寨甯陵知縣王毓昌以練總張法章史演龍等鄉團會陳祿興之兵解其圍次日分路進擊敗賊於十里鋪追至馬官集值睢州知州周廣德柘城知縣謝國輔帶團馳至遂合兵爲一攻克周堂殲賊三百餘復敗諸金相寺賊乃東趨與朱喜元等合擾金樓張三座樓句結金樓教匪邵永清攻馬牧集寨毛昶熙令叅將敖天印等進兵馬

牧七月十三日敖天印與邵春仁擣賊中堅立破大小賊營四斬首二百餘左成元蔣學耕等轉戰而前立將東西援賊擊退乘勝克張三座樓寨十五日敖天印密約各隊繞至賊莊縱火大呼楊莊羅莊孫窰楊倒樓大郭樓小郭樓智閣樓魏莊楊合樓之賊皆聞風潰我軍乘勢追殺殲斃無數賊竄宋郡西北清涼寺諸處七昶熙調隊截勦賊竄甯陵之瓦屋樓馬油房睢州之平岡寨西陵寺各色團練與官軍分道扼之乃均南竄於是嚴樹森方駐陳州與毛昶熙會籌全局合辭具奏疏曰豫省歸陳汝光界連皖楚粵捻氛逼環而相伺頻年以來或蒙亳之匪西犯或曹單之匪南趨往往駛近省垣恣其窺探軍興日久饑需日絀兵力日單賊勢日衆籌剿事莫難於今日者從前豫軍之病在不能選將以練兵存營馬步兵勇向稱二萬餘人去其濫報之虛數傷亡之空額實存者不過十之六七去其零星雜湊之隊老弱疲乏之卒可用者不過十之三四且統兵諸臣專駐歸德一隅賊每出巢遂得避實乘虛

狼奔肆擾前不能遏截後不及追躡賊蹤所至任其蹂躪沿邊一帶犬牙相錯路路可通又無一旅分駐我出賊歸此擊彼竄門戶洞開已成熟徑臣自到防後與臣毛昶熙咨函往返商辦一切懷遵

皇上訓

飭各自悔悟和衷共事推誠相與釐剔積弊先就在防兵勇點驗實數杜其浮冒刪汰冗卒抽換勁旅按楚軍法申以紀律教以行陣所調鄂將穆正春楊飛熊先後來豫各帶營官哨弁十餘員選募各路壯勇有分營而排練者有成軍而甫至者計自求將治兵殫心竭慮數閱月今始規模麤備然簡軍乃謹守之本禦敵以扼形爲先無恃其不來恃吾有以待之無恃其不攻恃吾有所不可攻就今日賊勢與中州地勢較歸德近接捻巢竄越靡定商邱永城夏邑邊境匪衆蟻聚擬以步隊五千入馬隊三百騎駐朱鹿邑與亳東緊接另派一千人守之由臣毛昶熙督率調遣以扼正東一路陳州與潁阜相連沈項之交土匪未靖苗練窺伺尙恐復萌擬以步隊二千人馬隊一百騎駐陳另以游擊劉鳴

岐五百人守項守備王永慶五百人守沈派候補知府李徵松爲統帶以扼東南一路汝甯光州苗練糾合土匪肆竄擬以步隊五千人馬隊三百騎分駐之派記名道張曜爲統帶以顧正南一路是爲守邊之師至於省城爲根本重地饒檢東匪時犯雕杞蘭考逼近汴垣聞警戒嚴輒患無備擬練足撫標剛銳十營步勇五千人輔以馬隊五百騎派署信陽協副將穆正春將之紮營省郊並擬練足撫標襄勝五營步勇二千五百人派前湖北儘先副將楊飛熊將之紮營蘭考間此二軍者日日訓練且相去僅數十里聲勢互相聯絡兩將倚爲左右手練成一枝活兵通盤更覺靈動並可北屏河朔西捍宛洛何處緊急由臣親督調度馳往何處策應是爲雕勦之師統而計之馬步兵勇二萬有奇而周家口水師一營不與焉月餼七萬兩實屬不敷而庫帑支絀萬分由臣督同司道殫精籌畫核實樽節期於兵歸實用餼不虛靡從此戰守兼資外寇難入內患自消致人而不致於人軍威可以漸振矣疏入

上報聞時毛昶熙方督各軍剿金樓嚴樹森將由陳州回省部署軍事
云

豫軍紀略

卷九 皖匪九

皖匪十

秋八月毛昶熙督陳祿興等攻克寧陵之顏集孫之友等攻克趙浩然所踞夏邑洪樓及孫楊集樊口孫五口樓頭太邱集洪路口等七寨永夏寧睢賊蹤稍戢毛昶熙乃令前御史尹耕雲總兵圖塔納督敖天印陳祿興等專剿金樓賊臺捻既不能肆擾宋郡劉狗王懷義朱喜元蘇立楞眼等股乃由宋北劉家口繞出寧陵大孔集又折而沿睢北乾河灘晝夜疾趨東犯杞留通許其由潁郡竄入沈項境內輾轉而擾宛南者爲姜太林等大股八月初三日劉狗等由陳留竄朱仙鎮初四日偪省城環列五色旗幟火光燭天嚴樹森先於八月初一日自陳州啓行尙未抵省於是河督黃贊湯學政景其濬藩司邊浴禮城守尉富保等咸登陴布置防守初五日賊攻城愈急城上連開大礮斃賊甚多游擊李殿甲將南北鎮標官兵及馬隊出城堵勦賊衆悉向西南沿河趨黑堽遂由東漳楊橋竄中牟鄭州滎陽聲言將西犯山陝初八日嚴樹

森至省令穆正春蒯賁孫將兵援西路時賊攻滎澤滎陽皆不得逞遂犯汜水知縣劉定敷出戰失利練總生員王景璫死之初十日賊踞城北隅高山火城內衙署由間道犯鞏縣知縣袁修翰扼虎牢關老犍坡以禦之賊分股由汜水烏沙河犯兩河口袁修翰分勇守虎牢自率三千人迎戰賊愈聚愈多袁修翰腰中數傷退保神隄十四日賊於浴河南岸束筏將順流入黃河北竄洛水忽漲袁修翰連開大礮楚賊百餘木筏皆漂散賊退南岸掠黑石關河南府知府樊琨叅將馬春華洛陽縣知縣任桂偃帥縣知縣鄧爾復登封縣知縣章慶保各帶鄉團集黑石關西岸相持一日十七日樊琨督團奮勦斬馬步賊數百賊向倉西一路闌入鞏縣城袁修翰急馳回巷戰逐賊自東門出賊回竄汜水滎陽掠鄭州十八日穆正春等軍甫至迎戰於城外賊衆萬餘合戰數次穆正春馬傷倒奪賊馬乘之大呼陷陣所向披靡千總周兆常把總王國良裹創力戰馬賊兩路包鈔我軍火藥盡乃抱隊保濠邊賊夜攻城

蒯賁蒧督知州唐知銑登陴奪其攻具十九二十兩日賊數來攻皆爲
穆正春擊退追斬二十餘里賊分三股劉狗率賊萬餘東竄都司李永
祿敗諸中牟總兵黃得魁敗諸東漳賊由陳留杞縣睢州寧陵柘城諸
處回巢王懷義等由鄭州向東南疾竄爲通許縣知縣李純錫擊敗竄
扶溝之江村太康之崔橋爲太康縣知縣水安瀾督練總范支山等擊
斬甚多賊衆由柘城歸巢宋喜元蘇立楞眼等由鄭州南竄爲新鄭長
葛洧川尉氏等縣擊敗由朱曲賈魯河疾趨鄆陵扶溝賊走柘城又爲
知縣謝國輔練勇所敗遂由鹿邑邊境竄歸亳巢蓋二十八九等日賊
股悉出豫境云其姜太林等於八月十三日圍沈邱十五日守備王永
慶擊斃執旗賊目二斬馬步賊二百餘賊據城東之秦灣十六日王永
慶乘賊不備斫賊營賊潰奔我軍追斬三百餘十八日竄上蔡十九日
攻西平知縣姚詩雅擊卻之後股攻磚潭寨練長張振清夜襲賊營復
繞至河口擊賊之半渡者斬賊百餘淹斃無算生擒姜逆之姪姜魚等

賊奔舞陽掠葉縣爲知縣秦茂林所扼乃竄裕州署知州孟宣泗千總劉福和禦諸七里關二十二日敗賊於關口擒僞先鋒一餘黨二十三忽騎賊大至劉福和戰歿二十四日犯賒旗店寨圍守禦三日賊不得逞乃竄泌陽樹雲梯緣城而上城中文武官紳悉力抵禦礮斃姜逆之子並賊目李順等賊懾退九月初五日竄唐縣十一日掠新野趨樊城復由鄧州入內鄉浙川荆子關副將伊里綳阿等號召丹河兩岸鄉團以禦賊二十六日賊衆萬餘竄至清風嶺山口徑曲路窄賊騎不得騁鄉團敗之殲馬步賊四百餘追至浙河擊賊半渡斬黃衣賊目賊敗奔由內鄉鎮平竄南召十月十一日乘大霧攻城知縣曾照擊卻之遂入魯山之交口鎮及寶豐之大石橋適叅將保英等督軍追至斬馘數百賊奔郊縣鄉團接仗失利賊薄縣城署知縣王延燁乘夜出擊斬賊數百賊欲西竄河洛間各隘有守兵且居民多入保野無所掠乃折而東趨由禹州許州鄢陵各邊境疾竄二十三日攻扶溝西關知縣鄒金生

截其後隊其前隊至太康二十五日知縣水安瀾把總祁陽年禦諸三里橋賊由柘鹿邊境疾竄歸巢巖樹森以道剿無功効叅將保英知縣汪鼎和革職留營以觀後效請將八月以來勦賊立功之穆正春等陞賞有差陣亡各員悉優卹如制時王懷義一股自八月二十九日竄回毫巢後復糾捻首孫老威等於十月初七八日由沈項之交掠西華商水至西華分股一由鄆城犯舞陽一由上蔡掠汝陽之姚灣由遂平諸市店竄泌陽沙河合股竄唐縣邊騎游駛裕棠之間十一月初一日由唐縣竄新野知縣丁嘉言會同新野營守備特合圖分路出擊初二日戰於距城十五里之廖樓殲賊三百餘擒紅衣賊目四黃衣賊目二賊被創狂奔特合圖策馬窮追至連樓賊回拒特合圖斬執旗賊目三馬蹶仆地躍起徒步血戰復手刃悍賊數人遂遇害傷痕如鱗死後右手握利刃猶堅不可開奏 聞于卹賊犯唐泌分股犯賒旂店爲南陽縣知縣李瀛所敗乃折竄泌舞掠裕葉襄城臨潁諸縣境值風雪作不

及屯聚乃由鄆城商水西華太康邊境疾趨二十二日至寧陵之夏莊
爲李徵松之軍擊敗由鹿柘邊境歸巢其劉狗宋喜元等自八月回巢
後尋糾大股馬步數萬援金樓據商邱馬牧集將攻踞附近各寨與金
樓成犄角之勢尹耕雲圖塔納議以賊衆我寡難恃力敵乃於附近之
井泉瀦澤潛毒其流賊飲水輒病日有死亡十月十九日金樓賊目僞
東門丞相侯邦威富垣大等潛出乞糧於金樓西南之竟樓寨爲首事
竟玉彩誘擒其黨來救爲練總王箱擊散遂斬侯邦威於軍前賊益氣
沮我軍夜劫賊營乘風縱火賊驚亂死者無數追奔四十餘里悉竄歸
巢擒蹤甫退而苗練之禍又亟苗沛霖自本年春與壽州紳士孫家泰
構釁掘孫姓祖墓三十餘處以苗字旗號其屍九月二十七日夜攻陷
壽州戮掠家泰全家屠守城拒敵之皮黃洪吳張諸姓遷巡撫於蒙城
之板橋集執壽春鎮總兵黃鳴鐸割耳焚鬚留數千人守壽州自率大
隊於十月初六日赴懷遠部其衆爲十大營一耿老紹二吳正誼據洄

潘集等寨三朱品三據曹家集等寨四王令魁據延陵集等寨五董志誠杜維忠據太和東北各寨六鄧林松鄧香山據淝河以南各寨七林朗據潁上縣城及縣西南各寨八朱蘭馨九潘四據三河尖及霍邱境內各寨十卽苗家老寨佔地數百里有衆十餘萬結張樂行與汝寧正息各路土匪互相連絡其害已及中州會有人奏豫皖連界專事防守不能無瑕隙不若乘勢進兵擣其巢穴則匪蹤自不敢遠出等語於是

上命嚴樹森毛昶熙會商袁甲三等密籌機宜分路進剿限今臘明正爲先發制人之舉嚴樹森毛昶熙因通籌全局請添兵增餉以資戰守上疏曰河南居天下之中爲南北關鍵四通八達無險可扼從前防剿不過宋東一面近則蒙亳捻股愈結愈多金樓踞匪阻我進兵之道是東面防剿較前益緊加以直東會匪教匪擾我河朔逼我省郊是北路宜防剿也汝寧有踞賊正息有土匪光固有苗黨或鴟張於內或蠶食於外是南面宜防剿也而叛練苗沛霖尤爲中原巨患陰險很悍

與各匪情形不同近聞句結粵逆陳四眼狗捻首張樂行等爲其前驅
圖據壽穎以爲根本然後窺伺中原肆擾西北穎郡孤城無援勢難固
守豫省陳汝光與穎郡處處接壤穎西有警則沈項最爲喫重新息次
之光固之苗黨潛四必將同時並發統計豫省兵力省防汝防宋防三
營馬步僅一萬九千餘人以省防一軍爲勁旋昨因汝光告急派總兵
穆正睿馬步五千人馳往援勦省郊僅留楊飛熊襄勝前後中三營暨
親兵共一千七百餘人旣防東匪北來又防皖捻東至設有緩急萬難
兼顧現催提副將余際昌新募昌勝五營楚勇卽日來豫徑紮省郊以
固根本兼籌各路策應此外汝防張曜一軍久爲平輿之賊所牽制且
師力已疲應須抽換簡練庶可得力宋防一軍進圍金樓退防臺捻尙
形單薄其周鳳山招募之新鳳六營雖經屢次催提如能速至祇可備
光固一路防剿自沈項至新息路路空虛分撥抽調顧此失彼深恐各
匪乘隙蹈瑕使我進退失據臣等早見及此是以前欲聯楚皖豫爲一

心合力共濟疊經臧咨官文曾國藩李續宜彭玉麟諸臣約李續宜親
統一軍由光固進紮三河尖與六霍之師兩路並進以救潁壽先後接
准諸臣咨覆李續宜以楚南辰沅一帶石逆餘燼復然楚防方亟未暇
越境圖苗曾國藩以廬州未復兵力難於抽撥彭玉麟所部祇有水師
亦難間道援潁是江楚皖均未能會師合勦而苗逆乘暇勾結凶焰日
張其禍瞬及於豫而西北皆將震動若任其決裂專盼鄰師而不早謀
自強自立之術勢必貽誤中原臣等罪戾尤大再四籌畫欲保危疆約
有三端一請添派將領查有已革湖北宜昌鎮總兵李續燾樸誠勇敢
善於將兵又記名提督陳由立身經百戰驍勇無敵二將皆楚產其才
均能將數千人前經臣等函商楚中諸臣尙未接准函覆應請 敕
下湖廣督臣官文湖南撫臣毛鴻賓調派李續燾並請 敕下兩江
督臣曾國藩轉飭記名提督綏靖鎮總兵鮑超調派陳由立前來豫營
均令其在湖北兩處招募壯勇丁各三千人卽日成軍北來以資防

勦現計省防汝防宋防三軍及分紮河朔之襄勝兩營省西路之保洛
一營步勇共一萬八千有零楚勇十居其七俟將新募齊合之周鳳
山余際昌二軍二千五百人將及三萬之數則兵力較厚庶歸陳汝光
各邊隘及河朔省防均敷布置一請添調馬隊行陣之間列仗鏖戰利
用步而追奔逐北利用馬前此劉天祥等竄擾東省經僧格林沁軍營
馬隊緊躡匪衆日夜狂奔不敢停喘是以各寨團勇得乘其疲截殺殆
盡此其明驗今豫營祇有黑龍江吉林馬隊一百二十餘名此外省防
驍果驍健驍壯三營及宋防汝防兩處馬勇合計雖有一千餘名均不
如馬隊之驍捷善戰練步勇易練駐兵難仰懇 天恩准撥吉林黑

龍江馬隊一千名選將統帶馳赴豫營聽候調遣實於軍務有裨一請
添撥餼項從前豫省養兵不足二萬人月餼七萬兩業已時形拮据今
欲添兵萬人不得不籌增萬人之饟奈豫事之急倍於往年庫款之絀
甚於曠昔所有入不敷出情形早經縷悉上陳嗣復將各省協餼兩次

奏請停撥今自秋冬以來屢經賊擾全省州縣被兵被災十居八九小民蕩析離居地方凋殘滿目向來進項涓滴皆枯臣嚴樹森督同藩司盡心設法而爲炊無米智力俱窮不特外省協饟無款可解卽本營兵饟積欠已經兩月設新軍齊集而饟解以應不出一兩月饑潰立形不可不早爲之計查鄰近各省秦晉獨爲完區由豫省爲之屏蔽故也欲保秦晉宜先保豫刻下豫事如此其亟一省之力難以支持應請

敕下山西撫臣英桂陝西撫臣瑛榮每月各撥饟銀二萬兩協濟豫營庶有饟以養兵而賊可勦亦有豫以當賊而秦晉可安一俟兵將到齊先令歸陳汝光一帶扼要駐紮星羅棋布遇賊卽擊一面督飭諸將先將本境土匪迅速蕩平輿金樓次第克復然後酌量情形相機進取以全力會合楚皖各軍東擣捻巢南圖苗逆掃除醜類以靖中原大局所關在此一舉臣等連日籌商非如此振作不足以固中原而挫賊勢疏入適先期已調嚴樹森爲湖北巡撫 詔官文曾國藩飭令李續

肅陳由立迅赴河南交鄭元善差遣山陝兩省各月協銀二萬兩以吉
林黑龍江馬隊未便分撥 諭託明阿調撥西安馬隊一千名赴豫
助勦又允毛昶熙奏請調給事中李鶴年陸秉樞赴營襄理軍事

今上御極之初中州軍事方亟臺捻張樂行等大小數十股橫皖豫之交乘汝南土寇蠡起一歲數出往來剽疾歸陳數百里平衍無山河險阻郡邑殘破官軍罷於奔命苗沛霖攻陷壽州跨有長淮旣輸欵粵逆復向當事求反正粵逆陳玉成方據廬州廬州敗匪程保民亳州巨捻姜太林等圍攻潁州困署皖撫賈臻於潁城潁郡地接沈項陳郡戒嚴朝廷調楚撫李續宜撫安徽調豫撫嚴樹森撫湖北而擢鄭元善爲河南巡撫與團練大臣毛昶熙共任勦匪

命兵部左侍郎勝保

以欽差大臣督豫軍務馳解潁州之圍並辦苗練反正事時張樂行遣黨張耀林林其進等率大股賊由方家集竄息縣境圍光州爲游擊李忠奎知縣單體晉擊退張樂行竄潁上勝保令苗沛霖圍之

朝旨責擒獻張樂行以明心跡並促勝保迅速進兵援潁

命李續

宜由三河尖一路進兵

命漕運總督袁甲三自臨淮遣將赴援

命江南提督李世忠由懷遠以達潁州水陸並進

命鄭元善李

續宜幫辦勝保軍務勝保遣總兵成祿率師三千先期繞由懷遠東進
總兵劉景芳由槐店滾營進鄭元善令副將楊飛熊統剛銳五營及吉
林黑龍江馬隊驍健營馬勇馳駐槐店以扼防沈項之剛銳左營新中
營暨叅將王永慶游擊李永祿兩軍隸之會謀稱臺捻五旗並出毛昶
熙在省聞報乘夜馳回宋郡正月二十日臺捻劉大老淵二老淵蘇添
福王懷義孫繼先李加英趙浩然楊興太蘇立楞眼李大箇蘇天祥李
五孫四瞎子龔耀等率悍賊數萬糾山東長槍會匪王廣奇等同時出
竄前御史尹耕雲總兵圖塔納等圍攻金樓方亟恐竄捻與教匪勾結
傳飭各營嚴兵以待賊衆由金樓西南直衝敖天印劉進貞朱金鈇等
營我軍槍礮環擊賊卻走另股馬賊犯馬牧集爲圖塔納擊退賊衆復
趨邵春仁營敖天印等各率所部截勦尹耕雲等復飭姚允寬尹彥欽
以步軍小隊出擊自督馬步往來策應鏖戰逾時賊氣沮竄向西南二

十一日黎明賊黨從東北折回復進逼邵春仁營圍營外巡勇邵春仁驟馬出救斬其紅衣賊目各營大隊馳到將賊壓退追殺二十餘里斬首一百餘級是日擒衆前隊已由營廓集蔡道口竄過寧陵睢州科爾沁親王僧格林沁以

欽差大臣駐軍單縣剿辦直東會匪聞擒股出竄卽與杭州將軍國瑞親督各起蒙古馬隊四五千晝夜兼程截擊賊掠杞縣毛昶熙阻不得進督知縣劉時修登陴守禦賊衆圍攻城關城中出勇轟擊毛昶熙於城上見後隊賊騎動偵知僧格林沁已破賊於許岡時賊馬步橫亘十餘里步賊皆以長矛迎拒僧營署翼長蘇克金營總恆齡富和侍衛卓明阿托倫布擊敗之賊屍枕藉餘賊竄入廢寨官軍方欲圍攻忽有大股賊分三路由西來援恆齡拒北路蘇克金擊中路卓明阿哲里木盟左翼頭品臺吉諾們丕勒戰東南一路鏖戰二時衝動賊陣向前追殺復有另股賊西南突出我軍會合痛剿斬馘二千餘賊始敗北是晚狂風大作僧格林沁距杞縣東四五里逼賊立

管人馬追馳數百里饑苦異常毛昶熙令城中齎餼糧草料猪羊至僧
格林沁營分給諸軍將士皆歡騰又遣都司蔣學耕州判方戊昌率輕
騎越賊壘至靈陵調陳祿興馬步全隊來杞鄭元善聞警親率叅將楊
長春一軍出省駐陳留扼賊西竄會副將余際昌新募楚勇三千至省
遂檄令東進會勦大風數日不息飛沙障天僧軍不能出隊賊騎四出
游駛二十九日風少止賊復來攻僧格林沁預伏馬隊於濠邊觀釁而
動日晡賊罷將退馬隊齊出直衝東南史莊馬樓各賊營連踏七壘斬
首千餘級追殺十里二月初一日鄭元善令余際昌楊長春成景巴揚
阿毛昶熙令蔣學耕陳文平等會蘇克金於杞西攻陳敏屯踞賊賊出
嘗官軍旋避入圩而東北田陵寨出賊萬餘截我後蘇克金等合軍與
戰破其梅花陣殪賊無算追奔十餘里偵知西北趙寨焦寨東北田陵
寨正北魏堂皆踞賊數萬初三日各軍會攻趙寨賊圩矢石槍礮如雨
余際昌楊長春身先士卒越濠猱進各裹創奮勇躍登將士畢登把總

任敬秋中礮殞陳文平步隊繼進合力痛殺賊屍填塞街濠斃賊四千餘蘇克金余際昌復揮各隊至焦寨而田陵之賊復出救馬步迎擊移時巴揚阿礮中眉際裂裳束額喋血接戰斃賊無算賊始潰奔焦寨之賊亦焚圩遁余際昌督隊追之賊見其兵少回戈相拒魏堂之賊忽尾其後余際昌前後受敵傷痕櫛比猶執矛馳驟攢刺如飛富和蘇克金等正追田陵敗賊恐余際昌孤軍有失諾們丕勒托倫布楊長春率馬步馳援鏖戰四時賊遂大敗各軍合逐之陣斬賊八九千獲旗幟鎧仗無算騾馬千匹賊宵遁僧格林沁親督各軍躡擊初四日至陳留初五日至尉氏賊踞城東派隊出擊擒斬甚多賊竄入里四黃河樊家三處民寨負隅固守馬隊圍攻不能克鄭元善調襄勝昌勝兩營步勇三千人以巴揚阿領之馳赴僧營聽調十二日僧格林沁親督攻寨破之後起援賊麇至連戰勝之敗賊東遁十三日竄睢州白樓寨鄉團邀之斬首數十級十四日至寧陝大黃岡練總史演龍等集團逆擊賊竄柘城

之慈聖堡知縣謝國輔率團逼之復斃賊百餘毛昶熙未防各軍又大第截擊敗賊於大李莊包公廟十字河高心集曹莊賊衆向東狂奔僧格林沁國瑞鄭元善毛昶熙聯銜告捷有

旨嘉獎復余際昌副將

原官賞還花翎加偉勇巴圖魯名號擢楊長春爲副將其餘出力將士優獎有差僧格林沁既督軍至歸德調單縣步隊由馬收集進攻金樓教匪鄭元善毛昶熙奏言僧格林沁統領馬隊四五千未及浹旬殄除羣醜豫省官民僉稱近年來未嘗有此大捷而勝保馳奏猶謂毫擒三四萬人圍攻杞縣四面築立長圍僧格林沁毛昶熙均在圍中致煩聖明廑念則傳聞之誤也於是鄭元善毛昶熙請乘此士氣奮揚軍心鼓舞一鼓作氣直擣蒙臺老巢縱令被勦肆竄而田在田駐兵宿州袁甲三扼紮臨淮吳棠統師淮徐皆可會合嚴防卽勝保穎郡解圍亦可兩路並進奏入報可議未及行而邊事復亟矣時勝保援穎之師連日獲捷進屯王圩劉家海茨河鋪距潁州十里與城中消息相通勝保自率

大軍駐太和縣親督調度賊既慮我軍解潁圍而張樂行潁上賊黨又爲苗沛霖所迫遂相率西竄圖斷我軍後路故邢圩援賊驟增十五日襲陷對河穗子鋪阻絕文報軍火饟糈太和將被圍勝保飛章告急請各路援應 詔僧格林沁暫紮鹿太之間速派得力馬隊千餘駐槐店李續宜鄭元善親督各軍馳援總兵成祿以赴援遲延摘頂副將劉景芳以築營未定爲賊所乘褫職勝保復劾楊飛熊屢調不遵 詔

謂楊飛熊前經奉

旨與張曜會勦平輿其不能赴槐店非有意遲

延不之罪鄭元善赴援陳州行有日矣適勝保所部降衆靖東營叅將宋景詩見潁郡賊勢復張官軍後路隔絕遂於十七日夜率所部馬步各隊走陳州誘誠順中前後三營馬步同逃以赴省乞饟爲名鄭元善飭開封府知府朱光宇至太平岡彈壓宋景詩請酌給口糧歸農其誠順營雷鳳鳴馬榮程順書等願仍回防議未定宋景詩懼率衆由蘭儀東北夜遁鄭元善遣巴揚阿帶勇及勝保所派副都統明慶馬隊沿途

追勦及諸東漳殲斃百餘外委葉寶登戰歿潰勇奪民船潛渡原武縣知縣孔慶鉞乘其半渡擊之落水死者過半仍遁回南岸會勝保派軍功馮廷祉彭體勤諭招宋景詩鄭元善遂屬明慶以馬隊五百押令回營勝保檄宋景詩會同總兵黃得魁由槐店進抵太和以通穗子鋪之路迨三月初三日勝保親督各軍由茨河鋪馳解潁州北面城圍一戰大捷而李續宜所派成大吉之師同時抵潁各軍會合分路並進潁郡城圍立解賊聞僧格林沁有直擣蒙亳之議遂悉向東南竄逸回顧老巢並救張樂行於潁上勝保以陳郡東南賊勢偏重潁圍解卽退駐陳州以顧豫境而以皖事責成楚師成大吉等軍並奏苗沛霖薙髮助饗潁上可望迅克

朝廷以張樂行縱橫皖豫苗沛霖首鼠兩端若勝保退屯陳州恐張逆兇脫苗沛霖復懷觀望仍令乘勝進兵潁上別遣馬步助勦亳捻之竄豫境者方亳捻之爲僧格林沁擊敗於杞也有南竄太康者有從尉氏擊敗回竄宋郡復爲宋防將士迭擊東竄者有糾

阮鼎擊退者有北竄新蔡以地雷轟塌城垣爲知縣韓承宣搶護擊退者及至陳郡復合股圍沈邱二十日知縣顧恩培率民勇登陣轟擊凡六晝夜顧恩培出奇縋擊斬賊二百餘二十四日始由維莊西竄二十七日犯項城值楊飛熊軍到會同在防游擊丹凌雲敗賊於八里橋賊踞羊樓寨二十九日擾周家口及商水縣城復由西華之郝岡逕犯上蔡縣城知縣姚錕督勇擊走之三月初一日賊攻西平署知縣宮國勳募勇縋城槍斃賊數十初五六日賊竄舞陽之吳寨攻陷塚李寨及舞葉交界之卸甲店邊騎駛及寶豐魯山初九日大股全趨郟縣汝州駸駸西竄鄭元善始有陳州之行及聞潁郡解圍臺捻將南窺宛郡西犯河洛遂取道尉氏洧州駐許州適中調度令楊飛熊李徵松率剛銳襄勝各營楚勇由陳州西華郟城暫屯襄城視賊所向並調勝保前派防河之西安馬隊五百名輔之會賊已於初十日由郟縣趙寨一路入汝

州境知州舒亨熙集團勇拒之賊由間道攻城雲梯四面槍登城幾陷舒亨熙馳回擊退夜襲賊營火發賊驚潰於十一日北竄臨汝鎮分股一由登封諸葛村掠龍門鎮一由宜陽白楊樹西竄河南府叅將馬春華率本標兵偕署洛陽縣知縣徐光第調鄉團二三萬守伊闕口賊由西南間道會合宜陽一股十三日犯河南府城火東南兩門署知府安奎督在城文武守禦槍礮併發賊卻退十四日昧爽賊由南門圍繞西北噴筒火箭飛集城樓悍賊首戴方桌門板揉攀蟻附上城危甚先是郡城武試未竣武童千餘以弓箭登陴助守兩射城下登者輒斫以短刃繼以大礮賊始潰敗而楊飛熊率剛銳襄勝驍健驍壯等馬步及營總雙全所統黑龍江馬隊營總圖克唐阿委叅領訥勒和春西安馬隊同時馳至斃賊二千餘賊於是日西竄新安城外八斗山署知縣梁敞率兵出擊賊由東北繞我兵後梁敞及外委楊登魁均受傷墜馬賊據北山頂夜擲火彈入城燒衙署十五日梁敞裹創督團奮擊賊向東竄

入宜陽境十九日據宜陽城外錦屏山火四關知縣謝仁溥率團嚴守賊斫樹縛雲梯四面圍攻二十二日城陷謝仁溥與典史齊金詰死之事聞優卹建專祠二十三日安奎督勇往援楊飛熊前隊亦到賊不虞官軍至倉皇潰奔我軍乘勢追擊斬馘千餘遂復宜陽縣城賊犯韓城鎮縣丞張慶岡率團出勦受傷賊遂踞韓城焚縣丞署馬春華雙全等馬步馳援雙全手刃賊目賊敗走追殺十餘里斃賊五六百賊竄永寧晝夜圍攻知縣宋劭經守三日二十六日城陷 詔禪宋劭經職四月初一日楊飛熊等軍由藕池鎮馳抵永寧城外賊已盤踞五六日見官軍至出馬步四五千由東南兩門分路抗拒楊飛熊分布訥勒和春馬隊防包鈔令游擊劉興旺都司景得勝守備趙鴻先都司蕭鳳鳴叅將范敷印守備劉鴻增前後擊之自督親軍策應賊腹背受敵騎兵截賊數處各軍直薄城下趙鴻先登手刃數賊城內賊驚潰我軍大隊從東門擁入巷戰逾時遂復永寧縣城賊由永寧竄嵩縣知縣彭繩祖拒

守賊退竄嵩宜接壤之白楊樹楊飛熊等踵至其地四面皆山初六日各隊進剿賊紅白二旗馬步五六千下山衝突我軍屹立不動相持間復有藍旗萬餘從東南沿山下以連環槍擊之賊屍枕藉山坡下復有馬賊疾馳而出西山均內又出步賊無數官軍酣戰自己至未殺賊略相當賊向東潰奔千總李全興朱占魁李朝相把總嚴大治曾守達張連榜外委方世昌李永興尤正國閭士貴正藍旗佐領塔克什等均戰歿得旨優卹賊竄大辛店官軍追之值伊水陡漲前股已束筏渡至伊陽之寨子街其後股正爭渡雙全及叅將烏爾克蘇都司陳玉林叅將盧得勝等蹙之擒斬數百落水斃者不少伊陽知縣謝金誥擊賊於大虎嶺賊由白沙臨汝東竄登封署知縣章慶保卻之初八日撲西口金店里大唐里王石里爲各鄉練勇礮斃四五百夜撲曲高里襲團勇營各練設伏俟之猝起迎鬪復環鈔其後斃二百餘賊知有備遂退去合竄汝州楊飛熊率各軍追之鄭元善檄駐襄城巴揚阿一軍由郊

勇防各隘十二日敗賊於紙坊店署知州任愷前任知州舒亨熙與任桂等會同楊飛熊前隊游擊劉開友守備王秀林乘夜襲營賊驚亂狂奔十三日由五里溝薄郊縣城圖克唐阿王珠煒由襄城至李徵松巴揚阿等踵至戰於城西三里舖知縣陳桂芬集團勇助之戰數時賊衆敗退方揮軍進勦忽另股捻旗自南趨至譙諫震地鈔我軍後敗匪復回戈困鬪巴揚阿督隊衝壓賊不退城上以大礮擊之凡七礮賊屍枕藉追斬十餘里夜分賊全股奔竄由襄城擾臨潁兩次攻城皆爲知縣查以謙擊走擾許州之薛橋楊飛熊巴揚阿等跟蹤至會同知州陳肇鏞出不意揜之多所斬擒敗賊向鄢陵西華邊境東趨其亳東續出之股一至淮太一至睢杞間前股已敗衄遁歸遂相率折竄亳巢是時僧格林沁方築長圍困金樓未能分兵扼賊歸路而樂行遣出之賊自圍攻新蔡後與粵逆僞扶王僞啓王僞端王僞遵王等合股由泌陽擾宛

郡入浙川荆子關進至商南踰秦嶺圍西安折而東趨回匪乘之而起
遂爲陝亂所自始豫省用兵十餘年皖捻之禍未嘗及西路此後粵捻
之踰潼關出嶠函張總愚往來黑峪欒川專以依山阻險爲負隅計河
陝遂成熟徑實肇於此云

皖匪十二

自潁州解圍後羣捻皆趨潁上援張樂行四月十二日張樂行率馬步各賊攜家口由北門出竄過沙河遁歸雉河老巢時苗沛霖方以數萬衆困之朝廷責其有心疏縱命勝保速赴潁上親督圍攻會潁上

已拔苗沛霖復誘擒粵逆四眼狗陳玉成檻送勝保營而靈璧一帶踞匪之竄項城者爲郎中袁保慶等擊敗五月以來豫防稍弛六月僧格林沁攻克金樓旋軍鹿邑休養士卒爲進擣蒙亳之舉於是各股捻首羣思出竄牽制我師又聞粵逆僞扶王陳得才等由關中折竄宛郡議由間道西與之合鄭元善時駐汝甯督勦陳大喜等土匪具以狀聞

詔勝保率師駐河洛而以潁州一帶軍務責成李續宜勝保甫抵洛陽又值關中回匪大熾命就近由河洛統師入關於是豫境空虛蒙亳巨捻大舉東犯矣七月十九日捻首姜太林孫四牙王懷義周化臨韓老萬張小明等率黃旗藍旗紅邊白旗黃邊白旗黃邊藍旗各股二十

日至鹿邑之梅城集王皮溜二十一日至淮甯二十二日至扶溝二十三日攻西華縣城知縣徐炳登陴嚴守砲鎗紅衣馬步賊數十賊竄圍城時僧營營總恆齡待衛卓明阿等精騎追及賊於是分兩股一竄西平舞陽恆齡等躡其後而盧得勝等逐之入楚者也一竄許州楊長春等擊之忽東忽西尋復遁回老巢者也其竄許州者二十七日圍州城知州陳肇鏞登陴適楊飛熊在許養傷陳肇鏞以練勇三百人屬之總城列陣楊飛熊振臂一呼賊衆辟易斃賊數百由禹郊邊境西竄汝州鄭元善檄臬司洪貞謙出省扼賊所向令叅將盧得勝於葉裕之間截其竄宛與粵逆勾結之路令楊長春由汝州迎擊長春與賊遇於距城五里之郭莊八月初二日賊馬步環至我軍槍礮輪擊殪馬步賊二三百賊西駛初三日由臨汝鎮竄伊陽縣初四日圍城知縣楊維宗擊走之賊由藕池河底鎮西趨十一日至陝州之觀音堂時鄭元善入關監臨慮賊擾秦晉嚴飭河北鎮道集兵團防河咨秦晉扼守關河並留勝

仍後起各隊副將王佐臣叅將梁仕紳等暫緩入關即在新澠陝靈助剿故硤石一路駐有防軍賊遂折竄澠池之土嶠鎮焚掠而東十三日竄新安石寺村知縣韓經畬會梁仕紳往勦賊竄澠池之葫蘆頂十六日知縣張應煒率練勇奮擊斬首百餘賊撲白浪村河口澠池巡檢陳錫疇方率團防河邵之賊繞山徑入陝州十六十七兩日攻城代理知州杜翊會王佐臣守禦河陝汝道廣隆令游擊蔡全宗陝州營都司謝榮陞千總夏青山等各帶勇縋城出擊城內開礮助之殲斃甚多生擒賊目雷桃斬之十八日夜風雨大作蔡全宗簡精騎襲之斬首百餘級賊潰遁二十一日掠靈寶閭鄉代理靈寶知縣康曾定會同城文武守禦十四晝夜先是五月粵逆犯靈寶守城火器缺乏曾定籌經費購製大小砲三十餘位甫抵縣賊亦踵至城賴以守時閭鄉殘破野無可掠且聞潼關有重兵楊長春由東路追擊遂率大股竄盧氏山中東擾永甯鄭元善時已出關親督襄勝玉成兩營取道中牟鄭州榮汜羣偃於

三十日抵洛陽令楊長春李世玉等追擊連旬阻陰雨閏八月十三日及諸永甯偵賊據距城四十五里之長水鎮十五日楊長春等率隊進遇賊於孫洪峪揮軍趨龍頭山居高臨下槍子雨發賊敗走十六日我軍發長水鎮賊陣洛河南設伏山坳而散布騎賊於孤嘴山楊長春揮軍渡河背水立陣密令親兵誘伏賊出戰賊不動乃佯爲反兵卻走賊齊出掩襲襄前營都司趙鴻先襄右營都司楊飛鵬襄後營游擊石得勝剛銳新後營守備楊長林縱橫馳擊斬其黃巾賊目賊陣大亂楊長春率親兵大呼馳下賊潰散一路追殺救出難民千餘人擒老捻張信禮等而把總段連才李發南張學桂外委任進貴胡映南熊良有等均戰歿十八日敗賊十馬店突有步賊三四千由洛河上游涉水來我軍擊其半渡斃賊百餘追至高莊望見劉營打卦嶺山谷中旗幟如林徑險路難相持竟日於是楊長春撤屯范鎮請濟師於鄭元善而前竄西平舞陽之賊於八月初二日由葉縣保安驛竄裕州盧得勝率襄勝左

營劉興旺等擊之陷賊圍中盧得勝手刃數賊不得出劉興旺挺矛入
瞋目大呼富者輒靡盧得勝乘之出圍我軍火器齊發賊潰奔初四日
賊攻博望驛恆齡卓明阿等追擊之斃賊三千餘賊由山徑竄鎮平內
鄉恆齡等因馬隊不能入山折回東路賊往來內鄉淅川山中依山阻
險入武關擾商南縣境賊首姜太林等直逼城下荊州將軍多隆阿適
至衆未集乃出奇勝之斃賊二千餘乃竄逸閏八月初七日回擾黑漆
河初八日竄重陽店丁河店西峽口邊騎至五里川十二十三兩日攻
內鄉縣城知縣朱琨登陴守禦礮斃悍賊甚多十四日三更賊於西北
兩門搶登守城勇丁斫退募敢死士由東南隅縋城下呼譟斫殺夜昏
黑賊不辨多少即時驚潰會洪貞謙遣襄勝勇隊至內外夾攻殪賊數
百生擒賊目二十餘賊竄鄧州南古里繞至新野洪貞謙令游擊任國
治等扼林水驛令盧得勝扼葉縣防東竄十七日賊至三河寨沿唐河
東西兩岸犯林水十八日昧爽任國治等馬步鈔擊火器齊發中執旗

賊目賊陣亂我師乘之斬馘甚多姜太林乘黑羸立陣後羸中槍倒墜而逸我軍逐之十九日至新野城外八里賊方聚食見官兵至棄炊具狂奔分兩股一向東南一向東北任國治等力截東北遂向正南潰逸我軍奮追各寨民團出助斬賊數百得羸馬軍械無數賊與前股合奔東南我軍追至陳家擺渡殲斃無算至湖北棗陽界法山下賊捲旗匿山谷二十日向棗陽之紫微山竄去洪貞謙飭各軍嚴扼邊境防回遁當是時永寧賊方伏山谷中鄭元善派叅將李世玉率玉成營步勇雲驤營馬勇從宜陽一路探勦二十一日李世玉率把總禹步雲等擊賊於關莊又渡河截殺賊佯敗竄而大股潛撲河南府城鄭元善督率在城文武登陴守禦所部僅游擊甄樹德襄中一營及吉林黑龍江三省馬隊驍健營馬勇百人二十五日賊馬步二三萬擁至城上開大礮擊之賊退屯洛河南岸我軍夜選壯勇襲賊壘賊驚竄不敢近城二十九日楊長春李世玉等軍次第至九月初一日楊長春李世玉率馬步各

賊由城北邱山進剿至馬坡遇賊甄樹德及都司王秀林游擊李文全
李朝明守備王明田馳入賊陣手刃悍賊甚多賊卻官軍壓之忽聞海
角齊鳴賊如潮至楊長春以衆寡不敵約其軍毋妄動步隊結爲圓陣
專以火槍外向環擊令馬勇兩面馳突大戰三時守備周顯魁王連陞
李富德都司王登舉千總王振川外委劉朝友任長茂等同時戰歿陣
亡勇丁三百餘斃賊一千餘賊退而擾河口下固街小呂莊時偪河干
北鎮總兵牛浩然及濟源孟縣各團對河列陣禦之賊不得渡遂攻孟
津縣城知縣王雲漢擊退賊悉竄偃鞏鞏縣知縣袁修翰敗賊於莊頭
乾溝等寨十二日賊南走楊長春等擊賊於棗園賊由白沙一路東遁
鄭元善以姜太林一股已入楚境飛檄盧得勝自宛來洛會勦毛昶熙
令陳祿興扼賊於許州賊犯登封聞援兵將至折向汝州大路東竄郊
縣襄城二十二日至潁橋陳祿興由許州截擊獲勝二十三日竄臨潁
之五里河掠城下二十七日楊長春盧得勝等兵至陳祿興率隊會之

知縣查以謙亦選練勇總城下賊敗走官軍追至瓦店大麥廟擒老捻
張玉等陣斬馬步賊六七百賊竄西華二十九日圍陳州府城知府劉
拱宸率屬嚴守適毛昶熙自省城令總兵趙鴻舉帶勇馳至遂擊走之
賊奔鹿邑由生鐵塚黃臺寺一路歸巢初僧格林沁之軍於夏邑也以
進勦永城東踞匪不得分軍而西檄歸陳郡縣聞擒回巢先期馳報至
是賊已回巢各縣探報始達於是鄭元善劾劉拱宸及淮甯知縣李澍
西華知縣徐炳均摘頂又以洪貞謙帶兵不力屢奉 朝旨切責遂

劾罷洪貞謙而以副將劉車龍代領其衆是時永城一路捻圩漸次廓
清而勝保顧以其時奏調苗沛霖入關援勦回匪得 旨嚴飭並諭

鄭元善等遣兵堵截不准一人一騎入境智者見危於無形明者弭患
於未然豈不恃有 廟堂之勝算哉十一月鄭元善以鐫級去官

命張之萬代爲河南巡撫時棗陽竄捻屢爲楚師堵擊遂與粵匪合
股由新鄧淅川李官橋諸處環轉遁入鄖陽西竄房竹十二月僧格林

泌進軍逼渦河而陣檢黨日蹙羣思棄巢出竄而張樂行之姪張總愚因與陳大喜句結蔓延至於來歲豫軍又罷於奔命矣

卷之三



因調劉大昌復部為部市舊來龍嶺又調劉大昌
為將軍復部而取龍嶺舊部市舊來龍嶺又調劉大昌

自僧格林沁進軍渦岸擒黨日蹙欲結豫擒以拒我會汝擒陳大喜上年爲官軍勦敗棄巢出竄由楚境折回新蔡句結陳大常袁安愚秦宣等匪往來肆掠汝光各屬伏莽滋蔓於是張樂行令其姪張總愚偕賊黨孫四牙張鳳昌洪馬瞻等由潁州沈項一路援大喜而令劉狗孫醜出宋郡爲後應同治二年正月十二日賊頭起由苗家寨竄元牆集十五日及雞蛋劉家湖寨時大喜爲張曜余際昌等追勦遁入阜陽界吳老莊寨十八日張曜方督叅將尹嘉賓等擊大喜於秦宣寨北面煙塵大起偵皖擒已至侯家集張曜恐華莊坐營有失遂抱隊退而以馬隊乘夜襲賊於侯寨連破賊三壘擒擒首獨角虎周馬斬首二百餘級其竄油店橋者爲游擊李忠奎擊走十九日余際昌與陳大喜各賊戰皖擒驟至際昌令昌勝各營分路迎敵以剛銳營往來策應賊圍十餘重候補知縣陳學仁戰歿際昌往來盪決振臂疾呼士皆殊死鬪始得出

是時續竄之劉狗孫醜等賊於十八日至鹿邑蘇克金舒通額等邀擊於魏橋斬首數千級賊大敗歸巢巡撫張之萬聞際昌被圍檄左成元邵春仁及際昌所留茅家臺兩營同往援勦賊見官軍大集而劉狗等不能至遂與大喜合竄二十五日攻陷汝陽之史樓二十八日入棗王寨張曜令游擊南宮寶襲破之二月初一日攻新蔡之宋培基寨爲游擊周明崑擊退初八日賊由正陽之銅鐘店南走際昌追之初九日擊賊於正息接壤之土扶橋霍光玉寨賊夜遁初十日至息縣龐家渡署知縣劉鴻昌都司田映唐率勇練擊諸半渡斃賊數十賊竄羅山縣竹竿鋪知縣賀錫福邀之斬首數十級賊竄光山十一日際昌渡淮見賊據曹黃嶺集馬步乘夜進勦至旦及諸寨河集副將李殿元率步隊驟進賊驚棄輜重走游擊劉自順已革副將盧得勝等率馬隊追至吳椿店截賊爲兩都司連美直隸州湯聘珍守備楊長林踵至斬紅衣賊目及騎賊數十賊搶渡五里河我軍逼之副將浦本祥游擊靳玉書鞏玉

林自上游濟游擊甄樹德叅將劉興旺都司趙鴻先自下游濟兩路鈔襲賊不支向南潰奔我軍追之斬首千數百級賊竄白雀園議欲東竄商城循六安結粵逆張之萬令際昌等繞前扼之十六日際昌至胡莊店遣劉自順崔廷桂盧傳勝等率本部馬勇取道光州扼商城十七日夜際昌令各營襲賊先遣步勇攜火器間道至賊館縱火馬隊繼進賊驚潰羸馬器械遺棄滿山兵勇開道而行賊聞商城有兵不敢東竄遂南奔虎頭關十九日際昌追及督軍占山頂對山發礮賊分三路進自午至申我軍連捷賊知際昌追之急遂以小股據沙坪率我追師而大股前竄界嶺際昌遣連美及把總吳安邦簡精銳夜襲賊營冒雨疾行既至槍礮齊發響振山谷賊大亂墜崖谷死者無數悉竄楚之麻城縣際昌督軍出境裹糧而追麻城多稻田值久雨埂隴泥深日行二十餘里三月十一日抵麻城偵知賊已至蘄州謀竄黃梅廣濟宿松東下結粵逆楚軍尙未接仗張之萬以賊蹤過遠而汝郡方需兵遂檄際昌還

令留三營扼南固甫旋軍而賊復回竄夫子河白果二十一日至潘家塘中關驛逼近光山際昌聞之督軍由白雀園而出光山令劉鴻增守東界嶺與在籍知府何蘭馨團勇聯絡聲勢二十七日賊由山僻入境二十八日由新店竄至潑陂河際昌檄李殿元各營分三路進而伏馬隊於磚橋集令盧得勝出沙子岡誘敵何蘭馨及光山知縣沈振鈞集團練助之自辰至申斬首百數十級賊知光息有大軍扼守遂於光山之青龍寺口光羅接壤之河口集息縣之茶棚三路搶渡騎賊分列淮南北防官軍揜襲李殿元盧得勝等會各縣練勇亦分三路邀之斬悍賊百餘得車馬器械無算而守備王國元殞於陣四月初五日事也初七日際昌偕何蘭馨由息縣李家大竹園探勦初八日至正陽南界之李寨多所斬馘初九日黎明際昌率浦本祥楊長林連美李廷彪崔廷桂劉自順王秀林周大陸等進令李殿元等押鍋帳繼進自辰至午轉戰十五里至方寨南賊衆返拒李廷彪揮軍敵之賊稍卻俄而方寨西

出賊五百餘騎步賊數千橫截我軍際昌怒馬大呼挺矛疾刺賊衆辟
易而寨後又出伏賊圍十餘重我軍左右隔絕際昌被數十創歿於陣
游擊李廷彪都司魯華青趙嵩三守備申得三徐英杰王炳坤趙鴻春
汪大順千總連興胡登庸張得勝朱得勝王文慶蔡公興把總何成功
趙其蘭吳得元李廣田王玉珍張得福陳鳳山黃學立魯世林嚴登高
張殿文曹占春蘇文章陳廣玉外委楊守忠頓得之頓興成張福興蕭
萬貴江之學傅盛豐周學達彭心福五品軍功李占元余泗先等三十
九人均戰死將士傷亡過半越二日始護際昌遺骸傷痕鱗次無完膚
際昌驍勇善戰賊當之輒靡統將中最有威望及戰死遠近惜之事聞
詔以提督例卹建專祠追贈三代諸將附祀焉其救援不力之崔
廷桂連美王秀林周大陞楊繼才等均褫職當賊之回竄也張之萬慮
際昌所部轉戰累月奔馳數千里又衆寡懸殊恐有失命叅將孫之友
敖天印率本部二營往援至則已無及距際昌之死才半日耳賊旣戰

敗官軍其勢張甚分據方家寨萬安店大小張寨黃寨與張岡之賊聯絡蔓延及寒凍汝郡戒嚴張之萬檄張曜以豫勝六營臨勝營馬步分守要隘令孫之友敖天印游擊王文行等分駐張岡東西以斷援賊十一日賊攻正陽之吳家寨文行救之斬首數百級賊入萬安寨文行擊走之追至熊寨奮身力戰手刃數十賊左右驍皆中矛傷賊撲張岡忠心廟之友擊走之復敗之於殷家圩十五日賊衆六七千至張岡趙鴻舉飭各軍四面邀擊卻之追至周小灣而止賊旣不得逞志於我又不得併入張岡遂由東北渡汝河欲由新蔡歸皖張之萬預令張曜扼新蔣遂敗賊於宋培基寨又襲賊於李莊橋北岸斬首數十級其後股之在汝南埠者千總喻魁高自秀等亦於是夜襲斬賊數十追至河邊炮擊落水者二百餘賊竄平信鋪新蔡知縣唐咸仰會同尹嘉賓設伏誘之斃三四百擒賊目徐卯等賊由潁州一路遁歸亳巢賊之出也以正月申旬其時張樂行猶未伏誅迨僧格林沁進軍亳東各圩迎刃而解擒

張樂行降姜太林而直東教匪復熾僧格林沁率軍北趨苗沛霖戕官
據城煽蒙臺各圩乘機竊發故此股敗賊遂挈大喜而東據雉河舊巢
會蒙城臨淮被圍日急苗燄大張 朝廷命僧格林沁督軍南下由

臺東進討臺捻聞之復出竄五月捻首蘇老夢陳福王尿翼耀王廣張
安張搭拉等糾擾永臺境由耿黃寺三丈口立液寺寶告進犯盧廟營
廓等集另股李大箇子相盤等攻永城之丹城集石弓山銅溝集陳家
樓大肆焚掠時張之萬毛昶熙方以全力攻張岡而程四老砍及大喜
子姪等由六安州竄入固始之黎家集馬步賊萬餘沿途刈麥劉鴻增
與知縣陳贊擊走之賊由光州林家集過河西掠南茶菴高店杜傳店
張之萬檄孫之友尹嘉賓往勦五月初五日賊攻光山縣之慶元張寨
知縣沈振鈞擊斬數十賊竄東南大王廟官渡河十四日尹嘉賓率馬
隊馳至遇賊於新息交界之河口十六日蹙賊於河賊分兩股其一與
孫之友遇於息境之白土店十八日我軍進擊斬馘數十三更之友選

死士刦賊營火器並發斃賊三百餘詰旦賊糾衆反拒之友馳馬直前
手刃賊目二復追斬數十餘衆遁入王倫空寨二十日我軍進攻賊棄
寨走入譚家圩之友以練衆夾擊賊遂由馬店出境而尹嘉賓擊敗之
賊於二十日撲廖寨官軍與寨團會擊斬首數百級賊竄新蔡邊境總
兵保英與知縣唐咸仲率兵勇迎擊值嘉賓至前後夾擊賊走息縣之
趙莊王家灣六月初二日賊由固城倉一路遁回皖此股擾新息時歸
德正告警張之萬等以軍事方棘兵無可分檄叅將李世玉率所部由
彰德移赴永城及賊由息縣出境復檄之友取道商水陳州以扼鹿柘
世玉至永則前竄之賊已退六月初七日賊衆分據會亭驛左近世玉
會同會亭營叅將徐汝紳擊之斬首百餘級擒李壑林等初十日賊竄
柘城張橋集另股擾碑橋集十一日攻縣城知縣恒志卻之賊騎駛至
太康毛昶熙遣游擊呂振河呂浩然馬隊由商水探勦而之友軍亦至
遂擊走之賊折竄鹿邑二十四日我軍至十字河南遇賊騎之友躍馬

斫倒執旂賊目賊衆辟易擒斬五百餘二十五日追至亳西之李橋又
截殺百餘賊乃竄回亳東於時永鹿邊防日警會張岡已拔毛昶熙移
軍歸德而張總愚等因聞僧軍卽至遂傾巢出擾我腹地矣

卷之三

三

承慶三年秋八月丙子朔甲辰朔日丙辰朔日

初七日丙辰朔日丙辰朔日丙辰朔日丙辰朔日

初七日丙辰朔日丙辰朔日丙辰朔日丙辰朔日

豫軍紀略卷十

皖匪十四

毛昶熙之軍於歸德也分遣諸將進圖亳匪先克盧廟王廟吳廟口吳各拉諸賊圩令趙鴻舉邵春仁蔣東才由韓家集進兵呂振河李大成由營廓集進兵黃貴誠由權家寨進兵次第勦撫亳北楊廟等十餘寨亳南之沙土集孟家窩蔣家集丁固寺程家竹園程家北寨劉家礮楊家莊燕家莊袁家樓洪莊盧西樓西蔡莊朱牌樓小吳莊彭家埠口穆新莊韓衢衢諸處張總愚不自安遂糾巨捻程二老砍等謀棄亳巢別竄會聞僧格林沁軍將至苗沛霖復嗾之犯豫別遣葛小牛一股出潁州趨沈項於是張總愚程二老砍李庫等馬步賊萬餘閒道由鹿邑一路疾走七月二十一日至太康之五里口新集獨塘二十二日至扶溝知縣鄒金生禦之賊竄鄆陵臨潁七昶熙急遣孫之友永奎敖天印等取道鹿柘繞前截擊張之萬方在省飛檄張曜由陳州追勦益以李世

玉彭心友各隊令扼西竄路二十八日張曜會合孫之友等敗賊於鄆陵賊竄許州據大莊保全兩寨三十日張曜令張士元周明崑等進攻擒斬悍賊程虎李小蘭王妮子等復大莊寨而保全寨之賊聞風西遁於是分兩路張總愚竄禹州程二老砍走襄城而苗黨葛小牛一股亦於三十日入豫境之紙店八月初一日至淮甯之魯臺集犯西華縣城知縣徐炳卻之張之萬檄孫之友折由扶溝迎勦令李世玉扼於通許尉氏之間王文行由上蔡北趨會諸軍堵擊檄南陽鎮府擊南竄之程二老砍而以西竄之張總愚責張曜遏其入秦自督親軍出省駐許州策應各路時禹州被圍知州馬傳和晝夜嚴守賊西竄登封山中張曜追及於吳渡黃樓新店岳廟諸處擒斬甚多初九日張曜會同候補知府湯聘珍督諸軍抵嵩山之麓擊賊於沙果河窪村保英敖天印周明崑朱徵文彭心友周登高何成蛟等緣崖越塹轉戰半日斬賊目十三賊首二百餘級賊於隘口壘石斷我進兵路張總愚自據大金店初十

日張曜令保英等奪箕山口顧家嶺石橋諸隘鎗大金店之後令敖天
印等奪耿樓小中廟文村口諸隘通大金店之前自督親軍居中策應
山中要隘以箕山口顧家嶺爲最宋徵文潛師奪卡賊抵死相爭攢長
矛下刺宋徵文手接賊矛騰躍而上諸軍隨之登直逼大金店忽援賊
四合張曜急令王占鰲羅中奎等突圍入援拔出全軍宋徵文被重創
與把總王詩已戰歿敖天印進取耿樓冒矢石肉薄仰攻賊棄險逃我
軍乘勝逐北旣奪文村口諸隘而山後驍賊猝起循澗橫衝金店之賊
亦蜂擁出圍我軍數重敖天印持矛躍馬突重圍與援軍合賊始退千
總何紹林黃仕祥盛繼隆武金太等皆戰歿時秋雨連旬相持不得戰
而賊中黑旗一股已於初六七等日分竄偃盪入洛陽李村諸葛村十
五日賊分數十隊冒雨渡洛河爲知府厲文煒所遏遂回登封與大金
店之賊合二十八日賊乘霧突出我軍先已嚴備斬首數百級二十九
日張曜整軍進勦出營數里卽見賊衆蔽地至張曜令總兵保英領親

兵由中路衝壓保英馬蹄賊趁勢凌我軍幾爲所乘張曜驟馬而前手刃退縮者士乃奮會知府湯聘珍軍至縱橫盪決所向披靡副將張士元率臨勝營馬步繼進槍擊矛刺賊衆死傷枕藉張曜率馬步由坡後包鈔四面蹴之殲戮殆盡是時羅輔臣郝永剛等隊奉張之萬檄至軍張曜因地勢險阻宜導以鄉兵乃飛調大金店附近團練授以機宜三十日申酉之交選各營敢死士飽食嚴裝銜枚進晦夜初更野色不辨張曜率湯聘珍張士元身先士卒壓賊壘火器齊施賊出不意駭愕奔潰立將大金店附近賊卡踏毀殺斃無數於時各寨團練均由山僻熟徑抵賊巢火光礮聲震耀山谷大金店踞賊乃大怖棄巢南竄九月初二日入汝州境初三日薄魯山縣城知縣左駿章郤之初五日張曜率各軍及於魯山北寨之大營集斬首數十級初六日襲賊於撈飯居棟樹店甘露寨斬首百餘級十五日賊復攻魯山縣城左駿章以大礮郤之賊由鴟路關竄入南召前隊由鐵牛廟閒道窺城郝永剛率隊至與

知縣曾照合擊走之十六日賊復至我軍憑城列隊槍砲齊發十七日
又敗諸城下賊南竄王文行周明崑馬步各隊擊賊於城南十五里之
字河二十日張曜督各軍擊賊於十里鋪賊幟環立王文行怒馬疾
士爭首功皆大呼從之立斬悍黨數十賊勢披靡追至 字進將河迤
南賊竄城南二十里之草店圍攻山南太子望寨寨築山顛汲道爲賊
所斷勢危甚二十一日夜張曜密遣都司王占鰲許萬榜各率所部以
團勇爲鄉導間道潛師夜進連破賊五卡以五鼓馳入太子望寨二十
二日黎明張曜擊賊於七里灣馬步賊數千殊死鬥游擊王文行都司
楊春祥奮臂大呼馬隊由兩翼包鈔三軍譟而從之賊衆驚潰追斬首
數百級至山南王占鰲許萬榜亦由寨中衝出前後夾擊大破之王占
鰲中槍殞餘賊敗回草店二十三日張曜部分各軍令南召辦團委員
黃機率民勇伏城北鹿鳴山之麓把總陳大德領汛兵伏城西林木中
曾照領練勇列城南以大砲扼河灘會北風大作各軍順風發槍砲山

谷震動自辰至未斬馘千數追十餘里因溝狹箐密乃收隊二十四日夜我軍冒雨進至拐角鋪南踏破賊卡兩處草店賊列炬迎戰相持兩時卒爲我軍所敗二十五日賊撲太子望寨許萬榜出擊王文行雷才貴等閒道往援賊卻走是夜羅輔臣彭心友等閒道襲賊營斬首級二十九日賊分股圍孟山黑山等寨其大股仍據險與我相持百餘張曜與諸將計曰賊情詭譎其以精悍死拒山口阻我進兵將分股旁趨我不繞道出奇而坐受牽制非策也乃令郝永剛援孟山等寨令單體晉繞由草店以西趨南路周明崑繞由東山前進而親率各隊直逼草店賊見我兵四出恐被阻截遂於十月初一日悉衆南走張曜督各軍追擊初三日遇賊於鎮平柏樹廟殪其騎賊追至柳泉鋪賊由黑龍集竄鄧州之白太山廟初四日分撲鎮平西南之賈宋寨外委段明出擊至李坡遇大股援賊段明戰死初五日賊犯內鄉縣城張曜及之揮兵縱擊賊敗走初九日賊犯淅川廳城同知馬筮乾卻之賊據北鄉之馬磴

板橋蒿坪姚灣其地西通商維南達鄖襄張曜恐賊走秦楚遣豫中豫
後靖淮三營由北山繞赴西坪臨勝楚勝各營並郝永剛所部倍道疾
走荆子關自率嵩鎮豫右等營扼舊縣絕其入陝之路當是時僧格林
沁督軍至汴與張之萬議由鄆陵扶溝西華一路下蒙亳總愚聞僧軍
鐵騎且大至懼而西走依山阻險不敢入平原一步而程二老砍一股
則自八月初二日爲孫之友永奎等一敗之於靈樹寨再敗之於縣北
汝河口走郊縣初三日知縣張熙瑞會同在籍總兵黃得魁擊斬賊數
十賊由寶豐竄葉縣初六七八日孫之友等追及屢敗之初九日賊騎
至裕州知州鄭福申集團邀之賊竄賒旗店十一日犯唐縣城署知縣
金緘三絕勇出擊截殺越濠悍賊二十餘遂由源潭竄楚之棗陽隨州
闌及鍾祥縣境楚軍梁作楫歐陽正塘等軍躡擊之賊輾轉東走入黃
州境復回竄光羅總兵李殿元自息縣勒兵截之九月二十二日至二
十七日連敗賊於中興店七里岡賊據獨山李殿元偵知息境土匪吳

天鳳踞李寨欲結皖匪遂飭各隊乘其不備拔之殲其衆進擊獨山之賊斬殫數百其後股由麻城繼至李殿元邀諸潑陂河初四日賊潛由河口寨渡淮初六日代理正陽知縣朱淦敗之於阮店初七日賊竄汝陽東南之王岡慶寨初八日王文行一戰敗之賊由沈項邊境疾趨歸巢其後股於初六日至光山之草簍店渡夫店民團擊斬賊目陳元虎賊犯光山縣城李殿元令叅將靳玉書渡淮迎擊擒四十餘初九日敗賊於王家樓知縣沈振鈞合練總陳家善馮毅劉恩詔等團勇設伏助之斬賊數百擒魯金貴等救出難民九百餘人初十日賊渡淮北竄兵練追蹙之正陽知縣白渠復敗賊於油坊店賊由廟灣趨沈項尹嘉賓時駐槐店邀擊於谷集徐連陞亦率隊至先後敗之斬首數百級千總林宗魁戰歿十五日尹嘉賓等復以馬隊斬賊八十餘乃狂竄出境其葛小牛一股由西華逍遙集趨臨潁八月十二日襲陷民寨數處南犯鄆城知縣楊元祐登陴嚴守賊復折圍臨潁知縣查以謙以大礮卻之

十七日孫之友李世玉擊賊於潁西大石橋二十日賊由茨溝犯襄城適永奎馳至揮騎兵縱擊知縣陳基亮集團助之斬馬賊四十餘擒李長太等賊竄郟縣二十四日復折擾葉縣二十六日孫之友李世玉追及之賊走舞陽之北舞渡東竄鄆城西平其行剽疾遂由上蔡一路歸巢當是時也豫境有賊三股官軍應接不暇大河以南幾於徧地賊氛而復有李大個子一股馬步賊數千於八月二十二日由永夏之交突竄會亭營蓋苗沛霖嗾攻懷遠阻雨不能進故西竄也毛昶熙時在歸德急調呂振河扼蔡道口令總兵成景率標兵出擊賊疾走二十三日竄甯陵知縣方恩植截斬王得林等二十四日竄睢州二十五日至杞縣聞省城戒備甚嚴太康尉氏間均有官兵因折向東北二十六日至蘭儀高小集由考城趨商邱之丁道口二十七日呂振河李大成及都司傅守巽穆清遠李玉得敗賊於劉口斬首數百級李大成夜襲賊營賊衆向東狂竄二十九日我軍追至虞城會同知縣劉廷章練勇敗賊

於梢壩集賊盡棄輜重遁歸巢而程二老砍雖被擊出境後股尙踞沈
阜之交據沙河南岸與蔡河西岸之劉雲景一股相犄角十月十八日
尹嘉賓會同沈項縣丞王沛霖等兵團敗賊於河濱斃賊三百餘十九
日賊於方家灘偷渡兵團蹙之又斃賊數百擒五十餘二十四日賊復
由槐店東水淺處偷涉兵團四面橫截溺死甚衆奪獲楚省號衣及資
械等擒于張等程二老砍遣其弟程大寬姪程友正因投誠練總程新
正赴毛昶熙營納款昶熙命赴僧營僧格林沁受而羈縻之於是豫軍
全力始專注於張總愚矣

張總愚既竄浙川遂據板橋川窺武關而川匪藍二順由漢中興安竄商州駸駸東犯張之萬檄張曜嚴備飭道員葛承霖以新募湘勇四營由唐鄧馳往浙川助勦張曜抵舊縣後分布各營令李世玉屯蒲塘敖天印屯臥龍岡郝永剛屯攔子嶺周登高屯東塢保英單體晉屯花園張士元羅輔臣屯兩河口荆子關副將裴政屯娘娘洞以勦爲防日有斬獲賊伏板橋川山中專困民寨寨皆築山顛水道迂遠賊以數百人斷汲道卽一寨坐困一日間分擾數十寨其大股則扼板橋要路與官軍相持於是各寨紛紛請兵十月十五六等日張士元羅輔臣率隊往援阻山險不得進郝永剛絙崖而上因解金龍寨之圍十八日李世玉敖天印擊賊於毛塘斬首數十級二十日賊攻攔子嶺郝永剛營槍礮環擊不退張曜率軍由河西鈔賊背賊譁潰斬首百餘級乘勝解馬寨之圍賊墮崖澗死者甚衆二十一日賊繞東山復攻郝永剛營我軍先

於山口設伏突出要擊賊驚遁追至上集二十二日賊分股犯廳城同知馬筮乾擊卻之賊退踞馬磴夜攻二郎寨民團擊退二十三日復攻二郎寨又擊走之二十五日賊繞出河西攻駐馬板山兩寨張曜往救擒斬數百賊因壘石斷板橋川山口以拒官軍二十八日羅輔臣由靈官崖進屯橋溝伐木爲壘壘半成賊衆突至我軍憑半壘列隊擊退之追殺十餘里郝永剛亦截殺攔子嶺擄糧賊是日藍二順竄至西坪保英及高自秀邀之斃賊百餘賊敗至護水關界嶺距西坪十餘里三十日川匪大股驟至保英等鏖戰數時殺賊三百餘把總沈福全戰歿張曜馳援敗賊於回馬溝張總愚知藍逆已至率衆分犯郝永剛羅輔臣營我軍盡力截剿賊始引退李世玉亦敗賊於毛塘十一月初四日川匪犯重陽店營張曜督張士元等奮擊追殺二十餘里賊於花園關築木壘死守初五日我軍自回馬溝繞出花園關後直擣西坪攻破之賊向荆子關大路狂奔花園關賊亦棄巢走至小陡嶺敖天印先已據其

險要矢石交下追兵自後擊之殲賊數百鎗黃衣騎川馬賊三棄寶械
無算狂奔百餘里竄據青山口地屬商南距荆子關八十餘里張曜令
敖天印高自秀扼關前防回竄初九日張總愚分股犯攢子嶺鎖河口
毛塘臥龍岡郝永剛羅輔臣李世玉周登高分路卻之各軍滾營而進
十八日羅輔臣槍紮下鎖河口乘月築壘一夕而成與板橋川隔一河
十九日賊見營壘糾衆出攻羅輔臣率隊截殺斃悍賊數十是夜孫之
友會同馬筮乾襲破鎖河北雞山根賊營進踏河西賊壘斬首數百級
張灣賊衆皆不戰而遁張曜聞之夜令各營嚴備自督親軍由上鎖河
循岸東行遙聞賊騎蹴踏聲揮軍截之賊棄輜重狂走擒斬二百餘獲
賊謀言總愚欲往魯山嵩縣四棵樹暫屯再由潼關西竄張曜遂令蔣
希夷周登高自馬山口槍屯四棵樹令湯聘珍率馬步追擊賊於二十
一日攻內鄉縣城知縣朱琨擊走之二十二日賊竄馬山口都司尹彥
欽前湖北大冶縣知縣齊偉率練長梁榮薛德王信等敗之賊不得逞

由方山蔓山一路竄南召西北李青店張曜會同葛承霖自馬山口追賊豫軍新練馬隊副都統善慶色爾固善等統之會同僧營所遺翼長蘇克金道襄郊赴魯山扼賊西竄張之萬自許州移軍汝州督勦時僧格林沁已抵蒙城督總兵陳國瑞等一夕踏平苗逆七十餘壘斬苗沛霖擒石弓山擒首相盤及葛小年鄒煥林龔耀等寘諸法程二老砍李大箇子魏羣兒率衆乞降皖北大定於是陳大喜率苗黨三千糾擒李允劉三貓等竄至汝陽信陽正陽桐柏各縣肆擾旋由唐縣竄赴隨州尹嘉賓等逐之出境與張曜等擊板橋川之賊同時事也賊既竄據李青店白土岡諸處邊騎哨至魯山四棵樹於時張曜葛承霖等各軍四面入山二十五日永奎周擊賊於板山坪張曜繼至斬首數百級擒賊目張小安賊衆奔潰我軍屯板山坪各營連夜築壘詰旦賊大至李世玉羅輔臣營未就幾爲所乘永剛盟體晉雷才貴等率隊至揮盪決斬賊首數十級千總廖尙烈歿賊翻山遁二十七日張曜擊賊

於白土岡賊以大股迎戰移時各軍踵至賊遁入山谷十二月初四日葛承霖剿賊於留山堡副將張養吾率所部繞山疾進賊驚潰我軍鼓銳衝擊俄見蜈蚣旗數百突來接應勢將橫截我軍蜈蚣旗者張總愚之先鋒死黨也承霖以生力兵禦之游擊白定燮劉貴亨毛際惠大呼陷陣血戰兩時許斬首數百級逐北十餘里初七日張曜督率張士元程之偉周明崑等銜枚夜出縱火襲破賊營初八日賊馬步數千繞北山至板山坪鈔我營後張曜繞北山之北拊賊背都司楊春祥等殺入賊中賊隊大亂我軍乘之斬首三百餘級初九日我軍設伏於稻田溝雙廟溝誘賊入伏前後夾擊斃其四十三騎擒賊目張學文王雙成等是日賊分股掠馬牙山知縣曾照外委方振斗等率民團敗之而團長武生韓中選韓金鏐熊紹夢熊秋魏上豹魏成張文光張振聲霍玉祐等皆戰歿張之萬以賊注意西路而李青店白土岡居萬山中馬隊不得進惟以步軍分路扼防乃令總兵吳再升駐魯山之下湯葛承霖屯

四棵樹下湯之西爲二郎廟二郎廟西百餘里爲馬市坪四棵樹之南爲界嶺界嶺南二十里爲迴龍溝西扼馬市坪則可屏蔽高盧南守迴龍溝則可襟帶南召馬市坪距官軍板山坪營三四十里出迴龍溝則李青店賊壘在吾目中尋令吳再升由二郎廟進屯馬市坪葛承霖由界嶺進至迴龍溝闕南召一面示以空虛誘賊出走則以蘇克金等騎兵蹙之時蘇克金在魯山張之萬屢致函令其移屯南召左近而蘇克金以爲非策十五日以後晝夜陰沍平地雪深尺許山中蹊徑莫辨各州縣饋運軍食草料多有不能至者葛承霖將進兵阻於迴龍溝之險溝長五十餘里賊據溝口而壘葛承霖慮移營出溝爲賊所乘因議先由閒道擊散溝口之賊二十一日雪霽承霖選各營精銳攜椎斧攀巖鑿磴蟻附而上出溝口賊營之背賊大驚不戰而潰二十一日我軍乃以中左兩營自山溝出仍以前右兩營從兩旁山坡分進至趙家莊賊以萬衆來徧承霖以左右兩營與賊交鋒鏖鬥時許副將王有明把總

張紹先深入賊中中礮殲將士憤恨軍益力適右營自山頂墮下賊驍
愕承霖更率中前兩營橫出截擊縱橫盪決斬馘以千計賊狂奔我軍
追至王家莊焚賊營而返

皖匪十六

自葛承霖敗賊於迴龍溝口焚王家莊賊營後值歲除山中積雪賊驟
伏張之萬由汝州檄諸軍移營進逼葛承霖移界嶺營於迴龍溝在李
青店之北吳再升由二郎廟進屯南召之馬市坪在李青店西北張曜
營板山坪在李青店西南聲勢聯絡約期並舉三年正月初六日吳再
升率所部進抵馬市坪壘未就賊由李青店西北張灣驟至吳再升勒
兵出擊叅將吳永敷知縣賈立鰲陷陣斃甚衆吳再升率馬勇及洋槍
隊繞山後闌截斬紅衣賊曰各隊乘之火器齊發賊驚潰越山奔竄我
軍追至張家灣踏平賊卡數處是日葛承霖知吳再升已移營亦由界
嶺整軍進令嵩鎮後營扼分水嶺顧後路令府經歷劉載轅據迴龍溝
口備衝突十二日五更承霖率中前左右四營及親軍冒風雪出溝口
黎明至化坪距李青店三里令知府湯聘珍率左右營伏東山之麓自
率中前兩營渡澗擣賊巢擊斬哨賊於途俄聞西南西北礮聲震地賊

衆數千分路出西南一股直衝我軍游擊彭心友率本部迎擊劉載轅率中營策應正酣門閭西北一股越山澗下流襲我後我伏兵出賊駭奔承霖策馬怒呼將西南之賊壓退忽山北村後又出悍賊四五千衝我軍先敗之賊反戈復鬥賊陣中有馳馬指揮頭裹黃巾者游擊白定燮槍斃之賊氣沮我軍乘勢斬賊數百餘賊奪路狂奔時風雪愈大斂兵歸營十六日天稍霽賊馬步齊出犯西北馬市坪營吳再升先以三成隊迎擊賊洶甚乃以全隊繼之槍礮環施賊死拒游擊臯廣德中礮殞將士多傷者冉升率叅將吳永敖知縣賈立鰲等戰益力我軍洋槍隊所向披靡追近賊巢擒斬數百夜獲李青店逃人言賊畏各路兵厚知馬市坪稍單決意北趨已於附近之小黃土嶺一帶分股屯踞以備接應張之萬聞報飛檄副將尹嘉賓率所部取道南召守備賈文田率所部自四棵樹前進均赴馬市坪會合吳再升扼守要隘檄善慶率吉林黑龍江二起馬隊進屯南召之石橋與張曜一軍遙爲聲勢扼南路

十九日賊馬步二千餘由李青店竄白河張曜繞山鈔截戰一時久賊
敗遁斬首四五十級張曜因念各營距白土岡賊營甚近賊備必嚴若
選敢死士二千繞北山先襲李青店出不意賊可破而白土岡之賊亦
思潛襲官兵營是日五更張曜督兵疾進甫離營數里即遇賊張曜急
折回繞出臥石溝賊見兵從北至疑援師新到正彷徨間我軍齊出左
右夾攻賊死傷枕藉呼號狂奔追至白土岡賊入壘死拒我軍奮勇進
攻立破其街南一壘殺賊百餘忽李青店馬賊千餘風馳而至由兩面
沙灘鈔我後路敗賊復出壘抗拒張曜恐兩面受敵而千總李承元王
朝元把總王金智等適戰歿乃撤隊歸當張曜五更出隊時善慶尹嘉
賓等諜知賊在南召所屬劉家村小店諸處肆掠距石橋五六十里急
集馬步隊邀之遇諸張家村大呼殺入賊衆驚潰斬首百餘級追至二
十里外賊大隊齊出兩相撞擊我軍已深入以寡敵衆將士殊死戰磅
礴格鬥兩時之久賊乃敗回李青店山巢是時葛承霖聞張曜善慶等

同時獲捷遂簡精壯於二十三日昧爽徑襲白土岡賊卡賊排立岡頭扼我軍不得上乃陽爲列陣於前陰令游擊劉貴亨率所部由旁峽扳崖鈔其後岡上之賊見後路絕驚譟而奔我軍方乘勢拚殺而李青店大股四路援應值狂風大作望見賊旗五色懸舉入雲我軍逆風不得施槍礮乃收隊歸二十四日承霖由迴龍溝西出化坪甫立陣賊騎大至游擊彭心友怒馬陷陣衝賊爲兩各隊槍礮繼之斃賊百餘毀賊卡四是時張曜板山坪之營旣扼賊西南使不得逞賊又聞蘇克金馬隊已分屯南召色爾固善駐鎮平與善慶石橋之師相犄角乃圖竄西北二十九日賊馬步五千撲馬市坪吳再升營翻山越嶺一望無際吳再升令楚黔親軍分路迎敵鏖鬥一時之久再升槍斃領隊賊目賊譁潰我軍乘勢追殺數里當是時賊已困如釜魚山口官軍更番戰勝張之萬又奏調總兵宋慶一軍於皖僧格林沁道提督傅振邦至宛南勦剿軍氣百倍遠近皆謂掃蕩在此時矣而粵逆僞扶王陳德才僞端王藍

成春僞啓王梁成富僞遵王賴汝洸由漢中東竄一自石泉漢陰出興
安竄鄭陽一自西鄉紫陽碑坪平利至竹山一自寧陝出鎮安趨商州
皆會於南陽楚豫震動張總愚聞粵賊至嗾其黨拚死出山圖合粵逆
二月初二日賊由西南奔竄爲魚爾固善截回十一日葛承霖至化坪
遇馬賊四五百騎擊斃十餘賊反奔俄黃衣賊首率衆三四千呼嘯全
集副將張養吾游擊劉貴亨驟馬突賊陣追至午陳莊遙見李青店西
北紅旗徧野賊衆數千風馳而東絕我後路我軍分途應敵勢幾不支
適游擊白定燮等隊至諸將合力環攻戰三時久賊始退十三日賊衆
出承霖令鎗炮環攻一黃衣馬賊應鎗落馬衆掖之而去是夜張曜選
步卒襲白土岡燬其柵火光中見衆賊裸體狂奔我軍刀矛攢刺擊殺
無算惟街東一壘堅守不動敗賊皆逃入十五日葛承霖遇賊化坪扼
嶺而戰都司胡德亮歿於陣三更賊由李青店全股衝張曜營曜擊卻
之乘勝追至白土岡賊不復進巢棄壘走遂合李青店踞賊折向西北

馬市坪一路曜恐吳再升等有失乃繞前策應時葛承霖猶嚴陣而出十六日黎明至李青店擒馬賊詰之始知張總愚已西竄矣賊至馬市坪以騎賊當前步賊繼後徑攻吳再升營再升令各營嚴備將士憑牆守禦槍箭無虛發賊衆多落馬抵死不退再升乃選銳卒親出拏擊敗之副將周登高并嘉賓守備賈文田各率兵助戰追出二道河賊列陣於小黃土嶺尹嘉賓身先士卒手斬悍賊百餘賊狂竄蓋吳再升敗賊之時賊以此股羈我追師大股由北河口翻山疾趨南召之喬灘抵瑕蹈隙自正月二十九日之戰已決計取道於此也至是而張曜葛承霖等軍俱集會議追勦張之萬急檄各軍出賊前扼西北留精壯防南召各山口檄新到總兵宋慶一軍赴嵩縣調副都統善慶色薩固善馬隊由鎮平南召與宋慶合勦而漢中髮逆已近浙內交界之西峽口土匪陳大喜率衆竄湖北黃龍壩瑜山諸處將援張總愚時總愚已竄嵩縣十九日由龍王廟至黑峪二十一日張曜等軍及之戰黑峪街賊竄盧


氏之藥川廟子街三川諸處衰延二百餘里張曜令總兵保英副將李士玉各軍仍扼黑峪自率張士元尹嘉賓會合諸軍繞出盧氏分道防剿葛承霖駐冷水鎮顧北路宋慶屯陶灣顧西路張曜駐三川策應各路三月初八日宋慶至陶灣敗賊游騎初九日賊以大股來撲宋慶督礮隊環擊斃賊無算賊乃狂奔各軍方議會勦忽粵逆分股由商州東竄盧氏距朱陽關百里遂令賈文田率所部扼守保英繼之張曜葛承霖宋慶各軍皆有腹背受敵之勢乃激勵將士更番疊進張總愚始於藥川迤西山口築四營深溝高壘既而屢爲官軍所敗賊衆傷亡極多各壘皆爲我軍踏平賊不能支於十五夜盡棄輜重向東南大坪頭一路攀越大嶺由廟子街羊子溝長陽河二郎坪竄遁將由下關出馬山口奔鎮平內鄉此路萬山奇險賊馬墮崖澗死者無數張曜等各留數營駐藥川防朱陽關粵逆自率精銳踰險躡擊善慶色爾固善率吉林黑龍江騎兵會合尹嘉賓張士元步隊由黑峪山中大路徑趨馬山口


與張曜宋慶葛承霖等會齊前截後勦時粵逆頭股倪逆已由鄧州至新野攻縣城端逆等股由西坪攻內鄉其尾股鍾得終等爲總兵李殿元副將黃貴誠裴政等敗之荆子關繞由屈元岡一路竄內鄉而陳大喜大股自鄧州永青山南竄亦與粵逆合其朱陽關之賊漸由山中南竄大勢趨重宛南二十三日張曜宋慶葛承霖善慶色爾固善等馬步各軍同抵馬山坪詢知張總愚大股經寨前竄向內鄉纔一時許遂各整隊馳追忽粵逆大股自內鄉之西坪巡檢司赤眉城竄至旌旗蔽山谷我軍駐隊邀之游擊蔣希夷首先陷陣尹嘉賓程之偉鈔賊後善慶色爾固善以鐵騎橫截之戰四時久斬首八百級擒二百餘賊向南狂竄其內鄧新唐一路粵逆大小十餘股及陳大喜等縱橫旋繞無處非賊而張總愚自此遂與之合是時僧格林沁統全軍由河洛至宛張之萬檄各軍會之緊躡賊踪分道進勦賊由新鄧一路入楚四月初二日僧格林沁敗捻股於隨州之沙岡白口賊東竄犯信陽之平靖黃土兩

關張之萬時駐南陽檄葛承霖一軍及連美賈文田馮聖傳李承先等
營扼賊信陽十二日馮聖傳擊賊於城南三里店敗之十八日賊攻州
城爲連美等擊走葛承霖亦敗賊於馮家莊賊衆紛向南奔十九日承
霖等敗賊於譚家河追出武勝關二十二日各軍又連敗之於廣水驛
長正河大山口石塘諸處斬首三百餘級賊悉東竄前股僞端王藍成
春與陳大喜合竄黃州之下巴河二股僞遵王賴汝洸與張總愚合由
羅山宣化鎮竄至黑斗關爲副將徐連陞一軍擊卻竄入黃州境三股
僞扶王陳德才與捻匪張佃江合由安陸竄至應山後股僞啓王梁成
富爲張曜等擊敗追至鄖西遁入陝境張之萬以東路軍事日繁檄張
曜朱慶善慶色爾固善等馬步悉往信正光羅一路扼要防勦皆聽僧
格林沁調度賊畏僧格林沁鐵騎盤旋於豫之光羅皖之英六楚之蘄
黃其地田塍交錯我軍不利馳騁而髮逆則志在赴援金陵阻於江楚
防軍不能東下亦分踞於三省之間自四月以後此出彼沒來去靡常

張曜朱慶善慶色爾固善等與皖楚諸軍大小數十戰遇賊卽擊所擊
皆粵逆而皖捻實與之合臨陣莫可辨晰故戰事詳於粵匪部云









豫軍紀略卷十一

皖匪十七

秋八月張總愚由麻城竄黃安之七里坪初總愚與各股粵逆合從橫楚豫之交凡五閱月至是扶逆陳得才爲我軍破其沙河木城遂偕端逆藍成春自麻城東竄羅田尋與馬融和一股合而遵逆賴汶洸與總愚營壘最近扶逆句合不及總愚乃合遵逆及毫捻任柱牛老紅等別竄自此檢蹤始顯然可別矣張之萬時駐汝甯檄前敵諸軍就近由僧格林沁節制僧格林沁令張曜徐連陞等各軍剿東竄之賊而令成保色爾固善宋慶善慶楊長春等躡西竄之賊八月初二日追至羅山之蘇家河陳家河未陣而賊猝至我軍小挫僧格林沁適親督軍至羅山九里關戰於蕭家河都統舒通額等皆戰歿將士死者甚多初五日賊圍羅山之永安寨初七日至潘新店豹子山大股據倒座灣初十日陳國瑞督軍追至敗賊於竹竿鋪十二日賊分竄光山之文殊寺張朱店

僧格林沁令成保陳國瑞色爾固善宋慶善慶楊長春巴揚阿等軍追擊十四日辰刻及於光山西南之人和砦賊於南山列陣宋慶陳國瑞分東西迎擊戰三時久賊愈聚愈多巴揚阿戰歿賊由新店長潭虎灣竄黃安麻城分據東南之范店正南之苦竹西南之雙山門即以雙山門爲老巢總愚居其中二十六日陳國瑞等從西南進攻衝散賊隊搶佔山卡礮臺令勁兵守之自由雙山門追至石家埂接戰良久殺賊酋一斃賊無數賊譁然奔二十七日我軍五鼓進攻賊已先時竄陳國瑞揮軍追之至黃安大山賊依險負隅勢難仰攻乃營箭長河扼其回竄時扶逆等遠竄張之萬檄張曜等軍馳回豫境由南溪進屯岳嶺關以顧北路九月初九日宋慶陳國瑞成保色爾固善將本部出擊戰於麻城之槐子店斃賊數百追斬三十餘里賊竄白果我軍進至閭家河十四日至宋埠偵知賊據新洲會副都統常星阿等率馬步軍至擊退之賊折而東趣由上巴河撲蘄水其行剽疾僧格林沁督諸軍追之張之

萬以長嶺關一路有張曜扼守令趙鴻舉率領蔣東才李大成彭心友等營扼松子關一路各路官軍力扼西北二十二日僧格林沁敗賊於蘄水北三家店追殺二十餘里賊竄縣東陳家壩二十七日楚軍敗賊於青石嶺二十八日僧格林沁敗賊於蘄州張家灣獅子口賊分兩股遁張總愚等竄太湖宿松望江之間陳大喜等竄英山以東芑茅街楊柳灣諸處漸近商城張之萬慮陳大喜回竄汝郡檄王文行崔廷桂扼守光羅適中之地張曜扼守金家寨益以趙鴻舉蔣東才彭心友等顧邊境會各股粵逆十餘萬衆爲僧格林沁擊敗次第乞降巨憝伏誅唯賴汶洗一股仍與張總愚合總愚復與陳大喜折趣豫境據光山之沙窩十月二十一日陳國瑞夜擊賊於沙窩之西擒斬數百賊竄新店復截殺尾賊甚衆二十二日楊長春進擊賊斬首數十級救出難民無算二十三日色爾固善宋慶會陳國瑞戰於新店賊大敗追殺三十餘里時僧格林沁督軍至羅山張之萬由汝甯馳往會商方略防賊西竄遂

調張曜屯唐縣令湯聘珍率新募之軍防宛南以崔廷桂輔之令宋慶色爾固善楊長春等軍仍隨僧格林沁躡賊西進而降衆經由汝光者叵洲難恃張之萬以情形入告暫緩至宛會張賴各逆全數西竄十一月初九日僧格林沁擊賊於襄陽北蔣家溝賊死戰不退初十日竄至鄧州白洛堰十四日僧格林沁督軍追及戰於鄧境西南之唐坡賊傾衆出門降衆果不用命幾中變我軍更番衝擊復爲霧氣所乘遂失利僧格林沁率數十騎入鄧州收集敗軍十五十六等日賊攻鄧州城我軍擊退之賊竄東北腰店旋由南陽境之青華鎮保安寨窺郡城適道員張汝梅將兵爲張之萬前驅至郡會同鎮府嚴防賊知有備竄鎮平之黑龍集先是湯聘珍率軍抵平鎮慮馬山口爲賊熟徑令彭心友邵春仁將所部入山扼之二十日崔廷桂令李承先率馬勇出探獲賊黨劉漢魁等言賊欲入山乃令金錦林王太朝兩營協勦遇賊於趙河相持一日夜二十二日湯聘珍崔廷桂等率各營並進斬其步隊賊首賊

向西北逸張之萬由汝赴宛二十六日抵舞陽知賊勢趣重西北遂停軍於舞令王文行拔隊前進檄飭河陝汝三屬團練堅壁清野扼賊北竄賊於鎮平境內盤旋數日屢爭馬山口之險我軍皆擊卻之二十三日賊復乘夜攻營彭心友設伏擊之賊皆反奔斬首十餘級山高冰滑賊墮岩死者甚衆二十五日湯聘珍進屯石佛寺寨賊相率北趨由南陽之石橋走南召奔魯山騎賊四出二十九日薄魯山縣城署知縣楊宗頤督民團擊卻之張之萬令湯聘珍等各軍繞道南召魯山出賊前顧河洛以張曜宋慶兩軍新挫乃令汰舊部之弱者益以臨勝四營及新募飛虎一營隨僧格林沁進勦張之萬自駐葉縣時賊分據魯山之梁窪寶豐之張八橋騎賊四出掠糧十二月初九日僧格沁督軍至寶豐賊騎數百馱近城僧格林沁設伏以伺賊偵知逸去夜僧格林沁密飭勇目張玉等導官軍襲賊壘賊先已驚走十一日僧格林沁令副將駱得勝等再襲之銜枚而進破其張八橋賊壘賊奪路奔獲其馬匹器

械甚夥當張曜宋慶湯聘珍等先後馳抵魯山也賊乘我未陳率黨猛
攻張曜揮軍擊退乃築營十一日各軍分道進列陣誘賊相持半日賊
不敢出十三日張曜選奮勇夜擊賊營拔柵而進斬首十餘級附近據
匪皆聞風逸十五日張曜等復勒兵出途遇賊馬追斬數十至段店北
忽梁窪援賊大至四面包鈔豫勝營外委王克仁諺字左營守備周步
升皆戰歿十九日張曜宋慶湯聘珍等敗賊於魯山城北山坡二十日
率各營由霍山廟間道攻賊巢伏馬勇於霍山廟西北我軍及巢大呼
銳進賊驚起倉皇奔竄盡棄刀矛旂幟追至梁窪之西日向辰賊衆麕
集我軍佯卻以誘之過霍山廟數里賊已入伏我軍回戰馬勇突出鈔
擊賊大敗陣斬無數生擒悍賊陳六等二十一日僧格林沁復大敗賊
於寶豐張曜等偵知賊將遠竄於二十二日夜勒兵至魯山之廊店遇
賊逐之至瓦店東見山窪內衆賊蟻聚我軍薄之賊欲迎拒而後路裏
脅之衆已瓦解遂大敗竄汝州二十四日僧格林沁先追及於臨汝鎮

張曜等踵至斬首數十級僧格林沁繞由洛陽進屯宜陽之韓城鎮賊不敢西向至龍門復由伊陽之南翻山遁二十六七等日張曜等軍分路進剿皆獲勝而皖軍郭寶昌猝遇賊爲其所乘賊遂於二十九日回竄魯山四年正月初三日僧格林沁及賊於魯山戰不利副都統蘇倫保恒齡等皆力戰殞會陳國瑞將所部至賊不敢逼初四日賊走東北前隊賊逼近葉縣城張之萬親軍僅數百乃益爲疑兵遣死士馳精騎擊賊游兵斬首十餘級賊始退沿葉邊東走襄城僧軍踵至初六日夜遣陳國瑞選勁卒乘風雪進擊賊營賊衆大亂斬馘數百焚死者不可計追至石固驛郭店皆獲勝至尉氏賊復由西竄東南張之萬以省防緊要檄令湯聘珍率所部進駐省城南門外賊不敢逼十四日大風揚沙霰冰交集張曜部將周明崑周登高等由洧川追賊至尉氏之保全寨擊賊於狂風大雪間殺傷各相當賊由鄢陵南趨十七日各軍跟蹤進十八日春壽蔣希夷乘賊不備破其數卡賊驚走我軍追之截斬無

數適僧格沁大隊馳至復令各軍過河馳擊忽援賊馬步擁集敗賊復
反戈相向我軍力戰竟日賊抵死不退焉隊爲賊所乘宋慶張曜見事
急急築營會同郭寶昌憑壘迎擊始得壓退二十一日賊由臨潁圍城
掠西平署知縣金福林登陴嚴守礮鏖三日賊目賊沿洪河奔張曜宋
慶等躡後雕勦僧格林沁駐軍鄆陵整部伍張之萬因有 旨令回

顧省防遂由襄城督親軍回省會四川副將徐邦道將川勇二千至張
之萬汰其老弱令馳赴南路會同張曜等視賊所向躡擊二十三日及
於西平境時賊卡林立徐邦道乘夜襲之賊不虞官軍北至悉駭走由
上蔡遂平之五溝營黃埠南竄沿途裹脅二十七日及汝陽破金鄉寨
二十八日破唐營萬家兩寨王文行率隊擊之斃賊十餘騎賊於三更
遣黨潛伏汝郡城東襲城毛昶熙時尙在城督同文武嚴爲之備賊不
得逞走正息新蔡之交各軍馳追僧格林沁亦由鄆陵整軍而行
朝旨命張之萬省防布置畢仍出省督勦不得恃有僧格林沁在豫遂

任賊縱橫到處蔓延等語之萬以豫軍盡隨僧格林沁勦戰地方政事亦巡撫之責不能不暫留省城以顧根本乃上書自陳其畧曰臣以地方疆吏受命督師掃盪賊氛是臣專責自抵任以來帶兵出省東

馳西驟已閱三年雖兩次肅清淮蔡而遇此髮捻合竄各股未能迅致

天討日久無功咎無可追若復恃有僧格林沁在豫任賊狂竄蔓

延則臣罪戾滋深具有天良何敢出此臣部步隊本有三十餘營合之

上年敕調來豫之吉林黑龍江馬隊共有馬步一萬餘人以兵力

計之原可與僧格林沁相輔而行用收夾擊之效自上年賊竄馬山口而後所有各營均隨僧格林沁追賊即均歸僧格林沁調遣此後臣由南陽移紮汝郡復由汝郡移紮平葉縣襄城止有親軍數百人隸臣左右此外如張曜宋慶湯聘珍等久已隊均經僧格林沁派令追賊出境及此次追賊於魯寶之交或經年甲子月始得接見各營將領一次至地方團練止可責令守寨本非訓練之師難供征調之用伏查臣之官則巡撫

也臣之責則剿賊也臣有剿賊之責而無勦賊之權且因有勦賊之名
並不得稍盡巡撫之責何則地方公事分寄於藩臬兩司而總其成於
巡撫也非兩司則公事無以分治非巡撫則兩司無所諮稟而行故巡
撫兩司不可不朝夕見面臣受任即帶兵出省與兩司相見之日絕少
遇有公事僅恃書函千里內外往返需時筆墨有難達之情事變有不
齊之致函商已定則必憚於更端批荅稍遲將別滋夫疑竇人情睽隔
久則猜度易生旁觀窺伺多則浮言胥動此則臣之久不在省於地方
公事不能整頓之實情也假令臣所部兵勇尙足辦賊兩害相形則去
其重自應專心兵事俟寇氛稍盪再爲整頓地方現在髮捻各股愈裹
愈衆臣部親軍數百人而外更無兵將足資調遣臣名爲出省帶兵寔
則隨僧格林沁之後奉行

欽差大臣文書而已儻臣果欲出號施
令或與僧格林沁意見相左則前敵將士何所秉承是則非徒無益又
將有損於軍事臣斷不敢鹵莽至此或謂臣不出省則僧格林沁後路

無人一切軍火車馬草料米麪必致呼應不靈此則更非所慮也此時僧軍所需如擲營則用大車五六百輛兵過則日供草料各三四萬斤羽書一至咄嗟立辦固無俟撫臣之督催也臣在外已閱三年雖未嘗躬冒矢石而櫛風沐雨業已甘之若素必非有所畏於出省而僧格林沁與臣共事二年每謂臣能顧大局臣亦非別存意見而藉詞以冀不出省者誠以軍務地方均屬 朝廷公事臣出省實與軍務無所裨益而地方公事因之積壓不少此次到省據藩司蘇廷魁臬司王正誼屢以爲言勸臣奏請在省暫駐伏惟臣子萬不得已之苦衷非極艱難不敢直陳於 君父而地方一切應辦公事苟有補救亦可仰荅夫

生版云云奏入

報可並諭僧格林沁隨時察看軍情如必須張之

萬出省卽行飛咨該撫遵辦時賊方擾新蔡知縣章慶保令守備黨錫齡集團擊走解徐家寨之圍殺馬賊十餘步賊百餘賊犯汝南埠游擊王玉佩擊走之二月初四日賊渡汝河撲寒凍寨徐邦道馳援斬悍賊

數十騎生擒賊十五都司郭紹欽歿於陣時陳大喜匪黨葉鳳成葉和尚等率馬賊二十餘騎冒官兵至閭灣陰句匪黨蔣希夷知之誘擒殆盡復會郭寶昌敗賊於正陽之蘆岡小陳等寨初九日張曜宋慶抵寒凍乘夜探勦餘賊皆驚走於是正陽信陽之間賊蹤四出擾及息縣之土扶橋彭家店諸處知縣蔣彙之督勇擊走之十四日賊由陡溝大林店渡河後股尙阻北岸適張曜等軍追及蹙之淹斃無算先是張曜慮信陽空虛請毛昶熙預飭湯聘珍高白秀等軍馳援湯聘珍駐兵南關自督馬隊及叅將蔣京才都司鄒春楊等至東十八里鋪將擇地安營忽遇山岡馬賊蜂擁而下遂整隊迎戰千總蔣尙均揮戈直擣兵勇從之賊大駭遁回十五日黎明以前中左三營分列而以右營專司築壘賊以數百騎來犯我軍槍列如林立時擊退至雙林寺賊忽回騎相持彼此對峙聞賊之馬步大隊已由十八里鋪東北五里墩諸處擁至斜長十餘里別遣賊馬數十騎渡河至南城對岸三里店窺我後路湯聘

珍急調高自秀一營守東面遙爲聲勢令各營抱隊穩紮部勒甫定雙林寺之賊卽渡河向三里店一路進攻信陽南關十八里鋪五里墩之賊分南北兩路進我軍以槍礮環擊賊不少卻都司胡得勝守備丁萬春千總郭金友把總王九如趙昌虎蔣文行劉柏倫皆戰歿蔣東才及已革知縣談燮和把總樂得勝等袒臂血戰歷二時久賊始退其攻南關者爲城中大礮轟擊退據中山店十六七等日張曜等軍至信陽夜肇獲勝十八日偵知賊大股在中山遂與戚保郭寶昌合兵進攻賊折竄東北會陳國瑞督隊東來兩路夾擊張曜郭寶昌兩路大捷斬獲甚夥賊遁至五里店西南山中十九日賊由十八里廟山口突出勢洶甚各軍整隊截勦自已及申斬賊七八百二十日僧格林沁軍到令各軍緊追至陽河之北賊已由陡溝長臺關疾趨正北二十四日陳國瑞敗賊於確山縣東之確山殲其長髮老賊二千餘得馬三百賊由遂平西北犯二十六日至鄆城二十九日圍扶溝知縣鄒金生擊走之三月初

一日由尉氏通許犯杞縣知縣查以謙出奇鈔擊頗有斬擒賊至蘭儀之儀封壩頭水口村及睢州之匡牆西陵寺榆廂鋪諸處初三日賊騎駛過乾河掠考城之張莊程莊大股悉入山東曹縣境僧格林沁追抵睢州諭張曜等軍馳赴虞城防回竄潁亳自督馬步大軍由考城追抵定陶張之萬檄湯聘珍崔廷桂北渡扼直東豫三省之交嚴飭河北鎮道督率兵團分防各隘保完善時賊騎剽疾數日間曹單定陶城武河澤鄆城鉅野金鄉濟寧諸處賊騎徧野

詔書責問東境既有防兵

何以任令闖入漫無準備僧格林沁不肯截其北竄之路致令擾及完著措置殊未合宜

諭湖北巡撫吳昌壽遵照迭次諭旨帶兵直抵

豫境爲僧格林沁接替之軍迅將豫省餘匪奮力勦除張之萬於吳昌

壽到豫時飭令各營兵勇聽候調遣張之萬以賊已去遠張曜宋慶蔣

希夷等軍現屯虞城高自秀駐宋郡中五臺寺徐邦道屯商邱劉口集

已敷防勦楚軍不利馳聘請免調吳昌壽來豫於是

命張之萬總

督東河授吳昌壽爲河南巡撫半月間賊由曲阜向東南滕嶧復渡運河折回東北奔蘭山南趨郛城赴贛榆青口僧格林沁一路追勦賊不得喘息三月二十九日賊由沐陽西竄峒嵒窰灣折走呂家湖西竄邳境尋入東省汶上縣境向濟寧東平由開州袁家口渡運河向西南奔大名開州長垣張之萬檄各軍嚴防黃河時已四月下旬吳昌壽甫抵任令湯聘珍崔廷桂扼龍門口宋慶張曜蔣希夷等軍駐考城會合聯絡與僧軍收夾擊之效黃河各口渡船悉徙泊北岸調楚軍提督譚仁芳一軍由許州進屯河干布置畧定乃議渡河親駐滑溶督師防勦

卷之八

一、
二、
三、
四、
五、
六、
七、
八、
九、
十、
十一、
十二、
十三、
十四、
十五、
十六、
十七、
十八、
十九、
二十、
二十一、
二十二、
二十三、
二十四、
二十五、
二十六、
二十七、
二十八、
二十九、
三十、
三十一、
三十二、
三十三、
三十四、
三十五、
三十六、
三十七、
三十八、
三十九、
四十、
四十一、
四十二、
四十三、
四十四、
四十五、
四十六、
四十七、
四十八、
四十九、
五十、
五十一、
五十二、
五十三、
五十四、
五十五、
五十六、
五十七、
五十八、
五十九、
六十、
六十一、
六十二、
六十三、
六十四、
六十五、
六十六、
六十七、
六十八、
六十九、
七十、
七十一、
七十二、
七十三、
七十四、
七十五、
七十六、
七十七、
七十八、
七十九、
八十、
八十一、
八十二、
八十三、
八十四、
八十五、
八十六、
八十七、
八十八、
八十九、
九十、
九十一、
九十二、
九十三、
九十四、
九十五、
九十六、
九十七、
九十八、
九十九、
一百、

皖匪十八

張總愚賴汶洸等既竄鄆城西北水套中其地三面阻河僧格林沁以爲賊竄絕地須乘時爲一鼓盪平計督各軍晝夜進兵時賊已勾結鄆北伏莽數萬四路麕集官軍方接戰於曹郡城西伏賊盡出僧格林沁遂遇害將士死傷甚衆餘皆潰散四月二十四日也巡撫吳昌壽甫卽任聞報飛檄駐考城之張曜宋慶等軍固邊防勿輕戰檄湯聘珍崔廷桂力扼龍門口嚴飭河北鎮道會同扼守船隻悉徙北岸派員分查僧營潰兵安插省城外免奸宄溷跡並奏言捻逆此番狂噬如虎生翼豫省兵力祇有宋慶張曜湯聘珍蔣希夷等步隊合計不過萬人三省馬隊可用者悉交善慶帶往僧格林沁前敵現有馬勇零隊尙待歸併城營臣所帶楚軍四營二千三百人初到豫省人地生疎現在北路屏藩止恃黃河一水則封疆之憂旣切畿輔之備愈殷臣一面督飭河北在防將士嚴守河隄梭巡堵禦其直東兩省河身綿長數百里誠恐防不

勝防惟有請

旨飭下直東督撫合兩省兵力聯集民團扼守河干

務期周而至僧營馬步各軍經此大挫該營將領惟總兵陳國瑞素爲賊中畏憚因憂譴畏譴不克自厚兵力致不能挽回此敗現准將軍國瑞來咨該總兵身受重傷尙無下落設使其人尙在收合餘燼或可有爲該總兵本有幫辦軍務之責可否仰懇

天恩仍舊錄用責令殄

滅餘氛爲僧格林沁雪此仇恥擒逆以殘破之餘而能折我

中朝

柱石驩勝而驕死亡將至果蒙

聖明簡放重臣總統陳國瑞以驍

敢善戰助之轉敗爲功當必不遠軍無常形惟在

宸衷之敬畏與

天心相感召耳臣秣馬厲兵敬俟

朝命一經總統有人使當

會籌方略殫竭血誠誓清寇盜以紓

宵旰之憂

上聞僧格林

沁戰歿

宸衷震悼卽日派乾清門侍衛克興阿岳林恩全吉凌前

赴軍營迎護僧格林沁靈柩回旗以國瑞等不能救援主將分別革職
成保等皆逮治閣敬銘張之萬等坐貶有差其
欽差大臣關防令

國瑞暫行護理

賜僧格林沁祭葬飭立功各省建專祠其子布彥

諾謨祐襲親王爵其餘典禮皆有加另

賞銀一萬兩給蒙古受傷

官兵

予陣亡之內閣侍讀學士全順等優卹附祀

命大學士

兩江總督曾國藩以

欽差大臣督辦直隸山東河南軍務地方文

武均歸節制

諭直東豫江皖等省聯絡聲勢不分畛域會擊竄匪

吳昌壽請就黃河船隻添置炮位配以濱河弁兵往來駕駛賊來卽擊
得旨允行乃令崔廷桂先以所統兩鎮官兵就船操習吳昌壽督

親軍渡河駐滑縣親履河干察看布置以黃河自考城縣屬之銅瓦廂
決口北行當考城之西封邱之東不過數十里出豫境而東其北岸地
面爲直隸之長垣開州清豐南樂又東出直隸境爲山東之濮州范縣
陽穀壽張在平齊河濟陽濱州利津各州縣地非三省同心合防難期
周密因奏言黃河北岸山東地面最長直隸次之河南最短儻賊得偷
渡無論由東由直由豫厥害惟均北岸渡口在豫省者只有封邱所屬

之尙店臣已派湯聘珍崔廷桂扼守在直隸者則長垣屬之翟莊口竹林口與山東曹州府屬之清澤對峙在山東者則濮州范縣爲最要又壽張屬之張秋鎮乃黃河穿運歸大清河處水平岸狹往來遂爲官渡其上爲齊河其下爲李連橋皆成官渡而李連橋尤狹最爲緊要其他私渡及水淺處更未可悉數故防河以山東爲最要伏讀初三日

上諭崇厚已於初二日起程取道景州前赴畿南著卽催調洋槍隊伍迅速赴景州一路扼防等因臣伏念景州之防所以防運齊河之防所以防黃可否請 旨飭下兵部左侍郎崇厚令其迅速督帶洋槍隊

伍前赴齊河一帶擇要駐紮賊不得渡黃何由渡運則畿南之防固矣

詔崇厚斟酌情形慎籌進止如劉長佑所派駐防景州之兵足敷扼勦崇厚卽可進紮齊河並 諭直督劉長佑東撫閻敬銘添籌礮

船嚴防河路時賊衆縱橫於鄆城清澤鉅野及濮范沿河欲伐樹木排造船筏由長溝等處偷渡運河竄至濟甯土圍以外邊騎至甯陽西南

滋陽兗州泰安境皆有賊

詔陳國瑞一軍移防張秋以東沿河口

岸劉銘傳張樹聲周盛藻詹啓綸劉松山趙三元水陸等軍咸赴援勦
僅會國藩迅速北上派軍會擊會國藩方懇辭節制三省之命

詔謂軍無統轄號令不一最爲兵家所忌會國藩更事旣多成效夙
著若非節制三省恐呼應未能靈捷勿冉固辭至所稱駐紮徐州專辦
十二府州捻匪直隸獨處河北應責成督臣另籌防兵不可調南岸之
師往來渡黃河南山東兩省除歸陳克沂曹濟外其餘各屬應責成兩
省巡撫另籌防兵不可使剿捻之師追逐千里永無歸宿等語著劉長
佑閻敬銘吳昌壽卽照會國藩所籌將應行防守事宜認真布置會署
兩江總督李鴻章恐賊北趨震驚畿輔令常鎮道潘鼎新將淮勇十營
由海道赴天津防剿 溫旨褒獎謂能視國如家顧全大局是時各
路援軍大集於直東之間賊方盤踞長溝圍攻嘉祥縣城陳國瑞劉銘
傳丁寶楨各派勁旅攻拔長溝賊寨陳國瑞詹啓綸等亦進兵獲捷解

嘉祥之圍賊復遁回鄆濮分竄蒙宿矣五月十六日張總愚賴汝沆等
悉竄亳州據雉河石弓山白龍王廟諸處煽惑裹脅逆裔大張牛老紅
竄據潁州府東北之江口集沙河沿任杜李允竄據宿州之臨涣集龍
山諸處並僞張官軍旗幟襲破高爐集安徽藩司英翰方軍於雉河四
面受敵皖事日急吳昌壽飭張曜宋慶等軍由烏橋集步步進逼程之
偉將馬勇前驅赴亳湯聘珍譚仁芳扼鹿邑兩商漕運總督吳棠請以
銳師出濉溪口臨涣集一路擣其東北安徽巡撫喬松年簡勁旅由潁
上太和進兵攻其東南豫軍由西北一路進兵爲四面擣巢之計程之
偉行至商邱之劉家口與賊遇揮軍縱擊截賊爲兩殲斃數百賊由烏
橋集竄併亳東雉河之圍日急賊知我軍逼近句回賴汝沆牛老紅任
杜等自白水河以東至義門鎮兩岸連築數十壘道路梗塞我軍若深
入賊必由後路截我饒道進退失據張曜與宋慶蔣希夷湯聘珍程之
偉等議於亳州迤東二十里之十九里溝四十里之釣魚臺五十里之

白水村七十里之義門鎮分隊穩紮魚貫而進吳昌壽檄譚仁芳由鹿邑進屯十九里溝俾張曜等得以所部兵力策應前敵閏五月初八日蔣希夷至義門鎮遇賊衆自丁壩寺渡河立擊退之薄暮馬步賊復抵渦河北岸勢將偷渡擾我後蔣希夷以長槍擡礮回環轟擊賊始退吳昌壽以兵力尙單非三省會勦益以馬隊不能制勝因奏言雒河附近各圩皆爲逆匪盤踞英翰以孤軍困守四面皆賊危險非常臣疊次函咨江皖等省合兵會勦而齊集尙復需時臣伏念賊之長技在於飄忽獷悍來無可備去無可追官軍坐受其困及其飽掠歸巢似可四面兜圍以待檻獸釜魚之斃而其勢斷非一省兵力所能辦一旦裝旗再出則燎原之禍又不可言臣愚以爲目前之賊方圖隊伏則三省會勦誠爲萬不可失之機除劉銘傳一軍應遵 旨留顧北路之防其陳國瑞一軍旣奉 旨追賊此時皖事日亟應請 飭下該總兵拔營速進至僧營現存馬隊計有千餘應請 飭令國瑞汰弱留強棟

員統帶合陳國瑞步隊直趨雒河與豫軍約期進攻或由永城一路出賊東面以成犄角之勢並請

諭令曾國藩喬松年檄調張得勝易

開俊張樹聲周盛波等軍由蒙城宿州剋期並進成批亢擣虛或附賊之背繼期愈紮愈近愈逼愈緊毋令賊蹤再得出竄庶幾戡亂有期又以陳國瑞驍敢善戰所向有功惟生性崛強不能忍耐是其血氣之勇不可無人在其左右隨時默化前任安徽臬司張學醇爲陳國瑞素所信服且久經行陣曉暢戎機請

旨由軍臺釋回監護陳國瑞之軍

又以豫省諸將中唯張曜一員嫻習鎗鈴堪膺統領之任其餘雖雄毅果敢各有所長而足以獨當一面者甚乏其人請

飭調前任甘肅

提督馬德昭來豫統領新募之軍皆奉

俞允並飭託倫布馬隊

官兵四百九十六員名改撥河南富森保馬隊三百餘名並善慶黑龍江馬隊一百八十餘名統交吳昌壽調遣會有効張曜養賊貽患統兵二萬有餘並不進剿遂使賊氛復熾流入山東致僧格林沁以督師重

臣力竭捐軀等語

上命吳昌壽確查具奏吳昌壽乃就豫省上年

軍情賊勢及張曜所部兵力之多寡與原奏所叅各節有未合者逐條覆奏云捻首張總愚東竄李青店張曜追至板山坪中隔白土岡張曜在板山坪日與白土岡之賊接仗而李青店之賊由馬市坪西竄實非張曜兵力所及至三年十一月僧軍失利於鄧州張曜力抵追賊遂爲僧格林沁所賞勳以自隨至汝信確山之戰張曜復將步賊追殺殆盡僅餘馬賊竄礪山東僧格林沁留張曜等軍扼守豫邊以防回竄賊至曹郡裹脅愈多伏莽又起僧格林沁遂致授命疆場非由張曜之坐視不進也張曜由佐雜蒙恩拔至二品大員具有天良何敢如原奏所云以改用總兵之故心懷怨望臣初撫豫圻誠如聖諭所云無所用其迴護惟明查暗訪張曜在豫帶兵有年不無微勞足錄至養賊貽患以及所帶兵勇到處搶掠均無實據又前後數年所帶之兵至多不過五六千人並無二萬有餘之數現經臣飭赴皖境勦辦大股髮捻

益當勉以忠義迅掃妖氛如果初終異轍亦即嚴叅不敢稍存徇隱疏
入 上諭以奮勉圖功毋再爲人指摘云時渦河北岸之盧營寨張

機房以東南岸之廖樓龔李莊帖木兒營諸處皆爲賊據十三日張曜
朱慶商令蔣希夷率哨官蔣廣濟董建西莊啓元等渡河先攻北岸之
賊接戰移時擒斬甚衆乘勝時北岸孟窩諸處村莊踞賊掃除十五日
賊糾集馬步欲由丁垆寺寺兒集搶渡南岸亦爲我軍擊退次日張總
愚張總道桂三魏羣等率大股由東北直趨河沿張曜等擊之賊循河
西趨擇水淺處搶渡爲保英截回我軍遂進屯百尺河十八日攻廖樓
擒首廖和尚堅壁拒守馬步援賊左右擁至各隊分應之蔣希夷冒矢
石一躍而登擒廖和尚殲其衆遂駐軍廖樓距義門鎮六里中阻帖木
兒營及龔李莊二寨十九日正議進兵帖木兒寨之賊咸薙髮歸順張
曜等察其誠乃勸勉而遣之并分隊屯其寨而龔李莊猶負固不服我
軍三面進攻士皆踴躍爭先賊不能支越牆鳧水遁擊斃無數其附近

十餘寨皆至營門泣訴脅從之苦悉願反正於是西南一路始通我軍進抵義門鎮湯聘珍保英簡精銳馳擊河北丁堰寺釣魚臺寺兒集十九里溝之賊逐日皆有擒斬賊於章河西岸偷築數壘又糾集大股圍義門鎮義門距雉河四十里賊之所必爭者二十三日張曜宋慶等督各軍分途進擊賊且抗且走徹過章河近壘列陣與我軍相持張曜令李永芳擊中路湯聘珍令蔣尙均擊左路蔣希夷令胡詩擊右路餘隊列河沿接應各軍方接戰間忽騎賊斜出左路勢將包鈔湯聘珍蔣希夷揮軍橫擊斬其領隊賊目賊衆驚潰我軍追殺二十里許賊復回拒適程之偉率游擊穆清遠等馬隊馳至因擊走之追至沙木橋斬馘六七百生擒阿木潔等平其壘其北岸來援各賊爲宋慶擊退捷聞

賞李永芳強勇巴圖魯名號擢穆清遠叅將蔣尙均都司胡詩守備加都司銜時賊之大股據張家花園扼雉河之衝恐我軍再進遂於北岸倪村店伏賊騎欲斷我後路張曜令程之偉往勦叅將張慶雲穆清遠

王進忠孫廣泰千總李家昌等賈勇而前賊一接反奔擁車填塞街口將士超乘而進斃賊二百餘於是議攻張家花園擒首楊務請援於張總愚添調馬步賊實其中並分屯程家園以拒官兵次日我軍分道進攻鑿戰移時賊敗走乘勝直抵寨門砲石雨下豫勝營官楊春祥骸中砲傷士卒亦多受傷不能克而臨勝營官鄧林豐已將程家園攻拔斬賊首高水高奎及餘賊甚多三十日大雨如注宋慶親督兩營槍紫張家花園之正東東南兩處賊屢出皆爲程之偉擊退卽夕壘成二更雨愈甚賊棄寨出遁遇我軍截殺賊譁潰寨橋毀自相踐踏賊屍枕藉斬馘不可勝計我軍進屯余樓距雉河僅十八里賊見豫軍愈逼愈近而喬松年所派張得勝等軍亦由高爐集擊賊獲勝賊乃分兩股遁賴汝洸李允牛老紅等由渦河南岸退至雉河西南張村鋪張總愚任柱等由渦河北岸退至雉河西北之劉奶奶廟於是雉河圍遂解賊乘我軍深入皖境乃間道分趨張總愚等繞竄商邱柘城賴汝洸等旁趨潁州

太和張曜等聞報卽日旋軍擬扼鹿柘賊已於六月初七日圍攻柘城知縣恒志登陴嚴守適張曜蔣希夷帶隊馳至賊卽解圍竄西南譚仁芳軍遇於途橫出擊之斬首四五十級初十日賊由太康之安平寨馬廠明光集向正南西南紛竄邊騎至睢州河隄砦居砦忽南忽北陳國瑞自柘城疾馳抵睢截其北面賊遂趨扶溝知縣鄒金生督團禦之賊肆擾於鄆陵通許西華長葛洧川尉氏十五日至許州之五女店臨潁之張潘鎮大石橋十六日五鼓我軍追及張曜商令宋慶爲頭隊蔣希夷爲二隊各軍以次進發捲旗息鼓至朱曲賊壘大呼斫入槍礮繼之賊潰奔我軍追殺數十賊奔襄郟吳昌壽恐河洛空虛令駐防虎牢之徐邦道勤探防守飛檄譚仁芳率楚軍四營扼河汝交界之白沙斷其入洛之路又檄副將李世玉李承先賈文田將新募楚勇馳往陳州勦分竄太和之賴汶洸等一股蓄六月十五六等日賴逆已由皖境突入淮甯據距城二十餘里之趙寨亦駸駸內犯也十九日張總愚竄寶

豐園城知縣張書紳督兵圍絕城邀擊賊奔魯山知縣胡廷楨擊卻之
賊聞河洛有兵乃竄據南裕交界之橫山神林大店諸處二十七日張
曜宋慶等追及令程之偉督馬隊張曜親率步隊策應與賊營對峙山
岡賊撲山麓我軍馬隊從高壓下步隊循山包鈔賊披靡敗走斬擒數
十三更張曜商令湯聘珍保英兩軍出大路爲正兵宋慶由青山出賊
後爲奇兵直趨橫山賊壘叅將李寶林守備鄧林豐賈勇先登守賊驚
起我軍手刃數賊餘皆譁潰越砦亂竄我軍外截內搜斬戮無算遂克
橫山寨獲芻糧馬羸甚多賊占村莊十餘同時皆掃蕩而神林大店之
賊亦聞風南遁會賴汶洗一股自攻淮甯後竄至周口吳昌壽所派蔣
希夷一軍適至勒兵出擊擒長髮老賊二蔣希夷正築壘賊忽大至希
夷選死士前進無不一當十都司蔣廣濟胡詩解衣搏戰斃賊尤衆練
長趙鵬飛李慶雲等率團助戰六時之久賊始敗奔我軍追殺二百餘
賊旣大敗聞李世玉等馬步將抵陳州遂竄西華扶溝臨潁掠許州之

秋湖樂園諸處遇陳國瑞軍至夜率親兵二百人劫賊營斬賊百餘黎
明賊大至戰於新店集賊潰奔鳧水向舞陽西去勢將與張總愚合股
吳昌壽恐其北犯省城乃親督軍出駐許州扼之檄陳國瑞駐於鄆舞
之間斷其句合命張曜宋慶等驅張總愚於宛勿令與賴逆相通時曾
國藩所派劉銘傳一軍已駐周口又添調烏爾圖那遜馬隊援陳令周
盛波一軍駐亳州託倫布等馬隊赴豫助勦請 旨飭河南湖北各
督撫於豫之鞏洛宛鄧楚之隨棗麻黃各駐勁旅一枝變尾追之局爲
攔頭之師以有定之師制無定之寇 上是其議催令迅速赴徐州
居中調度六月二十八日張總愚攻裕州敗竄賒旗店復趨唐縣知縣
錢德昌擊卻之賊渡白河至瓦店七月初四日襲據張旗營寨蔓延附
近村莊我軍於初六日追及張曜列營白河之東宋慶夜督鄧林豐胡
保林等渡河襲寨哨官馬玉奎先登斫開寨門賊驚起巷戰逾時援賊
大至我軍乃退次日張曜等先掃除寨外之賊進屯河岸張總愚率大

股出拒我軍渡白河衝入賊隊宋慶湯聘珍督率姜桂題熊祥麟各部
力壽中堅斃賊無數乘勝奪門進寨忽伏賊二千餘騎突出鈔我後我
軍分路奮擊立斬首數百級遂復張旗寨賊向西南竄至鄧州北值七
里河水勢驟漲不得渡乃折而西北掠鎮平之賈宋黑龍集伐木爲柵
將久踞張曜乘雨夜擊之賊棄壘走十八日至塚頭集張曜令程之偉
馬隊出賊北自率大隊由西北正西兩路逼進賊焚棄輜重悉力反噬
程之偉保英等大呼陷陣縱橫馳突賊殊死鬪守備孫玉琢李家安李
家冒等皆被傷游擊張萬均都司郭振清張以勤千總張玉豐把總蔣
尙友戰歿將士死傷相繼裹創奮擊追抵李堂賊又折回迎拒宋慶保
英等力戰斬賊百餘始退竄我軍夜出賊前扼諸潦河砦把總牛振宇
邢國柱戰歿事聞與張萬均等皆得 旨優卹賊圍新野知縣張象
鼎登陴固守賊南竄岡頭我軍躡追宋慶陳於河東張曜湯聘珍陳於
河西賊率衆來犯戰兩時久斃賊百餘追斬十餘里賊竄鄧州之麟鳳

里及鎮平之石佛寺將奔馬山口張曜商令譚仁芳屯宛郡扼北路自率各軍於八月初二日追抵鎮平至侯家集賊忽由馬山口折回至龐家橋據之張曜等就近築壘逼其前保英率豫勝三營扼鎮平之穰東爲犄角初三日賊衆出犯各隊齊出應之戰半日久賊敗退我軍乘勝疾追踏毀賊壘三殪賊甚衆次日賊將循山西竄我軍三路進擊賊敗過小河我軍正追涉間忽賊騎自南包鈔我軍幾動哨官王榮義臨陣退湯聘珍立斬之軍乃振宋慶督隊自北截擊賊大敗初五日夜朱驪乘風雨大作派隊往劫斬馘甚多生擒張三義郭旺等賊紛竄南陽之清華鎮鄧州之先主山鎮平之侯家集邊騎至鄧浙交界之李官橋復趨南陽攻破周營畢營寨八月十五日夜突攻南陽府城署總兵趙鴻舉知府張仙保知縣李瀛等親督兵練礮斃賊目及賊黨百餘二十日我軍馳至宋慶邀其前湯聘珍截其後張曜指揮各隊槍砲環施短兵繼接斃賊數百二十三日我軍進攻畢寨賊先以馬隊依寨抗拒程

之偉將騎兵突之湯聘珍督親兵要截之立斬驍悍賊數十砲子飛入
圩所至迸裂賊乃棄寨遁畢寨旣克楚軍提督姜玉順軍興譚仁芳軍
皆來會二十四日攻周寨宋慶湯聘珍選勁旅擊其西姜玉順譚仁芳
以全力赴之賊不敢戰棄寨東遁其宋寨踞賊亦聞風竄均過銅河掠
唐縣於是周宋二寨皆復賊往來賒旗店保安驛三十日我軍敗賊於
橋頭寨生擒李振發等九月初一日張曜宋慶等督軍追勦甫行五六
里賊率衆迎拒鏖戰半時宋慶督洋槍隊轟斃領隊賊目三張曜乘勢
擊斬東賒馬賊百餘會吳昌壽續遣前安徽臬司張學醇副都統善慶
等軍至遂會合追勦至唐縣三門寨賊望風遁竄至湖北棗陽之柿莊
一路其地多稻田埂隴交橫賊騎不能馳乃折回仍欲攻宛郡張學醇
善慶張曜宋慶等自郭灘拔隊扼之初十日與賊遇我軍分隊左右邀
擊斃其執旗賊目追至邵渠河張學醇渡河再戰賊又敗我軍逐北前
阻白河水大不可涉賊情急反噬背水死鬥張學醇大呼督戰賊矛及

其喉幾殆適張曜以生力軍至遂擊退賊屍枕藉我軍傷亡三百餘叅
領隆喜佐領慶福驍騎校德永千總郭春城把總王世興等皆戰歿得
旨優卹張曜以賊有圖宛意遂與善慶間道赴南陽會同鎮府防
範賊由唐縣竄賸旗店將攻據之張學醇追及選精壯於四更時銜枚
疾進及壘拋火彈賊驚竄斬殺無數追逐十數里賊知宛郡有備乃由
裕州南之柏坡竄魯山大股由下湯西之馬樓駛向西北吳昌壽檄馬
德昭崔廷桂蔣希夷等扼河洛張學醇等繞汝州截之賊攻魯山縣城
火箭射入城燒街屋知縣胡廷楨急選線鎗隊縋城繞擊斃馬賊四十
餘賊乃竄寶豐十月初一日宋慶敗賊於寶豐之石橋賊由郊縣奔禹
州張學醇宋慶擊走之正追躡間賊復反戈從旁邀我輜重張學醇急
飭立營初九日四鼓令都司張魁元蔣尙均等選壯勇五百前進宋慶
張學醇保英等率各隊繼之月光漸落火器齊發賊倉猝驚亂我軍刀
斫矛刺殲擒甚多賊壘一律踏平竄東北密縣新鄭境遇提督馬德昭

軍於小窰口左成元李承先等分兩翼進新鄭知縣王樞率團丁助戰都司張魁元歿於陣豫銳營有馬勇高萬容者臂中刀傷奪賊刀斫賊并奪其馬而歸捷聞擢蔣尙均爲游擊郭春報爲都司 賞花翎朱

得勝以千總用而拔高萬容爲外委 賞藍翎卹張魁元如制賊旣

受創狂奔由長葛鄢陵東趨扶溝一路攻城池掠牲畜馬德昭蔣希夷等軍自後躡追至鄢陵西北吉慶寨適賴牛各匪自寧陵一路爲劉銘傳周盛波等軍擊敗西竄遂與張總愚任桂等復合初賴汶洸等由舞陽西竄將追併張總愚適張曜各軍躡勦深入宛境而陳國瑞駐郾城躡其後賴逆等不能苟合乃折向東南七月初三日攻西平之儀封寨知縣金福楸擊走之初四日攻據吳樓寨由上蔡黃埠蔡溝里掠汝陽之金鄉堡祖師廟爲副將王文行王玉佩等擊敗值陰雨賊乘勢攻破上蔡之洙湖里寨塔橋寨洪橋寨及汝陽之中和寨署汝甯知府徐久照汝陽知縣秦本提會同王文行王玉佩等一戰獲捷遂復中和寨賊

蔣希夷及叅將黃祥興等逐之竄東南王文行等又敗之於汝河南岸
龔寨擒斬甚多賊東竄新息交界之居城王文行等追敗之復竄項城
之新興集爲團丁擊走掠沈邱之姜寨廟岔及阜陽之黃花嶺李家橋
皖撫喬松年檄藩司英翰道員史念祖等邀擊於迎仙店敗之並調張
得勝一軍出固始合豫軍兜勦賊由阜陽至固始之往流集知縣彭旭
集團禦之賊知有備竄息縣之包信里賈家寨剛李店邊騎至新蔡八
月初一日王文行黃祥興等自新蔡進兵斬騎賊甚衆初六日賊攻彭
延庚寨焚岳城集將奪船渡河王文行等馳往截之賊不得渡據沈邱
之瓦店華莊時蔣希夷一軍扼黃牛嶺會同皖軍總兵康錦文並劉銘
傳所派提督唐殿魁道員劉盛藻等攻張窪賊巢大戰半日殲斃無算
焚其巢於是楊河以北賊壘十餘皆掃平追至瓦店遇牛老紅等率衆
迎拒我軍擊斬二千餘生擒數百克復民寨十餘獲牛馬數千其另股
逆首李允在新蔡者攻鄒寨爲寨長鄒子興選精壯奮擊斬一紅衣賊

目卽李允也吳昌壽以捷狀聞擢蔣希夷副將蔣廣濟游擊諸葛漢奎鄧開成蔣蘭江守備賞鄒子興五品翎頂賊由新項奔汝陽之東岡寺射橋及上蔡之黨家店十五日攻城知縣陳慶涵擊走之十七日奔西華之逍遙集商水之雙陽樓邊騎至鄆城十八日圍扶溝爲知縣鄒金生擊追賊走尉氏太康吳昌壽檄司道嚴防省垣令善慶李承先統騎兵扼鄆扶二十日賊攻通許縣城知縣吳炳榮督壯勇縋城出擊賊由北奔合大股賊攻上蔡十五日圍汝甯府城陳留杞縣睢州奔蘭儀之乾河灘二十四日大股悉竄考城之小宋集蔣希夷晝夜奔馳士卒憊甚吳昌壽令馬德昭助之並請調安住富森保託倫布等馬隊來豫令崔廷桂督率礮船上下梭巡嚴防河岸賊奔曹縣復折至蘭考沿河麇聚二十九日攻考城聞馬德昭軍至悉奔直隸之長垣縣境繞入曹州定陶鉅野鄆城復至曹縣據安陵集金隄頭九月初七日焚姚村朱岡孟大夫集尋竄江南蕭碭時張總愚等方在魯山吳昌壽以賴逆已遠

適與張總愚合十月十二日也十三日馬德昭蔣希夷等軍戰於鄢陵
吉慶寨白慶雲陣於正南李承先陣於正東左成元陣於東南李世玉
陣於東北賊衆三面至剽悍異常我軍槍礮齊發賊少卻程之偉將馬
隊東北進蔣希夷將步隊正北進戰三時久適張學醇宋慶保英等自
西路馳至我軍勇氣百倍殲斃賊二百餘生擒三十四獲鎧仗軍資無
數遊擊王應龍千總魏占魁戰歿奏

聞子卹賊奔許州吳昌壽所

督各軍均已派出追賊僅存善慶馬隊百餘乃令出城邀擊戰於八里
營防禦奇珍歿於陣至是賊復分股張總愚由襄陽掠舞陽賴汝洸由
臨潁奔鄆城吳昌壽檄張學醇宋慶等軍馳赴南陽勦張總愚而令馬
德昭蔣希夷等追擊賴汝洸於汝郡十月二十三日蔣希夷遇賊於西
平之觀音堂斃賊數十追奔十餘里二十四日夜賊攻營蔣希夷令壯
勇伏左右賊知有備而去我軍僞爲賊隊潛襲賊營縱火大呼賊亂我

軍大隊擁進兵刃所及無不摧斃賊奔上蔡次日派守備胡詩諸葛漢奎等刼西南賊營遇悍賊數十守橋口我軍冒槍礮進鏖戰逾時破其三壘生擒逆首林安等十餘是夜又派蔣尙萬等往刼上蔡賊營殺賊七八十平其壘二十八日令叅將董建西由遂平西路進知縣何順成由北路進斃賊數十附近各村盡復賊奔確山旁趨汝甯十一月初一日確山知縣嵇文輅縋城擊賊賊奔東南又分竄遂平之諸市店知縣文玉令守備崔鳴岡劉大山等作嚮導蔣希夷親督各隊繼之三更時襲奪賊卡二乘勝進擣諸葛漢奎首先衝入矛鎗巨匪蘇大麻子連破逆壘三賊向東南竄我軍薄之於河淹斃無算賊走汝陽繞回確山奔信陽之蕭曹店梅黃寨初九日圍正陽縣城知縣白渠登陴拒守賊竄銅鐘店走羅山十一日馬德昭追及命李承先伍慶雲李廣進等冒雪進征敗諸羅山之竹桿鋪十二日賊圍光山之杏山寨李承先等擊走之十四日追至光州值賊攻城承先等乘大霧馳進賊衆自相踐踏承

先手刃紅衣馬賊二追至七里岡又斃賊數百獲賊首鍾孟林姚新元逆黨余驢子等十五日馬德昭令左成元李世玉李承先等進兵戰於城西夜襲賊營斬千數百遂解光州之圍是役也李承先擢叅將伍慶雲李廣進擢游擊諸葛漢奎擢都司賊退至光州東南官渡白鴨江二十三日馬德昭等敗賊於鳳凰嘴再戰於七里岡三平寺皆有斬擒當是時賊前股已分竄商城固始光山息縣皆有賊署固始縣彭旭督團戰於西城適安徽巡撫喬松年派張得勝黃秉中兩軍來援合擊敗之二十七日再敗賊於陽關鋪賊奔墨斗關其後股仍與馬德昭相持於光州十二月初一日令伍慶雲等邀戰於王家岡與蔣希夷各隊四面環攻槍礮雨發賊大股跳河死者甚衆各村踞賊羣出救援復爲左成元李世玉李承先等擊散追奔十餘里至夜馬德昭選壯勇襲賊巢賊驚亂不戰而潰悉向西南狂奔由光山之潑陂河白雀園南竄前隊已入湖北境後隊亦駁駁南向

諭湖廣總督官文安徽巡撫喬松年

會兵截擊

諭曾國藩飭劉銘傳一軍赴光固援勦

諭吳昌壽

令馬德昭蔣希夷等軍會同劉銘傳由西北兩路將賊逼向東南不可縱令回竄平原以使豫軍專力張總愚一股當張學醇朱慶等由襄城追勦張總愚也賊由裕州疾趨南陽將圖郡城時張曜陳國瑞已先後請假湖北總兵劉維楨駐軍唐縣提督姜玉順及淮軍提督劉銘傳駐軍新野張學醇手書致約併力辦賊十月二十一日賊由源潭至唐縣劉維楨分三路擊之逼於河濱淹斃無算生擒張總愚之弟張宗志及其黨十餘二十四日竄鄧州踞構林關二十六日姜玉順督軍進剿賊以數千騎襲我營姜玉順揮馬步縱擊斬首三百餘生擒黃衣賊首吳得勝及夥賊二十餘十一月十一日朱慶抵鄧州先派騎兵赴構林關挑戰令蔣東才將步隊伏於後騎兵誘賊佯退賊入伏蔣東才突起槍箭紛集賊大敗時姜玉順等駐構林關東南宋慶駐構林關西北劉維楨駐構林關東北相爲犄角訂期進攻賊見我軍大集又連受創於十

五日棄寨西遁竄至文曲集我軍遂克構林關二十二日賊竄淅川攻
李官橋寨爲團勇擊退二十六日賊折竄鄧州之厚坡據臥牛山二十
八日宋慶將各軍由厚坡黃梅岡進兵賊率衆來犯我軍施槍礮追擊
十餘里至桃園岡斬賊黨二三百獲馬數十夜令哨官郭春報等襲破
龍城寨賊營俘馘甚衆賊踞大王樞寨并攻韋寨二十九日宋慶令程
永和王紹烈將兵援韋寨賊望見旗幟卽反奔王紹烈與郭春報遇合
兵追至大王樞寨敗賊甫入官兵拚至賊棄寨亂竄由北太山廟竄入
新野迤南辛店鋪並擾湖北之樊城十二月初五日至襄陽之鄧家湖
呂堰驛邊騎至堰家埠口陳家河旁及唐縣之郭灘宋慶由趙岡魏家
集進兵起師劉維楨由唐縣向郭灘蒼苔一路進兵是時賴牛等逆已
入黃州境張任二逆擾襄陽一路豫境無賊吳昌壽駐師西平檄飭兩
路追兵會同皖楚各軍出境援勦先是吳昌壽以豫省軍務萬難措手
乃自陳供職無狀具疏以聞疏言人臣之道知而不言言而不盡

皆罪也能而不爲不能而強爲亦皆罪也敢以豫省軍務之難微臣竭蹶貽誤之狀爲我

皇上敬陳之賴牛任張各逆均係失巢窮寇鋌而走險兇醜方張賴汝洸等蕭颺折回益以湖團裹脅之賊不下三四萬人張總愚一股亦不下一二萬人分則東西牽掣備多而力單合則遠近蔓延賊衆而我寡當其萬馬奔馳颺飛電掣雖至勇之夫當之色變况驅疲師羸卒逼迫以嬰其鋒有不怯餒者乎故年餘以來止有尾追而無迎擊尾追而遠則無掣于生民焚掠之慘尾追而近則猛一回合立見傷亡當此之際雖韓白復生無所用其勇良平復出無所用其智何則驅羊以逐狼本非其敵况驅十羊以逐百狼其何以免於必敗乎計無復之不得不結營以自衛結營未成而賊已不知何往此賊勢之難也夫戰旣不足守或有餘憑恃險阻使之不得徑過以老其師何莫非以逸待勞之計豫省西北雖多山險因生齒日繁山田日闢嶠函澠陝古人一夫當關之地皆已犁爲田疇耕牛婦子可以上下其他髮

路樵徑日久成蹊幾無人跡不通之處故山險不如水險豫省大川除黃河而外至大莫如淮然自桐柏發源所過光羅新息諸境淺深寬狹不一有非舟楫不通者有人馬可以息渡者其他沙潁溱洧則到處皆可超越備左則右虛備右則左虛無所不備則無所不虛此地勢之難也古人凡爲固圉之計必先有防兵而後有戰兵防兵所以綢繆于牖戶戰兵所以角勝於疆場豫省固已無能戰之兵以防兵而言扼其入楚則申息宜防遏其入秦則浙內宜防慮其突潼關也則自鞏偃以至閩鄉之徑竇宜防恐其犯河朔也則自底柱以至銅瓦之隄岸宜防賊自曹單則蘭考宜防賊自蒙亳則鹿柘宜防賊自蕭碭則永夏宜防賊自阜太則沈項宜防蓋他省皆有邊地而後有腹地豫則無處非邊卽無處非腹地之他竄必取徑於豫賊之飽歸又必盤旋於豫以現在兵力屯紮一隅猶不足以制其出入又安能無處不防無防不固此邊防之難也於是有所爲堅壁清野之說者豈非所以濟戰守之窮豫省自團

練以來大縣堡寨二百餘所小縣堡寨亦逾百所當寇至之時男女牲畜入寨糧石資財入寨人情一日不再食則饑果令野無所掠賊將槁餓以就擒耳然嚴冬之野可清而夏秋之野不可清禾稼垂熟之時人可捋穗而食馬可弛銜而飽近日賊情狡獪所至之處多不發火小民無從驚覺賊騎已至始謀遷徙爲無及矣故堅壁清野不足以困賊而數年以來兵勇騷擾民間積怨已深仇殺官兵之案層見疊出現在三令五申嚴加約束兵漸不敢肆虐於民而百姓反閉關絕市以困官兵將欲破此積習計非旦暮之所能亦非條教號令之可爲力此堡寨之難也近日軍務以購糧爲第一要義曾國藩濟寧周口之軍每處必先儲米萬石可謂籌畫萬全然此二處皆係濱臨淮運可以泛舟豫省賊之所經多在平原曠野無水可漕數石之重中人弗勝則必隨地購糧卽必到處耽閣賊因糧於地因糧於人無糶糴輦任之累故一日之程爲官兵數日所不能及然此猶近城近寨完善之地至於荒陬僻壤烽

粟所餘則求一升之米一束之芻而不可得其良者忍餓而疲羸不肖者因饑而搜括兵氛蕙軍律廢賊勢張民怨積皆由於此此兵食之難也用兵之道火器爲先臣履任之初簡閱軍實擡礮鳥槍等件製造率不如法或膛口不光或身殼太笨或機括不靈火藥則硝磺提煉不精烘然之地渣滓凝結帳房兵之所以棲止禦風雨也或丈尺不足或布質麤疏不適於用而又不能經久臣心竊異之將欲罪其承造之人而查閱成案則官定之價減省太過縱使涓滴歸公亦不足以收精良之效於是改弦更張但求器械之利無取價值之廉數月以來製造無多而司庫已有不給之勢且近日賊中洋槍甚多即使官兵槍礮合式已難比其裝放之捷所以潘鼎新劉銘傳諸軍能於遇賊獲勝皆恃此物而濟以炸礮臣向在嶺南深知其利然皆非豫省所易猝辦卽欲販諸廣東上海等處而動需巨萬豫省何能辦此此軍械之難也抑用兵之道貴精不貴多使坐作進退一一整齊操縱擊刺一一靈便何嘗不可

以寡勝衆臣在軍中閱視隊伍豫省用兵十年未嘗講求及此無論馬步兵勇大抵以竹桿槍爲利器叩其所以不用槍礮之故則皆由於裝放之不能如法此不訓練之過也自奏調提督馬德昭到營以後遂責之操演然技未精而寇已深校未畢而賊又至冀有日月之暇俾士卒習吾教訓而不可得將欲稍忍須臾則累卵之危剝膚之痛何以自解乃知前此在事諸臣所以不及講求者爲此此訓練之難也雜霸之術必先富而後強卽聖賢論政亦足兵而必先足食斷無府庫空虛公私窘乏而可以枵腹荷戈之士僥倖於一戰者豫省歲入之數不足二百萬計其出項中年常缺其半上忙以後藩庫罄如前次豫省軍餉每月七萬有時養兵多至二萬計一兵每日所得雖糧石價平之時已不能求半飽臣稔知此弊常思厚其廩餼未能徧及每月已多至十萬以外賴有 賞給陳州贏餘銀十萬兩藩司又竭力攢湊僅敷散放八月以後藩庫萬難爲濟於此之時欲求緩而無可緩欲請協而無可協欲

抽釐而無可抽之釐欲勸捐而無可勸之捐譁潰之變即在目前乃不得已而裁兵就饟裁兵之後饟未見其不缺而兵則愈單賊則愈熾盤踞腹心久而不去民既失耕穫之期官豈有催科之術恐併此區區之兵亦無以養之矣此籌饟之難也夫豫省地處中原天下安危之所繫也信陵用魏而六國之師直叩函關岳飛至朱仙鎮而河北豪傑一時響應國家建都燕京以河朔爲門戶而河朔之屏蔽尤在河南使賊往來徑熟致六府三州之地遂爲戎馬之場則黃河天險賊將與我共之上下千餘里安能處處設防日日申儆乎且兩湖雲貴諸省驛路之所經饟道之所出而可聽其梗塞乎則賊之禍豫受之豫之禍天下受之此大局之難也以難戰之兵難籌之饟當難制之寇而又處難以自存之地此非文武兼資智勇足備豈能轉敗爲功勝其任而愉快者乎平吳之功必待於王濬入蔡之捷必奏於裴度江南之下必曹彬始成不殺之仁澶淵之盟必寇準始收退虜之效今以魯鈍無才迂疏寡效

如臣者當此重寄故雖有曾國藩之節制而臣不能稟承有官文喬松年閻敬銘之輔車而臣不能聯絡清夜捫心咎無可追此又報稱之難也臣以縣令不二十年蒙

兩朝知遇擢至巡撫受

恩不爲不厚

移撫豫疆已逾半載毫無補救負罪不爲不深儻再隱忍不言則臣之罪愈重異日

朝廷雖欲終始保全

寬大之恩臣亦無由仰受矣

惟求 治以應得之罪

簡任賢能畀以閫寄拯生靈於水火鞏疆

圉於苞桑中州幸甚天下幸甚疏入

上諭吳昌壽所陳豫省軍務

種種棘手勢處萬難自係實在情形該省地當四衝備多力分兵饟兩絀現在張總愚股匪與賴牛等逆併聚豫省賊數益衆斷非一省兵力所能支曾國藩本有節制三省之責自當統籌全局前往援應且江皖兵力較厚此時又無捻蹤竄擾所有原設四鎮兵勇自應移向西進步進逼以期力遏狂氛該大臣亦當斟酌情形移營進紮就近督勦未可株守一隅致誤事機豫兵不習火器無以制賊蘇省所製火器較爲

精良著李鴻章將洋鎗鉛丸火藥酌量提撥派員迅解豫省並著曾國藩李鴻章各陳派熟習火器弁勇赴豫交吳昌壽調遣令其教演豫兵俾利攻勦吳昌壽所陳供職無狀自請治罪並請另簡賢能等語該撫受恩深重自當力爲其難不得以兵饒兩紕遠事推諉卸責吳昌壽原摺並著鈔給曾國藩李鴻章閱看蓋至是而豫省之事乃愈棘矣

豫軍紀略卷十二

皖匪十九

同治四年冬十二月賊由皖豫被創入楚賴汶沆牛老紅股向黃安黃岡黃陂孝感諸境豫軍提督馬德昭副將蔣希夷追之張總愚股向襄陽豫軍總兵宋慶追之適楚軍成大吉營勇譚潰襄樊黃孝並警

欽差大臣兩江總督曾國藩因奏令淮軍提督劉銘傳率所部由光固麻城徑援黃州宋慶以十五日至襄陽及賊於老范岡龍集夜率親兵襲賊壘立破十餘村因進與楚師提督姜玉順軍會合二十日比明宋慶姜玉順各簡所部精銳進攻賊傾巢出拒我軍奮擊敗之追殺十餘里燬竹籐鋪太坪店牛首朱家坡諸賊巢獲悍目吳尹潰李中強張魁兒朱小安哈得勝等並寘之法二十二日賊由楊家橋竄棗陽之騎馬岡宋慶等慮其東竄與賴牛股合疾以馬隊繞賊前賊乃不得東折向北駛二十三日分掠唐縣新野南陽境二十五日圍新野屬之沙園寨

宋慶已先檄游擊屈聖祥率兵勇間道馳入寨自督親兵及左後兩營往援副將蔣東才守備鄧林楓魏鳳魁分西北兩路進親兵礮隊潛自寨西越東門出賊不意三面夾擊寨內兵齊出賊乃大潰追逐十餘里斬獲長髮老賊百餘沙堰寨圍遂解而新野屬之呂營陳營吳堂柴堂萬壯岡埠楊營所在皆有賊據設卡於栗河鋪化陂莊江家莊裏脅日衆勢益張宋慶姜玉順謀先去其卡因以二十七日率兵繞扼呂營寨前二十八日分路進勦斃先鋒悍賊二百餘盡焚所設卡擒駱猾狼周安付等斬之二十九日宋慶以所部列陣於吳堂呂營之前斷援賊姜玉順以開化三營直攻呂營分撥兵勇四路策應賊出馬步數千縱橫馳驟我軍屹不爲動賊勢漸靡尋退入寨援賊皆爲毅軍遮擊不得近副將姜河清奮身大呼躍登寨牆手刃十數賊各營弁勇繼之遂克呂營寨斬殺甚衆擒悍目吳小黑等是夕楊北集吳堂之賊竄併陳營復爲宋慶千總程允中截殺數十五年正月初一日我軍乘勝平賊壘十

飭進逼陳營初二日五鼓諸寨賊麀至欲包鈔我軍宋慶先飭馬隊繞出賊後令壯勇猛攻陳營西北賊方蹙拒聞姜玉順已飭三營由寨東緣牆而上奮呼斫殺各軍響應內外賊皆惶懼狂奔自相蹂踐及斬殺者不可勝算賊遂盡竄白秋田九店諸處宋慶督兵蹙之復竄唐縣桐柏泌陽回旋諸境上以十六七日至信陽交界之明港驛其至信陽將南趨與賴牛股合適劉銘傳軍在楚界宋慶復追之不容息賊恐前後受敵乃聚明港驛圖由確遂西鄆乘間北犯其時賴牛股黨蔓延麻羅黃孝間爲藍斯明等所敗復竄近光州巡撫吳昌壽策以張逆入豫楚師姜玉順外惟宋慶一軍與之角逐於南陽新野諸境而舞葉一路無兵攔截則西北兩面皆可虞因請令馬德昭蔣希夷折回豫省由光羅正確徑赴舞葉自督副都統安住馬隊一千名總兵保英步隊二千名由許州取道臨潁鄆城進抵西平會勦奏 上報可且敕淮軍員外郎李昭慶馬隊赴豫協勦焉吳昌壽旋因公事鐫級 命湖北巡撫

李鶴年爲河南巡撫二月張逆由明港驛李從店竄正陽時賴牛亦竄光州馬德昭軍爲鄂省所留蔣希夷軍至正陽之宋店與賊遇擊斬總愚之姪張九賊竄汝陽之馬鄉閭集楊樓叅將王文行擊之遂竄上蔡遂平二十六日副都統安住總兵保英率馬步進剿至距西平三十五里之古蔡寨遇賊突擊敗之二十七日黎明大股復至我軍列步隊於西平城南雙廟窰分馬隊爲南北兩翼安住槍斃騎馬賊目二匪衆死拒不退且由南面繞襲後路保英揮令豫勝前營轉向正南橫截豫勝後營向西南繞鈔以扼之馬步鏖戰數時賊始敗遁追殺二十餘里我兵亦有傷亡是日也賊亦知蔣希夷已過遂平宋慶由信確躡進且皆至古蔡寨乃分黨迎拒蔣希夷軍在前令韓大武爲頭隊蔣廣濟胡詩分列左右莊啓元董建西策應賊殊死鬪我軍少卻宋慶適至潛伏火器近村中賊追韓大武將至村村內礮矢齊發噴筒火箭飛激如雨賊大駭敗蔣希夷軍乘勢回擊追奔十餘里賊乃竄舞陽之武功鎮出山

店諸處宋慶蔣希夷追至舞陽賊方踞王莊劍坡營恃複澗深崖負隅爲固宋慶察其形勢可攻乃與軍士約鼓之則皆進卻立者斬於是營官李寶林郭春報劉廷李振清姜桂題各以其隊爭先越澗姜桂題爲矛傷裹創復進每越一澗斬殺數十大隊繼之援賊爲蔣希夷軍所截遂拔王莊劍坡營賊壘擒僞偏將裴春賊目陳器卞虎等斬之武功之賊遂盡併於出山店宋慶蔣希夷進至出山店夜大雷雨賊越澗潛遁宋慶軍過澗甫築營忽馬步賊數千來攻宋慶急整隊迎敵蔣希夷已鈔出其後夾擊之復斃賊百餘賊乃全遁遂平吳昌壽上兩軍戰事

上嘉之擢游擊劉廷董建西叅將用加副將銜守備胡詩都司用守備李振清都司銜千總姜桂題守備用均 賞戴花翎外委姜萬隆

馬玉寬千總用均 賞戴藍翎而以陣亡之五品藍翎領催委官石

成六品藍翎領催委防禦阿克達春卽補驍騎校五品花翎披甲防禦依臣保 敕部從優議卹賊之至遂平將踞紅山宋慶蔣希夷追及

據山梁連戰賊皆敗因由舞陽鄆城竄禹州新鄭先是黃河議立水師
礮船駐石橋副將崔廷桂統之賊馬直奔大隄將礮料梁奪船北渡崔
廷桂率衆登岸急擊立殺馬賊數十其奔河口者復爲師船大砲轟殺
十餘賊乃退屯鄭州之郭店而宋慶希夷亦馳至張逆謀知之潛伏馬
賊於沿途村舍冀出不意衝我軍宋慶隊素整馬賊突出爲營官張鳴
禮吳守義擊退賊乘大雨由鄭州竄中牟宋慶等追至夜三鼓襲賊營
胡詩莊啓元韓大武等奮呼直入賊衆大亂裸殺無算其悍黨以死拒
擁張逆而遁至朱仙鎮防省副都統善慶出隊復擊殺賊數十於是由
蘭儀竄山東之曹州宋慶等追至考城吳昌壽檄宋慶蔣希夷越境疾
追令安住保英爲後應方部署前進賴汶洗牛老紅股由光州竄阜陽
復由阜陽折回豫境以三月初三日紛擾沈邱項城鹿邑淮寧太康諸
縣初四日亥刻直犯扶溝縣城知縣鄒金生炮斃馬步賊十餘賊乃竄
西華通許陳留尉氏初六日至朱仙鎮時馬德昭軍已回豫吳昌壽令

與善慶各率所部迎勦行十餘里遇馬賊數百我軍擊殺數十擒長髮老賊六正法賊知省城備嚴乃西趨中牟馬德照部游擊李廣進都司谷瑞祥善慶部委叅領全福追及敗之千總李家安手搏殺悍目彭中庭奪馬數十賊遂踞鄭州白河諸處吳昌壽慮賊槍渡急檄水師戒備復令李世玉四營馳扼楊橋渡口而以羽書徵宋慶蔣希夷安住保英各迅回西路會剿賊由鄭州迤南滎澤山路竄鞏縣之三家店金孤堆知縣袁修翰率勇禦之賊受創乃不敢西復由朱仙鎮通計回竄十二日至陳留遇蔣希夷軍十三日蔣希夷令胡詩周永南進攻大營各莊賊巢董建西霍殿章進攻大馬各莊賊巢韓大武蔣廣濟伏東南脩截擊四路併發戰數時賊衆奔潰十四日黎明後賊復大至蔣希夷據溝爲險占上風施槍砲長矛各隊踰溝奮刺馬賊先敗把總蔣芳周藍翎外委李慶劉長春深入陷陣歿士卒益奮前鬥步賊亦紛潰是日斬獲長髮老賊甚多得羸馬千餘賊遂以十四五日由杞縣睢州蘭儀考城

疾駛入山東曹州府境於是賴張二逆俱東豫軍扼要隘備回竄焉當
二逆之蔓擾豫中爲宋慶諸軍所雕勦枝窮力竭皆思搶船北渡其不
得逞者水師炮船力也蔣芳周李慶劉長春後皆議卹如制

五年三月李鶴年受河南巡撫事張總愚賴汝洗牛老紅竄踞山東水套連樸運河爲官軍擊敗復竄河南商邱虞城夏邑李鶴年檄宋慶保英安住蔣希夷等隊自蘭考移赴歸德進剿劉銘傳軍亦自曹縣追至虞城大兵雲集賊乃奔竄江南劉銘傳追擊之於碭山賊知徐州備嚴復由碭山回竄虞城甯陵考城及商邱之劉家口是時張賴二逆忽分忽合牛老紅在張總愚股任柱在賴汝洗股任柱尤凶狡慣善戰出沒江皖楚豫飄忽靡定豫中宿將改用總兵張曜請假回籍葬親以所部交保英統帶宋慶一軍東西馳逐宋慶漸以功顯於時爲賊所畏云四月十四日宋慶保英追賊至睢州壩守備楊鴻禮李葆珠率馬隊前隊猝與賊遇列隊迎戰步軍踵至賊退追殺二十餘里獲賊首張全成賊大股方圍攻王家橋寨宋慶等軍至圍解叅將李寶林劉鳳清游擊楊春祥都司郭春報千總宋得勝姜桂題率親兵爲七起夜襲賊營副將

蔣東才叅將劉廷以大隊接應三鼓時疾馳二十餘里抵賊巢張總愚糾黨出拒昏夜短兵相接往復十餘次賊勢不支潰敗我軍連奪踞莊五所鎔賊三百餘擒擒首劉勤學郭文仲張得及長髮老賊五十餘獲牲畜旗幟甚夥賊乃遁竄豐沛李鶴年因以其時布置省防河防出駐歸德親督堵勦而賴任股匪復自江皖回竄永城淮軍總兵周盛岐皖軍總兵程文炳追擊之遂竄夏邑宋慶等移軍就勦馬德昭善慶繼之二十六日竄西南爲馬德昭善慶蔣希夷軍截殺甚衆宋慶偵知賊大股復竄正西乃乘夜疾回營於夏邑迤西之茅家營朱家寨距賊十里許夜四鼓令叅將李寶林劉鳳清蔣東才劉廷襲賊營將士皆銜枚疾走寶林先入賊卡各隊從之大呼奮斫賊不及措立殺二百餘擒長髮賊劉方城孫鄉等拔出難民數百餘賊紛竄二十八日大股聚夏邑西三十里之大周集諸將並追至於是馬德昭保英以所部營賊之東宋慶獨扼西面當賊鋒蔣希夷列隊西南安住善慶各率馬隊張東西兩

翼嚴陣待部勒甫定賊馬步擁而出善慶麾旗蹙之勢少卻旋犯我東
哨分衆繞步營馬德昭倚營結陣鎗礮驟發賊衆應聲倒斃賊不得逞
乃又衝我西哨宋慶麾令李寶林劉鳳清迎擊而自率劉廷蔣東才大
隊躡進馬德昭保英蔣希夷各刺斜夾擊安住善慶馬隊分路包鈔各
死門自辰至午持不決宋慶所部毅字親軍突前陷陣宋慶親率守備
李振清楊萬年兩營綠鎗環攻擊賊伏而又起則以長矛春刺刀槩近
接摩刃無聲久之賊大譁潰各軍乘勝追殺二十餘里始收隊賊遂南
趨亳州境是役也斃賊千餘擒長髮者九十餘中有擒目張料兒爲總
愚之姪又僞雄天豫右提司張義生並搜獲僞官執照訊明皆斬之得
戰馬二百餘我軍傷者百餘人陣亡二十三人奏入 上嘉之賞劉
廷換戴花翎擢蔣東才李寶林副將王國良總兵薩尼布副都統悅松
額防禦雙玉協領蔣廣濟叅將胡詩游擊李家玉守備投誠勇目馬融
和守備銜藍翎傷亡兵勇撫卹有差李鶴年因奏言匪蹤遠竄宜選將

合兵整頓隊伍以備征剿而專責成其略曰豫軍前敵步隊有南陽鎮總兵宋慶統帶毅字十營前甘州提督馬德昭統帶安勇豫銳等五營記名總兵保英統帶豫勝四營副將蔣希夷統帶輔衛四營每統帶一員各有馬勇一二百名不等馬隊則吉林副都統安住統帶吉林黑龍江四起原額一千來豫半年轉戰奔馳傷亡十去其二又杭州副都統善慶統帶吉林黑龍江馬隊二百七十員名河南駐防馬隊及河北南陽歸德三鎮馬兵共七百名查馬隊馬兵數雖二千而豫省馬兵鎗箭技藝究不若吉林黑龍江官兵之便捷善戰兩省馬隊除傷亡外實僅千人不若歸併一起又查步隊二十三營偏師各領將多心渙兵分力單在前數年匪股既衆到處蔓延於是或一二營或四五營分道設防爲騎峙聲援之計今則張牛任賴聚爲兩股現有江皖各軍游擊追截是豫省之軍分防牽掣師勞無功不如專力攻勦以戰爲守此馬步兵勇所宜及時歸併者也賴逆自竄入亳境直向東南奔逸豫疆附近已

無賊蹤臣因逆氛較遠暫檄朱慶等軍仍駐永城夏邑一帶以備征剿連日悉心訪察統帶馬隊之安住善慶二員皆久於行陣而善慶在豫有年地利情形較熟擬將安住所帶之馬隊歸併善慶統帶其原帶之駐防三鎮等馬兵仍令隨同教練提督馬德昭紀律嚴明聲威素著總兵朱慶果敢任事賊所畏憚現將保英所帶之四營歸馬德昭統帶副將蔣希夷現有被揭事件其所帶四營暫令副將蔣東才接管撥歸朱慶統轄以專責成疏入

上悉從所請於是豫軍各營裁汰冗疲申明賞罰所至每多克捷其後起張曜於家復添練二十餘營遂成張朱兩軍卒平大逆而選將練兵之策實始於此五月十一日張牛股匪由江南蕭縣竄入碭山勢將西趨十二日邊馬已至虞碭交界其時朱慶馬德昭等軍以任賴一股竄入皖境後擾至宿州方由永夏一路進兵躡勦聞張牛股至乃星馳折赴盧城碭山迎擊善慶馬隊爲之策應十三日軍至盧城境牛王壩遇賊馬數百疾擊敗之追至碭虞交界之

柳荻圈我軍逼賊壘爲營十四日黎明賊騎千餘來徧宋慶揮所部擊斃賊百餘擒擒目張得勝劉漢章張幘起嘉賓孔兆人劉荆保姚立業等獲僞印一沿河踞莊悉奪回正馳逐間逆首張總愚率千餘騎直犯我軍宋驪馬德昭急分隊夾擊逆衆散而復合逾時始向東南退竄十五日宋慶馬德昭夜襲賊營連奪所踞六莊斃悍擒五六百擒劉化雲劉小等百餘天向明甫收隊卽有馬步大股回衝我營宋慶急調各營自率親兵督戰馬德昭善慶均馳至三面鈔賊腹背聞官兵槍礮聲皆匍伏不敢起張總愚氣沮喪奮死突重圍遁去死者復三四百先後得牲畜旗械無算於是張牛復大創牛老紅遂與張總愚分股獨跳入皖境未幾復由亳州闌入鹿邑奔陳州至上蔡馬德昭軍一敗之於永定寨再敗之於洪橋再敗之於上蔡城關擒髮逆陳喜新張魁秀等牛老紅遂復與張逆合股張逆之敗南趨晝夜避兵而行以五月十九二十等日從甯陵睢州竄杞縣太康周家口亦麕聚於上蔡二十五日宋

慶等軍擊之於塔橋又敗之於大吳莊二十六日奪其宋戶寨踞莊賊乃奔竄二十八日追及之於邵鎮張總愚突引大股回撲相距隔一小河宋慶急令都司郭春報姜桂題程允和等列陣於南蔣東才李寶林等領隊扼其北傳知後隊速進營甫定賊已分隊踰河而東潛鈔我軍後宋慶親率南隊越河西抵張逆時賊勢張甚宋慶激勵將士都司郭春報千總吳會大呼陷陣賊猶死拒我軍橫擊斃其執旗悍目屍相枕藉羣賊驚亂戰至昏黑始潰奔我軍揜殺十餘里是日斬賊百餘擒長髮張西德等五十六我兵傷亡亦以百數夜二鼓守備鄧林楓往襲賊破所踞莊獲賊言是戰陣斃外受重傷者二千餘大小頭目相聚號哭勢甚窮蹙云二十九日馬德昭軍蹙之於十里鋪會大雨賊踞百尺集六月初四日馬德昭進屯單莊初五日宋慶軍至營甫定賊糾衆來犯叅將莊啓元等併力壓退須臾賊又來犯相持未決馬德昭聞出徑擣賊巢殺賊二百餘方撤隊問回援之賊涉水包鈔截我歸路官兵往來

衝壓鏖戰良久斃賊甚衆我兵亦多傷亡總兵王國良叅將王步雲守
備謝聯陞皆受傷初八日五鼓宋慶率親兵往襲賊奪所踞莊擒賊目
張效固賊遁初九日進至淇河截其後股盡棄械梟水淹斃殺死者無
算賊計急決洪河阻我軍不得進難民言賊頭目有程四老坎楊霧者
極狡詐皆爲官軍槍斃僞小王者亦死亂軍中於是張牛合竄汝甯一
路而賴任股匪復由皖境上犯竄至太康扶溝睢州杞縣延及陳留通
許皆有賊騎宋慶等軍方與張牛相持未遑兼顧蓋斯時賊雖兩股人
數愈衆所至劫掠羸馬騎多於步往來剽急已成流寇豫軍屢勦獲勝
然顧此則失彼李鶴年深憂之以爲制賊不流非合圍必不能痛剿兵
法十圍五攻校量賊勢又非一省兵力所能辦會

上敕欽差大臣

兩江總督曾國藩進駐周家口督周盛波等軍會豫軍辦賊與李鶴年
所見合曾國藩策言張牛各股業經遠竄洪河以西其勢必再渡淮而
南任賴等逆旣由下蔡西竄亦必上窺皖鄂我軍自需扼守沙河遏其

回竄之路應飭潘鼎新一軍在周口以上沙河北岸擇要扼紮不必跟蹤追勦任賴等逆果已南渡再檄調銘字一軍赴沙河北岸會同防守豫省各軍概防沙河北岸不必縱橫跟追庶勞苦較少而成功反多俟沙河之守已固逐捻於西南山多田少之處賊騎不甚得力官軍較有把握云李鶴年據以入

告內自歸德旋省布置省城防務令所調

直隸總兵余承恩一軍與崔廷桂水師會合以防河岸飭宋慶等無遠追且定議自周家口以下至槐店止扼守沙河自周家口以上至朱仙鎮止扼守賈魯河由曾國藩派兵設防自朱仙鎮以北四十里至卡梁省城又北三十里至黃河南岸無河可扼掘濠守之由李鶴年派兵設防自槐店以下至正陽關仍守沙河由喬松年派兵設防自正陽關以下即係淮河由曾國藩派水師與皖軍會防扼賊馳竄蓋自剿捻以來多尾追之師主客勞逸勢不相及分地設防議自此始後雖事變屢出而大功底定實不外制賊不流之策信乎智者所見蓋略同云

五年六月巡撫李鶴年回省踏勘設防自朱仙鎮以北四十里至省城又北三十里至黃河南岸按段築牆分兵扼守而朱慶諸軍方追奔逐北勢難回撤李鶴年因以情入

告且請敕浙江巡撫飭總兵張曜

迅速來豫於是豫省始有添練大軍之舉張牛股匪自百尺集敗竄距洪河迤北六月初十日圍攻五溝營寨馬德昭軍至潰竄是夜賊衆梟水謀刦我營擊退之十七日劉松山軍至高岡奪賊踞數莊二十日復敗之於雙廟朱慶所部悉渡洪河以北與賊戰馬德昭由黃橋奔擊擒擒首羅有法竇幗林等斬首二百餘級賊東竄西平縣境牛老紅先至西平爲馬德昭所派隊襲殺甚衆至是復合竄舞陽我軍疾追值淫雨泥淖將士冒暑前進二十九日及諸葉縣之保安驛賊衆盤踞寨外七里岡謂我軍阻積水不卽至方造食各隊衝入賊大駭潰擒長髮老捻李老姚陳羣王俄等餘衆南竄至裕州十里鋪賊見官兵馬隊不多糾

黨抗拒副將王步雲守備李家安千總李家昌汪印千奮擊敗之追殺至清和寨擒髮賊賈思安等賊遂沿白河東岸張逆在前牛逆在後意將乘隙偷渡阻水以避官兵時馬德昭軍因任賴蔓繞陳杞檄撤回顧惟宋慶一軍與賊角逐七月初三日追及南陽之瓦店擒長髮馬賊謝學珠等賊由瓦店岡頭偷渡白河會大雨河漲我軍成橋以濟賊遂竄新野之老龍寨初九日至鄧州我軍追殺擒擒目岳振澹劉開誠等解鄧州圍初十日黎明及牛逆於州城西南之駱家莊副將李寶林叅將莊啓元劉鳳清率所部奪賊踞莊三所戰方酣後路賊旗渡越刁河布滿官軍之北宋慶乃率蔣東才分路督戰賊殊死鬥我兵傷亡亦衆莊啓元李寶林頭腹皆被創都司鄧開誠陣歿力戰三時之久子藥罄刀矛多缺折騎賊均下馬手搏誓以死決宋慶乃合隊伍緊抱緩撤至刁河橋口扼橋爲禦是役也官軍以急追牛逆故陷賊圍中倉卒僅成一營張牛兩逆自西平舞陽皆在沙河南北分股行至是復合勢特盛距

官軍營半里許樹柵掘溝以圍我宋慶夜遣鄧林楓馬玉崑突圍出令
蔣東才等與賊梭戰至三晝夜芻糧並竭將士守愈堅後路各營爲刀
河北岸賊騎所阻饒道絕鄧林楓等至營申明大義兵勇皆感泣憤怒
誓以死透圍未至二里許鄧林楓懸大旗圍內軍懸旗應之十二日夜
宋慶親率游擊屈聖祥千總武會程允和自內出鄧林楓等自外入遂
毀圍並奪賊踞十餘莊擒斬賊數百賊遁刁河南岸十四日復於袁莊
追殺賊數十賊乃竄南陽事

聞擢鄧林楓游擊賜鄧南誠卹典二

十二日賊至南陽之瀘灘湘軍皖南鎮總兵劉松山宣化鎮總兵張詩
日軍並至與豫軍會合遂連敗賊於尹家寨桑莊寨侯橋寨諸處賊至
新野之上仙岡列隊以待我軍分三路張詩日居中劉松山右宋慶左
併力前進張牛二逆親率悍黨猛攻湘軍兩路合一結成方陣以劈山
大砲洋砲洋槍連環轟擊一時許賊屍枕藉猶冒死不退宋慶出本隊
長矛選鋒飛奔接應千總宋得勝程允和率親兵奮入斃賊三百餘賊

馬步始大潰湘軍合追計斃賊二千餘擒長髮四百餘賊遂由南召翻
山北竄恃山險爲避兵計八月初三日至汝州境先是馬德昭軍撤回
駐汝州賊至仙孤三山等寨馬德昭出隊州兵助之擒斬賊目穆添順
陳幅沅等復敗之於焦村張村賊穿山遁上仙岡之戰哨官千總沈金
藍翎把總鄧士炳死之皆議卹此張牛被剿事也其賴任股匪以六月
竄繞睢州杞縣知州劉廷柏知縣查以謙擊退之山東臬司潘鼎新軍
遇賊於杞境之石嶺岡油坊岡斬殪甚衆追至小武岡沙窩高陽集諸
處總兵余承恩截賊於陳留東提督劉銘傳軍亦至賊乃南竄蘭儀七
月由中牟新鄭禹州密縣長葛趨許州盤踞許之禹城賀張諸村馬德
昭軍至襄城諜賊衆分掠襄城縣北之潁橋縣東之方窟茨溝臨潁縣
之三星店因以初七日拔隊繞前截擊沿途均有斬擒至禹州黃岡寨
賊方圍攻寨我軍奮前斬殪三百餘賊目劉太清等正法初八九日復
敗諸襄禹所屬之洪水橋小黃莊提督周盛傳軍亦至許州會合十二

日大股復回竄沙河北岸擾及臨潁圍城尋至中牟尉氏與張牛合收降人桂錫楨獲大逆魏羣斬之八月長牆成豫分當河漫處多浮沙旋築旋圯地勢太寬兵分則見寡初十日以後張牛賴任合股東趨至近省之巴店李口括民間鑿鑿綿被將毀平牆濠於十六日竄至黑堽逼近河岸水師守備劉洪泰開大炮轟擊賊循東而奔復爲守兵擊退併歸南路乘夜晦分隊撲牆潛於蘆花岡沙鬆處填濠穴牆遁李鶴年具疏以聞咨直隸山東安徽江南各視賊所向出兵邀截且檄朱慶等會合湘淮各軍追躡焉於是賊竄山東九月復回竄豫會李鶴年至周家口與曾國藩籌商勦務聞賊耗疾馳還豫省而賊已由陳留通許犯省城馬德昭軍拒之敗賊於太平岡花翎都司銜守備于得水藍翎千總李世寶戰歿賊南竄忽又自南而北初九日事也初賊之東窺運河不得逞乃圖決黃河斷流以徒涉朱慶諜知其謀飛以狀聞李鶴年因檄保英蔣希夷各隊北行授計水師密爲之備十一日賊薄河守備

孔廣思船先至知府師長怡守備劉洪泰船亦至賊掘黑堽隄師船大
砲轟擊不退適宋慶軍及崔廷桂砲船均至黑堽任柱乃部分其衆退
踞近河各莊將乘夜復掘宋慶令劉廷鄧林楓襲其踞莊賊驚夜遁崔
廷桂慮其復掘上游石家樓因與宋慶約水陸並進偵知賊詭計欲誘
官兵西追乘間折回復掘乃密排步隊石橋隄上而以礮船緊泊埽下
已午之交賊馬步蜂擁回竄一路縱火焚燒料物延及埽段煙燄彌空
崔廷桂令水師開大炮宋慶令李承先等從烈燄中殺入刀砍矛刺所
向無前砲船首尾連環轟擊賊衆紛倒宋慶乘勝親督全隊猛擊之賊
始潰敗西走越日於上游三十餘里之榮澤壩復縱火掘隄是處爲黃
河坐灣其日西北風砲船上駛不利而埽面犯風之處波浪滔天埽根
料礮半爲焚燬壩工蟄場其勢岌岌忽東南風轉水勢平順砲船起篷
瞬息至榮澤壩步隊隨至合力轟擊斃賊數百餘衆南竄廟李寨蔣希
夷伏兵突起衝賊數段砲斃賊首任雙賊乃大潰追殺數里復斃賊千

飭獲賊供言逆衆仍欲渡運河擾山東云是日隄掘二十餘丈深丈餘
水勢洶湧已將汜濫搶築數日始完固是役也實南北大局所繫其得
化險爲夷者雖曰兵力若有神相焉李鶴年因奏請河神扁額且言逆
衆旣生狡謀必思再逞長隄十里防不勝防意深憂之於是始有添練
礮船之計而張牛任賴亦自此遂分不復合矣張牛一股自中牟南竄
許州爲蘇臬司劉秉璋軍所敗遂西竄襄郟由山路犯汝州知州舒
亨熙禦之復西竄伊陽境之車防鎮十九二十等日掠洛河南岸窺河
南府城知府陳肇鏞率文武堵禦逆知有備乃折竄龍門白沙掠宜陽
永甯知縣恒倫陳延芬各嬰城守賊遂由韓城鎮觀音堂竄陝州外委
薛位烈死之二十六日羈集州城西北之太陽渡意將渡河河陝汝道
趙書升陝州知州周仁壽率衆急擊都司謝聯陞炮斃紅衣賊目及馬
賊十數賊勢少卻千總郭長貴受矛傷裹創力戰賊遂由靈寶闕鄉疾
馳入陝由是縱橫馳踞於關中渡河之狡謀卒弗戢



皖匪二十二

賴任股匪自中牟陳留蘭儀考城東北竄山東菏泽曹縣諸境爲劉銘傳潘鼎新追敗之於魚臺金鄉因回竄豫境商邱甯陵犯歸德府城十月二十七日馬步至東北二關署總兵成景出兵擊斬擒目霸來住紀七李六等二十九日復至城下縱火游擊呂振河擊卻之復竄柘城爲周盛波劉秉璋軍所敗遂由太康奔淮甯晝夜急馳勢甚剽疾時西股入陝由華陰渭南尹家衛入南山犯藍田窺漢中李鶴年令保英四營馳屯閿鄉太峪口復咨曾國藩令劉松山一軍駐陝州扼賊回竄兼顧河岸浙江提督鮑超所部霆軍亦奉

命入陝會剿

一軍得專意賴任當賊之至淮甯也宋慶駐杞唯得報疾馳以三十日抵淮甯之萬寨遇賊麕聚乃令劉廷蔣東才李承先率所部精銳連破賊踞十餘莊復出奇兵由陳州正南攻賊中堅立斃長髮三四百獲悍目蕭振強雲炳徐有桂等賊敗西趨獲賊供言賊之輜重前一夕渡沙

河盡留馬步悍黨防追擊我軍因急起追至牛家口賊衆已悉由淺處渡河宋慶渡河躡追十一月初四五日賊由上蔡正陽兩日間狂奔三百里以初六日至信陽州焚掠攻城南汝光道蒯賁孫信陽協副將尹嘉賓率衆抵禦夜縋壯勇薄賊營縱火賊驚駭相踐踏死者甚衆越日宋慶軍追至賊已折竄羅山宋慶追至羅山賊復竄光州固始截獲後賊馬成等訊得賊狀因與周盛波約以豫軍由南路淮軍由北路進夾擊之豫軍副將蔣東才叅將劉廷馳至光州東南觀音堂偵知任柱大股不遠催軍疾進賊不敢敵折向東奔找軍且追且殺至高店生擒逆首任傳張春及長髮三十餘得牲畜無數宋慶以未得及賊憤甚翼日疾馳三十餘里及任賴大股劉廷等大呼直前縱橫截擊賊擁衆回鬥我軍長槍勁旅奮勇決盪宋慶親兵復繞出賊後賊首尾不能兼顧乃潰奔追殺二十餘里斃賊五六百擒帶隊逆首李開陳瞞堂馬四典任縛盡牛洪緒等百餘斬之解散脅從三千餘賊遂竄光州南之白雀園

其竄州南王仔岡之賊爲周盛波所截殺亦甚衆大股遂入鄂境樓麻城黃岡黃陂應山至天門李鶴年檄宋慶越追因復奏言賊至天門其西南則江漢大川爲之閼隔其正北隨棗與豫省南陽所屬桐柏新野壤地相連本月初六日准提督鮑超咨言東股賊勢較緊權宜緩急移師赴楚會剿臣以現在賊勢及各路官兵會勦情形計之除湖北本省郭松林彭毓橘等軍外張樹珊周盛波周盛傳三軍計已深入楚境劉銘傳劉秉璋均自確山進兵鮑超復自隨棗壓賊之背三路兜圍南阻江漢龍山絡野賊衆已入阱中特恐滑逆慣於避兵仍復乘虛紛竄則東趨熟徑又將回駛豫疆光固信羅終屬無險可扼臣已檄宋慶於長馳直進之時尤宜兼顧後路一遇賊衆回竄急繞出其前毋令釜魚倖脫並飛催總兵張曜俟其到豫臣與通盤籌議選將添兵稍有籍手卽出省擇要駐紮居中調度復請添設水師一營黃河水師砲船自巡撫吳昌壽倡設原募水勇五百名李鶴年至豫奏調歸德鎮標兵一千

名駐守河岸合三營歸副將崔廷桂統帶至是復增募一營添造長龍
杉板船十二隻合前僱募民船統四十九隻以二十五隻配兵勇兩營
令奏調直隸知縣邵鉞守備劉洪泰統之泊汜水上下梭巡往來策應
其後屢有戰功黃河之防愈密時西賊竄華州同州朝邑東城竄鍾祥
白口爲彭毓橘郭松林所擊勢將復竄豫境李鶴年檄宋慶暫將後隊
回扼信桐交界以前隊選鋒六營馳往德安聽候湖北巡撫曾國荃節
制復令善慶馬隊移駐信羅以相援應十二月十二日李鶴年出駐許
州以練兵需餼正月初十日奏言髮捻交訌以來惟豫省之民困最深
亦惟豫省之兵力最薄民困深則流亡載道歎杼柚之旣空兵力弱則
轉徙無功慨斧斨之易缺患貧患寡遂不敢避未能遠謀之誚而不得
不存因人成事之心

朝廷命將出師始以科爾沁親王僧格林沁
之忠勇性成繼以協辦大學士兩江總督曾國藩之威望素著蠢茲小
醜尙爾稽誅近且跳梁鄂渚蔓擾秦關日長炎炎又將燎原於豫矣當

良豈竟忍於出此伏查十有餘年賊之旋繞歸陳南汝繼至習爲故常
卽其去而之他而隄楚齊秦亦必假道於豫則滅賊之機惟豫操其樞
紐而豫軍自來馬步不滿二萬揆厥所由豫軍兵饑悉仰地丁每年除
減緩留支而外歲入不過一百六七十萬漕折京餼雖逐年皆有帶欠
而報解之數總在四五十萬本省旗綠各營城防製備又須二三十
萬其撥解本省軍餼銀多不過百萬而藩庫業已一空如洗遇有偏災
水旱羅掘俱窮卽不添一兵已無士飽騰馬之效臣受恩深重洊任封
圻向在京師親見司農仰屋假使兵不議添而賊終可滅臣亦何敢稍
事虛靡惟豫軍現有兵力以防本境猶不足何論出境以當一股猶不
敷何論兩股萬一賊蹤麇集援師未至我武不揚潰敗決裂何堪設想
且長河一線南北大局所關儻該逆故智復萌又豈眼前兵力所能兼
顧臣與藩司卞寶第等再四籌商僉謂以豫省現在解京之欸亦猶梯

米之於太倉如留爲本省增募之資則步隊可添萬人防勦均有裨益
秉承 謨訓仰賴 天威加以各省援軍同心協力果令寇氛速

殄以後夫耕婦織絲粒皆入

天儲一歲正供可敵二歲省嗇於前

必且取盈於後所幸

聖明在上臣子無不可披瀝之隱衷饋饌既

充天下無不可削平之劇寇是以不避

斧鉞干冒

尊嚴伏乞

皇上俯念豫省軍事日棘非添兵不足以勦賊非增饌不足以添
兵准將前後奉撥京協各饌及歷屆漕折暫緩一年留爲本省添隊練
兵之用詞意懇切 上俞所請於是賊擾襄陽之峪山黃龍壩劉銘

傳鮑超兩軍追擊超大敗賊於楊家蜂拖船埠永樂河諸處逆首任懷

邦受傷遁諜言賊近唐縣李鶴年因葉舞空虛無兵可調乃令蔣希夷

率親兵四營駐葉縣而令馬德昭所部屯許州復檄善慶馬隊往信陽

與宋慶會合二十一日宋慶軍遇賊於唐縣之谷岡擒亭擒三十餘二
十二日大股駛至桐柏縣之平氏鎮馬步數十仗排列二十餘里我軍

道及以檉錫槓馬隊前進槍砲間以長矛鏑前鋒悍賊四五百擒管帶
外五營擒首王鳳池張周王卯劉平青秦中游魯楨張用石中張成九
等百餘賊乃南趨固縣鎮小林店中陽臺入信陽州境二十四日賊於
州北五紀屯諸處縱火適善慶馬隊馳至因於州城北面樹木蒙雜處
布列旌旗而令馬隊馳騁煙塵蔽空賊驚見我軍不知虛實退回五紀
屯善慶與南汝光道前具謀言官兵馬隊不及千人又無步隊相輔
難以力鬥而賊勢甚銳不挫其鋒必且擾及城關爲害愈大乃以是夜
令所部馬勇改爲步隊銜枚疾行直入賊館雷呼擊殺所部騎兵齊列
莊外施槍炮壯聲勢城上然大砲文武官紳率團協應賊驚覺拋戈棄
械裸體狂奔自相蹂踐死者無算騎兵乘勢追殺賊乃敗向長臺關又
折向明港驛陡溝宋慶由平氏兼程追至洋河賊又向羅山之五里店
仙花鎮諸處善慶將東才各隊均至羅山與宋慶會合賊遂由光山縣
屬之白雀園潑陂河復竄入楚省黃安縣境賊之由湖陽竄豫本意自

鄧浙西趨出荆子關循商洛入秦與張逆股合疊爲諸軍所挫始折而東走復向東而北由北而南旬日間輾轉奔馳千有餘里二月湖廣總督李鴻章進駐周家口代曾國藩督諸軍會剿曾國藩回兩江任督籌兵饒李鶴年自許州馳與李鴻章會議軍事以善慶馬隊助劉銘傳軍其後贛榆之役擒首任柱爲善慶槍斃賴逆燔焉卒就衰滅張曜至自浙遂添募十五營名其軍曰嵩武宋慶所部亦酌增隊伍於是豫省始有大枝勁旅保英駐閩一軍爲張曜舊部因令馬德昭所部前往換防以張總愚句結逆復擾同朝意將槍渡復令馬德昭赴援晉省駐河東爲之備賴任股由孝感應山雲夢京山踞擾鍾祥之白口圖槍渡襄河聞霆軍移屯安陸復折趨京山天門漢川雲夢諸處潛冒官兵闖入信陽州屬之黃土岡雙和寨宋慶自桐柏回勦直隸提督劉銘傳方至桐柏之游河店亦回軍與宋慶謀以銘軍勦東雙合柳林之賊宋軍由游河之南進青石橋勦駱駝嶺之賊計定賊聞我軍進兵卽東南遁適

是月盛傳是盛波兩軍爲所擊敗本意出平靖關以劉秉璋李昭慶兩軍抵小河溪因旋竄應山孝感四月初旬事也李鶴年以秋讞回省事竣復至許州時西賊爲山西臬司陳湜浙軍所敗遁去馬德昭復還閬鄉方馬德昭赴晉李鶴年令直隸候補道段廣瀛率精銳四營往代至是遂併留防西路東賊出沒於豫之羅山楚之黃安其至黃安紫屏鋪爲劉銘傳軍所敗其至陡山爲李昭慶軍所敗宋慶回扼信陽賊遂以四月二十三日竄入新野越三日鄧鎮交界皆有賊馬宋慶自信陽一日夜疾馳二百餘里及之於張村潦河騎賊來嘗吾軍守備姜桂題擊敗之翼日黎明宋慶姜桂題率馬隊繞由鎮平迎截自與候選道裘德俊親率各隊進至侯集方辱食賊至毀竈前進劉廷蔣東才李承先列隊迎敵裘德俊督率築營賊見我軍營壘成乃南去宋慶逐之任柱親率死黨回拒我軍奮擊敗之擒斬悍目石老萬梅佳玉郭所吳賴子路永倡陳家明陳尙達七四虎等賊竄南陽之瓦店泌陽之羊册周盛波

軍自楚至院迎擊敗賊於福灣五月初二日賊犯裕州宋慶以賊行甚疾令各營輕騎急追及之於裕州東北十餘里蔣東才鎗斃執旗賊目陣斬逆目戴刁孫友高同心王化徐廣元等三百餘歷葉縣襄城近徧許州時嵩武軍已成駐八里橋初四日午刻騎賊蜂擁至李鶴年率張曜新軍各隊於橋南二里許嚴陣待賊遙見大纛急退我軍追殺至潁橋石固驛諸處擒其悍目林慶禧胡幅禧李貴如李順子等皆斬之是日大風揚塵陰霾晝晦嵩武新軍及鋒始試列陣嚴整士百其勇州民於城上皆額手忭躍以爲十餘年來未見如此之軍容也越日宋慶軍追至賊遂竄中牟鄭州知水師添設礮船不敢犯由洧川尉氏竄朱仙鎮邊馬駛及省城七八里大隄內外藩司卡寶第等督率文武嬰城固守賊乃由陳留通許杞縣睢州蘭儀考城疾竄山東曹縣境賊衆日輒馳二三百里饑足俱腫潰宋慶軍亦以疾追疲乏與張曜新軍均暫駐蘭考備賊回竄會劉銘傳軍至睢州李鴻章移宋郡因會籌扼守陷賊

之法其議以黃河舊隄東至江南徐州境四百餘里分段駐兵屯守與東省運防相峙使賊不得他竄合力兜圍其蘭儀東壩頭至曹縣王敞集一百五十里爲豫軍汎地張曜宋慶兩軍追賊出境卽就此地駐守方布置營濠賊已由戴家廟沈家河諸處竄過運河擾汶上曲阜直趨泰安有窺伺濟南暨東三府之說劉銘傳潘鼎新軍先後拔赴濟甯李鶴年因奏言運東平衍四達無險可扼齊河濱臨黃河毘連畿輔旣恐恣意奔突蹂躪完區復慮乘隙搶渡震驚北路李鴻章統籌全局必有制勝之方而賊衆路歧非厚集兵力不足痛挫凶鋒臣不敢存畛域之見宋慶一軍雖追賊疲乏而勇往善戰且極與淮軍聯絡應令出境助勦以期共殄寇氛於是令張曜暫駐蘭考宋慶赴東省會合勦擊於是賊竄萊陽膠州李鴻章自歸德移駐濟甯與李鶴年書略曰賊成流寇須驅之於必困之途取之於垂死之日會師合勦方爲上策山東青州迤東爲登萊地處海隅正可乘勢逼圍制賊使之不得再出擬以膠萊

爲裏圈運河爲外圈合東淮皖豫四省兵力共圖聚殲自汶上開河至
申口百五十里調派宋慶張曜兩軍分段扼守並令於運河西岸紮營
留住東牆分人巡哨俟有替防之隊再派宋慶一軍助剿李鶴年深然
之因令張宋兩軍並赴東省復移書湖北巡撫曾國荃由鄂分撥一軍
移屯荆子關防西賊回竄六月初八日宋慶張曜抵安山李鴻章復議
以運防百五十里地段較長添派涼州鎮總兵周盛波一軍屯開河至
靳口四十里豫軍自靳口接防至沈家口八十里按四里一營計之二
十營足敷分布令宋慶趕築長牆留副將蔣東才四營叅將李承先二
營統歸張曜督率防守宋慶自率十二營馳赴膠萊與劉銘傳軍會合
進剿七月初三日宋慶抵膠萊防所與劉銘傳商扼守新河楊家園三
十五里分兵布守賊之前股在卽墨城東馬山以下後股尙踞蘭中水
屯村距金口二十餘里邊馬時於沿河游駛意圖突圍張曜以沈家口
運黃交匯之處河汊寬廣陸營難以周顧請調黃河水師入運助守李

鶴年從之十六日五鼓任賴大股數萬自卽墨勞山裹糧疾馳猛衝我軍千總程允和所守地段程允和傳令牆丁點放鎗礮賊不稍卻直抵牆下程允和所部僅三百人矛石並舉奮力鏖戰正相持間鄰段游擊蔣尙鈞於所部三百人中以二百守牆親率百人繞出牆外潛襲賊後賈勇齊進奮呼殺賊賊衆不辨多寡前後受敵兼以河牆逼近賊馬不能馳驟遂大敗蔣尙鈞程允和乘勢追殺擒趙深王羅等斃者以千計餘匪繞東急遁二十日遂於他軍防段海神廟地方突過膠河宋慶聞報率隊躡追沿途秋雨泥淖賊遂竄江南境之贛榆李鴻章以運防緊要檄宋慶回駐原派地設會合張曜所部防守賊竄海沐邳宿間爲淮軍所敗復由臺莊竄鄒滕嶧諸縣境至濟寧州涉泗水至汶上東平將於戴廟女山豫軍防所突竄宋慶等嚴飭各營憑牆力禦密令營官姜桂題桂錫楨各率馬勇由東平進勦九月二十二日姜桂題等至汶河值馬賊半渡邀擊之賊衆大敗遂不敢復窺運河由泰安沂水穆陵廟

竄長山章邱鄒山臨朐東趨青州十月十九日劉銘傳會合豫軍善慶
馬隊連敗賊於安邱毀賊壘二十餘擒斬不勝計二十四日至贛榆城
下是日大霧善慶與劉銘傳分路迎擊賊衝我軍善慶親放洋鎗轟斃
逆首任柱餘賊負屍狂竄我軍乘勢追殺復斃數千賊勢遂不能復振
矣任柱者凶悍善戰賴賊倚之由是賴賊勢孤黨渙復爲劉銘傳善慶
軍連敗於壽光諸處伏屍各數萬賴汶沅率死黨百餘竄江南至揚州
從者止十數人皆薙髮易裝僞爲商賈將遁海上以十二月十二日爲
華軍道員吳毓蘭部所獲送曾國藩營斬首賴任之股遂滅

皖匪二十三

初夏秋之間李鶴年自許州移軍杞縣復因直隸梟匪蠢動回省布置
北防兼顧西路時

欽差大臣陝甘總督左宗棠率師由潼關進剿

甘肅臬司劉典取道商雒入秦湖北巡撫曾國荃檄提督姜玉順以所
部扼紫荊子關西賊張總愚由尹家衛一帶復擾近華州李鶴年檄馬
德昭段廣瀛分駐閿鄉縣境之晉溝與姜玉順聯絡聲勢賊遂急趨北
向竄陷綏德分擾米脂以十一月二十二日由龍王辿乘河冰凍合猛
撲渡黃至山西省之吉州鄉甯諸處平蒲並警李鶴年奉檄馬德昭一
軍渡河出境援守運城急調張曜宋慶兩軍回豫而賊已由絳州曲沃
垣曲山僻小路竄近豫疆以十二月初九日過邵原關至濟源縣其時
河北鎮總兵楊長春駐臨漳防梟匪因檄叅將田慶和玉壽率隊馳往
堵禦復飛調駐臨漳之楊長春駐晉溝之段廣瀛駐山西運城之馬德
昭各回軍會勦水師總兵崔廷桂渡河協助賊自十三日至二十三日

紛擾河內武陟溫孟諸境水師統帶知縣邵鉞遇賊於溫縣擊之獲勝
田慶和等軍各有斬擒 上命宋慶一軍與秦晉之師前後夾擊以

張曜一軍專防河北與宋慶爲援從吏部侍郎毛昶熙奏也於是宋張
兩軍分道疾馳回豫二十四五等日賊至獲嘉輝縣新鄉原武各境時
秦晉躡追之師則有廣東陸路提督劉松山安徽壽春鎮總兵郭寶昌
其自運防移剿之淮軍則有湖廣總督李鴻章親督直隸提督劉銘傳
杭州副都統善慶都統溫德勒克西自運防移剿之皖軍則有總兵程
文炳自陝西移繞直境進剿之師則有陝甘總督左宗棠親督各軍直
隸備禦之師則有大學士署直隸總督官文親督各軍及都統春壽頭
等侍衛陳國瑞所部天津備禦之師則有三口通商大臣崇厚所派洋
槍隊及天津練勇官文李鴻章李鶴年並以督催迂還鴻章 交部
嚴加議處官文從寬免議 中旨嚴飭各路援師皆奮勇疾進宋慶
張曜兩軍晝夜兼程衝冒風雪以二十八日馳至衛輝偵知賊已由滑

縣淇縣境內北馳三十日追及於湯陰縣屬之宜清縣宋慶張暉及進
員裘德俊整隊進勦多所俘獲三鼓始抵城下七年正月初一日連踏
賊踞村莊二十餘所逆首張總愚糾合全股抗拒賊馬數千由兩哨包
鈔我軍奮擊先敗其步賊馬賊勢亦不支乃東遁是日也戰甚力叅將
李永芳奉 旨以副將用守備馬玉崑給勇號千總徐效孟唐廣興

程允和並以守備用與馬玉崑均

賞戴花翎初二日李鶴年奏以

署糧道尹耕雲及所部文武員弁出省督勦請

敕李鴻章節制援

軍且言制流寇之法無過堅壁清野請

飭下直隸總督順天府尹

遴委循良牧令公正紳耆實力舉辦蓋斯時賊盡易步爲騎一日夜奔
馳二三百里官軍不能繞扼所以爲慮者深遠也初八日李鶴年至彰
德撥本標一營回顧省防檄水師炮勇撤回汜水孟津各口而令崔廷
桂鎮封邱延津哨巡後路楊長春以所部駐衛輝時賊已由臨洺關擾
順德張宋兩軍追之因悉調馬德昭段廣瀛隊赴彰德初因侍郎毛昶

熙奏得

旨令宋慶張曜分道入晉繞顧畿甸及賊竄懷慶機事猝

變兩軍偵賊所在擊勦賊行詭疾遂成尾追

上諭以責李鶴年令

據實覆奏並咎官文左宗棠李鴻章等於時各統兵大員皆一再被


嚴旨益激勵將士進剿安徽巡撫英翰山東巡撫丁寶楨皆各率兵
赴援於是李鶴年進至磁州張曜等追賊至廣平一捷賊遂由順德雞
澤平鄉鉅鹿隆平避兵疾蹙我軍於堅冰沍雪中馳逐手足皆皸坼恐
其北犯震京師急由新河一帶繞越前進以二月初三日至河間府之
臥碑集初四日至獻縣破賊踞莊劉松山郭寶昌軍亦至因合擊賊南
遁阻於滹沱遂沿河東竄初十日及之於深州偵知逆首張總愚踞錢
莊因以夜四鼓襲擊鏖老捻千餘奪贏馬旗械無數總愚率其死黨北
竄十三日及之於清苑縣之張登高碑店諸處復斬獲數百十五日至
深澤宋慶張曜等密約以三更逼賊所踞西華集毀卡猝進連破數莊
復蹙之於饒陽總愚姪張五孩五孩極凶狡張逆倚之猶賴逆之有

任柱也由是賊氣奪遂西駛李鶴年恐其由大名回竄磁州下隰沮洳
非用兵地且處漳河北岸無險可扼因復回本境布置漳防令馬德昭
軍分屯內黃之楚旺安陽之豐樂鎮於是賊阻漳沱仍圖北犯張曜宋
慶等追至大冉賊率衆橫拒擊斬甚多時二十六日也二十七日晨大
霧賊以全股北趨宋慶等軍緊躡晝夜時有斬擒三月初二日賊回竄
滑縣所屬之屯子街初三日黎明馬德昭進軍疾擊敗之於羊觜頭李
家莊及新鎮河西初四日復敗之於汲縣初六日張曜由輝縣雲門馳
至修武之恩村適賊黨由清化斫竹回騶驪遇我軍斬擒殆盡是日宋
慶亦由獲嘉取道至修武之待王集其地瀕近衛河正值馬德昭所部
與賊相持宋慶督軍縱擊賊卽潰奔我軍前隊渡河搶占賊莊賊見過
渡人數不多糾悍黨死拒我軍屢勝銳氣百倍酣戰兩時大隊悉至賊
隊大敗是夕張曜軍亦來會初七日黎明同渡衛河行十餘里突見賊
隊紛列揚塵袒衣意決死鬥時馬德昭隊亦至因共擊之鎗砲如雨陣

斃千餘解散數千我軍亦有傷亡時皖軍總兵牛師韓道員方長華率隊至修武迤南之三十里日薄暮忽見數十萬騎駛近呼投誠牛師韓識其詐陽許之密設伏於要隘方長華隊在衛河南岸馬德昭亦於西南遙應須臾逆衆果蜂擁至牛師韓揮軍力戰號召伏兵三路齊進方長華從後突起來擊賊遂敗竄初七日復有賊馬數百犯皖營爲營官牛允成劉廷兆擊退賊乃竄延津張曜宋慶追至賊大股折回排牆而進張曜親率總兵程之偉叅將李永芳短兵接鬥踰時賊衆負創不退適宋慶所部副將李承先從右哨騁出因陷陣突擊賊始潰敗我軍追殺二十里騎賊李全義等來降因盡得賊情十二日追至滑縣張曜軍次吳村宋慶次悅家莊賊大股於數里外南北列拒領隊悍賊皆下馬執旗犯陣餘衆鼓譟而前宋慶所部正當賊鋒副將蔣東才躍馬入賊陣連殺執旗賊目各隊繼之賊勢挫會馬德昭軍踵至與張曜由南直鈔賊後賊乃大敗斬獲甚多降者益衆十三日追及又敗之時賊掠封

邱一帶者爲劉松山郭寶昌程文炳諸軍所敗郭寶昌於陣間見張總
愚策馬直前將手執之遇伏起受傷十四日賊由衛輝東竄旋折北東
將襲奪我輜重張曜等回擊敗之十七日復戰於封邱步賊皆騎馬遁
十八日至延津之石坡堦宋慶張曜分東西兩路包剿營官胡金安楊
壽山首奮入各營繼之戰復勝是日賊黨分掠魏邱集蔣村馬德昭率
所部及已革叅將王永慶飛虎隊乘賊不備直擣踞巢深入爲賊所困
營官田宗勝謝聯陞等率勇決鬥三時之久賊始遁守備李惠恩死之
劉松山程文炳亦以是日敗賊於延津境賊遂由滑濬東北馳李鴻章
營提督陳振邦副將劉正同都司魯朝斌守備高峻嶺均戰歿奏入與
李惠恩同議卹四月李鶴年移駐湯陰復移駐滑縣賊竄天津被勦回
颺復竄山東將越運河西循熟徑歸懷二十四日以後由博平東昌在
平清平諸境四向紛掠遇官兵截擊復由德州恩縣駛至博平在平仍
圖犯運河李鴻章方進駐臨清與李豫年議困賊於黃河北運河東徵

各省兵臨河而壘以馬軍守東昌而以淮豫諸軍之尤健者當賊凡三月壘成賊求出不得各軍戰屢捷賊勢日蹙降者接踵六月十二日復戰於玉林鎮其地在徒駭黃運河之間會大雨漲張曜宋慶誘賊入河套合擊之自旦至暮短兵相接賊人馬相踐踏騎者或登屋壁困不得出趨者復陷泥淖中於是死者萬餘殘衆就淺水處壘屍爲梁竄去自是張逆不復能軍矣諸軍復疊敗之總愚挈其漏刃之衆尙思狡脫而東光南皮濟陽武定等處黃運交溢均無竄路遂一意西南圖犯東昌決運防張曜等晝夜躡勦不容喘息所至又爲防運各軍擊退賊遂復竄東北六月二十八日五鼓張曜等各率所部由荏平西南揮軍突擊擒斬無算降衆紛紛倒戈賊愈孤疾駛北向復爲劉銘傳郭松林善慶溫德勒克西馬步大隊邀截張曜宋慶潘鼎新諸軍四面合擊賊瓦解張總愚屢自殺不殊遂自沈於河張午股滅皖匪之局遂結於是諸軍奏凱奉 旨加各統兵大員及在事文武爵賞有差



784181